

A. Mon. 144

Ad Conventu Monasterio
D. C. S. Aug²ij.
j 7 3 j.

287-




<36613520450013



<36613520450013

Bayer. Staatsbibliothek



I D E A
ORDINIS
Hierarchico-Benedictini,

Sive,

B R E V I S
DELINEATIO,

Exhibens

Principatum, Clericatum, Scien-
tiam, A&ionem & Antiquitatem

ORDINIS
S.P.BENEDICTI:


R Dissertationibus Juridico-Hi-
storicis Illustrata.

A

P. FELICE EGGER,

Ejusdem Ord. in Imperiali Monasterio
Petrhusiano professo, SS. Theol. & Sac. Can,
Licentiato, ejusdemque SS. Theol.
quondam professore &c. &c.

Cum Licentia Superiorum.


Friburgi Brisgoiæ, typis Jacobi Handler, 1715


Veritas vincat, necesse est, five
negantem, five confitentem.
S. Augustin.

Respondendum denique, ne
jam non reverentiæ, sed
diffidentiæ esse incipiat,
quod tacemus, & dum cri-
minationes falsas contemnimus, vi-
deamur crimen agnoscere. *Cypr. init.
libri contra Demetr.*

Sed quid faciam? Veritas os re-
ferat, & invitam linguam conscium
ad eloquendum pectus impellit. Ve-
rum enim invenire volumus, non tan-
quam Adversarium aliquem convin-
cere. *S. Hieron. advers. Lucifer, c. 7.*



ANGELO PACIS.



Mabilissime AN-
GELE! TIBI, nec
alteri, hæc folia ;
TE unicè spiran-
tia, ambientia &
deposcentia. Ah! quàm neg-
lectus hucusque jacebas ! totâ
Eûropâ in exitiale, non inter
profanos modò Principes, sed
Ecclesiasticos etiam Præfules,
bustum subsidente. TU per-
cepisti hætenus clarissimarum
) (2 urbium

D E D I C A T I O.

urbium tuas in aures illabentes ejulatus ; tuis sub aspectibus Heroum sanguis tepuit , natavitque laniena tot civium ; sensisti profundo cum dolore matronarum illudia , Virginum dehonorationem , sacrorum despiciatum. At postliminò redux tandem , olivam Pacis lætus reportasti , cum jussu : *cessa Miles !*

In ipsis præterea Sanctuarijs , ubi frater insurgit in fratrem quanta tui oblivio ! Hic stringit calamum , ille acuit stylum , iste obtestatur fidem Judicum , alter falsum producit testimonium : omnes quæ sua , non quæ TUA sunt quærunt , corruptis omnium ferè judicio.
rum

DEDICATIO.

rum subsellijs: in quibus *perijt*,
qui non fallit: (a)

Hoc unum nobis non modico sit solatio, quod tui amore dimidiam juris nostri portionem cedere, parati fuerimus. Sed pervicit tua repagula litigandi libido. At, quo demum fructu & lucro? Fraternæ charitatis dissolutione; vicinitatis amicæ convulsione; hostium, qui ex adverso sunt, plausu & cachinnatione; crumenæ tandem bene nummatæ evacuatione: *Potuisset unguentum hoc dari pauperibus; exultantibus Pacis Angelis, non amarè flentibus.*

Sed hæc humanæ sortis calamitas

(a) Sfondr. in Præfat. ad Reg. Sacerdot.

DEDICATIO.

mitas à Mundi incunabulis ex-
titit, ut fraterna statim æmula-
tione, cæde ac cruore conta-
minaretur.

TU verò, ANGELE PA-
CIS amantissime! nosti quàm
optimè, quo animo hæc folia
sint exarata; ut con fractis ac
positis armorum, inutiliter pug-
nantium, spiculis, & tu in San-
ctuaria tandem gratus admitta-
ris, quando jam Cæsarum, Re-
gúmque palatia non invisus subij-
sti; ut oliva tua in choro pariter
vireat, & floreat, quando in foro
jam viget; ut frater fratri dex-
tram porrigat, quando hostes
mutuos ruunt in amplexus.

Pia secundet vota Numen ter
maximum, & TE, tuámque
oleam æternare ubique faciat.



Approbationes Universitatis Colonienfis &c.

Prima.

QUod si crudelem Jura eum, qui famam pari cum vita passu ambulantiem negligit, palam proclament: justo profecto titulô ad inclyti Ordinis S. Benedicti *Principatum, Clericatum, Scientiam, Actionem & Antiquitatem* generosè ac gloriosè tuendam provocatus calamum strinxit Admodum Reverendus & Clariss. Dominus ac Pater Felix Egger præfatæ familiæ sacrae in Abbatia Petrohusana Professus, SS. Theologiæ LICENTIATUS ac ad Divum Trudpertum ejusdem Lector in *Idea Ordinis Hierarchico-Benedictini* ab ipso admodùm feliciter conscripta; quam cum studiosè perlegerem, tam modestè enucleatam offendi, ut nequidem irritantis, & ad respondendum provocantis minus circumspecti Adversarij nomen in ea expresserit; minùs ullum ei aculeum infixerit; tam solidè, ut omnia Antagonistæ sui tela absque vulnere eliserit; tam eruditè, ut brevitate perspicuâ Ordinis sui prærogativas, antiquitatem,

tem, & præcellentem in Ecclesia Dei statum
nervosè descripserit; tam denique *religiosè*, ut
nullam fidei, aut bonorum morum lauriam
imbibat. Quare, me Judice, Idea hæc me-
retur, ut accedente, quorum interest, ap-
probatione, præli beneficio lucem aspiciat.
Dabam Colonia Aggrippinæ Anno reparatæ
Salutis M. DCC. III. die decima quarta Mensis
Octobris.

Joannes Forsbach in alma Universit.
Colonienſi SS. Theol. Doctor, Sub-
senior, Publicus & Ordinarius
Professor, prædictæ Universit. p. t.
Rector.

Secunda.

E Nimverò lucem meretur publicam Libel-
lus, in quo, tãquam in IDEA, Au-
thor Admodum Reverendus & Clariss.
Pater Felix Egger celeberrimæ Abbatia Petro-
husanæ Professor, SS. Thlgia. LICENTIA-
TUS, & ejusdem in Monasterio ad S. Trud-
pertum Lector, sacri sui *Hierarchico Benedictini*
Ordinis Principatum, Clericatum, Scientiam,
Actionem & Antiquitatem tam modestè, clarè &
solidè exhibet, ut non offendat. Quod ita-
que meretur, præli beneficio consequatur:
Quò lucem afferat omnibus, non tantum,
qui in Domo, id est, inclyta Benedictinâ
Familiâ sunt, sed toti Christiano Orbi. Ita
censeo

censeo Coloniae Ubiorum 25. Novembriæ
Anno 1703.

Cornelius Brewer SS. Theol. in alma
Universitate Coloniensi Doctor, Or-
dinarius & publicus Professor,
Collegiatæ Ecclesiæ ad S. Severi-
num Canonicus Capitularis &
Chori-Episcopus, nec non Pa-
rochialis ibidem Pastor, per Civi-
tatem & Archi-Dioccesin Coloni-
ensem Censor Librorum Ordinarius.

Tertia.

Libellus hic, cui titulus: Idea Ordinis
Hierarchico-Benedictini, ingeniosè &
artificiosè ab Admodùm Rev. ac Clariss.
Domino Patre Felice Egger ejusdem sacri Or-
dinis, ac celeberrimi Monasterij Petershusani
Professo elaborata, sic contra quoscunque de-
fendit pervetusta Ordinis sui Privilegia, Præ-
cedentias, Prærogativas &c. ut meritò omni-
bus totius sacrae Benedictinae Religionis Reli-
giosis. non ut Idea solùm, sed & velut verum
ac genuinum Prototypon singulis per publi-
cam typi divulgationem Urbi & Orbi offera-
tur & afferatur. Unde censeo, justum &
æquum esse, ut prælo mandetur. Coloniae
ad Rhenum in Conventu Sanctæ Crucis Ord.
Præd. die 25. Septem. Anno 1703.

Fr. Albertus Grünewald Ord. Præd.
in Universitate Colon. SS. Theol.
Doctor & Professor Ordinarius.

Quarta.

Idea Ordinis Hierarchico-Benedictini suis coloribus pro celeberrimi Ordinis decore est ita aptè delineata, ut excellentia pulchritudinis suæ omnium oculis gratiosa videatur & amabilis. Proinde dignissima iudicatur, quæ, mediante prælo, publico Fidelium conspectui fructuosè proponatur. Datum Coloniae in Conventu S. Crucis Ordinis Prædicat. Anno 1703. die 25. Septembris.

Fr. Petrus Dietinger Ord. Prædicat.
SS. Theol. Doctor & Professor Ordinarius.

Quinta.

Ego infra scriptus legi librum, cui titulus: *Idea Ordinis Hierarchico-Benedictini &c. Dissertationibus luridico-Historicis illustrata à P. Felice Egger, ejusdem Ordinis &c.* In quo nihil inveni contra fidem vel bonos mores. Et licet tractet materiam alioqui invidiosam, de præcedentia sui Ordinis ante aliquos Canonicos Regulares, tamen cum id faciat satis modestè, nec improbari possit, si quis rationes suas proponat, paratus stare iudicio ac determinatione Superiorum; iudico librum publicâ luce dignum, præsertim cum multa alia habeat valde digna lectu pro notitia & iusta commendatione laudatissimi Ordinis S. Benedicti. Coloniae 18. April. 1707.


Claudius la Croix Societatis Jesu, in
Universitate Coloniensi SS. Theol.
Doctor & Professor publicus.

APPROBATIO

Anglo-Benedictina.

Libellum, cui præfigitur titulus: *Idea Ordinis Hierarchico-Benedictini &c.* ab Adm. Rev. P. & clarissimo Domino Felice Egger ejusdem Ordinis, in Imperiali Monasterio Petro husiano Professo, SS. Theologiæ Licentiatò & Professore doctè & feliciter conscriptum, attentè & studiosè perlegi. In eo eruditissimus Author antiqua sacri Ordinis nostri Benedictini privilegia, variâsque ejusdem prærogativas clarè demonstrat, solidèque defendit, & Christianæ charitatis, ac religiosæ modestiæ memor, cujusdam Antagonistæ (suppresso nomine) tela, absque ullis verborum aculeis dextrè, nervosèque elidit & retorquet. Nihil in eo reperi, quod honestatem morum aut Orthodoxæ fidei puritatem lædit; multa verò, quæ eruditionem Authoris monstrant, & pietatem spirant. Quapropter justum esse & æquissimum censeo, ut, mediante prælo, lucem aspiciat. Dabam in Monasterio Sanctorum Mart. Adriani & Dionisij, vulgò Lamspring, die 24. Febr. Ann. Dom. 1706.

F. Joannes Townson, Congregationis Anglo-Benedictinæ Professus, SS. Theol. Doct. & Prothonotarius Apostolicus.



EVOLUTIO EMBLEMATIS:

S E U ,
FRONTISPICIJ
EXPLICATIO.



E in ipsa statim fronte
Lectori imponere , aut
imperitorum oculis illu-
dere videamur , totius
Emblematis [quod Fron-
tispicij , ut vocant , serviat loco] ra-
tionem pauculis hîc declarare placet.

En ! ût sanctiss. BENEDICTUS,
curru triumphali sublimis , grandævi-
senis speciem referens , vario symbolo-
rum , ac Lematum apparatu , comi-
cantiumque frequentia cinctus , pro-
vehitur !

Sedet

*Sedet beatissimus Pater, cum Lemate :
Et Antiquus dierum sedit. Dan. 7. ut in-
telligas, senectam venerabilem, post de-
victos Amulorum insultus, dignam
omnino quiete, ac glorioso merito-
rum, honorisque vehiculo.*

*Utrumque cingunt, ac circumvo-
lant latus duo genij, tubâ canentes,
cum Lemate : pro Ecclesia, & Imperio.
Et hi quid innuunt, nisi sanctissimum
PATREM, ejusque Filios in Ecclesiæ, ac
totius Orbis, Romani maximè Imperij,
obsequium ab ipsis incunabulis desti-
natos?*

*Currum dirigit sacra RELIGIO ;
cum Lemate : Religio Hierarchica. Ut
demonstretur, in Religione Benedicti-
nâ universa reperiri constitutiva, quæ
ad Ordinem verè Hierarchicum requirun-
tur, id, quod plenius adhuc exprimit
quinaris Leonum, currum trahen-
tium, numerus ; quorum primus exhi-
bet sacrum Principatum cum Lemate :
Confortatus est Principatus eorum. Psal. 138.
Secundus, sacrum Ordinem, seu Clerica-
tum, cum Lemate : Inter medios Clero.
Psal.*

Psal. 67. Tertiū , Scientiam , cum Lemate : Dedit illi Scientiam Sanctorum. Sap. 10. Quartus Actionem , cum Lemate : Spiritu Dei aguntur. ad Rom. 8. Quintus denique , Antiquitatem , cum Lemante : In Senectute uberi. Psal. 91.

At quorsum Genij habitum Benedictinum , in aëre pendulum , versus Cherubinū explicantes ? ut pretium ejus agnoscas , & sanctitatem , quando per sex alas tam venustè cum habitu Cherubico symbo'izat , teste Bonifacio IV. Nec in minori reponas loco ipsum adeo ABBATIS titulum , quem cum Christo communem habent Benedictinæ Familiæ Præsides.

Sacro porro Ordine , ac regalis Sacerdotij caractere suos Alumnos donat , ac insignit ipse certè sanctissimus BENEDICTUS , quando eosdem illis verbis : Vos Sacerdotes Domini vocabimini : Isa. 61. compellat , & in ipsa sua Regula Sacerdotio eos initiari , jubet.

Hos ipsos verò cum ipso sanctissimo PATRE divinitus fuisse ad Prædicationis munus destinatos , innuit cœlestis Genij

nus, sacram offerens *stolam*; ac *librum Evangelij*, cum Lemate: *Euntes prædicate. Matth. 10.*

Curru adstant gemini Ephœbi: quorum unus *gladium* offert & *Mundi globum*, cum Lemate: *Constitues eos Principes etc. Psal. 44.* insinuando: Benedictinos subinde Alumnos, inter ipsos etiam populi Principes collocandos. Alter *doctoralia* exhibendo *Insignia*, docet: Eosdem, scientiâ tam sacrâ, quam profanâ illustres, exemplo ipsius Sanctiss. **BENEDICTI**, magno Ecclesiæ bono, *Juventutem* semper instruxisse, & etiamnum instruere: neque eos Doctorum *Insignia*, ac docendi munia [ut nonnulli, livore perciti, perperam existimant] dedecere.

In Genio denique, super sanctiss. **PATREM** *Insigne* ipsius Gentilitium tenente, intelligas: universa virtutum, ac gloriæ decora, quæ in alijs cernuntur dispersa, in uno **BENEDICTO** reperiri unita.

En, Amice! genuinam Benedictini Instituti, quam exhibemus, *Ideam*: non

intempestivo [oculus novit omniscius]
jactantiæ Zelo incitati ; sed necessitate
ab Adversario eò compulsi, ut convitia
ac scommata , quæ in sacrum Ordinem
nostrum proterve congeffit , una velut
lineâ , ac primo statim obtutu deleantur
& abstergantur.



ANIM-



ANIMADVERSIO

In Adversarij Præfationem.

Perpendenti mihi , & accuratiùs
examinanti Adversarij illam ,
quam Commentario suo præfi-
xit , Præfationem , opportunè
succurrit illud Eminentissimi Sfondrati
nostri , de Ludovico Maiburgo crebrò
conquerentis : *quod nemo veritatem pulchrio-
ribus verbis , ac singulis fere paginis professus
sit , nemo fœdârit turpioribus factis.* [a] Pro-
fitetur ille [noster Adversarius] se Cara-
muelem & Alvisetum admodùm religiosè
tractare , solas ipsorum rationes , non verò
personas reprobando , nisi ubi vel necessitas ,
vel discretus Zelus acerbiozem exegerit sty-
lum &c.

Alterius porro Antagonistæ sui Msta.
infectando , jactat , *eum lixivio nonnihil*
b acer-

(a) Sfondrat. in præ lud. Gallicis Vindic.

acerbiorē se abstergere, ab omnibus tamen calumnijs & famæ detritiōibus alienissimum, modestiæ religiosæ nunquam immemorem.

Larga profectò, & venustissima promissa, quæ tamen in ipsa hac sua præfatione, suimet oblitus, pessimè corripit, hunc ipsum suum Antagonistam, Scriptorem, veluti hodiernum è terra proruberantem fungum, ac scurram &c. Vocitando; Caramuelem verò & Alvifectum in ipso Commentarij sui decursu [ut constabit] indignissimis modis tractando; In ipsum denique habitum ac statum Monasticum, nomenque ac dignitatem Abbatis sæviendo. Unde palam prodidit, quo animo in arenam descenderit, passionibus nempe, & vehementibus quidem, imbuto. *Passiones autem* [inquit ante citatus purpuratus San-Gallensium Princeps] *tincturæ quædam sunt, quas si animus semel imbibat, ægrè alium colorem admittet, rationis libram in unam partem præcipitant, multisque modis veritatem excludunt. Veritas placidum animum requirit, quod ratione & auctoritate probatur.* [a]

(a) Sfond. in Regal. Sacerd. prælud. §. 2.

Verùm , tantò securiùs hæc justæ defen-
sionis tela in *Adversarium* se contorquere ,
glorietur Antagonista hic noster , quod
id agat cum sapientissimo scuto trium cele-
berrimarum *Universitatum Germaniæ* , quæ
totum suum *Commentarium NB.* impariale
erga eum calculo comprobarint.

Discutiamus paulisper , & ad incu-
dem revocemus vel unius saltem (*Co-*
loniæ videlicet *Universitatis*) scu-
tum , tentando ac pulsando , num ex
ære , auro , an scoria , constet? Fa-
bricavit illud *Theodorus Degens* , SS.
Theologiæ Doct. & Professor Colonia Agrip-
pinæ Librorum Censor.

Magnum profectò nomen ! At cu-
jus statûs , Professionis , aut Religionis
est iste Degens? *Frater* est [ut alibi se ip-
sum subscribit] *Professus Ord. Canonico-*
rum Regularium Provincialis , & *Prior Co-*
loniæ &c. En ! statum , Religionem &
Officia istius hominis. Quæ omnia
astutè reticet *Adversarius* , ut in ipso
statim limine , & ipsa approbatione
imponat *Lectori* , insigni commento
partiali.

partialem pro *impartiali* supponendo cal-
lamum.

O infelix astutia ! Quale jam for-
mandum iudicium de aliarum , quas
allegat , Universitatum approbationi-
bus ? Verbo , & communi parænia
rem totam conficio : *Semel deprehensus &c.*

Cómparet interea Adversarius *par-
tialem* suam cum nostris , mox suby-
ciendis & ab eadem Universitate ex in-
dustria impetratis , approbationibus ;
damnabit dubio procul cum rubore
infelicem suam astutiam , nostrúmque
cum tot ac tantis Viris probabit can-
dorem & modestiam.

Atque hæc paucula sunt , quibus
Adversarij Præfationem perstringen-
dam duximus : reliqua , quæ in ea
circa privatam suam adducit perso-
nam , superis relinquendo.



IDEA
ORDINIS
Hierarchico - Benedictini;
five,
BREVIS DELINEATIO,
exhibens
Principatum, Clericatum, Scientiam,
Actionem, & Antiquitatem
Ordinis S. P. Benedicti:
Dissertationibus
Iuridico - Historicis
illustrata.

DISSERTATIO I.

Præliminaris.

Scriptionis hujus Occasio,
& *Scopus.*

SUMMARIA.

1. *Deploranda Religionum Aemulatio.*
2. *Acerbior, & bilis effusa plenus Adversarij contra Monasticos Ordines calamus.*
3. *Resuscitata controversia initia &c.*
4. *Scopus & Finis hujus Scriptiois.*

N. I.

Deploranda Religionum
Aemulatio.



Nter fatales, quibuscum Ætas hæc nostra
conflictatur, miserias, facile princeps
ea fuerit, quâ, indies vix non la-
tius serpente, Frater in Fratrem in-

A

surgere,

surgere, Religio in Religionem (nullo licet, nisi solius æmulationis, si rem inspicias, titulò) arma quærit stringere, ut nobilissimum inde Ecclesiæ Robur, & principalis Acies mutuis à se cædibus foedissimè dilacerata, non sinè graviori clade, ac ingenti aliorum insuper ruina miserè succumbat. *Heu!* (exclamat Eminentissimus Sfondratus noster, *Gall. Vind. Diff. 1. §. 1. num. 1. Catholicorum discordias cogitans.*) quàm inani- bus, imò noxijs bellis occupamur, quando tot aliæ supersunt, & necessaria, & coronis digna, nullò que pugnantium damnò! quanta ubique terrarum scelerum, ac errorum messis est, quæ falcem, ac calamos Catholicorum expectat? quanti animarum fasces idè pereuntium, quia Medicis carent, quorum ope sublevandæ? quanta rerum cœlestium & ignorantia, & contemptus? in tribunali- bus fraudes? in castris impudentia? in aulis scandala & exempla vitiorum? his omnibus emendandis, quæ tantò majoris momenti & curæ sunt, quòd eternitatem ac cœlum spectant: omnium vigilie, & ingenia Doctorum sudare oporteret: quæ stolidi tamen in semetipsos crebrò convertunt, non sinè altiori eorum, qui ex adverso sunt, cachinno, & scandalo.

In quo ipso tamen concertandi pruritu nonnullus adhuc veniæ locus esse videtur (si non prorsus immoderatus sit ardor) quando & inter ipsos Apostolos legimus ejusmodi velitationes intervenisse, cùm, quis eorum major esse videretur, vehementer non minùs, quàm frequenter disceptarent. Consimilis scilicet æmulatio hodie-

hodiedum viget inter Viros etiam Apostolicos, ubi existimant nonnulli, aut alterius contemptu accrescere, aut ejusdem exaltatione plurimum decrescere suæ Religioni, in ejus materno veluti gremio nutriuntur.

Hinc sanè Gloriosissimi Patriarchæ Benedicti familiæ atrocissima hætenus discrimina incubuere: quemadmodum èt nuper adeo efferebuit Non-nemo, ut Clericatus, seu Ordinis prærogativam non nisi per accidens Benedictinis competere audacter asseveraret; eò dein ex titulo, & existimatâ simul Ordinis sui Antiquitate omne Nostris Præcedentiæ jus, ac Possessionem turbare haud veritus. Cujus acerbum admodum, & immodici fastûs, ut agnoscas calamum, Amice Lector! attentius inspice, quæ f. 74. inter alia ponit.

N. II.

Acerbior, & bilis effusa plenus

*Adversarij contra Monasticos Ordines
calamus.*

Precedentia, (inquit cit. pag.) censenda est res & causa magni momenti; ex his (pergit, paucis interjectis) proin consecrarium est, peccare Prælatum, aut Communitatem, qui sibi patiuntur ab alijs injustè eripi præcedentiam & honorem debitum: Si enim peccatum sit, indebitè alienare bona Religionis temporalia, & materialia, quantò majus erit, honorem bonis omnibus, & ipsâ etiam vitâ potiore, prostituere?

Quæ sanè ratio fuit, cur Sapientissimi Antecessores nostri adedò constanter pro jure præcedentiæ, veluti pro Aris & focus dimicarent. Neque hîc morari oportet, quosdam Religionum fungos, quæ sicuti otij & ignorantia sunt mancipia, ita & postremis collocari locis cupiunt, ac merentur.

Certè Sapientissimus & Pientissimus noster Joannes Mauburnus in Venatorio censet, maximè curare debere Canonicos Regulares, suam dignitatem tueri, utpote quâ cæteris Ordinibus Monasticis antecellunt, sicut homo cæteris animantibus, & pulcherrima illa Sponsa gregibus ovium. Hæc ibi.

Alibi videlicet pag. 50. 51. 54. ita loquitur: Monachi toto Cælo à Canonicis differunt, sùntque quâ tales canonice dignitatis incapaces.

Iterum Cucullum (ait) esse ita Monachorum proprium habitum, ut Canonicis non nisi ob publicum crimen veluti in pœnam delicti injiciatur.

Nunquid ejusmodi plumæ satis prodant, in quem hæc volueris censum pertineat? unde luculenter vel obiter consideranti liquet, quâ Adversarius mente in arenam descenderit. Ideò nec illud miror, quòd in privata etiam Monasteria, & Personas invaserit.

Ad hæc verò universa meliùs dijudicanda, necessum erit inprimis, natæ inter nos his in Partibus controversiæ ortum, progressus & causas ob oculos ponere.

N. III.

Resuscitata Controversiæ initia, progressus, & incrementa.

ANno à Partu Virginis IMMACULATÆ supra millesimum sexcentesimo, septuagesimo tertio è Ducali Campidonensi prælo in lucem prodijt Opus *de Privilegijs Regularium*, Authore D. Virgineo Alviseto Bisanfino Monacho Ordinis S. P. Benedicti in Sacra Insula Lerinensi &c. jam olim in Italia impressum, & approbatum Paduæ à Commissario Sanctæ Fidei, & à Reformatoribus Studij Patavini. Unicam in Opere hoc suo, cæterà ab ipsis etiam Adversarijs laudatus, Historiolam refert, à Reverendissimo & Illustrissimo Joanne Petro Camuz Episcopo Bellicensi in libro *Variet. Historic.* conscriptam; Hæc quia lepidum Rustici de Canonorum Regularium vestitu Judicium continet, tam acriter pupugit prædictæ eximie Religionis Non-neminem, ut in aliqua concionum suarum Dedicatoria immoderatæ vindictæ studiô in universum Ordinem nostrum Stylo satis intempestivô invasit.

Impetiti tam ferreâ aggressione Nostri non aliô, quàm legitimo Juris remedio usi sunt, apud Celsissimum Ordinarium de illatâ sibi injuriâ decenter conquesti: jussus præinde purgare se

re se Adversarius, respondit quidem, sed eâ verborum formulâ, quæ plus jactantiæ, & fastûs, quàm Religiosæ modestiæ saperet, id quod facile colliges ex pauculis ejusdem formalibus, quæ ad R. mum suum D. Ordinarium scripsit, & hîc ego subjungo : *Quæ Reverendissima Dominatio de DD. Abbatibus Benedictinis scripsit, jam ante sciveram, & multoties mihi civere risum; quæ scripsi in Dedicatoria, scripsi omnibus doctis in Sacro Ordine nostro scientibus & volentibus, idq; longè fusiore typo dabo alibi forsân sub censura Romana. Si ad Reverendissimum Dominum Ordinarium devenerint, respondebimus in formâ eum illorum confusione. &c.* Et paulò inferiùs ita : *Si sapiant Benedictini, tacebunt, & non irritabunt crabrones : sciant ita ipsos à nobis timeri, sicut à Gigante pumilio : &c.*

In hanc epistolam Nostrorum aliquis Responsionem in iure & facto fundatam &c. scripsit, palamque & paucis ostendit, quàm inconsultâ planè & cæcâ temeritate tot Adversarius Principes, Abbatésque (& hos inter nonnullos Purpurâ ac Tiaris Episcopalibus insignes) aliâque doctissima Benedictinæ Familiæ Capita pumilionibus comparando, incautus provocârit : At, quia præter Nostrorum mentem ac votum Stylus plurimum bilis habebat, non permisere Superiores, ut lucem aspiceret. Unde incendium inter privatos parietes si non extinctum penitus, at sopitum saltem fuisse, bonâ fide Nostri existimârunt. Sed ecce ! latens hætenus quasi sub cinere ignis violentiùs & in publicum

cum quidem erupit, cum Adversarius Commentarium in Regulam S. P. Augustini edidit, in quo sepultam tantisper controversiam resuscitans, non Authorem modò *Responsionis*, de quo proximè dicebamus, sed Caramuelem insuper & Alviletum admodum indignè tractat: & certus quasi Victoriæ, turbatâ inter utrumque Sanctissimum Ordinem (quæ hætenus inconcussa steterat) Pace, classicum canit, hortaturque suos ad præripiendam Nostris ubique præcedentiam: cujus tamen jus & Possessionem Benedictina Religio hætenus quietam habuit. Ut porrò melius persuaderet, in exemplum Juris jam exerciti allegat, Lateranenses de Cassinensibus, & de Peterhusianis Creüzlinganos actum triumphasse.

Sperabam equidem non defuturos è Nostris, qui honorem tam manifestè læsum vindicarent: sed reposuere nonnulli, pertinere negotium ad eos, quos in specie Adversarius nominasset: ego proindè, cum Petri-Domus tam frequenter, sed perperam allegatæ membrum & filius sim, licèt indignus, quamprimùm natus sum Adversarij Opus (quò deficiente moliri nihil poteram) ex tempore statui mecum ipse Monasterij, & totius simul inclytæ Religionis nostræ honorem ac Jura, sicut morigerum addeet filium, Scriptione aliquâ pro viribus tueri: in qua finem mihi Scopumque præfixi, proximo numero declarandum.

N. IV.

Scopus, & Finis hujus Scriptionis.

Geminam Adversarius ponit columnam, ad obtinendam suis coloratō saltem titulō aliquō Præcedentiam; prima in *Clericatu*, altera consistit in *Antiquitate*: hanc ab ipsis adeo Apostolis derivat; illum compe-
cere per se asserit suis, at Monachis duntaxat *per accidens*. Has igitur columnas evertere, sicut necessum, ita statutum mihi est, quia non habebit deinceps, quod solidè Nostris obijciat.

Quæ de *Actione & Scientia* subjungo, præterquam quòd Adversarius de his tractandi ansam non rarò subministrârit, exigit insuper ratio tituli, qui bina capita illa, præter *Ordinem*, seu *Clericatum* in suo conceptu complectitur, prout infra docebo. Nec istud supervacaneum fore puto, quando permulti rerum Benedictinarum ignari, id Canalibus attribuunt, quod nostræ Religionis, ut primo & originario Fonti, adscribere debebant.

Alter, quem proposui, Scopus fundatur in studio & amore Veritatis, quam tantopere violari, sicut minimè tolerandum erat, ita in ejusdem obsequium militare homini Sacris & Religionis addicto, utique conveniens, & non inglorium simul est.

Hinc tamen animus mihi nullatenus est, Statum Monastico-Benedictinum super Canonico-regularium Regularium elevare, ut sibi persuadere
eorum

eorum nonnulli perperam possent : sed ostendere, per Characterem Sacerdotij illis æquales nos reddi ; nec Nostros hortari, ut alienam sibi præcedentiam imprudentes arrogent, sed à Majoribus comparatam non negligant ; nec pro eâ vindicanda Judicium subsellia fatigent, sed pacificè & amicè, si lis adhuc pendeat, componant ; nec alios in possessione, si quam habent alicubi, perturbent, sed in propriâ se tucantur, in eademque constanter perseverent.

Hæc verò à Religiosi animi Moderatione, reor, prorsus non aliena fore, nec ullius vel longinquum scandali periculum ; hoc enim verò Adversario potius imminebat, utpote non verito, causam jam sepultam è cineribus quasi ad vitam typò publicò revocare, & vindices Jurium suorum Benedictinos acerbiori (ut in Præfatione ait ipsemet) lixiviò excipere. Spoponderat equidem, intra Religiosæ modestiæ limites sese continere ; sed inflammator subinde calatus in chartam coniecit scommata, honestis auribus duriora : indignisset certè aliquo (ut loquitur nonnemo de simili quodam athleta) qui aurem ei vellicâisset, & à proposito suo devium in decentiæ tramitem revocasset. Alvisetum quippe (ut plura alia incivilia sanè epitheta taceam) nominare *scurram* ausus est ; sicut & alterum Scriptorem, licèt in Universitate Salisburgensi famosum olim Canonici Juris Professore, & Venerabilem jam senem *protuberanti hodierno è terra fungo comparavit* ; nec non *blasphemo in Spiritum S. calamo, ac hæretico Spiritu ductum*, asseruit.

Injuriâ porro exaggeravit, quando *manuscriptis* & privatis parietibus non contentus, ut in hæreticos etiam cuncta dimanarent, luci ea publicæ commisit. Unicus certè Sarcasmus, quò cum Mauburno *brutis animantibus* &c. tot Principes, Abbatesque &c. assimilavit, tam sordidus erat, ut vel ab invito confutandus fuisset Stylo paululùm incitatori, nî saniora religiosa Charitas suavisset. Omnibus proinde fundamentis sinè fūco & phaleris, solidè prorsus, ac sincerè propositis, Adversarij Argumenta absque omni explosione (quâ tamen ille Caramuelem persequitur toties) pro ingenij modulo dissolvam. Quæ ubi præstitero, non video, cūr ullo ex titulo malè audiam: sed spero, nullum non Lectorem tam benevolum fore, ut id mihi tribuat, & fateatur, quòd omnes innocui Scriptoris & legitimi simul Defensoris numeros impleverim.

DISSERTATIO II.

Præliminaris.

De Ratione Tituli, & Oeconomia totius Operis.

SUMMARIA.

1. Hierarchiæ Ethymon, & Definitio.
2. Ordinis Hierarchici constitutiva.
3. Operis Oeconomia.

N. I.

*Hierarchia Ethymon, &
Definitio.*

Illois (ut in Prœmio Juris Canonici ajunt communiter ejusdem Interpretes) manibus accederet, qui ipsam statim titulorum explanationem aggrediretur, non præmissâ ipsius tituli & vocis, rei que subintellectæ Origine ac Definitione. Ne proinde in hanc nos legem peccemus, ante omnia quærimus, unde vox, ac nomen Hierarchiæ derivetur? Juxta omnes ex græco fonte descendit, & à vocabulo *ἱεραρχία*, denotâtque *sacrum Principatum*; Principatus autem *principantium* significat *imperium, ac parentium subjectionem*.

Ipsam Rei definitionem, explicationemque geminam tradit Divinus Dionysius (qui ejusdem quoque vocis esse Author censetur) cum *lib. de Cœlest. & Eccles. Hier. c. 3.* ait: *Est Hierarchia, meo quidem judicio, sacer Ordo, Scientia & Actio, quæ ad Divinitatis similitudinem, quoad ejus fieri potest, & pro proportionem illustrationum, quæ divinitus datae sunt, ad DEI imitationem traduntur.* In hac igitur Definitione tria annoto, intento meo apprimè servientia, *Sacrum videlicet Ordinem, Scientiam & Actionem: Quorum explicationem Ordo Doctorinæ suis in locis dabit.*

N. II.

Ordinis Hierarchici constitutiva tria sunt.

EX his autem manifestè collige, illa ipsa tria, in quibus juxta proximè dicta Hierarchia constituitur, reperiri debere in quolibet Ordine, qui Hierarchicus est, ac Hierarchicus esse Jure dicitur. Unde ut luculenter demonstretur, Divi Benedicti Ordinem & Religionem Hierarchicam esse, atque sic grandem eidem injuriam ab Adversario irrogatam fuisse, ostendamus oportet, *Sacrum Ordinem*, seu *Clericatum*, *Scientiam* & *Actionem* in nostrâ vigere Familia, nec minùs inter Nostros, quàm alterius Stemmatìs sacri Alumnos, perpetuò floruisse, & etiamnum florescere. Hòc tamen, quem Operi præfixi, titulò, nolim existimes, amice Lector! horrere nos, aut erubescere ipsum adeò nomen Monachi, vel Sacrum Monachismum, quem sanctè colimus, ac lubentes profitemur; at per eum à Clericatu & Hierarchiâ Ecclesiastica Benedictinos *per se* excludi, hoc enim verò diffitemur omnino, & inficiamur.

N. III.

Oeconomia totius Operis.

VNiversi igitur Operis Oeconomiam in sex omnino partes dispertiemur: Prima de *Sacro* aget *Principatu*; altera de Or-

de Ordine seu Clericatu Nostorum; Tertia de Scientia; Quarta de Actione: Quinta de Antiquitate, quam præcipuè contra Adversarium tuebor; Sextam denique adijcimus partem, de ijs agentem, quæ ex tribus prioribus consecutanea sunt: In omnibus autem non alius (ut suprâ jam contestabar) Scopus mihi erit, quàm ut Dei ter optimi, & S. P. N. Benedicti gloriæ, ac almæ pariter Veritati pro viribus interserviam.

DISSERTATIO III.

Præliminaris.

De Reverendo P. D. Ioanne

Mabillonio &c.

SUMMARIA.

1. R. P. D. Mabillonij Elogium.
2. Ejusdem adversus Canonicos Regulares Victoria.
3. Quantum Eidem Author hujus Scriptionis debeat.

N. I.

R. P. D. Ioannis Mabillonij

Elogium.

INter Principes ætatis nostræ Historiographos, velut inter primæ magnitudinis stellas, non meô, utpote quod ob suspectum partium studium nolim in Exemplum trahere, sed omnium Eruditorum illustri suffragiô emicat

eat R. P. D. Joannes Mabillonius, natione Gal-
lus, Congregationis S. Mauri, ex Ordine S.
Benedicti Presbyter, & de Romanâ Ecclesiâ,
& de suamet cumprimis Religione eximiè me-
ritus.

Quemadmodum autem Dei Sapiencia,
ut pulcherrima in Universo varietas reluceat,
varios in vario genere scientiarum Doctores
vult excellere, & eminere, ita Mabillonius no-
ster cum in re Historica, tum in Materie cum-
primis Diplomaticâ, quam Opere prorsus sin-
gulari illustravit, visus est plerisque palmam tu-
lisse. In finem tam gloriosum necessarius An-
tiquitatis sacræ, profanæque Amor impulit Vi-
rum, ut omnem ferè Europam peragrandò,
præcipuas Bibliothecas, ad eruenda è ruderibus
suis monumenta, ingenti labore, nec minori
solertiâ, dexteritatèque lustraret.

Neque tam insigni Eidem elogium Ego,
utpote domesticus, tribuerem, nisi Regiô Vir
tantus calculò & Authoritate magnus pridem
proclamatus fuisset: Ludovicus quippe XIV.
Galliarum Rex Potentissimus, & delicatus pa-
riter meritorum in omni genere Censor, in
frequenti corona Procerum digitò subinde de-
monstrans Mabillonium: *En! (inquiebat) Re-
ligiosum in Regno nostro humillimum & Doctissi-
mum! Paucula, me hercle! sed aurea sanè ver-
ba, quæ non à Laureato tantùm Capite ingens,
sed à militari pariter animo, ac Indole Mar-
ciâ ad Palladem & literas plerumque minùs re-
spicien-*

spiciente, incomparabile omnino pretium accipiunt.

Regis hujus tam gloriosi interpretem egisse mihi videtur Clarissimus Societatis Jesu Faſtorum Eccleſiæ Scriptor P. Daniel Papebrochius, qui varijs in locis, & nunquam non, ubi ubi ſeſe ingerit Occaſio, Mabillonij memoriam & nomen encomijs celebrat ſplendidis admodum & ſolidis: nuncupat eum namque *Virum eruditiffimum, Doctiſſimum; in Antiquitatibus verſatiſſimum & experientiſſimum, præſertim in diſcernendis Regum, & Imperatorum Diplomatibus veris à falſis; à quo ſe in multis correctum, & melius inſtructum gratus agnoſcit & profitetur.*

Huic pari candore adſtipulatur ex eadem inclyta Societate inſignis non minùs, quàm in ſuperioris Germaniæ Provincia & Friburgenſi præſertim, Oenipontana ac Dilingana Univerſitate celebris Theologus P. Maximilianus Raſſler, qui in *defenſione Diplomatis illius Lindaviensis n. 7. Summâ eum Virum eruditione & industriâ compellat; cui in elaborando illo Opere multum debeat.* Nec prætereundum duco D. Joannem Pregitzer, qui *Viri celeberrimi* elogium impertitur Mabillonio, & aſſeverat, eundem in Regio Monasterio Salemitano mille florenos obtuliſſe pro Codice quodam Concilij Conſtantiensis nuperrimè per flammæ abſumpto cum ipſo (prò dolor!) tam illuſtri Coenobio; quod tamen ſub moderni Reverendiſſimi Abbatis STEPHANI gloriolâ & omni circum vicinæ

cinia suavi gubernatione velut alter è suis cineribus Phoenix, eò, quem in Germania vix deprehendas, splendore renascitur.

Hæc (ut alia taceam) de Mabillonio: unde Authoritas Ejusdem à me passim usurpata nulli non, ut spero, Sacro-sancta erit, in nostræ præsertim quæstionis articulo, quia tam notabilî illustris Victoriâ, quam mox ordiar dicere.

N. II.

R. P. D. Mabillonij adversus Canonicos Regulares Victoria.

Eâdem fere tempestate, quâ Canonicos Regulares inter & Benedictinos de Præcedentiæ titulô lis in Germania fervebat, in Burgundia quoque simile certamen inter easdem Partes efferbuit. Jus & Possessionem ab immemoriali tempore habebant Nostri inter Provinciæ illius Status; in quos Canonici Regulares & ipsi (sed Nostrorum ope) ante viginti quinque circiter annos admissi, vix Subsellia occupârunt, cùm Erinacei, in vulpeculæ specum recepti, fabulam renovantes, in Promotores suos (Patres scilicet Benedictinos) insurgere, Præcedentiæ jus ambire, & præter publicas Protestationes nihil non agere, quod inervire ad deturbandos Nostros videretur. Scriptô certè publicô in arenam, & ad arma provo-

provocârunt. Nec detrectavit certamen Mabillonius, sed clavum opposuit clavo, & lucubrationi lucubrationem: quam ubi denuo impugnârunt Adversarij, decretoriô insurrexit conata Mabillonias, & priorem partum, ac Religionis simul nostræ jura tam luculenter, feliciterque defendit, ut solemni ipsius Christianissimi Regis sententiâ, non absque liberali victæ partis rubore, palma Nostris & Mabillonio tribueretur.

N. III.

Quantum Eidem Author Descriptionis hujus debeat.

HUic itaque famoso & Laureato Authori debere me quamplurimum, ingenuè profiteor; quando ex laudatissimo geminæ responsionis ipsius Opere communia deprompsi tela, quibus contra Adversarium, communibus etiam armis usum, nostra tuerer; quatenus tamen exigebat nova ejusdem methodus, pro ingenij proprii modulo adjeci nonnulla: & præcipua mihi, ac unica fere cura fuit in eo, ut inculpatae tutelæ moderamen, & limites nullatenus transgrederer.



PARS I.

De
Sacro Principatu
Ordinis Hierarchico-Benedictini.

DISSERTATIO I.

An Sacer Principatus vigeat
in Ordine Benedictino?

SUMMARIA.

1. *Differentia inter Principatum Sacrum, & profanum.*
2. *Sacer Principatus datur in Ordine Benedictino.*
3. *Nonnulla prerogativa, quibus Sacer Ordinis nostri Principatus specialiter exornatur.*

N. I.

Differentia inter Principatum
Sacrum & profanum.

Princeps idem dicit, atque supremus ac potens Dominus, sicut & Principatus supremum ac potens Dominium; hinc enascuntur hæc & similia vocabula, Princeps Cœtus Monastici, & indicat Archimandritam sive Abbatem; Princeps Belli, Archistrategum; Princeps ædificiorum, Architectum.

Quemadmodum autem Princeps alius est sacer, profanus alter, ita & Principatus: qui con-

conveniunt in hoc quidem, quòd uterque dicat principantium Imperium, & parentium subjectionem; in plurimis verò capitibus differunt: Profanus enim seu civilis Principatus imperium exercet ac dominationem; circa subditos versatur potissimum, & vim infert: Sacer è diverso seu Ecclesiasticus occupatur circa Deum primò; nec dominatur in Cleris, juxta præceptum Petri Apostolorum Principis; sed Christi potius Regum Regis mansuetudinem ac Clementiam imitatur; Nec Corporum (quemadmodum politicus Principatus) sed nobiliorem, Animarum videlicet, curam administrat. In quam rem præclarè loquitur S. Chrylostomus lib. 3. de Sacerdot. c. 5. *Habent quidem Principes terrestres vinculi potestatem, verum corporum solùm: Id autem, quod dico Sacerdotum vinculum ipsam etiam animam contingit, atque ad Cælos usque pervadit, adeo ut quæcunque infernè Sacerdotes confecerint, illa eadem Deus supernè rata habeat, ac Servorum sententiam confirmet.*

N. II.

Sacer Ptincipatus datur in Ordine Benedictino.

Talem enimverò Principatum apud Nostros reperiri, tam liquidi juris est, ut inficias ire nemo possit: Abbas enim vi Jurisdictionis suæ spiritualis quo ad subditos intra septa Monasterij potest id, quod velin Dia-

cesi sua Episcopus, vel in Universali Ecclesia ipse Papa, si excipias illa, quæ speciali jure reservantur: quemadmodum concors Doctorum sententia proclamat.

Quemadmodum igitur Papa suum in Universalẽ Ecclesiam exercet *Imperium*, ac Episcopi in suas privatas Ecclesias, ita quivis non minus Abbas in suum, quod cum jurisdictione gubernat, Monasterium exercet *Imperium*, & suum vicissim subditi exhibent lubentes *subjectionem*: ergo sacro, qui ad Ordinem Hierarchicum requiritur, *Principatu* non caret Religio Benedictina.

Et ob hunc, quod gaudent *sacrum Principatum*, teste Barbosa (ut eam eruditissimus citat Rambeckius) in tract. Juris Univers. Eccles. parte 1. cap. 17. cum quàm plurimis ibid. citatis, & ex communi sententia, *Abbates omnes Episcopo minores precedunt*. Et, eodem referente, in Concilijs generalibus immediatè post Episcopos Abbatibus locus sessionis datur, deinde primum Prælati alijs; & ad hoc Romanæ Rotæ decisio ab eodem allegatur. Id ipsum tenet fute cum plurimis Tamburinus de Jure Abbatum, tom. 1. disp. 1. q. 2. n. 6. & disp. 24. q. 3. & seq. Item disp. 25. q. 5. & 4. atque ita observatum esse in Concilio Tridentino Fagnanus testatur. Tercius receptissimæ hujus sententiæ testis est Aloysius Riccius, in praxi aurea Decisionum quotidianarum, qui in Indice V. Abbas, hæc formalia ponit: *Abbatis dignitas est major post Episcopum, in Synodo sedet post Episcopum: & passim*

passim in materia præcedentiæ, maximè tom. 4. resolut. 393. & resolut. 394. idem docet; ubi repetitur idem: *Abbatum dignitas est prima post Episcopum, primùmque locum post eum obtinet.*

Quo Abbatum sacro Principatu & dignitate penitus penetratâ, nonnemo mirari satis non potest, quosdam Abbatum suæ dignitatis adeo esse immemores, ac pene prodigos, hæc præsertim delicatissima ætate, ut obvio vix non cuivis cedant, nec possessionem à tempore immemoriali tueantur, & vicissim alios tam esse arrogantes, ut debitam ijs disputare præcedentiam, ac in jure quidem fundatam temerarij præsumant.

Verùm si proximus cum isto numerus combinetur, dilucidè patefcit, splendidum quidem, sed delicatum pariter Abbatis munus esse. Matris præcisè non gerat Abbas viscera; nam æquò molliora sunt: at severiorem ubi Censorem induit, caveat sollicitus, ne Patrem exuat: sic timere assuescat subditus, ut discat et amare; nec timor palmam, sed amor ferat, & comes Amoris fiducia: ubi enim hæc exulat, multiplex Virutis periculum incumbit, & salutaris ad generosam submissionem extinguitur stimulus, quem nullius in Superiorem fiduciæ illicium acuit.

Sed redeamus in orbem, & singularibus, quibus nostri olim Abbates præfulserunt, Privilegijs ac honoribus, *Principatus Sacri* rationem mirificè illustrantibus, præfixum nobis titulum tantisper exornemus: *Alvisetus* perplura recenset, quæ hic subnectere placuit.

N. III.

Nonnulla Prærogativa, quibus Sacer Ordinis nostri Principatus specialiter exornatur.

LEgo (inquit) apud Yepez, antequam Cardinales eveherentur ad eam gloriam, in qua nunc cum admiratione universus eos Orbis conspicit, fuisse Romæ 22. Abbates, omnes S. Benedicti, qui Romano Pontifici Sacra facienti semper assiscebant, ut nunc faciunt dicti Cardinales. Hinc ego lego (pergit ibidem) apud Yepez, V Vion, & Belforet, Calixtum II. creasse Cardinales Abbates Sanctæ Trinitatis de VVindocino, titulūque Sanctæ Priscæ jure perpetuo eis attribuisse. Ac item Abbates Cluniacenses, & Cistercienses cum ad Curiam venire contingeret, inter Cardinales fuisse adscitos; & in Consistorio hincindè ad pedes Sanctissimi locum tenuisse, ut refert. Cassand. in *catal. Glor. Mundi* p. 4. *cons.* 31.

Addo (paulò inferiùs subjungit) & non paucos Abbates, qui olim sacrabantur in Episcopos, sicque sacro fœdere humilitatem monasticam in sua Persona cum Episcopali gloria sociabant: adeò, ut idem esset Abbas & Episcopus: & eorum Monachi simul essent Canonici; ut nunc de præsentì videre est Maleacense in Gallia, & olim fuere in Anglia Roffense, Cantuariense, Vintoniense, Cicestr. Convent, Batton. Lyche-

Lychefed. & Eliense, usq; ad ultimam extinctionem Ecclesiæ, ut refert Reyner, *in Apost. Tract. 1. §. 3. Sect. 1.* Qualis item fuit Ecclesia Cathedralis Vormatiæ teste Demochar, *lib. de Sacrif. Miss.* Cathedralis de Astargia in Hispania, teste Yopez *cent. 2.* Addo ego Salisburgensem ad S. Petrum, &c.

Sed singulare, & non prætereundum in hoc sermone de præcellentia Abbatum, eo usque olim nonnullos fuisse evectos gloriæ, ut rarô, & inusitatô admodum exemplo, Episcopi eis subycerentur, ut Cassinensi, quem sub sua Jurisdictione tenuisse 4. Episcopos, refert Petrus Diaconus *in suâ histor.* & Huenfi Abbati, cui teste Venerab. Beda *lib. 3. Hist. ang. c. 4.* omnes Episcopi Scotiæ, & Hiberniæ subyciebantur.

His addere possem non pauca alia, ut quod olim Abbates S. Martini Dumienfis autoritate Conciliorum erant Præfecti familiæ Regum Suevorum, quando tenebant Galæciam, ut ei circa Divina advigilarent, ut refert Ambros. Moral. *in sua Historia.*

Quod Reges Galliæ, cum ad Bellum procederent, accipiebant Auriflumen de manu Abbatum S. Dionysij &c. Hactenus Alvisetus.

Et hæc finè dubio tanta sunt, ut *sacri Jura Principatûs Benedictini possidere*, cuilibet æquo partium Censori videri merito possint.

DISSERTATIO II.

An Principatus etiam profanus in Benedictino vigeat Ordine?

SUMMARIA.

1. Sacri Romani Imperij Principatus inter summas censetur dignitates.
2. Hac dignitate non carent Benedictini.
3. Principalium Ordinis nostri Monasteriorum compendiarie notitia.
4. Prærogative illustrium aliarum Ordinis nostri Abbatiarum.
5. Judicium Tamburini de nostrorum Abbatum Prærogativis.

N. I.

Sacri Romani Imperij Principatus inter summas censetur Dignitates.

R ECEPTISSIMÂ omnium opinione summa in eo fere Dignitas hæc ætate constituitur, quòd in Romani Imperij Sacro Corpore Principis titulum quis, & illustrissimi membri locum teneat: Sic enim cum Augusto Capite (Cæsare) per nobilioris vinculi prærogativam connectitur, & Regali, juxta Publicistas, Dignitate immediatè sub Imperatoris & Imperij Jurisdictione fulget, fastigiúmque sortitur Celsitudinis.

Ex

Ex prioris igitur occasione tituli hunc meritò subjungendum duximus, & pauculis inspiciendum, an in hoc etiam genere Benedictini resplendeant?

N. II.

*Hæc Dignitate non carent**Benedictini.*

HAbent scilicet in hoc quid nostri Abbates eximium, ac ejusmodi decus, quale in alia Religione nullatenus deprehendas: Quodque gemmæ in annulis, id sunt ejusmodi Principes in Ordinibus Sacris.

Et verò, si tempora superiora & moderna, eaque Monasteria revocem ad syllabum, quæ Nostri tenuerunt olim, tenentque etiamnum, illustris omnino, & spectabilis prodibit numerus Principum, celsissimâ cum Imperio unionem, & tam eminenti fastigiò refulgentium.

In Buchovia FULDENSIS: In Suevia CAMPIDONENSIS, ELVACENSIS, REICHENAUIGIENSIS; VVEISSENBURGENSIS in Spirensi Diocesi; HIRZFELDENSIS, in Hassia; In Helvetia SAN-GALLENSIS, EINSIDLENSIS, FABARIENSIS, DISERTINENSIS, OMNIUM SANCTORUM Schaffhusij: In Saxonia CORBEIENSIS: In Alsacia MURBACENSIS: In Burgundia LUDRENSIS: In Archi-Episcopatu Trevirensi PRUMIENSIS: In Diocesi Leodiensi

STABULENSIS : In Coloniensi SIGBUR-
GENSIS : quibus novissimè, & hoc ipsò, quò
ista scribo, anno accedit MURENSIS in Hel-
vetia &c.

Quorum Monasteriorum, seu Ecclesia-
rum compendiarium hisce notitiam ut appone-
rem, tua, humanissime Lector! & cujusvis
Eruditi pia in ejusmodi genere Curiositas im-
pulsit.

N. III.

Principalium Ordinis nostri *Monasteriorum compendiarium notitia.*

INter Principes Benedictinos multiplici ex
capite præ reliquis eminent Abbas FUL-
DENSIS : totius quippe Buchoviæ ambi-
tum continet sub ditione, vicinis ideò formi-
dabilis ; & sicut virium potentia, ita inter Ger-
mania, Galliaq; Abbates Primatu gaudet, ac
(quod splendidissimi honoris Caput est) Augu-
stissimæ Imperatricis audit Archi-Cancellarius:
Cujus in eo præter cætera versatur illustre mu-
nus, ut, quoties sollemnis Ejus Coronatio
instituitur, cum reliquis Imperij Proceribus non
adesse modò coram, sed Augustissimæ serenif-
simo Capiti imponere Coronam debeat, ac sub-
indè depositam Celsissimâ ipse manu sustinere.
Et hac tam sublimi Provinciâ suâ (quam non-
nullus præripere Æmulus, sed frustrâ tentârat)
Celsissimus Abbas Placidus pientissimæ memo-
riæ

riæ functus erat nuperrimè, quando MAGNI LEOPOLDI magna pariter & gloriosa Con-
jux Augustissima Magdalena Theresia Augu-
stæ Vindel. 1690. imperiali Corona publico ritu
insignita fuit.

Bucelinus noster *Germ. Sacra p. 1.* hoc Ar-
chisterium nuncupat *Archi-Gymnasium Sancto-
rum, & Pontificum Promptuarium, Religionis
verticem per Teutonium.* De eo insuper sic
Michaël Antonius Bandrand in *Lexico Geo-
graphico: in ea (Urbe Fuldensi) inest Abbatia
totius Europæ, nedum Germaniæ celeberrima.*
Cujus Celsissimus Abbas in sacro Quatuor-vi-
rùm Imperij Abbatum Albo supremum obtinet
locum.

CAMPODUNI Abbas Quatuor-Vir &
ipse, Ejusdem Augustissimæ perpetuum agit
Archi-Marischallum: & singulari Privilegio ac
Jure gladij non simplici dotatus, Sanguinis in-
teresse judicio sine ullius irregularitatis peri-
culo in propria ipse celsissima Persona potest;
ad quod alludit pervetustus ille Rythmus, quem
cum Herpibolensi Episcopo communem habet:
Campidona sola judicat Ense stola.

Abbatis porro Campidonensis splendorem
& potentiam exinde colligas, quòd, teste Buce-
lino, factum, ut maximi Principes ejusdem feu-
datarij fierent; Archi-dapiferi, Pincernæ, Ma-
reschalli, Camerarij munus prompti obirent, et-
verò etiam exambirent.

Quin ipse Hadrianus Papa hujus nominis
Primus in augendo Campidonensis Abbatia: ti-
tulo

tulo exeat tam liberalis, ut eandem ab omni Episcopali Jurisdictione exemptam, *alteram* insuper, atque *secundam* Romam appellaret.

Felix & gloriosum ætate hæc nostrâ Campidonum eximiè floret in Celsissimo, quem à triginta jam annis Abbatem habet, RUPERTO ex Perillustri & antiquissimâ BODMANNORUM Prosapiâ oriūdo; Principis hujus copiosæ admodum Dotes, & varia, sublimiaque sunt decora: generosi tamen animi vigorem, & sociatum pulcherrimo foedere cum togâ sagum inprimis orbi Germano testatum fecit, quando exactrice Gallorum manu omnem latè Sueviam nuper rapinis, incendijs &c. divexante, & ipsi jam Algoiæ armorum terrorem inferente, solus fuit, qui tumultuariô impetu Suorum centurias aliquot sub signa cogeret, & armis arma fortiter opponendo, non à Patriæ tantum, sed & Tyrolis, aliarumq; Provinciarum jugulo prædandum hostem depelleret, docerétque, non otiosum Jus gladij esse Principi Campidonensi, sed eum heroicæ Celsitudinis animum, quem incomparabilis Domûs Lutharingiæ Gloria Carolus V. Cæsareorum tunc Exercituum Archi-strategus insigni honorare elogiô, & gratulatione elementissimus voluit.

SAN-GALLENSE vetustissimum Helvetiæ Monasterium, ac Dynastiarum spatium, viribusque præpollens, finitimis non ob potentiam tantum formidabile, sed cumprimis ob florentis ibi Sanctimonix, & severioris pariter Disciplinæ constantem hætenus famam venerabile

fabile semper extitit. Audi, quàm illustri Bugelinus præconio id extollat; Tantam, inquit, tot Sæculis Sanctorum, & Sanctitatis opinione celebrium copiam aluit, ut centum subinde, & ducenti, quin & trecenti aliquando eò nomine celebres simul, semelque in eodem conviverent, nec dubitaret Religiosus Non-nemo, & vetustissimæ fidei Scriptor ante octingentos jam fere annos in hæc ipsa prorumpere:

*Continet hoc Sanctum Sanctorum
millia Templum.*

Sua in Monasteriò hóc incunabula accepit Erfordiensis Universitas, quâ exinde translata, non omnis continuò Musa hinc migravit; mansuetiores enim disciplinas cum severioribus ingenti usque huc, & uberi semper studio coluerunt Sati. Gallenses: qui hodie, ut tam præclaros literarum fructus in externos quoque oportunius derivent, peramplum moliuntur Athenæum, ubi cum Philosophia, Jus, & Theologiam &c. publicè deinceps profitebuntur.

Inter Abbatis San-Gallensis prærogativas nolim prætermittere equestris titulum Dignitatis, quâ sub nomine Beatissimæ Virginis Annuntiatæ à Subaudia Ducibus conferri solitâ Celsissimus Abbas Gallus hoc nomine II. olim exornatus, perpetuò in Posteris jure hoc Insigne transfudit. Addamus denique Infulas tam Constantiensis Episcopatus, quàm variarum Abbatiarum, quibus San-Gallense Monaste-

nafterium toties fubminiftravit dignos tam fublimi honore Candidatos: quales perpetuâ enutriti foecunditate, teftatur Eminentiffimus Cardinalis Sfondratus, qui ephœbus in San-Gallenfium gremiô educatus, veluti cum lacte imbibit pietatis & eruditionis admirandæ fontes illos, quibus per tot volumina, velut aureos canales effufis, univerfam Chrifti Ecclefiam nuperrimè irrigavit. In compendium cœegit citatus Bucelinus cuncta hujus illuftriffimi Monafterij elogia, quando dixit: quod Italiae Cafinum, Gallijs Cluniacum, hoc Germaniæ effe S. Galli Afceterium.

EINSIDLENSE non Benedictinæ modò Religionis eximium, fed totius Helvetiæ præcipuum fanè decus, & innumerabilium animarum ex Chriftiano Orbe illuc confluentium illuftre Afylum; fat dives laudis eft, quia Sedes eft Gratiæ, & Auguftiffimæ Domus Virginis, quam & quotidianis locupletat favoribus, prodigijsque Mifericordiæ Mater, & tantæ Matris Filius ac fummus Sacerdos fecundùm Ordinem Melchisedech folenni confecrare ritu ipfe dignatus fuit. Hinc meritò quod Italiae eft Loretum, Hispaniæ mons Serratus, hoc Teutoniæ revera eft Einfidlenfe Monafterium. Inter illa porrò Marianæ Clementiæ beneficia veneror cumprimis illud, quod inter Noftates ibi femper floruere Viri cum virtute, tum eruditione eximij: inter quos tamen ceu inter pretiofos lapillos Adamas præfulget Celfiffimus Princeps Auguftinus ex illuftri Redingiorum fanguine pro-

propagatus, & splendidissimis contra Heterodoxos Victorijs, necnon profundissimis ingenij sui vixnon *Augustiniani* lucubrationibus per Orbem celebratissimus. His pro auctario ornamentis jure adijcias Bellizonense Gymnasium, cui pro DEI, & Ordinis gloriâ conservando insignes non modò viros, sed copiosos insuper sumptus strenuè impendunt Einsidlenses.

FABARIENSE tertium Helvetiæ, ob terrarum fontes quotidianis ferè prodigijs claros, in omni passim Europa famosum est Cœnobium: quod homines nobiliori stemmate, & pari deinde virtute conspicui incoluere. Præ reliquis memorandus nobis est Illustrissimus Abbas Rudolphus ex antiquissima & nobilissima Stirpe Comitum de Montfort, in quorum gloriosis Majoribus multiplex virtus, & singularis præsertim Clementia suaviter enituit, nec in Posteris à primævo candore degenerans. Hunc Henricus Imperator hoc nomine VI, in Comitijs Vormatiensibus inter Sacri Romani Imperij Principes solenniter cooptavit. Varias per superiora tempora calamitates, damnaque gravissima perpeßum Monasterium hoc, pulcherimè, magnisque iterum incrementis reflorescit sub felicissimâ & solertissimâ Gubernatione moderni Cellissimi Principis Bonifacii, ex Einsidlensium Monasterio in Abbatem postulati.

DISERTINENSE, vulgò Disentis, non vetustate tantum, sed laureatò etiam, quos
è gre-

è gremio primâ statim ætate dedit, Martyrum sanguine celebre est: Inter plurima, quibus ejus Monasterij Abbas ac Princeps ab Imperatoribus honoratus fuit, Privilegia, occurrit illud, quòd eudendæ monetæ Jus habeat. De hoc Monasterio ita Bucelinus in *Bened. Rediv.* Disertinense ut frequentiâ auctum, sic èt virtutum splendore, ut non Deserti tam nomen proferat, quàm horti, Paradyfi fontibus irrigui audire mereatur: *gloria Libani data est ei, decor Carmeli, & Saron &c.*

AUGIAM-DIVITEM erudito pro more calamo Bucelinus sic illustravit, ut luci addere velle lucem viderer, si de meo quidquam superflui adjungerem. Sic igitur ille: Angia Dives potentissimum longè, illustrissimumque Monasterium, situ ad miraculum eleganti, in Insula Rheni & Lacûs, veluti omnibus Naturæ gratijs dotatum.

Fuit Promptuarium multo tempore lectissimorum Germaniæ Pontificum; Erátque id Asceterium illâ tempestate inelyta non modò Sanctimonix, sed & liberalium Disciplinarum Sedes, adeò ut Phoëbus cum omni Musarum Gynæceo in eam Insulam, relictò Parnassò, migrâsse videretur. Insulam hanc tum jure *fortunatam* dixeris. Hinc multis Sæculis dicta erat *Schola Virtutis & eruditionis* celeberrima, necnon Asylum publicum, Civitas Refugij, & Portus salutis maximorum Principum, & Imperij Procerum; ad hoc Monasterium multis Sæculis tantus concursus fuit, ut nemini, nisi

ni, nisi primæ nobilitatis notâ insignibus, illustrissimisque pateret. Præstat etiamnum insignibus Sanctorum, Marci præsertim Evangelistæ, sacris exuvijs, & Smaragdo, ut vocant, Orientali, cui in Europa similem & magnitudine & nitore vix reperias.

MURBACUM opulentissimum Alsatia Coenobium, vulgari olim cognomine dictum est peregrinorum Vivarium, ob alimentorum utique copiam, vel ob comitem & domesticam Benedictinis hospitalitatem. Opulentiam Ejusdem facile conijcies ex eo, quod in Abbatis, & amplissimæ familiæ obsequium sæpius mille ducenti & sexaginta equi alerentur, cui numero grandis pariter nobilium Vasallorum Syllabus respondebat; quare meritò Murbaensis inter Sacri Romani Imperij Quatuor-Viros Abbates adlectus fuit. In hujus Monasterij Abbatem canonicè nuper electus, & ex Illustrissimo Monasterio San-Gallensi postulatus est Reverendissimus DD. Columbanus; qui electionis suæ Jura pro viribus tuetur, etsi temporum injuriæ ab actuali possessione eundem impedian.

LUDRENSE famosissimum olim in Burgundia partibus Monasterium, eundem hodie Principem habet & Abbatem cum Murbaco; fundatum est à S. Deicola, sumptibus illustris foeminæ Berthilde, & à Clothario Rege plurimum auctum ac sublimatum.

CORBEIUM in Saxoniae Electoratu Coenobium est multò Illustrissimum, quia fertile

Promptuarium illud, quod maximos Romanæ Ecclesiæ Præsules, & Apostolos suggessit: ex hoc enim prodiere Sancti Anſcharius, seu Anſelarius, Rembertus, Tiagrinus, Hogerus &c. quibus non finitimæ tantum, verum & diſſitæ Gentes infusam Evangelij lucem in acceptis referant. De Corbeienſium porro Sanctorum, & ab iisdem piè Geſtorum copia ſi diſſerere vel pauculis vellem, voluminis integri texendum opus eſſet.

STABULENSE potentiffimum eſt in Leodiſi Episcopatu Monasterium: quod Sigibertus Rex cum prole careret, Deum opum ſuarum ſcribens heredem, regiâ planè munificentia fundavit: cõoperantibus, & rem ſtrenuè promoventibus S. Remaclo Traiectenſi Episcopo, & Grimualdo Duce Brabantia, quorum ille cum Pontificijs Inſignibus pompam omnem honoris ultrò exutus, in hoc poſtea Cœnobio Monachum induit.

SIBURGENSE, ſeu, Sigebergense (ait Bucelinus) illuſtriſſimum, potentiffimūque propè Coloniam Benedictini Ordinis eſt Cœnobium, pulcherrimo, editiſſimoque ſitu, loco munitiſſimo conditum à S. Annone Archi-Episcopo Coloniſi &c. Ibidem ingens ſanctitate, eruditione, & generis ſublimitate virorum illuſtriam numerus exſplenduit, ut non tam ab Amne præterfluente Legebergense dicas, quàm Sigeberg & Sigberg, à palma Victoriæ, quâ de ſeipſis multi, maximique Heroes hîc triumpharunt.

PRUMIENSE in Diœcesi Trevirensi Cœnobium longè Magnificentissimum à Pipino Francorum Rege Berthæ Augustæ rogatu, conditum fuit. Basilicam secto lapide, insigni mole, & arte mirabili idem Fundator per 30. annos molitus est; quam Filius deinde Carolus, ob res egregiè gestas cognomento Magnus, feliciter absolvit, & consecravit Leo Pontifex hoc nomine III. præsentibus (ut Bucelinus testatur) Cardinalibus, Archi-Episcopis, Episcopis, numero mille tribus sexcentis. In quo etiam Lotharius Imperator, stupente Orbe, positò Imperii Diademate, inter Nostros adscriptus, glorioso tandem, & sancto fine quievit.

MURENSE illustre prorsus ac præpotens Helvetiæ Monasterium, fundatum, ut ait Gerardus de Roo, à Rapatone Comite Habsburgensi; vel, ut Bucelinus vult, à V Vernhero Strasburgensi Episcopo, Comite ejusdem Habsburgensis Familiæ; quod dein possessionibus alijs quoque hujus Gentis Comites plurimum auxere, ac promovère. Nuper emptâ Dynastiâ Klingbergensi, non opibus tantùm, sed & animabus quàm plurimis à perdita hæresis lue ad fidem catholicam revocatis est auctum, & paucis inde annis amænissimâ ad Rhenum Arce Sandeck. Videmus hodie, & admiramur in hoc nobilissimo Asceterio redivivum quasi ex cineribus Phœnicem, quando, destructis veteribus, novi consurgunt ædificiorum *Muri*, sive molem, sive artem spectes, *basilicè* facti. Ad splendorem porro & Majestatem, quod ultra desideretur.

ne quidquam deesset , Augustissimus Romanorum Imperator LEOPOLDUS I. ultimum hœc ipsò annò colophonem addidit, & comper- tam aliàs in hunc locum Austriaco-Habspur- gensium munificentiam propriò veluti sigillò obsignavit , quando modernum Reverendis- simum DD. Abbatem PLACIDUM ex per- illustri Familia zur Lauben oriundum , ob pa- rem cum Eruditione (typo etiam publico notâ) Virtutem inter S. R. I. Principes , rarò ætate hâc exemplò, clementissimus adlegit; & eò ipsò equidem tempore, quò ex eadem præclara Pro- pagine alius Non-nemo à potentissimo Gallia- rum Rege Ludovico XIV. Supremorum suo- rum in campis Mareschallorum , ac illustrissi- morum Comitum est Albo insertus; postquam (ut trinum non sit imperfectum) ejusdem Cel- sissimi Principis Fratrem Germanum *Geroldum* Infula Abbatia Rhenovienſis paulò antè exor- navit. Tri-felix sanè Progenies ! *togâ* nimi- rum clara , & *sagô* , *Astris* chara & *Castris*, *Marti* Sacra & *Iovi*, eâdem fere tempeſtate præam- bulis ad altiora meritis conscendens, sublimi- que simul coambulæ gloriæ, ac CELSITUDINIS vertice Sydera feriens.

De VVEISSENBURGENSEI , HIRZ- FELDENSEI , ELUACENSEI , OMNIUM SANCTORUM in Schaffhausen (Quorum Abbates omnes Ordinis S. Benedicti , & Sacri Imperij Principes erant) filere præstat, quàm eloqui , quæ dictaret expressus veritate dolor. Eorum certè recordari sinè lacrymis vix possunt
Filijs

Filij sincerè Benedictini : dolent namque tam nobilium membrorum avulsionem, & acerbius quidem ex hoc dolent capite, quòd eorum maximè adminiculò promota sit, quorum præfidiò depelli, & omnibus propugnari modis sancta cum reliquo Corpore Unio & debuisset, & potuisset.

N. IV.

Prærogativæ illustrium aliarum Ordinis nostri Abbatiarum.

HActenus diximus paucula de Monasterijs, quorum Abbates *Principum Imperij Collegio* accensentur; nunc aliqua subjungemus de illustribus & insignioribus aliarum Abbatiarum prærogativis, quæ nobis opportunè suggerit *Alvisetus fol. 89.*

Hunc proindè in meas vices substituo. In Magni Patris reverentiam orditur ille à Monte Casino, & Casinensis (inquit) Abbas à Carolo Magno & Ludovico pio creatus fuit *Vice-Imperator*, & *Super-Intendens* negotijs Imperij.

In Gallia moris fuit, ut, Rege absente, Abbates S. Dionysij Regnum administrarent; ut de Suggero, & Matthæo asseritur &c.

A Rogerio Duce (postea Neapolis, & Siciliae Rege) concessum fuit Privilegium Abbatibus Cavæ, ut per omnem dicti Regis ditionem possent reos vitâ donare, si sibi obviarent, dum ad patibulum ducerentur, eò modò, quò olim

olim Romani Vestalibus suis concesserunt, & de Cardinalibus asseritur.

Quibusdam Abbatibus Nostri Ordinis fuit concessum *Sceptrum* loco baculi Pastoralis, quo communiter alij utuntur; veluti Casinensis, quem Petrus Diaconus refert per-sceptrum olim debuisse investiri ab Imperatore; & Abbas S. Ambrosij Mediolani: de quo item refert Tamburinus, quod dum ad celebrandum Pontificaliter pergat, non baculam pastorem, sed Sceptrum tenet in manibus. Haftenus Alvisetus: cui unice adjungo, quod Principi Campodunensi, Sacrum solenniter acturo, denudatus pariter Ensis praefatur. Nec mireris tam illustres, & copiosas esse Benedictinae Religionis praerogativas; dignissima etenim evasit tam sublimium privilegiorum titulis & meritis, postquam Jidem perfectioris vitae studiò inflammati, rerumque caducarum vanitatem, pompamque exosi, se se totos, atque ex asse per assueta solennia vota, consecrarunt, qui prius Imperiale gesserant Pomum, regale tenuerant Sceptrum, & Ducali pileo splenduerant &c. Numerarunt aliqui (inquit P. Arsenius Sulger in *vita didac. S. P. Bened. n. 70.*) jam pridem sub cucullâ Benedictina Principes, Marchiones, Duces multos; Comites ducentos, quadraginta & amplius; Regum & Imperatorum Liberos centum quadraginta sex; Reginas quinquaginta unam; Imperatores quatuor; Imperatrices duodecim: Solus Casinus eodem fere tempore duos Reges habuit, alterum Gallorum, Longobardorum alterum.

N. V.

*Iudicium Tamburini de no-
strorum Abbatum Prærogativis.*

Format id tom. 1. de Iur. Abbat. Diss. 25. q. 5. cum è re nostra ita eloquitur: Abbates non solum Ecclesiasticis Dignitatibus, & Prælati Episcopo inferioribus præferuntur, verum etiam Laicis Dominis titulatis: ut sunt Duces, *Auth. habita C. ne Filius pro patre*: ubi Abbates præponuntur Ducibus, & Proceribus *Sacri Palatii*. Item Abbates, habentes Castra & Oppida, in quibus temporalem jurisdictionem exercent, dicuntur habere magnam Dignitatem, cum comparentur Præsidibus Provinciarum, & sic sunt Clarissimi secundum Baldum in l. 1. §. *his cunabulis circa medium ff. de Offic. Præfect. Prætor. Cassan. in 4. p. Catal. glor. Mundi, consider. 31. ad finem*. Imò existimarem, (pergit ibidem) Abbatem Fuldensem, Campidonensem, Hirsfeldensem, Murbacensem, Corbeiensem, Prumensem, Stabulensem &c. præcedere Archi-duces Austriæ, Duces Bavarie, Duces Saxonie, Marchiones Misne, Marchiones Brandenburgenses, Duces Brunsvicenses, & Lantbergenenses, Duces Juliacenses, Duces Meghabolitanos, Duces VVirtenbergenenses, Marchiones Badenses, Duces inferioris Saxonie, Duces Olfatie, Landogravios Lauenbergenenses, Principes

pes Analtinos, Duces Sabaudia, Duces Lotharingia, Comites Ambergios, Landgravios Hassia.

Ratio hujus Præcedentia desumitur ex præcipuâ Abbatum prædictorum Dignitate, Nobilitate, & Antiquitate; Argumentum autem, quod hujusmodi Principes, Archi-Duces, Duces, Marchiones & Comites, & Landgravij, & omnes alij titulati his inferiores, præferant sibi ipsis prædictos Abbates, desumitur à M. Daniele Ottone Origense in sua disceptatione de Jure publico Imperatoris Romani cap. 18. Ubi enumerans classes Statûs Imperij, Abbates supra positos collocat in tertia classe, & supra dictos Principes Politicos, Archi-Duces, Duces, Comites, Marchiones, & Landgravios in quarta classe.

Secus autem dicendum puto de alijs Abbatibus respectivè ad istos Principes, non verò ad Comites, Vice-Comites, Barones, Vice-Barones, & alios Dominos temporales inferiores. Quod probatur ex eodem M. Daniele loc. cit. ubi post quintam classem Abbatum ponit Comites, & Barones, & Vice-Comites & alios titulos in sexta Classe.

Et confirmatur eâ ratione, in primo quæsitæ Postea, scilicet: qui in litteris sunt primò nominati, præferendi sunt alijs, sed Abbates in litteris & Diplommatibus priùs nominantur Comitibus, Vice-Comitibus, & Baronibus & cæteris: ergo &c.

Et huc cum Tamburino ex occasione materia

terix delapsi sumus; facile nunc intelligentes, cur vehementer miretur non-nemo, hactum ætate nostrâ tam cultâ, delicatâ, & in elargiendis titulis tam profusâ, ut titulus titulum, cetera unda undam tradat, esse adhuc aliquos, qui subtili avaritiæ parcant titulo *Celsissimi*, dum tractant cum ijs Religionis nostræ Abbatibus Principibus, qui in Collegio imperiali pari cum alijs Principibus dignitate, subscellio, & characterē gaudent, ac proinde ab ipso Augustissimo Cæsare, aliisque potentissimis Regibus eodem cum reliquis pariter Principibus honore condecorantur: quasi obtenebraretur tanti fastigij splendor per solennium votorum Professionem, & vilesceret *Celsitudo*, quæ colit publicè Christi sanctissimam, & Apostolicam Servitutem. Unde non minùs obstupescit idem ille, aliquos non sinè negligentix intervenientis specie contentos esse posse solò *Illustrissimi* titulò, cui tamen jam omnes passim Comites asfluevère.

Nec minori admiratione subinde videtur dignum: reperiri alios etiam, qui prærogativis reliquis Ordini nostro annexis, veluti usu *Rocheti*, *Mantelli*, *Pectoralis* &c. quâ de causa ignoro, non, ut possent ac deberent, utantur; quò fit, ut nulla poenè in habitu etiam appareat differentia Religiosum simplicem inter & ipsummet talis Monasterij Abbatem.

Nunc transgrediamur, quò Doctrinæ, ac Tituli nosratio & Methodus vocat, ad asserendum Nostrorum, & Benedictinæ Religionis *Sacrum Ordinem*, seu *Clericatum*.

PARS II.

De Sacro Ordine, Seu, Clericatu,

Primo ad Hierarchicum Ordinem Requisito.

DISSERTATIO I.

*An Sacer Ordo, seu Clericatus
conveniat Religioni Hierarchico-Bene-
dictinae per se, vel per accidens?*

SUMMARIA.

1. *Quid per Sacrum Ordinem intelligatur?*
2. *Differentia inter Monachismum abstractivè, & concretivè acceptum.*
3. *Ortus Benedictinae Religionis in Clericatu.*
4. *Clericatus etiam in Regula Benedictina fundatur.*
5. *Clericatum Religioni Benedictinae per se competere ex praemissis asseritur.*
6. *Clericatus non tantum per accidens competit Benedictinis.*
7. *Multò minùs dispensativè tantum, & ex privilegio.*
8. *Nec denique ex Jure duntaxat novo.*
9. *Diluitur primum Adversarij Argumentum.*
10. *Secundum dissolvitur.*
11. *Examinatur Monachi Definitio, & annexa collaria ab Adversario.*

13. Re-

12. Respondetur ad Authoritatem S. Thome , & Gratiani.

13. Respondetur ad Authoritatem Panormitani.

N. I.

Quid per Sacrum Ordinem intelligatur ?

Nomen Ordinis Sacri pressius accipiendo, & spectando simul nostræ, quam pertractamus, controversiæ scopum, intelligitur per ejusmodi vocabulum ac rem verum in Romana Dei Ecclesia Sacramentum, quo quis novitate Benedictionis à communitate vulgi segregatur, & populi Doctor, Rectorque consecratur: quemadmodum Gregorius Nyss: Orat. de S. Baptist. loquitur.

Unde non Regale tantum Sacerdotium Ordinis constituit dignitatem, sed & cum Diaconatu ipse etiam Subdiaconatus in sacri honoris istius participationem, societatemque admittitur; ut, quicunque alterutrô Horum Insigni præfulget, Clerici hoc ipsò titulum & prærogativas adipiscatur, & Sacro, de quò hic tractatur, Ordine gaudeat.

N. II.

Differentia inter Monachismum abstractivè, & concretivè acceptum.

Dupliciter accipi Monachismus potest, abstractivè scilicet, & concretivè. Priori modo

modo spectatur, si ab ipsis, quas Religio quælibet involvit, *circumstantiis, conditionibus, & ipsâ etiam Regulâ* præscindatur. In posteriori verò acceptione consideratur, prout certis jam *circumstantiis, conditionibus & legibus &c.* alligatur.

Monachismum autem, sive tò *Monachum* non strictiorem semper, sed laxiorem nonnunquam ac universaliorē induere notionem, vult expressè Rosvveydus S. J. *Vindiciarum Kempens. c. 14.* apud Constantinum Cajetan. in *Gersene restituto c. 8.* dum fatetur, *Authorem libelli de Imitatione Christi Monachum fuisse, siquidem latè ea vox, ut sæpè fit, capiatur.*

Fatemur ergo ultronei, ac ingenuè, si Monachi nomen in generico sensu, & abstractivâ prorsus ratione arbitremur, Clericatum *per se*, necessariò ac universalissimè non competere Monachismo; At illud admittere nunquam possumus, Clericatum non competere *per se* posse Monachismo *concretivè*, sive, certas secundùm *circumstantias, conditiones, & leges &c.* accepto: Religioni v. g. juxta *Ortum, ac Regulam suam* spectatæ. *Moralium enim rerum & complexorum* (quale status Religiosus est) *Substantia* tota unicè dependet ex qualitate *Originis* partim, partim ex *mente, Constitutionibus, & Regula Fundatoris*; ex his namque prædicata *per se* competentia, ultimatâque specificationem suam, & essentiam accipit quælibet Religio, nec aliud, quod habeat, determinativum assignari potest. Unde si quidquam eorum, quæ

quæ majoris paulò momenti sunt, vel mutarentur, vel expungeretur, jure diceret, quòd ejusmodi Religio in aliam rursus speciem degeneraverit.

Quod si igitur demonstraverimus (ut solidè demonstrabimus) *Sacrum Clericatus Ordinem* competere Religioni Benedictinæ vi *Ortus sui*, & vi *Regula*, facillima erit conclusio, & enodatio positi in titulo dubij: *an scilicet Nostris Clericatus per se competat?*

N. III.

Ortus Benedictinæ Religionis in Clericatu.

Ortum ergò imprimis, & Familiæ nostræ Natalia inspiciendo, nullus est, qui ausit inficias ire, quin & ipse Adversarius suapte profitetur id ipsum, quòd per Syricium Papam, injunctum fuerit Monachis, ut *Sacris deinceps Ordinibus* initiarentur, atque sic non Deo tantum, sibi que, verum et proximo pro virili suo vacarent. Ex quo luculenter deprehendis, quòd à Christi Vicario Monachismus in sublimiorem conditionem evectus sit, & Authoritate Apostolicâ *Clericatus* prærogativâ insignitus. Jam quæro, Gloriosus Patriarcha noster quâ ille ætate vixit? Nunquid mortuò pridem Syriciò? Ergo illo tempore nata est Religio nostra, quò Monachi, qui solitariam antea assuetam ruri, & aggrestem quasi vitam
vix-

vixerant, *Clericatus* fastigiò & honoribus insigniti jam erant, & ea tractabant, ac tractare poterant, quæ propria *Clericatus* insignia sunt: ergo sua *Incunabula* Religio Benedictina trahit à Monachismo per *Clericatum* jam dudum nobilitato.

Quod si igitur ex omnium sententiâ in Nobilium is spectat album, qui vitam accepit & sanguinem ab homine, olim quidem plebeio & ignobili, sed per specialem exinde Principis gratiam nobilitatò, meridianâ nunquid luce clarius est, ex ejusdem similitudine argumenti, sacrâ Benedictinos *Clericatus* nobilitate, eminentiâque gaudere, utpote quorum *Cuna* feliciter in eam incidere ætatem, quâ Monachismus jam ultra primœvâ sortem elevatus, & *Clericatus* nobili veluti *charactere* conspicuus extitit?

Hoc verò Argumentum permultum exinde roboris accipit, quod nostrum deducamus Stemma ab eo simul Parente, qui Diaconatus Sacro Ordine resplenduit, atque sic in omnimodam adduci comparisonem cum prioris ævi Patriarchis (puta Magno Antonio, Pachomio &c.) nullatenus potest, quàm parùm ætatis ejusdem Monachi nobiscum, utpote qui (dicendo ita) ex Patre, Matrêque in ipsis statim *Sacris Natalibus*, seu *Ortu* genuinam *Clericatus* nobilitatem jure filiationis in nos transfusam accepimus; quemadmodum inferiùs, ubi titulum de *Actione* tractabimus, fusiori nonnihil stylo, alijsque insuper rationibus perquam validis comprobabitur.

N. IV.

Clericatus *etiam* in Regula*Benedictina fundatur.*

Alterum in rem nostram depromim⁹ Argumentū ex traditā ab ipso Divo Benedicto Regulā, quæ expressè Abbatibus imperat, ut *Presbyteros, & Diaconos è SUIIS eligant &c.* Ut dilucidè res appareat, verba ipsius sacræ admetior Regulæ: Capite 62. de *Sacerdotibus Monasterij Sanctissimus Legislator* ita loquitur: *Si quis Abbas sibi Presbyterum, vel Diaconum ordinare petierit, de Suis eligat &c.*

Pro genuino hujus textūs sensu eviscerando, observa: Ante tempora S. P. Benedicti Monachorum Superiores ab Episcopo petijisse Sacerdotes, qui certis eis temporibus Missarum solennia celebrarent, & Sacramenta administrarent, quibus ritè peractis, ad propria remearent &c. ut constat ex vita S. Pachomij c. 24. qui non passus est quemquam inter suos, qui Clericatus Officiō fungeretur. Quem deinde morem Sanctiss. Pater Noster non probavit, sed ne exterum accersere opus sit, & Presbyteros & Clericos in Communitatum suarum consortium lubens admisit, & præterea, quando Abbas Presbyteros vel Diaconos ordinari ab Episcopo petierit, ut *è Suis eligat*, certas, gravesque ob causas mandavit: earum unam detegit S. Gregorius Magnus l. 5. ep. 41. asserens: *quatenus nec ille (Abbas) de Monasterio suo hac de causa*

causa egredi; nec extraneum sibi ad peragendum Sacrum Opus cogatur adducere. Convenientiùs enim est, inquit Hæftenus, ut Monachus apud monachos celebret, quàm alius quispiam. En! genuinum hujus, quem ex sacra citavi Regula, textûs, verborûmque sensum: quò nempe jubentur Abbates è suis promovere ad Sacros Ordines, ne pro functionibus Clericalibus externos compellantur accersere, & ipsi idecirco extra Monasteria vagari. Unde jam sic ratioecinor: vi Regula imperatur susceptio Sacrorum Ordinum, ergo vi Regula annectitur: & cùm annecti vi Regula aliquid, sit idem, ac per se aliquid convenire, ut ex num. 2. patet: ergo Sacer Ordo per se convenit Religioni nostræ. Hoc porro Argumentum ita promoveo: Quod est distinctivum unius statûs aut Ordinis ab alio, id ejusdem quoque est constitutivum: Clericatus est Ordinis Benedictini distinctivus ab alio statu & Ordine, v. g. Pachomiano &c. ergo Clericatus erit Ordinis Benedictini constitutivus, adeoque essentialis.

Dicta hætenus robur ex eo etiam accipiunt, quòd ea, quæ Ordini nostro *accidentalia* essent, apertè Sanctissimus Pater reliquerit arbitrio & discretioni Abbatis; quia igitur hanc circa ordinationem Clericorum potestatem Abbatibus expressè ademit: signum omnino manifestum est, non *accidentalem* & *arbitrarium* esse Religioni nostræ *Clericatum*.

Pondus suâ addit Authoritate Bonifacius Papa IV, ex cujus mente Monachis ea omnia licent;

licent, v. g. seminare DEI Verbum &c. quæ Sanctus Benedictus non prohibuit, ergo (legitimè infero) ea, quæ prohibuit ipse, non licent illis: prohibuit autem alienum accersere Sacerdotem, ergo id non licet, ergo proprium, & ex gremio habeant, necesse est.

Dicis: Sicut una hirundo (ut trita fert paræmia) non facit ver, ita unus duntaxat sacerdos, vel Diaconus non facit, ut tota inde communitas dicatur Clericalis.

Vel maximè facit: ut enim in universali olim Ecclesia, & privatis quibusvis Ecclesijs etiam Cathedralibus paucissimi extitère Presbyteri, prout S. Augustinus hac de re apud Mabillonium in *primo Resp.* conquestus est, ita in Monasterijs pariter non multi erant Sacerdotes &c. & hinc locus olim predicabatur celeberrimus, qui Presbyterum & Diaconum obtinebat: ut annotat Boerius. Postquam autem in Ecclesijs Sacerdotum numerus crevit, auctus etiam is est in Monasterijs, & tanto quidem fructu, ut numerus Sacrorum Ministrorum (inquit citatus Mabillonius) fuerit proportionaliter major in Monasterijs, quàm in Clero. Sicut igitur toti ac universali Ecclesiæ, in qua multæ etiam myriades Laicorum numerabantur, paucique erant Sacerdotes, Clericatus erat essentialis, ita Ordini pariter Benedictino essentialis est, & hætenus semper fuit, licèt pauciores olim in eo extiterint Sacerdotes. Unde sic denique concludo: Illud alicui est Religioni essenziale, sinè quo illa subsistere nequit; at,
D sinè

finè Clericatu Religio Benedictina, salvâ, ex quâ conflatur, Regulâ, subsistere nequit, ut abundè hactenus demonstravi, ergo.

Ocurris iterum; Per particulam *Si*, quam Sanctiss. P. Benedictus in hoc tuo contextu usurpavit, houd obscure insinuari, in Abbatis pendere arbitrio, num exterum velit accersere, aut domesticum è suis ad Sacerdotium promoveri.

Falleris omnino: ejuscemodi quippe heteroclitum extorquere sensum, est cum primis nefragari menti S. Gregorij, ut demonstratum.

Dein, Conjunctio *Si* ut variè à varijs usurpatur Authoribus, ita varium quoque conciliat sensum; Nonnunquam enim accipitur pro *conditione*, subinde pro *siquidem*, modò pro *utinam*, nonrarò pro ipsa particula negativa *non*, frequentius tamen pro *postquam*, *quando*, *ubi dum*, vel, *cùm* &c. ut videre est apud Ambrosium: Et in postrema hac acceptione pro *quando*, videlicet, vel *ubi* &c. usurpatum fuisse à S Patre istam inibi particulam, evincit manifestè ratio suprâ adducta, ut iste adeo evadat sensus citati textûs: *cùm*, *ubi*, vel *quando Abbas sibi Presbyterum* &c. *petierit*, *de Suis eligat*, nec more aliorum Monachorum exterum accersat. Quoniam ergo Abbas, aliunde Sacerdorem, vel Diaconum & non ex gremiò, ac è suis eligens, peccaret in Regulam, manifestè deducitur, ejuscemodi Monasterium, ubi nullum reperire foret Sacerdotem è gremio assumptum, nullatenus

Genui-

Genuino-Benedictinum fore, nec dignum, quod vel pro *sincero partu* à Gloriosissimo Parente, vel ab ipsa Sacratissima Religione pro *Filiis non degeneri* agnoscat; quin ipsi etiam *sinceris Benedictinæ Religionis Filij* in Regulam injuriæ ac irreverentes forent, si ejusmodi Monachos pro Germanis nihilominus Fratribus haberent ac venerarentur.

Quemadmodum igitur (quod probè observandum) Ordini Benedictino *Clericatus* per nullius decretum Pontificis competit, sed *vix ipsius Regulæ*: ita per nullam pariter is *Decretum* abrogari poterit; nō velit Ordinem in aliam omnino speciem mutatum, aut penitus eliminatum. Et verrò hujus tum Religionis filij forent quidem Religiosi & Monachi, nullatenus tamen *Genuino-Benedictini*. Veluti si ipsis Canonicis Regularibus demeretur *Clericatus*, Religiosi quidem permanerent, non tamen Clerici Ordinis S. Augustini &c.

Illustrior est adhuc alia, quæ hoc ipso ex textu Regulæ promanat, consequentia; ubi videlicet Sanctissimus Pater Jussit *Diaconos & Presbyteros* è suis eligi: Quis enim, si verborum corticem penitiùs rimetur, non palpabiliter intelligit, à Sanctissimo Patre tacitè insinuari plures in suis Monasterijs *Subdiaconos* coëxistere debere, è quibus seligere in *Diaconos* aut *Presbyteros*, qui digniores videbuntur, Abbas possit? quia necessum est, ad faciendum in articulo quocunque *delectum* complures præexistere, ac proximè quidem ido-

neos esse eosdem, ex quibus deinde prudens arbiter seligat, qui præ cæteris collibuerint.

Quòd si Divus Benedictus *Subdiaconatum* in suis Religiosis pro suppositò quasi non agnovisset, debuerat utique in hac Regula sua præmittere mentionem *Subdiaconatûs*. Si dicas, ut superfluum omissem id fuisse; quæro, quæ necessitas fuerit, ut *Diaconatûs* nomen exprimeret? cùm & hunc presbyteratus involvat, pariterque sicut & illum præsupponat.

Adverterit, opinor, prævalidum, quod ex ipsius sacrae Regulae pharetrâ deprompsi, telum hoc Adversarium nostrum; unde maturiùs illud prævertendo, f. 3. ait: *Regulam non esse de essentiâ statûs religiosi absolutè loquendo, &c.* inque suæ, quam mordicus tuetur, opinionis fulcrum, producit Lessium l. 2. c. 40. n. 9. & Pellizarium tom. 1. c. 1. n. 25.

Quæ ego omnia de Religione in communi spectatâ lubens admiserim, secus de eadem sumptâ specificè. Nec in alio loquantur sensu Authores citati, quàm generico.

Diversitatem verò Ordinum capi ex particularibus Regulis, & Constitutionibus Religionum, harumque fine &c., disertè docet isidem Lessius per geminas Conclusiones locis allegatis. Et quamvis sint tantùm 4. Regulae approbatae, Basilij scilicet, Benedicti, Augustini, & Francisci; tamen singuli (sunt verba Lessij.) *Sue Regulae proprias constitutiones adjunxerunt, quibus inter se discrepant, etiamsi eandem Regulam sequantur &c.* Caiaccini Azorius *Institut. Moral.*

ral. l. 9. c. 24. asserens, Religionum Instituta esse diversa, aut ex Regula, aut ex Constitutionibus.

Cæterum, Interpretes Regulæ nostræ planè omnes clarè supponunt, Clericatum vi Regulæ Ordini nostro esse annexum; ut Hæftenus, Smaragdus, Joan. Turecremata Card., Joannes Craesbeeck, Joannes Bertels, Antonius Perez, Joannes Caramuel, Gerardus Belga, Declarationes Patrum Congregationis Casinensis, Statuta Ordinis S. Benedicti Diocesis Leodiensis; S. Rhabanus, B. Rupertus Tuitiensis, B. Petrus Damiani Cardinalis & Episcopus Ostiensis; quorum postremus *Apologeticum Monachorum contra Canonicos* scripsit, to. 3. opusc. 28. ita Canonicos affatus: *Multùm, Fratres Charissimi, si digni estis auare, miramur, quomodo, & ob quam causam conamini nos à consortio & unitate universalis Ecclesiæ separare: cùm constet, à Monachis, non à Canonicis universalem Ecclesiā fundatam, gubernatam, & à diverso errore cribratam &c.*

Denique, aut errorem Typographi, aut Adversarij incuriam notat citatus Lessij locus, dum c. 41. dub. 1. n. 9. non autem c. 40. ea, quæ sunt allegata, Lessius scribit.



N. V.

Clericatum Religioni Benedi-
ctinæ per se competere ex præmissis
asseritur.

Formemus nunc ex præmissis Argumentum ad hominem, ac proprio Adversarium telo, verbisque propriis eundem impugnemus. Juxta illum, Clericatus per se habetur ab ijs, quorum Ordini ita ex natura & instituto suo adhæret, ut sinè illo tota Ordinis essentia destruat, sitque Religiosus talis Ordinis hoc ipso & ex origine suâ Clericus: atqui Ordini Benedictino ita ex natura & instituto suo adhæret Clericatus, estque Religiosus hujus Ordinis hoc ipso, & ex origine sua Clericus: ergo à Benedictinis Clericatus per se habetur. Minorem, quam negare solam potest Adversarius, & debet, sic ostendo: Cujuslibet Ordinis institutum & natura radicatur in Regula, à qua speciem suam, perfectionemque accipit: ergo cum Benedictinæ Religioni (sicut proximè demonstravimus) vi Regula Clericatus conveniat, consentaneum est, eidem Religioni Clericatus titulum, & prærogativam per se competere: & cum nata sit in Monachismo per Clericatum jam elevato, habeatque Patriarcham, suique Fundatorem in Clericatu pariter, & Diaconatu constitutum Religio Benedictina, non potest non dici ejusdem Religiosus hoc ipso & ex origine sua talis esse.

Hic,

Hic, Amice Lector! mirari satis cum Hæf-
 teno nostro in *Vit. S. Bened. prolegom. 18.* ne-
 queo, Gabrielem Pennotum *lib. 2. Historiæ*
Clericorum Canonicorum cap. 18. n. 4. & 7.
 asserere, Divum Benedictum suis non ut Clericis,
 sed ut laicis Regulam vitæ præscripsisse, in qua de
 Clericis Monachis ne Verbum quidem habeatur.
 Cum tamen sanctissimus Pater Regulæ suæ cap.
 60. de Sacerdotibus, qui in Monasterio habitare
 voluerint, præscribit, quomodo sacerdotes &
 Clerici suscipi debeant, & quomodo Officijs
 Clericatus fungi possint. Capite cit. 62. de Sa-
 cerdotibus Monasterij decernit, quomodo Mo-
 nachi ad Presbyteratum & Diaconatum sint
 promovendi, & quæ jam Ordinatis sint caven-
 da. Proinde non immerito hic Author à Fran-
 cisco Bivario S. T. Doctore in Apologetico suo
 pro Lucio Dextro §. 4. reprehenditur. Quod
 verò ulterius dicit: non legi aliquem illorum, qui
 se in prima saltem Ordinis institutione S. Benedi-
 cto instituendos tradiderunt, Clericum fuisse.
 Id manifestè refellit Diaconatus S. Mauri, quò
 Authore Fausto, viæ, vitæque ejus comite &
 Scriptore jubente ipso S. Benedicto insignitus
 fuit. In eadem vita occurrit Simplicius Pres-
 byter unus ex socijs, qui cum S. Mauro missi
 fuerant à S. Benedicto in Galliam, qui Sacrifi-
 cium Redemptionis nostræ obtulit. Ex quibus
 satis evincitur jam tum Sacerdotes & Clericos
 Monasterijs non defuisse: & hinc nō fallor, apud
 posterioris ævi Scriptores Græcos illa Monacho-
 rum distinctio, quā alij simpliciter Monachi,

alii verò Hieromonachi, five sacri Monachi dicebantur: hi enim Hieromonachi erant sacerdotes; de quibus vid. Joannis Meursij Glossarium Græco barbarum.

Ad Regulam interea iterum deveniendo, mirari jam desino, cur Mabillonius noster Regulam S. P. N. Benedicti indigitalit *magis clericalem*, quàm S. Augustini, cùm in hac nulla fiat mentio Clericatus, in illa verò crebrior.

Cæterùm, ex mente Clarissimi P. Roberti König nostri *lib. 3. Decret. tit. 35 n. 3.* ineptè dixeris Monachos ac Canonicos Regulares differre per hoc, quòd Monachi sint Clerici tantum *per accidens*, & ex essentia sua non Clerici seu Laici; è contra Canonici Regulares sint Clerici *per se*. & ex essentia: Conveniunt enim Monachi (pergit is) nostri temporis cum Canonicis Regularibus, & omnibus alijs Religiosis in tribus votis substantialibus, solùmque quoad fines peculiares, & in accidentalibus quibusdam differunt, conformiter particularibus Regulis diversis hominum humoribus accomodatis.

N. VI.

Clericatus non tantum per accidens competit Benedictinis.

Diximus hætenus de Ortu & Regula; ipsam nunc ergo Instituti rationem inspiciamus tantisper, & num vitam *unicè contemplativam* suis tradiderit Benedictus? seduli explore-
mus.

mus. Investigandum scilicet nobis est, qualis & ipse vixerit *Protoparens Benedictus*, & gloriosa pariter ejusdem *Posteritas*? Pro Sanctissimo Patre perorat divinum ipsum Oraculum, quò coelitus à vita *contemplativâ*, & *idolorum ad pugnam* (ut propria ipsius sonant verba) fuit vocatus. Quin ipse Mons Casinus, elinguis sit licet, eloquentissimè tamen disserit, & quantâ potest, solennitate testatur, se Benedicto in acceptis referre, quòd ab idolis purgatus, fidei lumine illustratus, in eamque sit evectus felicitatem, quòd tot Divorum illustre seminarium jure ac paisim audiat: quin imò, si humanis quoque comprobanda res suffragijs est, in testes sese offerunt Casinenses populi, quos in omni latè vicinia Sacro Monti adjectos Dei Apostolus in eam coelitus adeò provinciam vocatus lustrico tinxit fonte, fideique Romanæ Elementis imbuit, sicut infrà *de Actione* pluribus docebitur.

Tam luculenta Pij Patris vestigia pressopede insectatam fuisse æmulam ipsius *Posteritatem*, docet nos Suada Romana, & ipsa Urbs Orbis, cujus & Juventutem per gemina Gymnasia distributam in Sacro cantu, & Clerum in Sanctiori morum honestate instituit. Quemadmodum in allegato proximè titulo ostendetur, ubi totus pro Nostis Occidens stabit, gratusque fatebitur, se Gratia Legem à Benedictinis accepisse.

Nunc sciscitor ex Adversario; an hi tam præclari fructus, gesta que publica in vitam queant, debeantque *contemplativam* refundi!

An vivendi ratio à curis Animarum abstracta vigerit ibi, ubi per aperta litterarum Gymnasia introductæ sunt Musæ, & Juventutis erudiendæ Magisteria viguere? An denique nullæ vitæ activæ vestigia impresserint postero spectanda Orbi speciosi Evangelizantium pedes, qui in varijs hinc inde Regnis Gratia Legem & Christum pro nobis crucifixum cum Gentium Doctore Paulo promulgarunt?

Nolit, velit profitebitur demum hæc Activæ vitæ insignia esse.

Alterum igitur telum, quod contra Nos intorquebat, levi à nobis brachio in auras retorquetur: *Per accidens* (inquit) *Clericatus habetur ab iis, quorum Ordo ad vitam duntaxat contemplativam, & à curis animarum abstractam, sibi que soli vacantem institutus est, &c.* sed (subsumo ego) Benedictinorum Ordo ad vitam duntaxat contemplativam, & à curis animarum abstractam, sibi que soli vacantem institutus non est: ut allegata ipsius Sanctissimi Legislatoris, ejusque sequacium Discipulorum vita Inculcentissimè testatur, ergo. Certè aliter docuisse & aliter vixisse, suæque Doctrinæ per vitam contradixisse, ac Regulam adeò ipsam evergisse tantum Doctorem, nemo mihi unquam persuaserit. Et hic labor, hoc opus erit, si tota denique distinctiuncula excogitetur.

Eâdem scilicet facilitate sese expediet Adversarius, quâ fide insinuavit, supposuitque Divum Patrem nostrum perfectum quidem fuisse Monachum, absque omni tamen Clerica-

ea; quasi jure novô, & hætenus inauditô ad Clericatûs titulum unus non sufficiat Diaconatus.

Cæterum, Beatissimum P. Legislatorem nostrum, tanquam vivum & alterum suæ Regulæ Exemplar vitæ *activæ* fundamenta ipsummet posuisse; ipsum quoque sacram Regulam vitæ *activæ* exercitia comprehendere, solidè non minùs demonstrat ex varijs, quæ in suis exercebant Coenobijs Monachi, artibus, ac labore manuum, quàm dilucidè dissolvit Adversariorum Oppositiones Hætenus noster l. 2. *disq.* Mon. *disq.* 4. & 5.

N. VII.

Multò minùs dispensativè tantùm & ex privilegio.

Insolens æquè mihi videbatur, quòd tam præfidenter ausus sit Antagonista dicere, Nostris *dispensativè* tantùm Clericatum competere: quando igitur, in quo capite, in quâ Regula Divus Pater interdixit, ne Clericatum Nostri susciperent, ut dispensatione ad illum assumendum opus sit? aut, quò se unquam votô ad detrectandum pro omni tempore Clericatum Nostri obligarunt, quò absolvantur? Evolvat quisquis velit, & revolvat Regulæ nostræ pagellas, ne apicem inveniet, aut syllabam, ubi quid hujusmodi præcipiatur.

Nullam pariter vel perfunctoriam tantùm
finis

similis voti mentionem facti dabunt; aut quis Romanorum Pontificum in tali cum Nostri voto dispensavit? nominasset, credo, illum, siquem scivisset Adversarius. Sed quid hæc frustra urgemus, ubi suppositò manifestè laborat argumentum? nec voluit ullus Pontificum, nec dispensare potuit, ubi materia defuit dispensandi, & nullum ubi vinculum, quod tantisper relaxaret Vicarius Christi.

Tam longè profectò absuit mens ejusmodi à sanctissimo Patre nostro, ut potius in singulari Capitulo methodum præscriberet, quàm actuales Presbyteri, Clericique in Religionem suscipi possint, ac debeant; unde meridianâ luce clarius est, quòd nullo prorsus titulò prætenso ejusmodi *Dispensatio* colorari, nec ipse etiam Adversarius ullum allegare Fundamentum possit, quò probet, se non perperam & abusive locutum fuisse.

N. VIII.

Nec denique ex Jure duntaxat novo.

QUia identidem Adversarius inculcat, & exprobrat, nullo antiquò, sed novo tantùm Jure Monachos fieri posse Clericos, ostendendum nobis est, quòd èt in hoc fallatur. Allegat ille toties pro se Capit. Quod Dei, de statu Monachorum; hic verò sequentia hæc expressè verba leguntur: per Antiquos

quos Canones etiam Monachi possunt ad Ecclesiarum parœcialium regimen in Presbyteros ordinari. Quid luculentius tam claro, & nullius effugij, aut interpretationis tortæ capaci textu? Ita per Antiquos decernitur Canones, & in eodem quidem Capitulo, quod utpote sæpiùs citatum, sedulò Adversarius inspexerit. Vel infelix igitur, dum non observavit; vel non admodum sincerus est, dum suppressit textum, qui eximere dubium utrique nostrum poterat.

Adyciamus pro tituli hujus coronide, priusquam objectorum solutionem aggrediamur, mirabilem, quò Adversarius usus est, argumentandi modum, quando, ubi definit, quibus *per se* Clericatus, & quibus *per accidens* tantum conveniat? in Exemplum mox opponit pro primo quidem Canonicos Regulares, Benedictinos autem pro secundo, ita differendo: *Ab illis Clericatus habetur per se, quorum &c. ut à Canonicis Regularibus &c. Ab illis autem per accidens, quorum &c. sicuti sanctus Benedictinus, alijque perfecti fuerê Monachi, absque omni Clericatu. &c.*

Amabo DEUM! qualem mereretur plausum Logicus de Necessitate Logicæ &c. ita Syllogizans? Illud est simpliciter & per se necessarium ad alias scientias, sinè quo comparari istæ nequeunt, ut est Logica: Nunquid talis poneret pro supposito ac exemplo id, quod in questione versatur? Nunquid Defendens negaret suppositum, deinceps in meliori forma ab Argumentante probandum? Ignoscat & mihi proinde

proinde Adversarius, si exigam, ut suppositum suum demonstret: hoc dum ille tentabit, ad objectorum solutionem ego procedam.

N. IX.

Diluitur primum Adversarij Argumentum.

ENthimema cudit Adversarius fol. 51. cujus *Antecedens* ingenti variorum, quæ ex summis Pontificibus, Canonibus, Concilijs, Doctoribus ac sanctis Patribus &c. depromptit, Argumentorum apparatu instruit: utque contendat, Monachos non nisi *per accidens* Clericatu gaudere, totus in eo sudat, ut Canonicos Regulares *per se* Clericos esse demonstret; quasi verò modò subsistat *antecedens*, hoc ipsò in dubium nequeat amplius trahi consequens. Postquam igitur multis se demonstrasse credidit, Canonicos Regulares esse Clericos *per se*; subinfert continuò, Monachos esse Clericos *per accidens*. Ego verò, ut plus tribuam Adversario, quàm à me forsan expectasset, transmitto *antecedens* cum tota testium, suffragiorumque & rationum in idem semper recidentium voragine: at illud nego, & pernego, ex eo, quamvis liberalissimè concessò, quidquam contra Nostros deduci posse. Quis enim sustineat ejusmodi enthimema: Paulus *per se* nobilis est, ergò Petrus nobilis est tantum *per accidens*? Nunquid Paulina Nobilitas collit

tollit Petrinam? Unius opes hominis suas alteri eripiunt divitias? aut bonus quis esse nequit, nisi malus sit alius? vel Divina Bonitas dum in unam se creaturam diffundit, ita exhauritur, ut derivare quid in aliam deinceps non possit?

Directè autem, & in formâ, quæ omnem Disputationi pulchritudinem conciliat, ut respondeam, consequens sic distinguo: Ergo Monachi sunt Clerici per accidens, qui in Clericatu non sunt nati, Transeat: qui in Monachismo ad Clericatum elevato nati, & ad vitam non contemplativam tantum, sed & activam vi institutionis ipsius vocati sunt, quales esse Benedictinos adductæ supra rationes probant: Nego consequentiam.

In eundem distinctionis sensum respondeatur, si differentia fiat, prout fieri debet, inter Monachum abstractivè & concretivè, ex genere, & in genere suo acceptum; aut si Monachus universalissimè, suisque à differentiis præcisus inspicatur, vel prout ad certam jam differentiam, Benedictinam v. g. contractus. Est scilicet in Religione Benedictina nobile complexum utriusque speciei, tam Monachorum, quàm Canonicorum perfectiones ac decora participans; in quo pulcherrimo foedere Monachismus, & huic vi Regulæ, adeoque per se conveniens Clericatus sic in unam coaluerunt, ut ex mutuo augeant splendore, & promiscue in Clerici titulo Dignitas per Monachi sanctitatem in uno eodemque homine mirificè illustratur.

Sed

Sed quid ad tot Authoritatum, suffragio-
rumque cumulum? Veneror pro eâ, quam debeo
cuiilibet Classi, reverentiâ: Et, cum suum Dominis
Canonicis, quem præferunt, splendorem non
invideam (modò non cum alieni honoris dispen-
diò fiat) supervacaneum, duxi, exactius scru-
tinium fore, nec operæ pretium, ut aut fidem,
aut vim textuum anxius explorem; præsertim,
cum Eorum Clericatum lubens admittam, &
ea, quæ conflantur ex purâ authoritate, infe-
rioris sint generis, nec nisi *extrinsecam* confe-
rant *rationem*: nobis è diverso *intrinseca* sub-
ministratur ex ipsius Regulæ visceribus, quæ
Sacerdotes è gremio jubet eligi, & in alio rur-
sus capitulo Clericos in Religionem admitti.

Et verò si authoritatem quoque à nobis
exigat Adversarius, nec illa deest, Magnus im-
primis Basilius c. 18. *Constitutionum monastica-
rum*, cujus titulus est: *ad Canonicos in Cænobio*:
rerum, juriùmque Ecclesiasticorum haud du-
biè scientissimus, *Canonicorum* titulò Mona-
chos insignivit. Et Concilium Ephesinum Cle-
rici tribuisse nomen legitur apud Mabillonium
in *Responso primo*; apud quem eundem refertur,
quòd Gregorius Turonensis, dum de Monachis
loquitur, eos Ordinariè Clericos appellarit. Ex
Marculpho quoque lib. 2. cap. 2. Et aliis colli-
gitur, Monachos nuncupatos fuisse Clericos, ita
ut accipere tonsuram monasticam idem fuerit, ac
fieri Clericum. Nec ad rationem Clerici plus
requirit modernus quidam & celebris nuper in
Univer-

Universitate cenipontana Juris Canonici Professor, quàm Personam ad cultum divinum specialiter deputatam.

Adde præterea Anastasium Romanæ Ecclesiæ Bibliothecarium, qui in Greg. IV. Benedictinos nuncupat *Monacho-Canonicos*.

Quin ipsum Concilium Augustodunense sub Leodegario Episc. & Martyre Benedictinorum Ordinem *Canonicum* appellat; sic ejus Canon. XV. audit: *De Abbatibus verò, vel Monachis ita observare convenit, ut quidquid Canonicus Ordo, vel Regula S. Benedicti docet, & implere, & custodire in omnibus debeant &c.*

Et hinc, credo, factum, ut Sapientissimus Leonardus Vairus, Beneventanus, SS. Theologiæ Doctor in libris *de Fascino Canonicus Regularis Ordinis S. Benedicti* aperte scriberetur.

Suum denique addit calculum S. Thomas, graviter pronuntians: in omnibus convenire Monachos cum Canonicis Regularibus, solum si excipias severiorem disciplinam: *Omnia habent (Monachi) quod est Canonicorum Regularium, sed cum majori arctitudine &c.*

N. X.

Ordinem Canonicorum Regularium Monasticum esse pluribus evincit Mabillonius.

O Mittere hîc ea nequeo, quibus eruditissimus Mabillonius noster summam, ut ita loquar, affinitatem, necnon omnimodum,

modam, quam Adversarius tantopere horret, identitatem Canonicos Regulares inter & Monachos eruditè demonstrat. Sic igitur è re nostra proloquitur.

Verùm, etſi Canonicis Regularibus concederetur, eos ut *Canonicos* eſſe Clericos, talesque à ſua origine fuiſſe, non ineptè dixeris, eos ut *Regulares* ad conditionem & ſtatum Monachorum redigi; & quemadmodum Benedictini ſunt *Monacho-Clerici*, ita eos eſſe *Clerico-Monachos*. At jam oritur quæſtio, utrum qualitas Monachi Clerico ſuperveniens ipſos non ad eundem ſtatum reducat, quo ſunt illi, qui à ſua origine & Monachi, & Clerici ſunt? Enucleemus utrumque caput, & à primo quidem ordiamur.

Conſtat ex testimonijs Veterum per *Regularem* ſemper fuiſſe Monachum designatum, ſempérque Ordinem Regularem oppoſitum fuiſſe Ordini Canonico. In Concilio Vercellenſi Anno 755. celebrato hoc diſcrimen ſignanter notatur Canone II. quò decernitur, ut conſurâ initiati vivant aut in Ordine Regulari, aut in Ordine Canonico: *ut in Monasterio ſint ſub Ordine Regulari, aut ſub manu Episcopi ſub Ordine Canonico*. En ! diſcrimen conceptis verbis expreſſum. Status *Canonicus* abſque dubio eſt Status Canonicoꝝ ſub Episcopo viventium, & *Regularis* certè Monachorum.

Idem diſcrimen occurrit in Capitularibus Caroli M., in quibus inſtitutio Canonica oppoſitur Regulari, id eſt, Monastico: *De relin-*
quen-

quentibus *seculum*, ut *unum* è *duobus* eligant, aut *pleniter secundum Canonicam*, aut *secundum Regularem Institutionem vivere debeant*. Præterea, vivere *Canonicè*, aut *regulariter*, erant duo termini, quibus exprimebantur hæc duo vitæ genera, uti discimus ex Canone *xxi*. Concilij Moguntini Anno *813*. celebrati, ubi de *Canonicis* dicitur, *si Monachi fieri voluerint, regulariter vivant, sin' autem, Canonicè vivant omnino*: & Canone sequenti de *Clericis vagabundis* dicitur, *eos neque Canonicam, neque regularem vitam ducere: sinè canonicâ vel regulari vitâ degentes*. Denique Canone *40*. secundi Concilij Cabillonensis jam supra memorati statuitur, ut *Sacerdotes exauthorati relegentur ad Monasteria Canonica, aut Regularia, id est, Monastica: In Monasterio Canonico, aut Regulari*. Quam ob rem etiam Authores primarum Congregationum Canonorum Regularium in loca à sæculi commercijs semota se subdixerunt, videlicet quatuor illi Canonici Avenionenses, qui urbe egressi Ecclesiam *S. Rufi* incolæerunt. Aroaisenses in locum magis solitarium se receperunt. Gulielmus de Campis selegit Ecclesiam *S. Victoris* in Suburbanis Parisiorum tum Prioratum à *S. Victore Massiliensi* dependentem, præ cæteris primos Authores Congregationis *Vindesheimensis* in Solitudines horrendas concessisse Monasteria *Vau-verdense*, & *Rubri-Claustri* in *Brabantia* inter densas silvas constructa fidem faciunt. Unde & vitæ ratio non multum à Monachorum vita abludebat, quorum

rum nomen non erubuerunt, quoties rebus suis commodum, expediensque censuere.

Ex his, aliisque testimonijs, quibus scientes supersedemus, constat, Ordinem Regularem eundem esse cum monastico, & vivere regulariter esse vivere more monachorum.

Hanc ob causam Canonici, qui sæculo xi. severiores vitæ leges amplexi sunt, Regulares se dici voluerunt, ut significarent, se Canonico-Monachos esse. In nobili controversia ob Authorem Librorum de Imitatione Christi exorta, cum Benedictini Canonicis Regularibus objecissent, Authorem à Canonicis Regularibus vindicari non posse, quòd ipsemet se Monachum fateatur, ultimò Scriptò responderunt, Thomam de Kempis & se, & suos Confratres sæpè monachi nomine compellasse. v. g. Opusculo II. *O! Monache! ad quid venisti? quare mundum reliquisti? Cur cappam istam induisti?* Et in sermone ad Novitios: *Frater Monache.* Et alibi: *O Religiose Monache!* Ita ante annos undecim Canonici Regulares locuti sunt: At cum jam eorum rationibus nomen Monachi officiat, aliam chordam tangunt. Monachi nomen summis viribus à sua Professione eliminare, & in Benedictinis deprimere contendunt. At ringantur licet, & reluctentur, quantum volent, necesse est, fateantur, quòd sint Regulares, & ut tales ad Statum, & Conditionem Monachorum reducantur.

Paulus Veronensis sæculi xv. ti celeberrimus Canonici Regularis fronti epistolarum suarum

Mo-

Monachi nomen ita præfigit: *Paulus Veronensis Monachus summo Cardinali Sanctæ Crucis appellato &c. Paulus Veronensis Monachus doctissimo Præceptori suo Guidoni &c.* Quod sæpius alibi repetit. Non solum privati, sed integra Collegia Canoniorum Regularium nomen Monachi non erubuerunt. Canonici Regulares S. Leodegarij Sueffionensis fidem facturi, Ecclesiam parochialem uni ex eorum numero à nostris datam nulli præjudicio futuram Abbatiæ S. Crispini ita loquuntur: *Joannes permissione Divina Abbas Monasterij S. Leodegarij Ordinis S. Augustini Sueffionensis, & totus Conventus ejusdem loci omnibus, & singulis, ad quos presentes pervenerint, salutem.* Ad perpetuam rerum memoriam attestamur, quod quamvis Monachi seu Canonici nostri Monasterij & Ordinis regere, & obtinere possint Ecclesias parochiales nostrorum Monasterij & Ordinis ex juris permissione, eò quod Regulæ serviunt laxiori &c. Die ultima mensis Novembris anno Domini Millesimo quadringentesimo sexagesimo primo. Ex his litteris, quæ Anthographæ in Abbatia S. Crispini asservantur, obiter videre licet, Canonicos Regulares non vi Statûs sui, sed ex juris permissione ad procurandas Ecclesias parochiales admitti, sed quod præcipuè causæ nostræ favet, est, quod nomen Monachi Canonico præponant: *Monachi seu Canonici nostri.*

Facile foret, alia complura in hanc rem coâcervare testimonia, sed finiendæ controversiæ suffecerit, quod Anno 1365. Concilium An-

degavenſe ſubminiſtrat. Id Concilium cùm primo loco de Monachis egiffet, cap. 20. de Canonicis Regularibus S. Auguſtini ita decernit: *Abuſionibus quorundam Canonorum Regularium noſtræ Provinciæ Turonenſis, qui ſecundùm Beati Auguſtini Regulam debentes laudabiliter vivere . . . obviare volentes, approbante Concilio duximus, quod Monachi dicti Ordinis, &c.* His ita dictis, quis negaverit, Monachi nomen æquè Canonicis Regularibus, quàm Benedictinis convenire. Poſtremo nulla cauſa eſt, cur ſe à Statu Monaſtico ſejungant, niſi fortè ex hoc ſolùm capite, quòd ex ſententia Innocentij III. *Regula laxiori inſerviant.*

Jam ſi conditio Monachi ex mente Canonorum Regularium ſacerdotem aut Epiſcopum in Ordinem redigit, aut degradat; ſi ad exauthorandum Papam ſatis eſt, ut Monachum induere cogatur, quare refragantur, ne concludamus, conditionem Monachi Clerico ſupervenientem in ipſorum perſonis, eoſdem à ſtatu Clericali dejicere?

Fortè dicent, ſe non eſſe Regulares, & conſequenter non niſi ex accidente Monachos?

At non ſunt illi virtute ſuæ profeſſionis Monachi, quod æquè eſſentiale ipſis eſt, atque eſſe Canonicos?

Si Regulares ſunt, & conſequenter Monachi vi ſuæ Profeſſionis, quare non eundem finem particularem cum Monachis habebunt, qui eſt, ex ipſorum ſententia, *proprie ſaluti incumbere, perfectam Saculi abrenuntiationem*

pro-

profiteri, esse mortuum mundo, plorare & non docere, donec necessitas aliquarum Ecclesiarum, quarum Domini sunt, eos ad animarum salutem procurandam evocet? Ita revera illi faciunt, etsi nolint vocari Monachi.

Verùm communis loquendi populorum usus, qui ductum naturæ sequitur, eos semper Monachorum nomine compellabit, etsi ringantur, fremantque. Haftenus ille: è quibus nonnulla, ne pungant, omitterem lubens, si fide id fieret integrâ, & Authore tantò non corruptò.

N. XI.

Dissolvitur secundum Adversarij Argumentum.

AB indirecta probatione directam insinuat Adversarius, & delibando tantùm, quod formari inde poterat, argumentum, dicit: ex *Habitu* præterea, *sine*, ac *definitione Monachi* patere, quòd *Monachi non nisi per accidens Clerici sint.*

Ab *Habitu* ordiendo solutionem, capere vix possum, an ideo minùs *clericalis* sit *Habitus Monachorum*, quia Christi plùs sapit humilitatem, & è viliori consuevit materie componi? certè & Apostoli in *pellibus caprinis, & melottis* incedentes, nobis assimilantur magis, quàm modernis *Canonicis Regularibus*, nihil nisi *splendidi, nitidique præferentibus.*

Oportet mens alia fuerit, alia Theologia Canonorum Regularium laudatissimis Majoribus, quos ut plenius cognoscas, accipe pauca, quæ de illorum habitu appono ex vita S. VVilhelmi Roschildensis. In Abbatia S. Genesee (refertur ibi) comedebant panem furfureum, & herbas agrestes, habitus erat pannosus, & ex abjectis vestibus. Et universim omnes non acceptabant aliud nomen, quàm Fratrum.

Verbô, Institutum Canonorum Regularium penè nil differebat ab Instituto Monachorum, unius penè, ejusdémque propositi, ut ait Urbanus II. Imo vi sui Statûs à monastica professione alieni non sunt; et si à Sanctorum Monachorum proposito non putentur sejuncti: ut loquitur Innocentius III. & probatum est mox fusiùs.

Testatur noster pientissimus Hæftenus disq. Mon. l. 5. tr. 7. disq. 2. Canonicos Regulares cucullam adeò aliquando ambivisse, ut Synodali constitutione id illis inhibendum fuerit. Unde in Concilio Aquilgranensi expressè statuitur, ut Canonici cucullas non induant.

Nec tamen, ut obiter hîc subnotem, asseverare Adversarius veretur: Cucullum esse ita Monachorum proprium habitum, ut Canonicis Regularibus NON NISI ob publicum crimen, veluti in penam delicti inijeriatur.

Amabo DEUM! quodnam publicum, aut quale unquam commisere crimen, delictumve Sanctissimi Illi Ordinum fundatores ac Reformatores Bruno, Oddo, Ludovicus Balbus, An-

Antonius Paduanus, Dominicus; qui omnes sepositò, quem semel assumpserant, Canoniorum Regularium habitu, cucullam monasticam suis ultro iniecere humeris? ubi *publici*, quò notamundique sanctitatem contaminarint, *criminis* tabulæ? ubi notorij, qui desiderantur, delicti testes? Nempe *insana precedendi libido*, & *congenitus erga splendorem monasticum livor*, ita aliquos excacant, ut & *Superos infestare*, & *Acheronta movere audeant*. Quæ resorbenda tandem quòd vel invitus propinem, indulgebis utique Adversarius, qui (fol. 6.) eadem, & longè acerbiora *Vindici nostro* innocenti nocens forbenda porrexit, quando *plumbeo eum ac petulantia assertò*, ineptissimè insuper, *blasphemo quoque in spiritum s. calamo necnon haretico spiritu ductum*, asserere non est veritus.

Quam, obsecro, inquires Amice lector, ob causam, tam gravi castigatur Vindex censurâ? Paucis, at sincerus edissero: Ex illo Juris Canonici *cap. quod Dei Timorem de Statu Monachorum*, ubi dicitur, *Canonici Regulares Regulae inserviunt laxiori*, ita intulit Vindex: Si prædicti *Sancti Bruno, Oddo &c. ex laxa illa Regula perfectionem sese consequi tam facile posse confisi fuissent*, non dimisissent Regulam laxissimam, & ad strictiorem anbelassent.

Hoc enim vero Vindicis erat ac unicum delictum, quò injuriam adeo censuram mereri Adversario videbatur: exhibui eam Viris doctis, & probis; & ad ejus aspectum attoniti, inhorruere, utque erroneam, privato homini

incompetentem, ac Heterodoxis omnino scandalosam penitus rejecerunt.

Et vero, ne in argumento per se evidente multus sim, quis alius S. Brunoni finis fuerit, ut S. P. N. Benedicti, quam Suis proposuit, Regulam, aliàs minimè laxam, asperis adeo constringeret Statutis: quàm quòd confideret, eos *faciliùs* perfectionem ita consequi posse &c. ? An idcirco *blasphemus in spiritum sanctum*, ac ipsam, quam profiteor, Regulam, imo *heretico spiritu inductus* audiam?

Vel, an ideo improprie est Clerico monasticus habitus, quia formam dictat, & continet singularem? urinam Adversarius Romanos lustrâset accuratior fastos; deprehendisset enim Clericos à Nobis sui vestitûs rationem olim traxisse, nec puduisse illos, ut, quorum Exemplis tam gloriosis ad virtutem animabantur, eorum quoque habitum imitarentur; quando enim Benedictinorum tanta extitit Sanctitudo, ut ex illis plures in Pontifices creati, in aureo Ecclesiæ Candelabro, & Romani Pontificatûs apice mererentur exponi publico, Romani Clerici ceu morigeri eorum filij censuerunt, dignissimum esse, ut summi Christi in terris Vicarij non mores tantùm, sed & vestes vivâ ipsi æmulatione exprimerent, versò violaceò, quem priùs usurpârunt, colore innigricantem. Videatur Hæftenus loc. cit. *disq. 1.*

Finis porrò Religionis nostræ cùm sit is ipse, quem juxta ipsius Adversarij confessionem Canonici Regulares sibi præfixum habent, non video,

video, ex quo capite eodem licet onere fungamur & munere, non idem tamen honoris & prærogativæ titulus nobis admittatur? *Finem* sui Ordinis statuit Adversarius *f. 48. in Choro ac Divini Officij celebratione*; nec malè, nam juxta Lessium, loco suprâ citato, *Canonorum Regularium præcipua functio est, horas Canonicas in Choro piè decantare.*

At, quis nescit, in his duobus potissimum Benedictinos & occupari quotidie, & quòd industriè, ac cum insigni accuratione id ipsum factitent, ab alijs passim deprædicari?

Hoc certè ut feliciùs præstent, non sinè ingenti, multiplici ac pertinaci labore Juventutem erudiant in Musicæ artis disciplinâ, quæ proindè permultum debet Benedictinis, quòd hac, quam vivimus, ætate insigniùs floreat.

Hunc pro domo Dei Zelum utique hausserunt ex sanctissimo Parente, qui in utero adhuc materno conclusus, cecinisse fertur, atque sic pulcherrimum dedisse omen Cultûs in Divino Officio quondam propagandi.

Nam per integra 12. capitula tractavit de *Divino Officio ordinando*: ac ipsum locupletavit eximiè, cum à duobus pientissimis juxtâ, atque Doctissimis Cardinalibus Bellarmino & Joanne Bonâ in *Tract. de Psalmodia divina*. Septimæ, quam vocamus, *Horæ Canonice*, seu *Completorii* Auctor habeatur. Prout refert Reverendissimus D. Abbas Geisser in *Oculo Extatico S. P. Benedicti fol. 272.* Ex Regula quoque D. Benedicti habetur, quòd singulis Horis ab Ecclesiâ

siâ præponatur : *DEUS in adjutorium meum intende. Bened. Hæsten. Disq. Mon. l. 2.*

At, ex ipsa Definitione Monachi alium colligi finem, Adversarius contendit : examinemus itaque, utrùm & Definitio, & consequentia inde deducta subsistat?

N. XII.

Examinatur Monachi Definitio, & annexa ab Adversario Corollaria.

Monachus (inquit fol. 56.) propriè ac strictè definitur, qui tribus Regularium votis obstrictus, in sancto secessu propriæ salutis incumbit, ac curis omnibus tam secularibus, quàm Clericalibus exutus, uni Deo per amorem & contemplationem adheret.

Hanc Definitionem statuit Adversarius, sed nullâ prorsus Authoritate fulcit, nisi domesticâ : quam equidem sic admitto, ut eum, cui exactè illa convenit, è Monachorum bonorum syllabo non arceam; Eandem tamen penitus rejicio, quatenus Adversarius fol. 58. deducit ex eâ, quod Monachus sit ex essentia sua Non-Clericus, seu laicus; & quòd per dispensationem seu ex accidenti solùm sit Clericus.

Jam enim superiùs abundè ostendimus, Nostros Clericû nomen per se habere idcò, quia vi Regule, & Ortûs, seu à Sacris incunabulis tales sunt, vitæq; simul activæ incumbunt; quin imò, quia eundem cum Canonicis

Re-

Regularibus finem, Chorum scilicet, & Officij Divini Celebrationem habent, quorum ultimum manifestè satis Clericatum involvit, excluditque statum laicalem, in quem nos deturbare, sed frustra, conatur Adversarius.

Unde si ad rigorem Monachismi Non-Clerici sive laici exigeretur conditio (quemadmodum deducit Adversarius) nego in isto Nos sensu Monachos esse: simul tamen & illud nego, quòd propria ratio Monachi idipsum requirat: si namque ad essentiam Monachi Non-Clericus seu laicus homo exigeretur, quo Jure potuit Sanctissimus legifer noster statuere, ut & Presbyteri in Religionem admitterentur? Quò insuper pactò Syricius Papa contra Monachismi essentiam decrevit, ut Clericatu Monachi deinceps insignirentur?

Fatemur equidem ultro, quòd conceptus Monachi in genere, & ut sic, abstrahendo à ratione Originis & Regulæ (v. g. Benedictinæ) non involvat per se, sive secundum se rationem Clericatus; illum tamen nec excludit: sicut ani-

mal per se quidem, seu secundum se

non est rationale; tale tamen nec

excludit: & ubi semel rationale

evadit, non per accidens,

sed per se tale est.



N. XIII.

*Respondetur ad Auctoritatem**S. Thomæ, & Gratiani.*

INter omnes, quas contra nos ponit Adversarius, Princeps Auctoritas est S. Thomæ: qui 2. 2. q. 189. a. 8. ad 2. Canonicis Regularibus nonnihil favere in speciem videtur, sicut & Gratianus.

Cujus tamen utriusque textum Doctissimus Mabillonius noster tam luculenter in partium nostrarum favorem exponit, ut superfluum foret, quidquid tanto Authori superadderetur; maximè cum ejusdem Paraphrastes Plurimum R. Religiosissimus & Clarissimus P. Franciscus Mezger SS. Theologiæ & J. U. Doctor Controversiarum ac SS. scripturæ in alma Universitate Salisburgensi Professor emeritus &c. permultum & ipse roboris suâ, quam illustri eruditione, famâque pari in dicta Universitate comparavit sibi, auctoritate afferat; in quorum proinde reverentiam nec aliâ, quàm Mabillonij responsione, nec alijs, quàm prælaudati Paraphrastis latinis verbis utar.

Quemadmodum verò (inquit Mabillonius) Adversarij abuti solent Hòc utròque, (id est, Divo Thoma, & Gratianò) modò prorsus mirabili, ita non possumus non circa hoc nonnihil subsistere.

S. Thomas igitur tractans quæstionem, an permissum sit transire de una Religione ad aliâ? devenit specialiter ad Canonicos Regulares,

lares, & quæri, num ad vitam Monasticam transire possint? ut ordinariâ suâ soliditate exactè hanc difficultatem resolvat, supponit, quòd Monachi, & Canonici Regulares (hoc enim ordine illos ponit) sint destinati ad functiones vitæ contemplativæ, inter quas officia Clericatûs, hoc est, Divina Mysteria primatum tenent. Supponit postea, quòd Canonici Regulares juxta suum statum relationem habeant ad Clericatum, & sint destinati ad hæc Sacra Mysteria: verùm, quia hoc nomen, *Monachi* non includit *per se* conceptum Clericatûs, possunt esse duæ Monachorum species, quarum una sit merè laicalis, altera Clericalis. His suppositis S. Thomas resolvit quæstionem, dicendo: quòd Canonici Regulares revera non possint transire ad statum Monachorum, qui essent purè laici, suppositò, si ejusmodi species daretur: possint autem transire ad statum Monachorum, qui essent Clerici & destinati ad serviciâ Altaris; siquidem isti habent, quæ conveniunt Canonice Regularibus, videlicet, Clericatum, & habent aliquid amplius, nempe majorem austeritatem. *Sed si Monachi, inquit, sunt Clerici, Sacris Mysteriis obsequentes, habent id, quod est Canoniorum Regularium cum majori arctitudine. Et ideo &c.* Ecce! quid in hoc puncto dicat sanctus Thomas. Sed ubi reperietur, quod doceat, Monachos hujus secundæ speciei non esse Clericos nisi *per accidens*.

Verum quidem est, quòd supponat, quòd Conceptus Monachi in se non includat Clericatum,

tum, & consequenter possint dari duo genera Clericorum, & non Clericorum: sed dicere, quòd hi, qui sunt in statu Clericorum, non sint tales nisi *per accidens*, est idem ac si quis diceret, quod animal in se, *per se* non includens rationale, non sit rationale nisi *per accidens*.

Benedictini sunt Monachi, verum est: sed Ordo illorum *natus est in Clericatu*, fueruntque semper destinati ad servitia Altaris. Et sic licet quoad qualitatem Monachi per præcisionem metaphysicam non sint destinati ad Clericatum: in qualitate tamen *Benedictinorum* sunt æquè destinati, atque Canonici Regulares: *Habent id, quod est Canoniorum Regularium cum majori arctitudine*. Igitur non sunt tantum tales *per accidens*, cum sint tales *vi sui status* tanquam *Benedictini*, si aliàs non forent, in quantum sunt Monachi Cœnobitæ.

Verum quantumvis libenter concedatur, quòd conceptus Monachi præcisè sumptus non includat in se Clericum, fatendum nihilominus est, quòd Argumentum, quò communiter utuntur ad probandum, quòd status Monachorum ex sua origine non sit status Clericalis, sustineri prorsus non possit,

Argumentum hoc innititur fragmento ejusdam epistolæ S. Gregorij, relato à Gratiano 16. q. c. 2. in his terminis: *Nemo potest & Ecclesiasticis obsequijs deservire, & in Monachica Regula ordinatè persistere, ut ipse Monasterij destructionem teneat, qui quotidie in Ministerio Ecclesiastico cogitur permanere.* Hinc ali-

aliqui inferunt, quod status monasticus cum Clericatu sit impossibilis; omnesque conantur exinde argumentum formare, quò ostendant: quòd in conceptu Monachi non includatur conceptus Clerici.

Sed potest securè dici, non fuisse lectam integram epistolam, ex quâ hoc fragmentum desumptum est, quamquam posteriores sint adhuc tolerabiliores, quàm primi. Gregorius Magnus (*lib. 4. Ep. 2.*) in hac Epistola, quæ scripta est ad Joannem Episcopum Ravennatem conqueritur, quòd certi Ecclesiastici sæculares, fingentes se ducere vitam Religiosam, præsumperant sibi arrogare regimen quorundam Monasteriorum. Magnus hic Papa dicit, quòd hæc duo officia sint incompatibilia: siquidem isti Ecclesiastici, cum ex unâ parte essent alligati alienæ Ecclesiæ, non potuerunt huic officio conjungere exercitium vitæ monasticæ, ad quod eos obligabat qualitas Monachi, multò minùs adhuc regimen alicujus Monasterij, quod ab illis exigebat qualitatem Superioris. Ideò Joanni mandat, ut hunc abusum corrigat, & dicit, se nunquam toleraturum, ut Monasteria destruantur per ambitionem ejusmodi Clericorum: *Nullò modò patior, ut loca sacra per Clericorum ambitum destruantur.* Ecce substantiam hujus Epistolæ!

S. Gregorius *l. 6. ep. 40.* easdem querelas renovat in epistola scripta ad Marinianum Joannis successorem. Circa quem Gratianus annotavit, quòd Clerici isti Ravennates, sub

speciè Religionis , occupabant Monasteria , quando habitum monasticum assumerent , & titulum suum relinquerent : *qui simulata , inquit , Religione Monasterijs cupiebunt præfici , non transeuntes ad Monasticum habitum , neque renuntiantes Ecclesiasticæ militiæ.*

Jam quæro , an rationabiliter inferri possit ex hoc primo loco S. Gregorij , quòd status Monasticus sit oppositus Clericatu , sive , quòd conceptus Monachi non includat in se conceptum Clerici ?

Gratianus 16. q. 1. c. 3. qui his duobus erroribus occasionem dedit , commisit & alium ; comparando textum Epistolæ S. Gregorij , de quâ locuti sumus , cum aliò , desumptò ex quadam Epistola Innocentij I. ad Victricium Episcopum Rotomagensem : En formalia ! *De Monachis , qui diu morantur in Monasteriis , si postea ad Clericatus Ordinem pervenerint , statuimus non debere eos à proposito discedere.* Gratianus ex his duobus locis hanc consequentiam infert : si ex unâ parte , juxta mentem Innocentij I. , non est permittum Monacho suum statum deserre ; & secundùm S. Gregorium non possunt simul conjungi hæc duo officia vitæ Monasticæ , & Clericatus : sequitur , quòd Monachus non possit assumi ad Regimen parochiarum.

Sed relinquendo discursum hujus rei , certum est , quòd Gratianus non benè percepit sensum hujus Papæ Innocentij. Ut hujus convincatur , plus opus non est , quàm ut legatur integer textus capitis 10. hujus epistolæ , & videbitur,

bitur, quòd in hoc loco non agatur, nisi de votis essentialibus vitæ monasticæ, præ omnibus verò Castitatis, quod falsi quidam Monachi tunc existimarent, eam se posse violare impunè, si Clerici fierent, & postea nuberent, sicuti concessum erat ijs, qui non nisi simplices Clerici erant.

Hunc sensum confirmat etiam Epistola Leonis ad Rusticum Episcopum (20. q. 3. c. 1.)

Videatur post hæc, an fidendum sit omnibus his citationibus detruncatorum, malè intellectorum, & adhuc peiùs ordinariè applicatorum textuum; è quibus tamen intereà quotidie desumuntur principia, quæ non possunt esse nisi malè fundata. Ipse Gratianus se circa hanc materiam alibi meliùs explicavit. 16. q. 1. c. 36. 39. 40. Hactenus Mabillonius.

N. XIV.

Respondetur ad Authoritatem Panormitani.

CUm Ceteri, qui adducuntur, Doctores unice probent, Canonicos Regulares vocari Clericos, idque eis non abnuamus, prout superiora responsa testantur, unus adhuc superest Panormitanus, in cuius authoritate mirè sibi etiam Adversarius gratulatur, sed cùm nullo veritatis applausu: allegatum quippe locum in *cap. statuimus de Major. & Obed.* multoties, & nullum non literæ apicem accuratissimus

simus lastravi, summamque pro viribus industriam adhibui, ne quid incauto efflueret, nihil tamen reperi, quod textum ejusmodi sapere videretur.

Unde liquidò apparet, quòd non admodum cautus sit in citando Adversarius: quemadmodum in libello illo, quem vocat *Unionem Theologicam* &c. etiam pariter: ubi prima statim citatio ex Gonetto adducta dubiam Authoris fidem pariter reddidit.

DISSERTATIO II.

De Dignitate Abbatis &

Præpositi.

SUMMARIA.

1. *Adversarius triumphum canit ante Victoriæ.*
2. *Quid sit Dignitas?*
3. *Quid nominis Abbas?*
4. *Nomen Abbatis Benedictini est, & nunquam non fuit Dignitas in Jure fundata.*
5. *Titulus Præpositi Canonorum Regularium, ne quoad modum est majoris dignitatis, quàm Abbatis.*
6. *Rationes aliæ convincentes nostrum intentum.*
7. *Titulus Præpositi ex ipsa Regularium Canonorum praxi minoris videtur esse Dignitatis, quàm Abbatis.*
8. *Argumenta Adversarij ex ratione desumpta solvuntur.*
9. *Adversarij rationes dubitandi: An Abbas sit*
no-

nomen Dignitatis? ex textibus Juris antiqui proponuntur.

10. Examinantur textus ex Glossa citati.
11. Examinatur textus ex Alciato.
12. Examinatur Canon à Subdiacono.
13. Examinatur allegatio ex Regula adducta.
14. Confirmantur hæc dicta ex Glossa ab Adversario citata.

N. I.

Adversarius hoc loco triumphum canit ante Victoriã.

O Vantem hoc se loco exhibet Adversarius, & triumphum ante victoriã canit: solenniter enim fol. 142. Antagonistas, & quasi tubã in arenam provocat. Et postquam multa de Abbatis nomine ac ratione contempnim, sed improviduse effutijt, *nucem* exinde (ut ipse quidem fol. 147. jactabundus ait) nullo conatu frangendam porrigit; ac fol. 144. in hæc denique verba prorumpit: Canonici autem Regulares sicuti ex essentia, & per se sunt Clerici, ita eorum Superiores per se, & ex Juris tam antiqui, quàm novi constitutione sunt in dignitate Ecclesiastica constituti, consequenter titulo Abbatis nec possunt, nec debent uti, quia redolet Monachismum, sublimi Canoniorum statu longè inferiorem.

Si verborum spectemus tenorem, velut cum jugulato jam hoste ludit Adversarius; sed me-

minisse prudens debuerat hostem, quantulus cūque sit, vix impunè contemni.

Causæ profectò vix non desperatæ & virium pariter debilium indicium esse, censent omnes, ubi plus agitur Sarcasmi, quàm rationibus: pariat mephitim Adversario Abbatis *Monachismum redoientis* titulus, non ideo decrescet splendor & veneratio, quâ ubique & coram ipsis sæculi Principibus, velut minoribus Gentium Dijs (ut nil attexam de maioribus Romanæ Ecclesiæ Proceribus) nunquam non floruit.

Verùm, quæ mutata subito mentis mira metamorphosis! nec Protheus tam leviter facies mutatur in omnes, atque Adversarius in varias pro libitu sententias. Nuper (in Dedicatoria illa sua litigiorum horum Genitrice §. dann obwolen &c.) pro titulo Abbatis, ceu debitò suis superioribus ad Sudorem usque pugnat, præfidenter asserens: *Præpositos Canonorum Regularium posse & debere vocari Abbates*. Hodie in suo ait Commentario *f. cit. titulo Abbatis nec posse, nec debere uti &c.* Ante prandium, post prandium &c. Nempe victi ad instar hostis, qui è fuga redux ut cladem celet, *versâ hastâ*, Victorem denuo desperatus aggreditur. Quàm feliciter autem; modò dispiciamus.



N. 11.

Quid sit Dignitas?

VT solidè rem tractemus, necessum est, præmittere loco basis, explicationem circa nomen dignitatis, & rem ipsam hac voce denotatam. Optimam dabit Tamburinus noster, quem pro se toties allegat Adversarius, ac proinde admittet lubens.

Sic ergo *de Jure Ab. To. 1. Diss. 1. q. 2. n. 2. & 3.* de Dignitate in Jure fundata differit: Inter Officium (inquit) & Dignitatem hæc est differentia, quod Officium dicitur habere onus annexum; Dignitas verò ea est, *quæ cum administratione rerum Ecclesiasticarum, & honore jurisdictionem habet. cap. volumus. cap. Diaconus. & cap. quia 99. distinct.* Unde dicitur habere Dignitatem, quando quis habet administrationem rerum Ecclesiasticarum cum Jurisdictione.

Hinc non continuò culmen Dignitatis in *Jure fundate* quis conscendit, quando Officium impetrat & quidem honorificum, nisi hoc requisitas simul conditiones involvat: quarum ex defectu ne ipsi quidem Præpositi Ecclesiarum Cathedralium de jure sunt constituti in Dignitate, tametsi reputentur esse in dignitate, ut cum alijs Idem docet, *lo. cit.* De Decanis dicit Barbosa apud P. Engel *lib. 1. tit. 33.* eos de jure communi non habere propriè dictam jurisdictionem, sed sæpius ex consuetudine locorum.

Dein (pergit Idem Tamb. lo. cit.) Dicitur etiam habere dignitatem, qui habet nomen dignitatis, & praelationis, sicut prerogativam in sua Ecclesia, tam in Choro, quàm in Processionibus, & alijs Comitijs & Sessionibus, quamvis non habeat administrationem rerum Ecclesiasticarum, vel jurisdictionem, ut patet in Decanis, & Archidiaconis quàm plurimum Cathedralium, & etiam in nonnullis Abbatibus sæcularibus, nullam administrationem, vel jurisdictionem habentibus. Tertiò dicitur habere dignitatem, qui ex consuetudine Ecclesiæ habetur in Dignitate, quia si consuetudo est in Ecclesia, pro Dignitate haberi debet; *cap. consuetudo 12. dist. Ita Archidiaconus in cap. 1. n. 2. num. de consuetud. in 6.* Porro Dignitas juxta eundem Tamburinum *loc. cit. n. 22.* debet esse perpetua; ut supponitur in *cap. de multa. de prebend. & in cap. 1. de consuetud. in 6. & in extravag. execrabilis de prebend.*

Nectamen, ut Idem *lo. cit. n. 31.* testatur, de essentia Dignitatis est, aut necessariò requiritur, ut quis in Officio perpetuus esse debeat, sed satis est, quòd perpetuus esse possit; Nam Vicarij Generales Episcoporum sunt ad nutum amovibiles; text. juncta Gloss. in *Clement. 2. de Rescriptis. Gemin. in cap. 1. de Offic. Vicar. in 6.* Azor. *instit. moral. p. 2. l. 3. c. 45. q. 14.* & communiter Doctores: Et tamen habent Dignitatem, & sunt in Dignitate constituti. Imol. in *Clement. 1. de Regular. quam sequitur Paris. de Resigna benefic. l. 7. q. 24. n. 79.* & communiter omnes.

Hac

Hac explicatione circa nomen, remque ipsam *Dignitatis* præmissâ, investigemus nunc, quid nominis sit *Abbas*? Dein, An Abbatis, cum primis Benedictini, Nomen importet *Dignitatem in jure fundatam*, nec ne?

Prius tamen, quam hæc præstentur, observes velim, Lector Amice! Adversarium f. 49. ex secunda illa, quam Tamburinus suprà assignat, *Dignitatis* acceptione, evincere mordicus conari: Canonicos Regulares omnes, ob suam, quâ fulgent, *Dignitatem*, esse *capaces ad delegationes Sedis Apostolicæ*.

Quamvis me non lateat, Sanctissimum Pontificem, teste P. Engel lib. 1. tit. 29. n. 11. nunquam solere (quamvis utique possit) causas alijs personis delegare, quam in Dignitate ecclesiastica, aut Personatu constitutis, & etiam Cathedralium Ecclesiarum Canonicis &c. Causam tamen hanc ut paucis expediam, & nunquam non liberalissimus sum erga Adversarium, transmiserim gratis hanc ei illationem; Quid autem, si hoc ipsum de Monachis inferam Benedictinis? Quid enim, id ne præstem,

ex mente Adversarij obstat? *Habent id*

(inquit S. Thomas) *quod est Cano-*

nicorum Regularium, sed

cum majori arctitu-

dine.



N. III.

Quid nominis sit Abbas?

Nomen *Abbas* (inquit Caramuel in Theologia Regulari parte 9. n. 2250.) est Nomen DEI: non enim in propria sua significatione alium Patrem significat, quàm illum, quem nos jubet invocare Christus, dicendo: *Pater noster, qui es in Cœlis &c.* Unde in Missa concinimus: *præceptis salutaribus moniti, & Divina Institutione formati, aude-
mus dicere: Pater noster &c.* Quod ipsum faciebat Apostolus, & à nobis fieri desiderat, dicens: *accepistis spiritum adoptionis, in quò clamamus Abba pater &c.* Et in epistola ad Ephes. 3. v. 15. affirmat omnem à DEO in Cœlis & in terris paternitatem denominari.

Unde opportunè interrogas (pergit Caramuel) an hoc nomen *Abbas* homini attribui possit?

Negat D. Hieronymus; illos, qui volunt dici Abbates, incriminans; inquit enim: cum autem *Abba* hebræo sermone, syriòque dicatur: & Dominus Noster in Evangelio præcipiat, nullum Patrem vocandum, nisi DEUM; nescio, quâ licentiâ in Monasterijs vel vocemus hoc nomine alios, vel vocari nos, acquiescamus.

At, Sanctissimus Legifer noster Benedictus aliter cum alijs sentit, in Regulæ c. 2. asserens: *Abbas, qui præesse dignus est Monasterio,*

sterio, semper meminisse debet, quod dicitur, & nomen Majoris factis implere: Christi enim agere vices in Monasterio creditur, quando ipsius vocatur prænominē, dicente Apostolo: accepistis Spiritum adoptionis, in quo clamamus Abba, Pater &c. Ecce Monasterij Antistes, qui græcè ἀρχιμωνὸς dicitur, ex hebræo, & syro nomine Abbas à S. Benedicto vocatur.

His omnibus consideratis, concludit demum Caramuel: Nomen *Abbas* respectu DEI, & hominum esse analogum: DEO enim omnium rerum Creatori, & hominum Sanctificatori & Glorificatori convenit primariò; Archimandritis verò secundariò, & per participationem: quia Abbas, ut S. Benedictus dicebat, Domini nostri Jesu Christi in Monasterio vices agit. Ex quibus Colligas, quàm temerè Adversarius Nomen Abbatis deprimere sit conatus; ut infra videbimus.

N. IV.

Nomen Abbatis Benedictini

*est, & nunquam non fuit Dignitas
in iure fundata.*

IN bujus Conclusionis asserendam fidem primò sic argumentor; Ratio dignitatis juxta positam priori numero explicationem tria hæc involuit: *Administrationem bonorum Ecclesiasticorum, Jurisdictionem in subditos, & quandam honoris prerogativam; sed hæc omnia vi*
Regule

Regule semper habuit, posseditque Benedictinus Abbas: ergo. Minoris (cùm certissima maior sit) prima duo membra circa *Administrationem* &c. & *jurisdictionem* in dubium vocare nemo potest, cùm juxta quotidianam & perpetuam praxin cujuslibet Monasterij Abbas circa bona disposuerit, ac etiamnum disponat eâ libertate, & potestatis plenitudine, quâ ipsi Canonici Regularium Præpositi. Deinde, *vi Regule* Abbates nostri jus, potestatemque semper exercuerunt in subditorum sibi Monachorum gubernatione; id, quod vis, quâ pollent excommunicandi Suos, abundè declarat.

Tertium verò membrum (de quo solo Adversarius dubitare videtur) sic probo: Si honor, qualis ad Dignitatem in jure fundatam requiritur, de esset Nostri, tunc hac de causa, quia ejusmodi honor fundatur in Clericatu, quò Benedictini Monachi, eorūque Abbates ex mente Adversarij sunt destituti: sed à nobis jam in priori dissertatione ostensum fuit, quòd Clericatus *per se* competat Nostri: Nullus verò unquam omni hætenus ætate Benedictinus Abbas extitit, Clericatu non ornatus, & nullo unquam tempore, omnes licet Ordinis nostri Fastos evolvat Adversarius, ullum ejusmodi extitisse Abbatem deprehendet, ergo tertium quoque Dignitatis requisitum apud Nostros invenitur, & perpetuus ille, qualem in Dignitate Ecclesiastica requiras, Honor fulgere.

Porro: *Vi Regule Presbyteri* jubentur post *Abbatem stare*: ergo Abbas juxta mentem ipsius Legislatoris in majori saltem est Dignitate constitutus, quàm Presbyter quivis simplex: ergo major ei debetur honor; & consequenter Abbas Benedictinus *vi Regule*, ac secundùm se est, & nunquam non fuit in Dignitate.

Verùm, satis Adversario non erat, Dignitatem Abbatis, quoad poterat, reddere dubiam: sed ipsum adeò titulum Præpositi supra titulum Abbatis elevare (quod vehementer mirèrè) omni nisu conatur.

N. V.

*Titulus Præpositi Canonico-
rum Regularium ne quoad mo-
dum est majoris Dignita-
tis, quàm Abbatis.*

NE inutilibus, & huc impertinentibus quæstionibus, argumentisque præsentem implicemus titulum, volumus ea, de quibus inter nos convenit, præmittere: ut sic certa ab incertis segregando, pulchriori & solidiori inde methodo procedamus.

Igitur juxta ipsum Adversarium fol. 148. quæstio tantùm procedit de Abbatibus Monachorum, & Præpositis Canonorum Regularium, quorum uterque hodie fulget Dignitate Ecclesiasticâ.

Fatetur porro ibidem Adversarius; titu-
lum

lum Præpositi Canonorum Regularium quoad Jurisdictionem, & Administrationem non esse majoris dignitatis titulò Abbatis: benè tamen *quoad modum habendi administrationem Ecclesiasticam*: eò quòd hæc essentialiter in Clericatu fundata, competat Monachis, eorúmque Abbatibus tantùm *per accidens*, *dispensativè*, & *ex Privilegio*; Canonicis verò Regularibus, eorúmque Præpositis *per se*, & *ex essentia*.

Itaque ex ipsius Adversarij mente cardo quæstionis tantùm in eo versatur: *An titulus Præpositi saltem quoad modum habendi Administrationem Ecclesiasticam sit majoris Dignitatis, quàm titulus Abbatis?*

Et resolvimus Nos Negativè.

Ostendi hoc à nobis meliùs non poterit, quàm si Ipsius Adversarij balin, cui unicè, & opinione sua tam firmiter innititur, jam superiùs everfam esse demonstremus. Basis ipsius in eo consistit, quòd sicut non competat Monachis, ita nec Abbatibus Benedictinis *per se* Clericatus, atque in Clericatu proinde nequeat fundari eorum *modus habendi administrationem Ecclesiasticam*; quemadmodùm è diverso in Clericatu fundatur *modus habendi administrationem Ecclesiasticam* apud Canonorum Regularium Præpositos, utpote, quibus (sicut ille supponit) *per se* Clericatus competat.

A nobis autem jam superiùs, ac ex ipsa quidem Regula luculenter probatum fuit, quòd Religioni Benedictinæ Clericatus etiam

per

per se competat: ergo Abbatum Benedictinorum titulus & modus habendi administrationem Ecclesiasticam fundatur in Clericatu æquè, ac Præpositorum titulus & modus &c.

Positò hoc ex parte nostra fundamentò, ejusdem Argumenti, quò Adversarius fol. 144. usus est, fulcrò nostram confirmamus sententiam. Ut intentum probet ille, sic argumentatur: *Canonici Regulares sicuti ex essentiâ & per se sunt Clerici, ita eorum Superiores per se & ex Iuris tam antiqui, quàm novi constitutione sunt in dignitate Ecclesiasticâ constituti &c.*

Unde ego legitimè infero: ergo, sicuti Monachi Benedictini sunt Clerici *per se & ex essentia sua, ita eorum quoque Superiores (Abbatibus scilicet) erunt per se, & ex Iuris tam antiqui, quàm novi constitutione in Dignitate Ecclesiastica constituti æquè, ac longè magis, quàm Canoniorum Regularium.*

N. VI.

Rationes aliæ nostrum convincentes intentum.

SUBLATâ, quâ Adversarius nitebatur, basi, aliâ insuper producimus, quibus Abbatum nostrorum evincimus Clericatum, argumenta: è quibus efficacissimum planè suggerit ipsa Regula nostra, è cujus textu, qui habetur c. 60. ita dissero: *Vi hujus Regulæ, & jussu*

jussu Sancti Patris nostri Presbyteri tenentur stare post Abbatem, ergo nequit esse Abbas laicus; aliàs Divus Legifer manifestè peccasset in jura Sacra, secundum quæ ab ipso Adversario citata Abbas merè laicus (si detur scilicet) inferior est quocunque Clerico.

Quis verò nisi temerarius Gloriosissimo Patriarchæ toties coelitus & mirificè semper illustrato, hunc regali Sacerdotio, & Ordini Sacratissimo injuriam errorem impingat? aut, quis sincerè Christianus somniet, à Magno Gregorio, cujus divinam propè sapientiam Græca etiam Ecclesia suspicit, & veneratur, hæc adeò palpabilem, neque notandum, neque corrigendum fuisse, quando vivæ vocis Oraculò, & Apostolicâ Authoritate suâ Divi Benedicti Regulam approbavit, confirmavitque?

Tertium depromo ex lato, & supra jam memorato Syricij Papæ Decreto, unde hunc eruo Syllogismum: Ubi vi Decreti Pontificij inter Subditos Monachos existere debent aliqui saltem Clerici, ibi vi ejusdem Decreti & jure saltem argutivo longè magis oportet ejusmodi Monachorum Superiorem sive Abbatem esse Clericum; Secus nulla, qualis tamen esse debuit, vera & fundamentalis Capituli præeminentia fuisset (utpotè, quod in unico ac præcipuo titulo, nempe Clericatu, veram, genuinam & substantialem in Jure Dignitatem fundante, aliquibus saltem membris inferius extitisset) atqui in Ordine Benedictino, utpotè in Monachismo

*nachismo per Clericatum jam elevato, in eodem-
que nato, vi Syriciani Decreti, semper debue-
runt saltem aliqui existere Clerici inter Mona-
chos, ergo longè magis & à fortiori eorum-
dem Superior & Abbas debuit esse Clericus:
ergo nunquam potuit esse Non-Clericus.*

Quartum desumo argumentum ex ipso
rursus Adversario, constanter negante, *anti-
quo etiam Jure Abbatiali Benedictinorum Di-
gnitati Clericatum per se annexum, atque in
hoc eorundem Administrationem Ecclesiasti-
cam fundatam fuisse; sic enim discurre: Si
Jure antiquo Abbatibus Benedictinis Clerica-
tus non fuit per se competens, ergo tantum
per accidens, ergo administratio eorundem
Ecclesiastica per accidens annexa fuit Clerica-
tui. Sed, quod per accidens connexum est,
non semper connexum est: (cùm in hoc discri-
men connexionis per se, & per accidens con-
sistat) ergo si Clericatus Administrationi Ec-
clesiasticæ Benedictinorum Abbatum non fuit
per se annexus, etiam non fuit semper annexus:
atqui fuit semper annexus, ergo fuit per se an-
nexus; ergo Abbates Benedictini Dignitatis
suæ titulum fundant in Clericatu, uti suum
Præpositi Canonorum Regularium.*

Subsumptum ultimum (quòd scilicet Cle-
ricatus semper fuerit annexus Abbatum nostro-
rum titulo, sive, quòd omnes Abbates Bene-
dictini semper fuerint Clerici) ita jam proba-
vit notissimus Adversario Antagonista, & Be-
nedictinæ gloriæ Vindex, ut dubitare pruden-

ser nequeam, Adversarium in hoc manus dedisse, *tacitè saltem & dissimulanter*. Provocatus enim, ut unum saltem assignaret è Benedictinis Abbatem, qui Clericus non fuisset, nullum produxit, licèt & ad indagandum otium illi, tempùsque amplissimum suppeteret, & à mille ducentis ferè Annis tantus utique Abbatum Syllabus fuerit, accuratò dignus scrutiniò, & solertiori labore, cui forsàn Adversarius non pepercerit; sed postquam in nullum incidere potuit, qualem expectarat, dissimulare meritò debuit, quod probare non poterat.

N. VII.

Titulus Præpositi ex ipsa Regularium Canonorum praxi & Regula minoris videtur esse dignitatis, quàm Abbatis.

ASSERTò hætenus Abbatum Benedictinorum Clericatu, ad illustrandam tantisper conclusionem nostram, disquiramus pauculis, num Præpositi titulus (inspectâ ipsâ Canonorum Regularium praxi & Regula) ejusdem sit Dignitatis, cum Abbatis titulò?

Videtur planè verissimile, quòd minoris sit dignitatis: quia in solemni illo Inaugurationis ritu non in *Præpositos* (utpote quales subinde priùs jam erant) sed in *Abbatès* consecrantur; certè Mater Ecclesia Præpositi nomen præ
titulo

titulo Abbatis usurparet in ejusmodi actu, si id majorem post se traheret dignitatem: Interea ante consecrationem nec à Domesticis, nec ab exteris Abbatis titulò honorantur Canonorum Regularium Superiores; Absolutà porro consecratione quasi nudum Præpositi nomen jam displiceret, aut non sufficeret, plerumque illud Abbatis titulò augment.

Quod ipsum, ut Patronum suum (Reverendissimum DD. Abbatem N.) magis honoraret, observavit Adversarius, dum in dedicatoriâ Concionis suæ *Abbatis* eidem titulum inscripsit; sui itaque planè oblitus est, dum in hoc ipso opere fol. 144. quasi è superiori loco perorans, asseruit: *Canonicos Regulares titulo Abbatis nec posse, nec debere uti, quia redolet Monachismum, sublimi Canonorum statu longè inferiorem: ut supra notavimus.*

Mihi, ut ingenuè fatear, *Abbatis* titulus nullo prorsus arrideret modò: si quocunque demum ex prædicato titulus *Præpositi* præstaret.

Porro, titulum *Præpositi* minoris esse Dignitatis, quàm *Abbatis*, ex ipsa S. Augustini Regula manifestè deducitur, in qua S. Pater *Præpositum* postponit *Presbytero*, eique subjicit, quando c. 9. ita loquitur: *Præposito tanquam Patri obediatur, multò magis Presbytero, qui omnium vestrum curam gerit. Et mox: Ad Præpositum pertinebit, ut ad Presbyterum, cujus est apud vos major auctoritas, referat, quod modum, vel vires ejus excedit. Ex*

quibus apparet, Præpositum esse secundam personam, & Presbyterum primam.

Aliter Sanctissimus Legifer noster de suis Abbatibus, quibus Presbyteri postponuntur, jubenturque *post Abbatem stare*.

Est & aliud præterea, quod ex illo Regulæ Augustinianæ cortice, eruo, pro causa nostra, non leve argumentum: *Superiores nimirum Canonorum Regularium nullatenus in Dignitate Ecclesiastica esse constitutos*; ut contendit Adversarius *cir. f. 144.* quando nempe ipsis vi suæ regulæ simplices præponuntur Presbyteri. Non equidem me latet, ex mente Adversarij *f. 174.* per Presbyterum intelligendum ibi Superiorem illum, qui in Religiosos cum præminencia habet potestatem & jurisdictionem ordinariam tam fori interni, quàm externi; per Præpositum verò Superiorem manualement, seu ad nutum amovibilem, habentem potestatem tantum delegatam, & à Presbyteri voluntate dependentem. Quàm torta autem hæc sit interpretatio, constabit facillimè legenti ipsa Adversarij verba formalia. Torqueat interea, utut velit Adversarius, consensum tamen extorquere nequibit ab Hæfeno nostro, Mabillonio, alijsque Authoribus gravissimis; nec eam, quam vellet, fidem ei deberi, palam ego affirmo.



N. VIII.

Argumenta Adversarij ex ratione deprompta solvuntur.

AUdiamus nunc disserentem pro se Adversarium: primus, quem contra nos format, Syllogismus est iste: Illa dicuntur per accidens concurrere, quæ possunt abesse, & adesse sinè corruptione subjecti; atqui Clericatus potest abesse, & absuit in Abbatibus antiquis, uti tum ex citatis textibus juris, tum ex S. Benedicto, & aliis manifestum est, ergo tam Clericatus, quàm dignitas est titulo Abbatis merè per accidens.

En! nucem, in cujus robore sic confidebat Adversarius, ut fol. 147. exclamaret: *frange hanc nucem, si potes!* Omnino possumus, & levi quidem brachio, & unicâ frangere distinctiunculâ possumus.

Admissâ enim Majore, distinguimus minorem: Clericatus potest abesse, & absuit in Antiquis Abbatibus Benedictinis; Nego: fortè in alijs ante tempora Benedicti, de quibus hîc non disceptamus: transeat. Dixi imprimis transeat alterum membrum: Magnus quippe Basilii Monachos suos nuncupavit *Canonicos*; ut supra notavi: ergo horum Superiores Clericos fuisse, dubitari à prudente nequit ex ipsius Adversarij supra allegata ratiocinatione.

Illud porro membrum, in quo ipse Benedictus pro Exemplo Abbatis non-Clerici ad-

ducitur, penitus rejicio; nec mirari satis possum incautam Adversarij libertatem, quâ audacter asserit, quidquid collubescit, aut in rem servire videtur, parùm sollicitus, num ex eodem, quem pro se citat, Authore confutari luculenter possit; sinè dubio scire poterat, aut debuerat, quòd idem ipse Angelus de Nuce, quem adducit, quando probat, Benedictum non fuisse Sacerdotem, Idem (inquam) pulcherrimè ostendat, Benedictum Diaconum fuisse.

Hoc ex ipsius etiam vitâ dilucidè comprobatur; in quâ à S. Gregor. Mag. c. 23. refertur, à Divo Benedicto Moniales in vita excommunicatas, & subinde mortuas, sub Officij Divini Celebratione, eò, quò jubebantur à Diacono exire excommunicati; tempore solitas etiam fuisse egredi, nec priùs quievisse, donec à S. Patre solenniter iterum absolverentur. Et tam Sacra, tam sublimis & veneranda Potestas nunquid homini merè laico, & nullatenus Clerico competeat?

Hoc dum scribo, opportunè succurrit & illud: si Abbates Benedictini non fuissent Clerici, quò pacto, quòve Jure poterant Sacerdotes Monachos sibi subditos excommunicationis ligare vinculo, ac illius exercere potestatem Ordinis, quem nunquam acceperant?

At video, nondum exhaustus est Adversarius, aliam iterum nucem porrigit, priori tamen per omnia simillimam, ac nisu pariter desultoriò frangendam: *Quod* (inquit) *aliquan-*
do

do, aliter fuit, & iterum se aliter habere potest, tametsi hodie aliter sit, illud non est hodie essentialiale, sed tantum accidentale, & in sensu specificativo, sed Abbatum Monasticorum status, etsi hodie ex Decreto Pontificio sit Clericalis, fuit tamen aliquando non-Clericalis, poteritq; ex alio decreto fieri non-Clericalis &c.

Iterum Transmitto majorem; ac minorem ut prius distinguo: Sed Abbatum Monasticorum Benedictinorum status, etsi hodie ex decreto Pontificio sit Clericalis, fuit tamen aliquando non-clericalis, poteritque ex alio decreto fieri non-Clericalis &c. Nego: quorumcumque demum aliorum forsan ante tempora Benedicti, transeat. Dico igitur, Statum Monastico-Benedictinum nunquam fuisse non-Clericalem; & sicut per nullum Decretum Pontificium, sed per ipsam Regulam, & ex Ortu suo, ac origine est, & hactenus fuit Clericalis, ita nec per ullam Decretum Pontificium fieri posse non-Clericalem, nî velit Pontifex illum quoad substantialia sublatum, ipsamque, quam alij hactenus Pontifices approbârunt, Regulam omninò everfam, & reprobaram. Hoc autem ubi eveniret, forentne ejusmodi tum Monachi genuini Benedictinae Regulae filij, & Alumni?

At urget tertio Adversarius, & instat hoc dilemmate: vel Abbates ante tempora S. Benedicti, (ut Antonius Magnus) fuerunt veri Abbates, vel non? si primum dicas, habemus intentum: si secundum, contradicis sensui Eccle-

sia, Antonium Magnum inter Abbates celebrantis.

Neque hoc telò vulneravit Adversarius causam nostram: damus enim, Antonium & alios fuisse Abbates, & veros quidem; sed accipi nomen Abbatis debet per *ampliationem* & *extensionem*. Ne porro asserere gratis hæc, & necessitate sententiæ videar, illustro idipsum exemplò Fulvij Paciani Mutinensis Comit. D. & Equit. qui in suo *Tractatu practicabili de Probationibus lib. 2. c. 27. n. 86.* ait: *Priores & Prepositos, quorum Dignitas electiva est, nec Abbatem nec Superiorem recognoscunt, per ampliationem Abbates dici posse.*

N. IX.

Adversarij rationes dubitandi: ex textibus juris antiqui desumptæ, proponuntur.

ET si hâc ætate in dubium revocare nemo prudens amplius soleat, an nomen Abbatis importet *Dignitatem*? cum hoc nomine nullus gaudeat, nisi constitutus in Dignitate Ecclesiastica, quæ, ut suprâ notatum, cum administratione rerum Ecclesiasticarum, & honore jurisdictionem habet. Adversarius tamen fol. 140. ex novandarum rerum studio, ac libidine cavillandi, deprimendique nomen Abbatis, rationes quasdam dubitandi reperisse se arbitratur in antiqui Juris mendosis & corruptis

ptis textibus, quæis rudioribus, & in disqui-
rendis ejusmodi fragmentis vel negligentibus,
vel imperitis persuadere conatur, nomen Ab-
batis non *dignitatis*, sed *mere esse sollicitudinis*.

Adducit igitur textus ex Glossa in *cap. Tuam in V. non ascendant. de etat. & qualit.* Et in *Can. accedens. in V. Abbatem dist. 50.* ubi apertè dicitur (inquit ipse) nomen Abbatis esse titulum sollicitudinis, & Officij, non Dignitatis: Item esse nomen sollicitudinis, non Ordinis. Quamobrem (pergit ibidem) laicus id est, simplex Monachus, poterat esse Abbas, ut dicitur de S. Benedicto, & de S. Equitio, apud S. Gregorium *lib. 1. Dialog. cap. 4.*

Id ipsum confirmat ex Alciato, in *l. Collegiorum. de verb. Signif.* ubi ait: nomen Abbatis competere cuilibet etiam artium vilium Magistro.

Et ex *93. dist. can. à Subdiacono &c.* Tandem ex ipsa Regula S. Benedicti colligi, ait, Abbates non debere esse Sacerdotes.

Revocemus ad incudem singula, & quod iisdem robur sit, atque fides argumentantis, sedulò discutiamus.

N. X.

Examinantur textus ex

Glossa citati.

VT sinceri Defensoris numeros impleam, integros omninò, nec corruptos, vel in ullo apice, sed genuinos Glossæ textus,

G ;

& ut

& ut formalia ipsa sonant, oculis hęc subjiçio. In citatum igitur cap. *Tuam*, ita loquitur Glossa: *Nomen Abbatis potius est sollicitudinis, quàm Ordinis, vel honoris.* Et in Can. *accedens* ait: *Abbas est potius nomen officij, quàm Dignitatis.*

Et hęc Glossa quidem; Adversarius autem sic: *Nomen Abbatis est sollicitudinis, non Dignitatis, non Ordinis.* Et fol. 141. addit, ex Glossa colligi, *nomen Abbatis esse mere sollicitudinis.*

En amice Lector! quàm manifestè pugnent inter duo hęc: *Nomen Abbatis est potius sollicitudinis;* &: *Nomen Abbatis est mere sollicitudinis.* Deinde, *Abbas est potius nomen Officij, quàm Dignitatis;* &: *Abbas est nomen Officij, non Dignitatis.*

Si quis Glossam, Adversariumque comparans, dixisset: Eum esse *potius* solertem, quàm veracem; ac deindè istius verba ego referens, assererem: Eum esse solertem, *non* veracem. Aut, dicente alio: Adversarij Tractatum esse *potius* solertiæ, quàm veracitatis; arque iterum ego, ex alterius quasi ore pronuntiarem: Adversarij tractatum esse *mere* solertiæ, *non* veracitatis. Per Deum immortalem! quàm meritò succenseret mihi Adversarius, & quàm justè objiceret, nec religiosam mihi fidem, ac mentem candidam, nec linguam veracem esse. Enimverò particula *potius* denotat excessum comparativum, &, dum in uno plus tribuit, in altero totum non aufert, sed minus

minus tantum esse dicit hoc, in comparatione alterius. Particula verò *Non*, secundum ipsos adeò Summulistas, est malignantis naturæ, & quidquid post se invenit, negat totum, totum aufert. Non igitur negat Abbatibus *Dignitatem* Glossa, sed in comparatione sollicitudinis, ac grandium, qui eam, velut umbra Lucem, consequuntur, laborum, minorem omnino his esse affirmat: Id quàm verum sit, experiuntur illi, qui suos tanto oneri hameros subtrahere non rarò compelluntur.

Eadem interea fidelitate immediate sequentem (non tam commodè forsan vitiabilem) Glossam dissimulavit Adversarius, utpote quæ pro nostra causa tam luculenter concludit, ut vix luculentius posset: juxta Illam enim Glossam *loco cit.* Laici poterant quidem esse Abbates, sed *dispensativè* tantum: ergo regulariter Abbates debebant esse Clerici juxta hanc Glossam, ergo etiam secundum *jus antiquum*; aliàs laici, qui *in casu necessitatis tantum* (sunt formalia Glossæ verba) poterant esse Abbates, dispensatione non indignissent.

N. XI.

Examinatur textus ex

Alciato.

Alciatus *loc. cit.* refert: in multis locis Consules, seu Priores artium appellari Abbates. Ridicula sanè objectio; quasi vero

rò non esset quotidianus aliarum etiam vocum abusus, vel analogica usurpatio: sic pictus & verus homo obtinet nomen hominis, & de exanimi Cælaris aut Regis imagine pronuntia-
 ri solent ea, quæ ipsi repræsentato conveniunt: ignoscendum est haud dubiè *similitudini*, quæ, dum gradus ac generis diversi res frequenter comparat, ac eodem non rarò vocabulò denotat, plerumque *claudicat*: unde non est, cur tam claudicans argumentum nos multùm detineat: In ipsa sacrâ Pagina Deorum nomen hominibus attribuitur, & quis tam intempestivi hætenus genij fuit inter Christianos Doctores, cui prudens hinc dubium incideret, quid *nominis*, quid *rei* vox *Deus* sit? Accedit huc, quòd Alciatus hoc loco Historici manus subeat, & solummodò referat, hanc in locis nonnullis consuetudinem vigere. Aliud foret, si scholasticò rem rigore trutinâset, & pronuntiasset exinde, istorum farinæ hominum aliquò Juris titulò deberi nomen Abbatis, de quo inter nos præsens est controversia; hinc obiter tantùm insinuo tam parum ex hoc Alciati textu probari, quàm parum probaretur, si ex eo, quòd Præpositi nomen (vulgò *Pröbst*) Teloniorum Præfectis aut inferioris etiam notæ hominibus in nonnullis pariter locis attribuat, quis inferret: ergo Præpositi nomen nullam *per se* unquam, de quali jura tractant, Dignitatem importat.

Quamvis hæc illatio confirmari posset ex ipso Adversario, concedente, Præpositi no-
 men

men secundum se acceptum non importare dignitatem. Quod & Tamburinus ab Adversario hîc citatus, Tom. 1. de jure Ab. D. 1. q. 2. n. 20. pluribus ostendit, asseritque: *Præposituras quasdam nedum esse dignitates, imò nec beneficia Ecclesiastica, sed esse tantum simplices administrationes temporales, nihil spiritualitatis habentes, prout Rotta resolvit.*

Ridiculum igitur non modò, sed à sinceritate iterum etiam Religiosâ (quam tamen hominibus Deo sacratis cordi esse imprimis oportet) alienum est argumentum; dixerat Alciatus: *Consules & Priores artium appellari Abbates.* Adversarius verò: *cuilibet etiam artium vilium Magistro competere nomen Abbatis: dicit; & sic pro sui Majestate Calami pleraque exaggerat: majore specie tamen, quàm plausu & fundamento veritatis.*

N. XII.

Examinatur Canon à Subdiacono.

TExtum hunc veluti palmarem crebrò, & ad nauseam usque inculcat Adversarius, persuadetque sibi, se hoc velut ictu decretoriò hostem confecisse. Sequamur nos iterum Poëtæ monitum; &, quia

Purius ex ipso fonte bibuntur aquæ;

Inspiciamus non Canonem modò, sed qualificativam ejusdem Notam, utpote ex qua decidit

cidi ultimatò debet, genuinus utrùm Canon, & quæ authoritas ejusdem? Ipse Canon itaque sic habet:

A Subdiacono usque ad lectores omnes subditi sint Diacono Cardinali Urbis Romæ, in Ecclesia representantes ei honorem. Porro Pontifici Presbyter &c. Exorcistæ Lector, Lectori Ostiarius, Ostiario Abbas, Abbati Monachus in omni loco representet obsequium &c. Clarus sanè, sed vitiosus æquè textus. Audi quid ad eum Notæ censoriæ ad marginem in ipso Jure Canonico positi: Caput hoc (inquiunt) & apud Gratianum, & in ipsius etiam Synodi editionibus videri valdè mendosum. Imò expressissimis ibi verbis additur: De Abbate, & Monacho in Synodi editionibus nullam mentionem esse.

Vitiosa Canonis hujus auxesis non effugie industriam vigilantissimi Mabillonij nostri, solerter advertentis, verba illa: de Abbate, & Monacho: addita esse à Gratiano; & nec Abbatibus, nec Monachi factam esse mentionem in Concilio, ex quo hoc decretum desumptum est. Quin & hoc, quòd Adversarij textum penitus enervat, insuper ait: affirmare audeo, esse impossibile, ut tunc mentio fieret, hoc est, anno 324. quò hoc Concilium celebratum est; siquidem tunc temporis necdum erant Communitates Monachorum, & consequenter nec Abbates in Urbe Roma, pro qua iste expressè factus est: & fortè en toto Occidente nulla adhuc erat; siquidem Ordo Monasticus non nisi in Oriente incepit, qui est illius origo, & incunabula. Hæc vir in Concilij

cilijs versatissimus. Quæ confirmat Author Anonymus *Epitomes Historie Ordinis S. Bened.* lib. 1. c. 3. num. 1. ita de allegato Canone differens: nam præterquam quod in Concilio, ex quo ille Canon transcriptus, ea nomina non occurrant, Eruditi jam pridem illius Concilij fidem expi-
serunt. Quid igitur nobis deinceps negotij cum supposititiô textûs fragmento? quod, priusquam legitimetur, nec vim, nec locum habet apud Litteratos.

Verùm, quid si verba illa Canoni propria, cogenita & ipsius Synodi oraculô fusa essent? foretne adhuc via nobis & modus responsionis? Omnino. Nam juxta ea, quæ hætenus ex Jure adduximus, & iste & similes textus loqui de alijs nequeunt Abbatibus, quàm de *laicis*: Et in hoc nobis pulcherrimè suffragatur ipsa Glossa, quando in eundem Can. testatur: *Constitutiones illas loqui secundum ea tempora, cum Monachi non erant Clerici.* Hem! quàm limpida eruuntur Veritatis venæ, si ad ipsos, qui à longè aliàs duntaxat monstrantur, perfodiatur fontes!

N. XIII.

Examinatur allegatio ex Regula adducta.

TOedet fere cum tam frequentibus allegationum figmentis ultra depugnare: Nam linceis quamvis Regulam oculis perlustrem, ne vestigium quidem deprehendo, unde
(quem

(quemadmodum asseverat Adversarius) colligi possit, Abbates non debere esse Sacerdotes. Pro tam luculenti Corollarij prudenti assertione cur non caput, cur non verba formalia, cur non ipsum denique locum, recepto inter Eruditos more, assignavit?

In altero quidem, ubi subdit: *Quamobrem Laicus, id est, simplex Monachus, poterat esse Abbas, ut dicitur de sancto Benedicto, & de S. Equitio apud Sanct. Gregorium lib. 1. Dialog. c. 4.* allegavit locum; sed in spatijs, credo, imaginarijs, & ad græcas forsan Calendas (cujus Gentis nota ubique fides) invenire illa erit: quæ Magno ipse Gregorio temerarius attribuit de S. Benedicto.

Ego verò ostendam Adversario locum in Jure, ubi per Glossam apertè satis insinuat, quid in præsentis quæstionis articulo de ipsa Divi Benedicti Regula sentiendum? In Can. sunt nonnulli 16. q. 1. V. *Benedictus* Glossa ait: *quod omnia, quæ non prohibuit S. Benedictus, sunt concessa Monachis.* At ubi prohibuit Benedictus Abbatibus suis, ne Sacerdotes fierent? Nulla ergo dispensatione opus est, ubi nulla prohibitio præcessit.

N. XIV.

*Confirmantur hætenus dicta
ex Glossâ ab Adversario citatâ.*

Hæc in cap. 1. de ætate, & qualitat. §. *Præpositi* illimitatè asseverat: *Præpositus est Digni-*

Dignitas per se. Hæsi nonnihil (fateor) primo aspectu textûs adeo clari; sed ut liquidissimò mihi constaret, quis sensus, quæ ratio, quis effectus sit, ipsum iterum adivi fontem Capituli, unde purior in me veritas derivaretur; nec sterilis labor fuit, vix Capitulum oculis subjeci, adverti illicò, hoc meæ Defensionis telum servire. Capitulum ita sonat: *Ut Abbates, Decani, & Præpositi, qui presbyteri non sunt, Presbyteri fiant.*

Et de his utique Præpositis Glossa loquitur. Jam sic argumentor: vel nomine horum Præpositorum intelliguntur Superiores Canonici Regularium, vel non? si posterius; in favorem Adversarij nil probat Glossa, sed ab eodem perperam adhibetur. Si prius dicatur? infero plura, quæ vehementer pungent Adversarium; Nam deduco primò: ergo Abbates, qui juxta Adversarium vi Capituli (sed mendosi) Oſtarijs postponebantur, hîc verò ipsis jam Præpositis, ac vi quidem Capituli nullatenus suspecti, præponuntur, iisdem digniores sunt. Secundò, ergo Præpositi Canonici Regularium de *jure antiquo* non sunt, & per consequens, non *per se*, sed *dispensativè*, *per accidens*, & *jure tantum novo*, Presbyteri. Tertiò, ergo, quia Præpositi nomen est *Dignitas per se*, longè magis Abbas, qui vi hujus ab Adversario citati Juris, præcedentias juxta Adversarium *vocabulorum ordine* disponentis, Præpositum antecedit, nomen dignitati, *per se*, & non officium sollicitudinis

tantum , sed etiam *honoris* erit.

Hæc igitur quisquis accuratè perpende-
rit , desinet mirari , cur à nonnullis Canoni-
corum Regularium Superioribus (velut nuper
à Burano , & VVengensi) cum ingenti
plausu excepta fuerit impetrata ex
Urbe licentia , ut nunc de-
mum in *Abbat*es con-
secrarentur.



PARS

PARS III.

De

Scientia,

Secundò ad Ordinem Hierarchicum

Requisitò.

DISSERTATIO I.

An Scientia, ad Hierarchicum

*Ordinem requisita, floreat in Religione
Benedictinâ?*

SUMMARIA.

1. *Quid sit Scientia, alterum Hierarchici Ordinis requisitum?*
2. *Hæc Scientia datur in Ordine Benedictino.*
3. *In S.^{mo} Patre Scierenter nescio, & sapienter indocto.*
4. *In Regula per varias Religiones propagata.*
5. *In Albo Sanctorum, & Pontificum &c. syl-
labo.*
6. *In Ecclesiæ Doctoribus, & celebrioribus Asie-
seos Magistris.*
7. *In Joanne Gersene aurei de Imitatione Chri-
sti libelli Authore.*
8. *Posthuma Reverendissimi DD. Georgij Geisseri
Abbat is Villingani testimonia pro Gersenio.*

9. *Prolixior Relatio Controversiæ circa Authorem libelli de Imitatione Christi &c.*
10. *Corollarium ex recensita hætenus Relatione.*

N. I.

*Quid sit Scientia, alterum
Hierarchici Ordinis requisitum?*

INter Hierarchici Ordinis requisita secundum obtinet locum *Scientia*: Non autem hic sermo nobis est de fallaci, vanâ & inani *Scientia*, cum quâ Gentiles olim Philosophi, teste Gentium Doctore Paulo Rom. c. i. in infernum descenderunt: sed loquimur de scientia verè Christiana, quæ ex ipso profluit Deo, & in eundem iterum refluit; Est nempe scientia hæc juxta Theologos *Charisma* illud, & donum *Spiritus Sancti*, quò imbutus homo cognoscit, quæ credenda, & non credenda sunt. Geminò donò id perficit in homine Spiritus Sanctus, *Intellectu* scil. & *Scientia*: Per donum *Intellectus* instruit, & disponit facultatem hominis naturaliter intellectivam, ut non erroneam, sed veram rerum imaginem, seu apprehensionem formet. Per donum autem *Scientiæ* juvatur ipse hic Intellectus, seu vis hominis naturaliter discursiva, ut sincerum & conforme rebus ipsis *judicium* statuatur, atque sic per rerum creaturarum cognitiones, velut per quosdam Jacobinæ scalæ gradus ad ipsius, qui scalæ summitati innititur, Dei Conditoris pulcherrimam, beatissimamque contemplationem pertingat.

Hujus

Hujus autem Scientiæ habitus duplex, Speculativus nimirum, & practicus est: hic *facienda*, ille *credenda* proponit, & uterque modum, quò fiat idipsum, per internas illustrationes edocet; vocaturque talis habitus *Scientia Sanctorum* eâ de causâ, quia *ex Deo est*, & *in Deum* per viam Salutis æternæ *dirigit*. Quare non immeritò Veterum, qui à via salutis & veritatis deviarunt, Philosophorum futilem, fluxamque scientiam irridens Christianus Poëta cecinit:

Si Christum nescis, nihil est, si cætera discis.
Ubi verò ab æternorum luminum Patre Deo tam affluenter illustratur fidelis anima, ut felici Magisteriò hanc *Sanctorum Scientiam* non modò docere alios, & in Cœlestis Philosophiæ disciplina erudire possit, verùm & hostes fidei, ac opinionum adversantium fundamenta evertere pariter valeat, huic tunc animæ juxta Doctorem Angelicum 2. 2. q. 9. a. 1. confertur *Gratia gratis data*; quæ tamen non ad salutem necessaria, nec singulis, licet Justis, propria est.

N. 11.

*Hæc Scientia datur in Ordine
Benedictino.*

Hanc igitur cœlestem Disciplinam, hanc *Sanctorum Scientiam*, hoc Spiritûs Sancti *charisma*, & gratiam gratis datam in Religione Benedictina & hætenus viguisse semper

& perpetua fecunditate virefcere , tam certum est , atque dilucidum , ut nullis prorsus armis ad roborandam ejusmodi veritatem , sed ad eam dignè illustrandam robustiori potiùs facundiâ opus sit.

Arboris nobilitatem , & pretium ex triplici dimetiri capite solemus : ex radice scilicet , ex ramis , & ex fructu ; Quod si mysticæ comparemus Arbori Religionem nostram , nunquid peraccommodâ similitudine ipsam quidem Sanctissimum Parentem sub *Radice* ænigmate , felices autem tanti Patris Filios , & Posteror sub *Ramorum* typo , & edita hætenus vix non innumera , plenissimâque variæ eruditionis volumina sub *Fructuum* schemate præsentamus ?

At quo spiritu & vitâ vegetatur tam sancta *Radix* ? quâ medullâ nutriuntur tam fertiles *Rami* ? quò succo dulcorantur *Fructus* tam delicati ? Solus ac unicus Spiritus *Scientiæ* vegetat *Radicem* , enutrit *Ramos* , & *Fructus* illos dulcorat , ut dubitare amplius non possis , genethliacam Benedicti Arborem , esse *Arborem Scientiæ* : Cujus admirabiles *fructus* Hæftenus noster *disq. Mon. l. 2. tr. 4. disq. 1.* duodenario numero comprehensos , uno veluti fasce colligatos , lectorum oculis objicit , ita differendo : Fuit sacratissima S. Benedicti Religio

1. In universalis Ecclesiæ gubernatione admirabilis.

2. In particularium Ecclesiarum & Diœcesium Regimine sollicita.

3. In

3. In Gentilium conversione infatigabilis.
4. In Hæresium oppugnatione & extirpatione invicta.
5. In Schismaticorum ad Ecclesiam reductione pacifica.
6. In Scholarum & Academiarum erectione utilis.
7. In sacræ Scripturæ interpretatione assidua.
8. In Juris Canonici collectione fidelis.
9. In Historiarum & veterum monumentorum conservatione incorrupta.
10. In Deiparæ Virginis cultûs propagatione pia.
11. In Cæremoniæ ac rituum Missæ SS. Sacrificij, & Divini Officij ac Festorum institutione devota.
12. In utilium rerum adinventione, ac Disciplinarum illustratione ingeniosa.

Ex his pro ratione tituli aliqua amplissimis Nos per insequentes Numeros & Dissertationes documentis edocebimus.

N. 111.

*In S.^{mo} Patre scienter nescio,
& sapienter indocto.*

Grandis Ecclesiæ Doctor, ac Pontifex, nec minus eximium Religionis nostræ Sydus GREGORIUS MAGNUS admirabile omnino elogium tribuit BENEDICTO, dum illum *scienter nescium, & sapienter indoctum* appellat; quanta enim in brevissimâ antithesi

profunditas! quanta in humili ad speciem præconiô sublimitas! quanta in pauculis adeo verbis multiplicis Arcani fecunditas! Nulla luci cum tenebris unquam, & æquè nulla Scientiæ cum inscitia, aut Sipientiæ cum ignorantia societas unquam fuit. Imoverò est luci cum tenebris, inscitiae cum scientia, & cum ignorantia sapientiæ foedus arctissimum. Lux, *omnem illuminans hominem*, DEUS, qui cum Judæici populi Ducibus olim loqueretur, *nebulam inhabitabat*, & cum Salomoniacam Basilicam præsentem impleret Numine, indice Majestatis fumo totum involverat; Idem (inquam) ille DEUS, qui *scientiarum Dominus* est, ac Fons Sipientiæ lucidissimus, Sanctioribus, quas in suam semel scholam discipulas admisit, animabus hanc in solenni statim Principio legem dicit, ut *inscitiae ambiant tenebras*, & per Sacram Christianæ ac simplicis Ignorantiæ *caliginem* ad arcanioris scientiæ lucem, humanis aliàs viribus inaccessibilem, felices pertingant.

Hujus nobilissimum cape sis documentum à BENEDICTO: Navabat Romæ litteris operam, nondum ephœbos egressus; *paterne dexterae Digitus*, &, qui *linguas infantium facit esse disertas*, Spiritus Scientiæ, ac Consilij suavibus ad sublimiora stimulis innocens pueri inflammare pectus, cœlestis disciplinæ inspirare desideria, & in eremum, ubi sanctarum mentium Gymnasia florent, tenellum adhuc Tyronem evocare. Nec surdas Cœlum aures reperit: nam profanis valedixit Musis, ut divinio-

vinioribus jungeretur ; à perituris abivit scientijs, ut perennaturas adiret, & Romam Antrô sublacensi commutans, cùm in solitudine ad cor ejus loqueretur Patris Sapiencia, & quotidiano eundem Magisteriô Christus imbueret, tam copiosis & mirificis in sacra illa Caligine luminibus superfusus est, ut exinde *Stella* instar *Matutinæ* per oppositas sibi *nebula*s erumpentis lucens in diebus suis universam DEI Ecclesiam aberrimis hujus scientiæ radijs illustraret. Quàm ingeniosè igitur Gregoriana Suada BENEDICTUM scienter inscium, & sapienter indoctum nuncupavit ! At talem immeritò nuncupasset, nisi asseruisset pariter, omnium justorum spiritu plenum extitisse BENEDICTUM : *Secularium* quippe scientiarum cisternas ingenti consilio deserens, penetravit ad fontem aquarum viventium, & his ipsis dum totus inebriatus fuit, quis ambigat, non imbibisse scientiæ plenitudinem, cui omnium innatat Justorum Spiritus, qui in ipsa statim Mundi creatione ferebatur super aquas, & Symbolicè mentes Divinissimi Fontis, & scientiarum undâ irrigandas designabat ?

N. IV.

In Regula per varias Religiones propagata.

Q Uemadmodum autem in nitido solent speculo oppositi Solis radij pulcherrimâ reverberatione signari, sic in una san-

etissimâ *Regulâ*, quam Prudentissimus Legifer præscripsit Suis, totius Cœlestis *Scientiæ* Dogmata perfectissimè contenta emicant.

Exiguus quidem mole libellus est, sed hæc tenuitas ejusdem pretium extollit; quia in eo, velut in parvula gemmâ totus ultramundanae Sapientiæ discus solaris non sinè prodigij specie venustissimè relucet.

BENEDICTUM igitur jure Solem dixeris, à quo tot Sacra ac Illustres Religiones ceu minora Cœli Sydera lucem suam, & vitæ *Regulam* accepere: Septemdecim enim numero inelytas Religiones, quæ Christo sub eâdem nobiscum *Regulâ* militant.

Hanc amplexantur Ordo Specuensis, Ordo Carthusiensis, Ordo Cisterciensis, Ordo S. VVilhelmi;

Hanc colunt Ordo Scotorum, Ordo Montis Oliveti, Ordo Selavorum, Ordo Vallis-Umbrosæ, Ordo Fontis Ebrandi;

Hanc imitantur Ordo Cœlestinorum, Ordo Humiliatorum, Ordo Grandimontensis, Ordo S. Ambrosij;

Hanc observant Ordo Camaldulensis, Ordo Vallis scholarium, Ordo S. Pauli primi Eremitæ, Ordo de S. Burga Vidua.

Et ne sublimium hominum Ordo ad splendorem deesset, plures etiam Equestres Familiæ hanc toties, & nunquam dignè satis celebratam *Salutis Regulam* suscepere:

Susceperunt Eam Equites de *Avis*, seu
Ebo-

Ebore ; Equites de Calatrava ; Equites de Alcantara ; Equites S. MARIE de Mercede , & Redemptione Captivorum ; Equites de Montefia ; Equites Jesu Christi ; Equites S. Mauritij , & S. Stephani Papæ ; quorum ultimam Ordinem instituit Magnus Cosmus de Mediceis Erturiæ Dux : Hic interrogatus, cur assidue Regulam S. Benedicti versaret in manibus ? Respondit istud se facere, quòd scilicet ex tam prudentibus S. Patris præscriptionibus, ad populos suæ fidei concreditos valdè accommodata media caperet. *Ex c. 1. lib. Thomæ Galeti, qui inscribitur, Religiosus.*

Et si scire quis aveat, in hac quidnam Regula proprium Cœlestis Scientiæ characterem manifestiùs exprimat ? Magnum denuò Gregorium audiat, gravissimè pronuntiantem, Benedicti Regulam *Sanctæ discretionis plenam esse.* O ! Sancta discretio ! O ! Divina præ reliquis ! O ! propria Sanctorum Virtus ! tu cæterarum medulla, tu vita, tu anima es !

N. V.

In Albo Sanctorum, & Pontificum &c. syllabo.

R Adicis indoles solet ramis adnasci, & genuina nunquam degenerat à Parente soboles. Non est igitur, cur obstupescam ex pleno *Divina Scientia*, ac tam Sancto Patre *plenos pariter Scientiæ Spiritu*, & Sanctos omnino *filios descendisse.* Utinam ea dicen-
di

di mihi vis, & tanti flumen ingenij, & calamus tam facundus esset, ut eorum, quibus Benedictina Religio effloruit, hominum, solenni Ecclesiae ritu immortalitati consecratorum, vel accuratum inire calculum, vel singulorum cogere merita in compendium possem! Credo sanè, idipsum ingeminari hinc posse, quod dixerat olim Abrahamo Deus: *numera stellas, si potes.* Astronomorum industria pertigit eò, ut certum determinaret stellarum numerum, licet nullus eorum dubitet, majorem esse; & Trithemius noster illibatæ Author fidei, ac inter Eruditos ætate suâ celeberrimus ingenti usus accuratione, initò tandem calculò, *lib. 1. de Viris illust. Ord. S. Bened. c. 4.* asseverat: *Temporibus Joannis xxii. ex annalibus summorum Pontificum, & historijs veterum repertos esse de Ordine Sancti Benedicti tam ex Monachis simplicibus, quàm ex Prælati diversarum Dignitatum Sanctorum Cathedralogo inferros quindecim mille, quingentos, quinquaginta novem.*

Ambige nunc, si potes, utrum in Religione tot sanctis conspicuâ Spiritus vigeat Scientiæ? Hæc communis est Dos, quam desponsandis animabus largitur DEUS; Illâ non potuerunt ergo carere in hac, quos in altera coronare vita Coelum statuerat. De quorum numero Sanctorum quidam ita cecinit:

*Iste quot Indigetes! quot Divos protulit
Ordo!*

*Vix fasti capiunt numerum ; sunt aethere
plures,*

*Quàm qui Sanctorum sunt in monumenta
relati.*

Sanctis in Cœlo cum Christo regnantibus addamus eos , qui eosdem in terris Sanctos pronuntiant , & qui ipsi , quòd Christi vices gerant , in terris jam Sancti audiunt : inspiciamus seriem Romanorum Pontificum , & inspicemus *quadraginta sex* , è quibus plerique Sancti , non aliò , quàm Virtutis , & Scientiæ meritò in Romani Principatûs fastigium evecti , Romanam Ecclesiam plurimum illustrarunt ; Eorûmque non pauci turbidissimis temporibus (ut aiunt Mezgeri) ultra tria sæcula steterè magis , quàm sedere in Petri Cathedra & Sede , inter procellas constantissimi. Nec invidendus erat Honor , in quo tantus labor , quies nulla , nullæ , quæ appetitum irritarent , deliciae. Talibus ergo viris , & Patri , qui illos genuit , & Matri , quæ educavit , Religioni , non parum debet illa , cui omnes debent , catholica Ecclesia : Nempe inter pericula Tutoribus , inter minitantes ruinas Columnis , inter Tempestates fidis Gubernatoribus. Nec inaniter scriptum legimus ; Sanctum Petrum Ecclesiæ Primatem tunc temporis cuidam conspicuum se præbuisse , dixisseque : *Vado ad Fratrem meum Benedictum.*

Ubi verò tam venerabilis est Pontificum Syllabus , imaginari sibi quisque facillimus potest , reliquorum in mystico Ecclesiæ corpore mem-

membrorum insignem non minùs numerum fore: si *gloria Patris*, juxta Divinum Oraculum, est *Sapiens ac illustris filius*, multiplici sanè gloriâ circumfluit *Benedictus*; è suo namque gremio dedit *Ecclesiæ Patriarchas* quinquaginta duos; dedit *Cardinales* ultra ducentos; dedit *Archi-Episcopos* plures, quàm mille ducentos; dedit *Episcoporum* millia quatuor, sexcentos & ultra, &c.

Nec vel *Crucem*, vel *Purpuram*, vel *Palium*, vel *Tiaram* hi fere omnes aliò sunt adepti sudore, quàm eò, quò discipuli *Crucis* in schola *Christi* sub *Magisterio Spiritus habentis Scientiam vocis internè loquentis* suaviter distillant.

N. VI.

In Ecclesiæ Doctoribus, & celebrioribus Asceseos Magistris.

IAm in medium adducendi essent *Ecclesiæ Doctores*, & celebriores *Asceseos Magistri*, quorum felices *Calami Theologiam Mysticam* uberrimis *Christianæ Posteritati* monumentis consignârunt. Sed hujus *Orationis* difficiliùs est exitum, quàm principium invenire; præsertim ubi temporum injuriâ, *Antiquitatis* minùs exactæ vitio, & ob typi defectum innumera nobis interiêre *Cœlo notissima*, & in decretorio olim *Judicii ultimi die* manifestanda.

Inter hæc si revocem in memoriam illustrissi-

strissimos, quos Benedictina Religio diversis
 ætatibus tulit in *Ascetica Facultate* Doctores,
 stupeo, & suspensus pariter admiratione cala-
 mus hæret. Quid enim dicam, de laudato
 toties hætenus *Gregorio Magno*, qui in mora-
 libus & christi sancta

*Nec primum similem visus, nec habere se-
 quentem?*

Et cui frequentissimè sub *Columbæ* specie as-
 sidere in humero visus est Spiritus Sanctus, &
sanctorum Scientiam ubertim instillare?

Quid dicam de Anglicanæ Ecclesiæ, tot o-
 lim Apostolorum nutricis, eximio Sydere ac
Cantuariensi Archi-Præsule ANSELMO, qui
 in singulis, quæ scripsit pæne folijs nil spirabat,
 nisi Spiritum *Scientiæ*; & (ut effatur de eo *S.*
Mater Ecclesia,) in Sanctis meditationibus se
 exercens, lacrymarum imbres fundens, ple-
 rúmque ante nocturnas vigilias parum, aut
 nihil somni capiebat?

Quid dicam de illuminatissimo, & VE-
 NERABILI BEDA, cujus in Asceticis erudi-
 tio fuit incomparabilis, & nascent hinc fama,
 gloriæque ferè sinè exemplo; illius etenim ad-
 huc viventis Homiliæ cœlesti doctrinâ refertis-
 simæ in publicis Ecclesiæ conventibus ad in-
 struendos Christi fideles, & in DEUM obse-
 quiô, cultûque inflammandos prælegebantur;
 Unde cùm Sancti titulus non posset, *Venera-
 bilis* Antonomasia præfixa est?

Quid dicam de mellitissimo Ecclesiæ Doctore
 BERNARDO?

Quid

Quid de LEANDRO Hispalensi ? de GREGORIO Turonensi ? ILLDEPHONSO ? LAN-FRANCO ? RUPERTO Tuitiensi ?

Grandia nunquid Doctorum nomina ? grandia Ecclesiæ Lumina ? quæ cum alienâ luce non egeant, actum ageremus, si quid laudis addere, & quid lucis aspergere nostra eisdem balbuties, & caligo vellet. In honoris potius obsequium comitentur illos præstantiores itidem in hac *Sanctorum Disciplina* Magistri, B. PETRUS DAMIANI, Trithemius, Blosius, Gerardus Belga, Benedictus Hæftenus: omnesque cæteri, qui aliquo *Scientiæ* hujus Characterē inclaruerunt: quos inter nuperrimè in *Viciniâ* enituit Reverendissimus DD. Joachimus Abbas Fischingensis in Helvetia; ejus *Scientiæ*, quam tractamus, *Spiritum* editi hætenus libelli vix non palpabilem exhibuere.

Huic meritò adjungas R. P. Anselmum Bisling Einsidlensem, qui in *Exercitiorum suorum Monte Thabor &c.* summum profectò Perfectionis, ac elogiorum simul, quæ præstantissimi undique Viri addiderunt, apicem felicissimè attigit: sicut & R. P. Placidus Spies Prior Ochsenhusanus in suo *sacrarum Meditationum Alveari.*



N. VII.

In Ioanne Gersene aurei de Imitatione Christi libelli Authore.

AT, ut in uno reliquos Speculo intueri nobis liceat, prodeat JOHANNES GERSEN in Italia Vercellensis Abbas, quem aurei *libelli de Imitatione Christi* Conditorem, Authorem, & Scriptorem esse, nemo hodie dubitet: quando post annorum plurium celeberrimam acerrimis agitatam studiis, & summo rigore pertractatam controversiam, ab Illustrissimo Archiepiscopo Parisiensi, & Viris in re antiquaria, ac omni præterea doctrinæ genere veratissimis, necnon illustri dignitate, famaque conspicuis Anno tandem 1671. in nostræ sacratissimi Ordinis favorem, & pro ipso *Gersene* definitum fuit; delectos tunc Judices ad ita decernendum præcipua hæc impulit causa, quòd Authographa MS. Gersenis, ex varijs hinc inde locis Lutetiam Parisiorum comportata, & ab Adversarijs falsi postulata, omni prorsus carere vitiò, & nullius falsi vel longinquam suspicionem latere, manifestè deprehenderent. Hoc peritissimorum Virorum factum judicium R. P. Franciscus Delfau Monach. ac Presb. Cong. S. Mauri per Apologiam pro *Gersene* toti subinde promulgavit litterario Orbi.

Canonici Regulares quidem tantum
I
subli-

sublimis libelli partum Thomæ Kempensi suo
tribuentes, sublato è vivis post triennium Del-
faviò (nostrò in tam celebri causa Agente)
Kempenses vindicias vulgarunt. Verùm insur-
rexit contra eosdem laudatissimus Mabillonius
noster, & editis in lucem solidissimis pro more
Animadversionibus &c. Adversarios luculenter,
ac cum victoriæ palpabili fructu refutavit.

Rationem autem, cur Benedictini Gersensem
vindicare seriori tandem animo debuerint, lu-
culentam detegunt ipsius Verba Galli Vindi-
cis: *Quanquam si satis habuissent* (inquit in
præfat. pag 14.) *Thomæ vindices*, rem haud
dubiè nostram ad se transtulisse, nullam propter-
ea litem eis intendissemus, seu in gratiam ejus
necessitudinis, quæ nobis cum ipsis intercedit,
æternúmque intercedet; seu quod Ordini nostro
affatim Scriptorum est, quorum præclara multi-
tudo unius quamvis nobilis jacturam facile so-
lari possit. Nunc verò cum Majores nostros cor-
ruptorum exemplarium Reos palam ac publicè
egerint, officij nostri esse duximus, fœdam hanc
atque illiberalem notam amoliri.

Quemadmodum igitur Regi Macedo-
num Philippo quondam Orator acclamavit:
summam hanc ejus esse laudem, quòd Alexan-
drum genuerit; ita potiori nos jure, sacram
Religionem nostram alloqui sic possumus: In-
comparabile tuum, fœcunda BENEDICTI Pro-
pago! præconium in hoc versatur, quòd aureum
hunc,

hunc, & pretiosum adeò, ac post sacras utriusque Testamenti paginas omnium judiciò nobilissimum edideris partum; &, dictante *Scientiæ* spiritu, in totius humani Generis uberri-
mos fructus scripseris divinissimum illum *de Christi Imitatione* libellum. Hujus laudes multò excellentissimas Constantinus Cajetanus noster laconicè quidem, sed energicè complexus est, dum ita loquitur: *Quanquam* (si verum fateri velimus) non Joannes, sed ipsa potius *Divinitas*, atque (ut apertius loquar) Sacer ille *Spiritus*, habitator quietis puræ mentis penetralibus dilapsus, per os Viri illius altitudinem divinarum Sapientiæ, & scientiæ Dei mortalibus patefecit &c.

N. VIII.

Posthuma Reverendissimi

*DD. Georgij Geißeri Abbatis Villingani
testimonia pro Gersenio.*

QUoniam Sacri tribunalis Parisiensis Auctoritas suismet probè instructa viribus alieno haud indiget robore, non pro fulcro, sed ornamento potius, & curiosi Lectoris gratiâ hoc apponere numero statui gemina testimonia, quæ inter notata posthuma Reverendissimi DD. Georgij Geißeri Abbatis Villingani, viri ob eximiam eruditionem, virtutemque prorsus singularem celebra-

tissimi, reperta, Reverend. mus DD. Michaël ejusdem Virtutis, eruditionis ac honoris Hæres, Successorque gratiose mecum communicare dignatus est; sic autem habent: In Celebrissimo & Imperiali Monasterio Zvvifaltensi asservantur duo libri MS. Germanici; alter in folio, ut vocant, octavo, alter in quarto. Qui in octavo hoc fine clauditur: „Hie hand ein End 2c. Capitel. Zu tutsch gemacht vnd genommen vß dem buch genant in latin De Imitatione xpi geschriben Anno Dñi M.º CCCCº XLVI. in jejunio Andreas Dunchs Capellanus in Hunenstain, hoc est, Hunenstein. Initium verò prædictorum capitulum est hoc: Ain Capitel von der Nachfolgung IHU xpi, vu verschmachunge all' vppickait der welt.

Alter in 4. to sic incipit: „Prima Pars de imitatione Christi. Tum Germanicè: Hie vahet an der erste theil der Nachvolgung Ch. vnd von verschmehung der welt. Post finem tertiæ partis hæc habentur: 1448. am anderen tag der Winachten wart diß buch vßgeschriben / bit GOTT für mich ein Ave Maria. Et ad marginem: „Explicit liber de interna locutione ad animam fidelem. Sequitur: hie vahet an daß vierde teil und sint von dem Sacramente.

In Monasterio omnium Sanctorum Schaffhusij extat libellus de Imitatione Christi, impressus 1487. cujus unus & solus titulus: „Tractatus aureus, & perutilis de perfecta imitatione

“ tione Christi, & vero contemptu Mundi, finè Authoris nomine: ut testatur Reverendissimus DD. Basilus Abbas Rhenovienſis in ad me datis 30. Martij 1683. Est autem hic libellus in forma 12. sub charactere antiquo, majusculis, prout mos antiquorum ferebat, colore tinctis, locus præli nullus est. Additus est Tractatus de meditatione Cordis Johannis Gerson.

N. IX.

Prolixior Relatio Controversiæ circa Authorem libelli de Imitatione Christi, ex Actis Eruditorum, Anno 700. fol. 100.

Citant Acta Eruditorum Bibliothecam novam Scriptorum Ecclesiasticorum, Authore Ludovico Ellies du Pin: & ad hujus mentem præallegatam controversiam sic referunt:

Nemo quippe tam ignarus est rerum in Orbe erudito gestarum, ut certamina ob libri hujus Auctorem à Viris doctissimis, integrisque Ordinibus suscepta ignoret. Et Auctor quidem omnem controversiæ hujus seriem primo justo ordine exponit, ex quo eam paucis repetere operæ fuit pretium. Prætulisse namque initio huncce librum refert nomen Bernardi, inde mox Gersonis, mox Thomæ de Kempis. Post Baldij editionem A. 1520. luci publicæ expositam, à plerisque Thomam de

Kempis pro ejus Auctore fuisse habitum nemine ferè repugnante, donec sub initium hujus sæculi lis hac de re moveretur. Et primo quidem in Hispania Petrum Manriquez Thomæ Kempensi cum ideo abjudicasse, quod Bonaventura in suis Collationibus libri hujus injeisset mentionem, quem tamen constaret esse mortuum, priusquam natus esset Thomas de Kempis. Secutos fuisse hanc sententiam nonnullos ex Hispania, quibus deinceps accesserit Rosignolus Ordinis Jesuitarum sacerdos, qui ex codice quodam manuscripto, quem apud Jesuitas Aronæ commorantes inspexerat, probare annisus fuerit, Auctorem libri hujus esse Joannem Gersen seu Gessen seu Gesen Abbatem Ordinis Benedictini. Huic opposuisse se Rosvveidam Jesuitam Belgam, qui editâ A. 1615. epistola Thomæ de Kempis librum hunc seu genuino Auctori vendicaverit, asserueritque Collationes, uti vocantur, Bonaventuræ huic auctori perperam tribui. Nec tamen impunè hoc tulisse Rosvveidam: Constantinum namque Cajetanum, itidem Ordinis Benedictini Abbatem ex Congregatione Montis Cassini Romæ A. 1616. recudi curasse huncce librum præfixo eidem nomine Joannis Gersenij, additâque dissertatione, quâ librum Bonaventuræ, à Rosvveida in dubium vocatum, iterum huic auctori asserere atque ex manuscripto Codice Aronensi rem omnem planè conficere voluerit. Nec tamen deseruisse causam hanc Rosvveidam, sed edidisse A. 1617.

Vindicias Kempenses, in quibus probare conatus fuerit, codicem aronensem neutiquam ex antiqua Benedictinorum Bibliotheca fuisse, sed Majolum Jesuitam eum ex Patris sui domo secum attulisse. Quam ejus sententiam Cajetanus, editâ A. 1618. Parisijs Apologia iterum infirmare allaboraverit. Hinc inducias veluti factas narrat usque ad annum 1626. tum enim Rosvveidam novam libri hujus curâsse editionem, addita dissertatione, qua Thomæ Kempensis causam iterum egerit: eamque editionem recudi fecisse, post Rosvveidæ mortem A. 1630. & 1634. Bollandum. Mox tamen Valgravius Benedictinum huic editioni aliam opposuisse Parisijs A. 1638. impressam, additis notis apologeticis, in quibus trium codicum manuseriptorum, & editionis Venetæ A. 1501. procuratæ, Auctoritate Joanni Gersenio Abbati Vercellensi hunc foetum asseruerit: licet in uno codicum manuseriptorum, qui fuerit Cardinalis de Biscia, auctor libri vocatus fuerit Joannes de Canabaco. Sed nec ita rem eum confecisse, quin Frontonem (Fronteau) opposuisse illi librum A. 1641. impressum, quo argumenta Valgravii diluere suscepit. Eodem verò tempore Richelius Cardinalis volebat, ut porro Auctor narrat, ut regijs typis liber de Imitatione Christi excuderetur: ad eum itaque Gregorius Tarissus Superior Benedictinorum de Congregatione S. Mauri accedebat, rogabátque Cardinalem, ut librum sub nomine Joannis Gersenij exire

permitteret, simulque ad quatuor codicum
manuscriptorum, qui Romæ essent, nomén-
que Gerseni hujus præfixum haberent, provo-
cabat. Richelius, ne temerè definire quid-
quam hac in lite videretur, à viris doctis co-
dices illos inspicere voluit, ut, num res se ita
haberet, uti Tarissus narraverat, edoceretur.
Pluribus auctoritate Cardinalis Bagnij cura ista
demandata fuit (ex mente quippe Auctoris
hæc narramus) quos inter etiam fuit Gabriel
Naudæus. Hic cum accuratiùs codices istos
perlustrasset, tandem deprehendit, nullum
causæ Benedictinorum hinc afferri præsidium
posse: nec etiam quatuor manuscripti codi-
ces, ut Tarissus asseveraverat, sed tres tan-
tum Romæ asservabantur, & quidem iidem,
quos Valgravius produxerat, quarto autem
loco accedebat Veneta libri hujus editio eidem
Valgravio laudata. Naudæus itaque cum hoc
retulisset, instrumento solenni hoc ejus con-
firmare testimonium, quod antea visum illis
fuerat, minus consultum duxerunt, quibus hoc
negotium erat datum: ipse tamen ut rem
omnem deprehendisset, litteris à Vincentio
Galleoto more recepto confirmatis, perscri-
psit ad puteanos fratres. Hæc dum Romæ age-
bantur, in Gallia Sirmondus auctoritate codicis
manuscripti, qui in collegio Jesuitarum exta-
bat, fultus, librum istum antiquiorem esse,
quàm ut Thomam Kempensem agnoscere pos-
set auctorem, contendebat: Dionysius contra
Petavius argumento ex styli ratione ducto, Tho-
ma

mæ hunc librum vindicabat, cæterisque difficultatibus jam abundè satisfecisse Rosvveidam arbitrabatur.

Quæ sanè doctorum Virorum dissensiones effecerunt, ut Richelius, nullo addito auctoris nomine, librum imprimi juberet. Naudæi tamen Auctoritas tanti non fuit Benedictinis, ut non Cajetanus Abbas in sententia persisteret, denuóque Apologiam pro Joanne Gersenio, cum nova libri editione, vulgaret, Romæ A. 1644. impressam. Sed Cajetanum rursus Simon VVerlinus A. 1647. refutavit, sicut jam A. 1641. Idem Valgravius refutaverat, licèt liber contra Cajetanum scriptus demum A. 1649. prodiret. Eodem tempore Fronto dissertationem suam recudi fecit, testimoniúmque Naudæi de codicibus MS.tis Romanis illi inseruit, & hoc ipso velut classicum cecinit, & ad prælium viros doctos denuo evocavit. Namque statim Robertus quatremarius de Congregatione S. Mauri ad Frontonis Dissertationem respondit, atque Naudæum perfidiæ tum in examinandis, tum in tractandis codicibus istis MS.tis accusavit: in suspicionem namque eum adducere conatus est, ac si codices istos, dum ad perlustrandum illi concessi sunt, ipse depravasset. Huic accessit Franciscus Valgravius, qui eidem Frontonis Dissertationi responsionem opposuit, & eandem quoque contra Naudæum repetijt accusationem. Naudæus itaque gravissimi criminis exprobratione irritatus, non tantùm arguit,
1 5 quibus

quibus pugnare eruditi consueverunt, depellere hanc calumniam consultum duxit, sed ad magistratum quoque rem detulit, ut petulantia suæ promeritas darent poenas, qui existimationi ejus æternum inussisse dedecus videbantur. Et hætenus vicit in hoc judicio Naudæus, ut adversarij ejus delere verba, quibus famam ejus lacessiverant, juberentur, simulque prohiberetur sub nomine Johannis Gersenij librum imprimere, permitteretur contra Thomæ Kempensis ei præfigere nomen. Interim Fronto tum Valgravio, tum Launoio (hujus enim de auctore hujus libri tractationem, qua pro Johanne Gersenio contra Thomam Kempensem sententiam pronuntiaverat, recudi fecerat Valgravius) nonnulla reposuit. Naudæus autem, editis varijs tum latino, tum gallico idiomate libellis, causam suam acriter egit præsertim in Cajetanum Abbatem calamum strinxit *in causa*, ut vocat, *Kempensis correctione*, nec mitiorem se præbuit erga Launoium *in Velitatione Kempensi*. Paulò modestior eò fuit Thomas Carreus Anglicus, qui eodem tempore pro Thoma à Kempis in arenam descendit, in libro, cui titulum fecit: *Thomas à Kempis à se ipso restitutus*. Atque hunc sanè inter doctissimos Thomæ defensores referendum esse Auctor censet. Cæterum Fronto quoque novis excogitatis rationibus iterum in scenam prodijt, nec defuit sibi Launoius, sed Frontoni librum opposuit: Vanguallius autem cum Marillacio congressus est, &

& , quæ hic pro Joanne Gersenio dixerat, diluere conatus est. Sed Canonici tamen Regulares, victoriam ad sua transisse castra, non dubitabant, postquam publico decreto, ut antea diximus, sancitum esset, ut sub nomine Thomæ de Kempis imposterum liber iste imprimeretur; hinc *Triumphum Thomæ de Kempis* ediderunt, Auctore Denosio, itémque alium librum Gallico idiomate scriptum, titulúmque præferentem: *La Contestation touchant l'Auteur de l'Imitation de J. C.* cui in dissertatione quadam gallica Launoïus quædam reposuit.

Benedictini interim, quos potuerunt, congesserunt codices manuscriptos, eosque supremo Præsidi Domino de Lamoignon obtulerunt, qui eum Viros quosdam doctrina præstantes convocasset, judicatum rursus fuit, hos codices nullum causæ Benedictinorum afferre præsidium. Accesserunt itaque iidem ad Franciscum Harlæum Archiepiscopum Parisiensem, eique duodecim codices manuscriptos obtulerunt: eumque itidem Viros criticæ artis peritissimos, interque eos Valesium, Baluzium, Cotelarium, aliosque convocassent, hi præsentem Archiepiscopo rem omnem accuratiùs sub examen revocantes, tandem deprehenderunt, scripturam unius codicis à Naudæo indubium Vocatam omnino genuinam esse. Factum id die 14. Augusti Anno 1671., indeque Benedictini A. 1674. librum istum, præmisso nomine Johannis Gersenij, recudi fecerunt, simul-

simulque in lucem emissa est dissertatio Delfonij, quâ causa Benedictinorum strenuè defenditur. Accessit mox codex manuscriptus Slusianus Benedictinis oblatus, quem præstantissimi Critici hanc ob causam die 23. Augusti A. 1674. Congregati pro genuino & satis antiquo, ut res ex eo confici posset, habuerunt. Canonici contra Regulares non tantum dissertationi Delfonij A. 1677. responsionem opposuerunt, seu Vindicias Kempenses à Testelleto conscriptas, & mox per aliquot observationes refutatas, sed congestis varijs codicibus manuscriptis Criticorum itidem hanc ob causam die 4. Martij A. 1681. congregatorum solenni testimonio illorum auctoritatem vimque probandi confirmari curarunt, ne hac in parte inferiores Benedictinis viderentur.

Tandem verò Johannes Mabillonius & P. Michael ex itinere Italico reduces, aliquot libri hujus codices manuscriptos secum attulerunt, eosque Criticorum celebrium, ad hanc causam disceptandam congregatorum, judicio submiserunt, qui codicem Aronensem, quem ex Italia apportaverant non inferiorem annis trecentis, præterea duos alios tantæ antiquitatis judicarunt, ut res ex illis confici posset: factumque id die 28. Julij A. 1687. Hæc itaque libri hujus facta postquam Auctor recensuit, ad rem ipsam se confert, & primò quidem rationes enarrat, quibus probari possit auctorem libri hujus non esse Bernhardum: cum codices manuscriptos, qui nomen Tho-

ma

mæ de Kempis præfixum habent, sub examen revocat, editionesque eidem auctori hunc librum vendicantes recenset, nec prætermittit testimonia Auctorum Thomæ à Kempis faventium, iisque & rationes, quibus idem evinci possit, addit; porro in medium producit rationes, quibus contra Thomam à Kempis pugnatur, & eas quoque accuratiùs sibi considerandas sumit: tum verò producit codices manuscriptos & editiones, pro Joanne Gersono Cancellario Academiae Parisiensis militantes, iisque rationes, quibus idem probari possit, subjungit; nec tamen rursus reticet rationes, quæ contra Gersonem proferri possint; atque his ita ordine enarratis ad Johannem Gessenium, seu Gersenum Abbatem accedit, & num Abbas aliquis Vercellensis hujus nominis unquam vixerit, aut num fortè cum Joanne Gersono à nonnullis fuerit commutatus, disquirat. Suam tandem hac de lite sententiam hunc in modum exponit: primò certum putat & exploratum, auctorem hujus libri nec Bernardum esse, nec Ludolphum Saxonem, cujus nomen in codice quodam manuscripto legatur; deinde nullum extare argumentum, quò planè evincatur, Thomam à Kempis ejus esse auctorem; antiquissimum enim codicem manuscriptum, qui ei favere videatur de Anno 1441. Thomæ quidem præferre nomen, sed non Auctorem; verùm qui librum descripsit, eodem designari; reliquos codices aut editiones nihil probare, cum ijs antiquiores aut saltem

æquè antiqui sint, qui Gersoni aut Gersenio
faveant: ex stili conformitate nihil quoque
colligi posse, cum hæc sola ad librum Aucto-
ri vindicandum non sufficiat, nec in omnibus
hic deprehendatur, incertum quoque sit, qui-
nam ex reliquis viri hujus libris eum auctorem
agnosceant. Præterea valde sibi verosimile vi-
deri asserit, librum hunc Thomâ de Kempis
esse antiquiorem; id quod ex codicibus, qui
A. 1433. 1434. 1436. 1437. scripti sunt, demon-
strat. Quin vivente adhuc Thoma de Kempis li-
brum hunc Bernhardi quandoque, aut Gersonis,
aut Gessenij nomen præfixum habuisse, itidem ex
manuscriptis codicibus ac editionibus nonnullis
comprobat. Certum insuper esse dicit, anti-
quissimos codices aut nullum nomen præfixum
habere, aut nomen Gersonis præferre, & Jo-
hanni quidem Gersoni non tantum multos co-
dices favere, sed in Francia quoque & Italia
per duo integra sæcula, decimum quintum &
decimum sextum, omnium consensu eum pro
libri hujus auctore fuisse habitum; sed obstare
ei primò diversitatem stili, tum quòd *Monachus*
non fuerit, qualem tamen auctorem libri
fuisse constet. Sed illos quoque nullo funda-
mento niti, qui Gersenium, aut Gessenium
pro Abbate Vercellensi Ordinis Benedictini
vendicent, cum in codice Aronensi tantum
Abbas vocetur, in cæteris autem codicibus
nunquam ne Abbatis quidem nomen compa-
reat: denique non posse definiri autumat, num
in Codicibus manuscriptis nomina Gelsen, Ges-
sen,

sen, Gersen Academiae fortè Parisiensis Cancellarium Gersonem aut aliam quendam & praesertim Abbatem dictum designent. Atque ex his omnibus concludit, post tot discrepationes incertum adhuc manere, quis sit libri hujus Auctor.

N. X.

Corollarium ex recensita

haëtenus Relatione.

EX hac, quam percepimus, Relatione colligas velim, Amice Lector! primò: agnoscere perspicuè, & ingenuè profiteri *Referentem*, Authorem libelli *de Imitatione Thomam Kempensem* neutiquam esse, sed Monachum quendam.

Secundò, eundem hærere, an Monachus is Benedictinae fuerit Familiae, & Abbas quidem, nec ne? idcirco nempe, quòd illi, quos Benedictini pro se adduxere, MS. Codices praefixum Abbatis nomen non habeant.

Verùm, si, quod res fortè est, fari licet, videtur iste Author hac concludendi arte solari voluisse Partem Adversam, cui Kempensem abjudicasset: inani quippe religione seu scrupulò eum trahi, nemo est, qui, penitiùs utriusque partis fundamenta perpendens, non luculentè advertat: Quem enim Eruditorum fugit, quòd etiam hac ætate non Abbatis modò, sed et ipsum adeo Authoris germanum nomen certas subinde ob causas passim supprimatur? ut nuperrimè videre erat in Eminentissimo Sfondrato

drato nostro, qui partim nullò, partim asecr-
titiò Eugenij Lombardi nomine varia typo
mandavit opuscula, inter Eruditos immorta-
litate nihilominus felicissimè adeptus.

Et verò, ipsa fortassè, quam enixè adeò,
& crebrò Gersenius inculcat, & undique spirat,
monastica eum humilitas commonefecerit, am-
plissimum Abbatis titulum negligere potius,
quàm avidè fronti sui libelli præfigere: Etsi
eundem manifestè indicent MSS. Codices Aro-
nensis, & Januensis, teste Reverendissimo DD.
Constantino Cajetano in *Responsione Apologe-
tica adversum Vindicias Kempenses Heriberti
Rosvveydi S. I.* Ubi apertè insaper, & ad oculo-
rum demonstrat, Gersenem & Benedictinum
quidem, & Vercellensem extitisse Abbatem &c.

Testem hunc (Cajetanum) appellat Ad-
versarius noster f. 532. *Abbatem fabulosissi-
mum &c.*

Labem tamen supplet, & diluit Emi-
nentiissimus Card. Baronius, qui apud Ferdi-
nandum Ughellum in *Italia Sacra* (quod O-
pus immortalis laude dignum censet R. mus DD.
Abbas Geysserus) Cajetanum fol. 161. appellat,
doctum, & rerum antiquarum peritissimum:
Item fol. 797. *Eruditum senem, amicum suum;*
& fol. 151. *in antiquitatibus in lucem vindican-
dis laborantem.*

Qui Idem Ughellus convicia, ab Adver-
sario in Caramuelem passim congesta, uno
abstergit encomiò, eum ex mente Erycei Pu-
teani nuncupans, *Virum, si ingenium, doctri-
nam,*

*nam, eloquentiam spectes, magnum, eximium,
ac planè Divinum.*

DISSERTATIO II.

*An aliæ præterea Scientiæ vi-
geant Religione Benedictina?*

SUMMARIA.

1. *Quales Scientiæ sub hoc titulo veniant? Et
eæ num in Benedictino Ordine florent?*
2. *Sacra Scripturæ Interpretes.*
3. *Theologi Scholastici.*
4. *Canonistæ.*
5. *Philosophi.*
6. *Historici.*
7. *Mathematici.*
8. *Musici.*
9. *Linguistæ.*
10. *Oratores.*
11. *Poëtæ.*
12. *Grammatici.*
13. *Quinque Sibyllæ.*
14. *Suffragium R. P. Dominici Musantij S. I.
de Literarum per Nostros propagatione, &
librorum antiquiorum utilitate.*
15. *Copia Scriptorum nostrorum.*
16. *Arnoldi VVionij circa Eos Judicium.*
17. *De iisdem Hieronymi Plati S. I. Testimo-
nium.*

N. I.

*Quales Scientiæ sub hoc titulo
veniant? Et eæ num in Benedictino
Ordine floreat?*

Sermo nobis hætenus de *Scientia* extitit *Sanctorum*, ab alijs *Theologia* etiam *Mystica* nuncupata, discenda in Academia cœlesti; ejus feliciores Alumni non tam Theologi evadunt, quàm Theophili. Ejus Magister est & Professor ipse Doctor Doctorum Christus JESUS: Discipuli universæ Christiani, Animæ, simplices tamen, & humiles, quæ ignorare, ignorarique in ipsius Mundi theatro unicè concupiscunt; Quæq; in centrum ignorantiae, Christum circumplexæ, semel admixtæ, Sortis denique & *Scientia* ejusdem JESU Christi merentur fieri participes, & in secretiori Ascesi salubrius eruditæ, propter eminentem *Scientiam* Jesu Christi, omnia arbitrantur ut stercora: His sublimior *Philosophia*, scire JESUM Christum, & hunc Crucifixum. Dicitur hæc *Theologia mystica notitia Divinorum in Oratione, & contemplatione modò supernaturali comparata.* Apud Pettschacher de Deo, q. præm. a. 1. §. 1.

Occasione hujus, quam Dissertat. priori pertractavimus, *Scientia*, ad alias insuper dilabimur *Scientiarum* facultates, quas humanâ obtinere industriâ possumus, sine speciali Luminis Divini adminiculô; Habitus earum recens-

consentur inter *aquisitos*, nec simpliciter, sed secundum quid bonum reddunt habentem.

Inter Eas verò tenet primatum *Theologia*, quæ occupatur vel in eruendis Sacræ Paginæ Mysterijs, & vocatur *Positiva*; vel in demonstrandis, explicandisque veritatibus, quæ DEUM, Christum, Angelos, Hominem, Virtutes, Sacramenta &c. spectant, & indigitatur *Scholastica*; vel in asserendis contra Hæreticos Fidei Dogmatibus, impugnandisque Sectariorum erroribus, & nuncupatur *Polemica*; vel denique in Syndereseos, morumque disciplina, & *Moralis* appellatur.

Cui nobilissimæ Facultati præcellentię meritò sanctior *Pontificij Juris Prudentia* succedit.

In harum autem Scientiarum regali quasi obsequiò ancillantur *Philosophia*, & *Mathematica*, *Historia*, & *Musica*, *Oratoria*, *Poëtica*, & *Grammatica*.

Istæ tam præstantes in omni genere Disciplinæ, si ratione, si linguâ, si voce pollerent, unanimes & gratissimæ profiterentur, quòd Benedictinæ Propagini vel ortum debeant & cunas, vel incrementum & splendorem, vel beneficam instauracionem, & vigorem, quem amiserant, redivivum.

At, quia nequeunt ipsæ loqui, nec vel ea mihi facundia, vel id lucubratiunculæ angustijs spatium sit, ut omnium queam Authorum pro dignitate merita, laudêlque proferre, unum aut alterum ex *Antiquioribus*, &

Modernis autem paucos, aut *fama* magnitudine, aut *Vicinia* beneficiô duntaxat notiores, (nec hos tamen omnes) per classes suas distributos in medium adducam, ut ipsa sui memoria partæ quondam *famæ* reverentiam, & pretium nobis ingeneret.

Quô fine velim de Singulis illud intelligi, quod in Salustio legimus, graviter pronuntiante: *Carthaginem non alienis egere clogijs, cum ipsa sui ipsius elogium sit.*

N. 11.

Illustriores Sacra Scripturae Interpretes.

Quemadmodum inter præclariora librorum monumenta, Sacer, quem ipse *Scientiarum* Spiritus dictavit, Codex primas usque tenet, ita Scriptores illi cæteris sunt meritò præferendi, qui Eundem, seu **SACRAS UTRIUSQUE FOEDERIS PAGINAS** locupletissimis commentationibus illustrarunt. Quô sanè in studio adeo Nostri (inquit Hæftenus) se indefessos exhibuerunt, ut alijs palmam præripuisse videantur; Dedit enim Ordo olim noster S. Matri Ecclesiæ decem Doctores, qui totam Sacram Scripturam à capite, quod ajunt, ad calcem suis lucubrationibus exposuerunt: Beda nimirum Venerabilis, Rabanus Maurus, Haymo Halberstadiensis Episcopus, Strabo, Anselmus Laudunensis, Rupertus Tuitiensis, Petrus Perchorius,

rius, S. Paterius, Hieronymus Lauretus, Isidorus Clarius Brixienſis.

Forſan ex his aliquos penitiùs averes cognoſcere, audi proinde Eccleſiam in Breviario loquentem de Venerabili Beda: *nihil illi dulciùs erat, quàm divinas legere ſedulò, & exponere Scripturas.* De Strabo loquentem Trithemium: *Strabus Monachus Fuldensis, GLOS-SÆ ORDINARIÆ Author.* De Anſelmo Lauduneniſi Hæſtenum: *Hic GLOSSAM INTERLINEAREM composuit.* Perchorius omnia penè Scripturæ verba in ſuo Dictionario moraliter explicat, alteróque libro moralitates totius Sacræ Scripturæ plano ſtylo interpreta-tur. S. Paterius ex S. Gregorij Scriptis excer-ptiones in omnes veteris & novi Teſtamenti li-bros exhibuit. Lauretus Silvam Allegoriarum ad totius Sacræ Scripturæ intelligentiam ex Ss. Patribus conſcripſit. Isidorus Clarius Græcè, Hebraicè, latinèque doctiſſimus, ex Mona-cho Caſinenſi Episcopus Fulginatenſis, Sacra Biblia ad Hebraicam, Græcàmque veritatem caſtigavit, & ſcholijs locupletibus illuſtravit.

Prætereo nunc alios clariſſimos Docto-res Gregorium Magnum, Alcuinum, Anſel-mum, Angelomum, Ambroſium, Ansber-tum, alióſque innumeros in hoc ſtudio dili-gentiſſimè verſatos.

Neque defuit nobis alter Hieronymus, qui Hebraiſmos, Hebræorúmque Chronica, & Rabinorum aliquot tractatus Latinis auribus daret, Gilbertus Genebrardus, hæreticorum

Expugnator acerrimus, & Scriptis Orbi notissimus.

De Joanne Abbate Monasterij Nivicense loquitur VVion: *Biblia Concordantijs fundamenta posuit.*

Cujus Succenturiator nuper fuit V. D. Hubertus Phalesius, Cœnobij Affligeniensis Subprior, qui Anno 1685. Sacrorum Bibliorum Concordantiam ingenti cura & studio varijs locis expurgavit ac locupletavit.

Vicinia dedit novissimè Plurimum R. P. Paulum Mezger apud S. Petrum Salisburgi Professum, Ss. Theologiæ Doctorem, ejusdemque ac Sacræ Scripturæ in universitate Salisburg. Professore emeritum, & Procancellarium &c. qui *Sacram Historiam de Gentis Hebraicæ Gestis expositam* edidit Anno 1700. Ejusque Frater Germanus Josephus Mezger &c. *Institutiones in S. Scripturam, & Cornu Danielis.* Famâ innotuit. Illustrissimus ac R. mus P. D. Antonius Perez Archi-Episcopus Cæsar-Augustanus, qui nuper *Authenticam Fidem quatuor Evangeliorum*, præter alia plura, scripsit.

N. 111.

Theologi Scholastici

Profundiores.

GOrdios SCHOLASTICÆ THEOLOGICÆ nodos feliciter dissolvère ex *Antiquioribus*, RABANUS MAURUS; qui
de

de Prædestinatione scripsit librum, quem hæ-
 ænus nunquam editum edidit Ferdinandus
 Ughellus *to. 3. fol. 676.* Alterum item contra
 hæreses, ibidem: ubi expresse dicit: *Mala*
DEUS tantum præscit, Bona prædestinavit. fol.
677. ubi, teste R.^{mo} DD. Georgio Geisler
 Abbate Villingano, videtur omnino negare
 præmotiones phycas.

S. ANSELMUM Sancta Mater Ecclesia
 in Officio Eccles. ita extollit: *Divinarum rerum*
contemplationi adeo deditus fuit, ut obscurissi-
mas, & ante id temporis inauditas de Divini-
tate quæstiones, DEO referante, clarissime in-
spexerit, & explicaverit. Dixerim ego de Di-
 vinissimis Ejus Scriptis illud commune: *quod*
verba, tot sententiæ! quod apices, tot Oracu-
 la! Dignissima proin' quæ nuperrimè Emi-
 nentissimus noster à Guirre eruditissimis suis
 illustraret Commentarijs, hujusque Exemplum
 plures posthac Benedictinæ Disciplinæ Alumni
 imitarentur.

Novissimè in hac solùm Vicinia quatuor
 integri Cursus Theologici lucem publicam
 subierunt; Primi Author est Celsissimus ac
 R.^{mus} DD. Augustinus Reding Princeps &
 Abbas Einsidlensis: cujus incomparabilem
 præterea Religionis Catholicæ zelum, nec
 minùs profundissimam doctrinam loquuntur
 alij insuper in Tridentini, Baronij &c. defen-
 sionem typis vulgati Tomi.

Secundum composuit Clariss. ac Magnifi-
 cus P. Benedictus Pettschacher ad S. Lamber-

cum in Styria superiore Prior, notæ doctrinæ Vir & probitatis.

Tertium vulgavit Clariss. P. Paulus Mezerger suprâ nominâtus: omnes antehac Ss. Theologiæ Professores in alma Universitate Salisburgensi.

Quartum edidit Cursum Admodum RR. PP. Professores Theologiæ ad S. Gallum: in quo ipso etiam illustrissimo Monasterio elucubravit suum illum notissimum *Nodum Prædestinationis* Eminentissimus Sfondratus noster, quò seipsum planè superâsse videtur.

His adde Gregorium Sayrum Casinensem, Virum in *Moralibus* maximæ Authoritatis, & famâ notissimum.

N. IV.

Celebriores Iuris Canonici Collectores, & Interpretes.

Locupletissimas in *Jus Canonicum* Exegeses, ac grandes tam mole, quàm Doctrinâ Commentarios concinnâsse, ac per hoc utilem toti Ecclesiæ, ac præsertim Jurisconsultis operam navasse Benedictinum Ordinem, nemo non fatebitur, qui consideraverit ab eo profluxisse tot Canonum, ac Decretorum *Collectores*, & Clarissimos PONTIFICIJ JURIS *Interpretes*. Inter *Antiquiores* autem, qui Sacros Canones collegerunt, primo loco (referente Hæsteno) ponit Baronius,

Anno

Anno 527., Dionysium Exiguum, nostri Ordinis Abbatem, Tertio loco Martinum Damianensem, ac Bracarensem Episcopum, His addendus Sextus, S. Burchardus, qui libros viginti ex Ss. Patrum, & Generalium Conciliorum Sententijs, ac Pontificum Decretis composuit. Quantus verò fuit Gratianus, qui nobile illud Opus *de Concordantia discordantium Canonum*, sive, quod **DECRETUM** appellatur, incredibili prorsus labore compilatum, non minori etiam industriâ in eas Titulorum classes distribuit? quo Opere Juris Canonici Professores, præcepto Eugenij III. in scholis utuntur. Cujus gloriam æmulatus est Joannes Abbas Nivicellensis, qui præclarum Opus, & à nullo alio tentatum, Bibliæ, scilicet & Canonum Concordantiam, posteris reliquit, ut suprâ insinuatum. Quem alius Abbas, Lopus nomine, secutus est, qui omnium primus Sextum Decretalium, & Clementinas exposuit.

His omnino par, vel etiam Major fuit Nicolaus Tudescus, Abbas Catanensis, Archiepiscopus Panormitanus, & S. R. E. Presbyter Cardinalis, qui octo Tomis quinque Decretalium libros, Clementinas, aliâque multa ad Pontificium Jus spectantia explicavit, Juris *Lucerna* per Antonomasiâ nuncupatus, quòd Ingenij sui luce amplissimâ inaccessam prius obstrusissimorum textuum caliginem illustrârit.

E^o Modernis in *Vicinia* claret P. Ludovi-

cus Engel, ex Monasterio exempto Mellicensi J. U. D. in Alma Universitate nuper Salisburgensi Procancellarius, ac Ss. Canonum Professor Ordinarius; ejus Collegium Universi Juris Canonici antehac juxta triplex Juris objectum partitum, nunc servato ordine Decretalium accuratiùs translatum, omnibus tam in Foro, quàm in Scholis apprimè utile ac necessarium, omnium Juris Studiosorum manu & ore occupatur: Huic antea Manuale Parochorum, & Privilegia Monachorum præmiserat.

Cujus nuperrimè æmulus extitit & in eadem Cathedra successor Clariss. P. Robertus König è Garstensi Monasterio in Austria, qui idem Juris Collegium per causas explanatum, publico typo commisit.

Ante hos P. Ægydius Rambeck Schyrensis Monachus Ss. Canonum in prædicta quondam Cathedra Professor Opus insignè juridicâ doctrinâ edidit, *Panopliam Ecclesiasticam*, in Romana etiam Curiâ commendatum. Ipse quoque ad Benedictinorum Cœlitum Icones per Natalitios totius anni dies distributas historiâ exornavit, quam *Calendarium Benedictinum* inscripsit, Opus illustre, & Sancto Ordini apprimè gloriosum. Et hic est ille Benedictini honoris Vindex, quem noster Adversarius ignominiosis adeo epithetis honorat, ut suprâ memoratum.

Nec prætereundum duco Doctissimum planè Romanum Hay, Oxenhusanum; ejus
in

in vendicandis antiquiorum ab Ordine avulso-
rum Monasteriorum Juribus solidissima Sacro-
rum Canonum notitia non sinè ingenti Ordi-
nis nostri emolumentò Orbi innotuit.

Huc referri posse videtur *Collectio illa
Maxima Conciliorum omnium Hispaniæ, & no-
vi Orbis, Epistolarumque Decretalium, necnon
plurium monumentorum ad illa spectantium, cum
notis, & dissertationibus, quibus Ss. Canones,
Historia, Disciplinæque Ecclesiastica, & Chro-
nologia illustrantur. Curâ & Studio Josephi
Saenz de Aguirre S. R. E. Presb. Cardinalis. Ro-
mæ, typis Jo. Jac. Komarck 1693. in fol.*

De quo præclaro sanè Opere Acta Eru-
ditorum Lypsiæ publicata 1696. tom. 15. fol.
120. ita habent:

Magnum Opus, longisque multorum
annorum desiderijs expectatum, jam demum
in Lectoris benevoli conspectum producimus.
Ex quo enim instituti, nunc tandem ad finem
omnibus exoptatum feliciter perducti, cogni-
tionem ad litterariæ Reipublicæ cives, proce-
résque impressâ Salmanticæ Anno 1686. *Con-
ciliorum notitiâ* pervenire Eminentissimus Au-
thor voluit, (quæ èt à nobis in Actis erudito-
rum Anni 1688. p. 71. optima fide fuit repræ-
sentata) nemo rerum Ecclesiasticarum paulò
ardentior fuit Amator, qui vitam, vires, &
otium vasto huic Operi perficinedo necessarium,
Viro, occupationibus Aulæ, inter Europæas
facilè negotiosissimæ, satis præpedito, non
precaretur. Cujus voti cùm tandem damna-
simus

simus propitijs fatis, ita ut manibus contrectare utilissimum Opus nunc liceat, ejus primum Tomum Lectorum nostrorum oculis jam duximus subjiciendum, dilatâ reliquorum representatione in menses proximè secuturos.

Hujus Collectionis &c. tres jam Tomi in lucem prodière.

N. V.

Philosophi Acutiores.

IN Philosophiæ discutiendis subtilitatibus multi multam, eximiâmq; collocarunt operam, præ cæteris autem omnibus tulisse palmam videtur olim PERIONIUS, qui Philosophiæ Aristotelicæ Curriculum ex græco in latinam linguam eò Ciceroniani Styli nitore vertit, ut deinceps Philosophi, qui antea (teste VVion.) infantes erant, latinè loqui cœperint, & paulatim repudiatis versionibus & formulis antiquiorum, barbariem dediscere, quâ eorum disciplina, & libri horrebant.

Hodie vel famâ, aut Viciniâ innotuère Eminentissimus S. R. E. Cardinalis Josephus Saenz à Guirre, qui Philosophiam suam, in Universitate Salmanticensi traditam, nuperri-
mè luci commisit publicæ. Eminentiss. & Illustrissimus Cœlestinus Sfondratus Curiam Philosophicum Monasterij S. Galli, tribus tomis comprehensum, composuit, ac vulgavit typis ejusdem Monasterij 1696.

P. Henricus Heinlin Philosophiæ in Uni-
ver-

versitate Salisburgensi Professor intra brevem biennij periodum, omnem Philosophiam complexus, typis edidit.

Eandem Stylo limpidissimo secundum mentem Doctoris Angelici elucidavit P. Placidus Renz VVeingartensis 1697. P. Corbinianus Kamm professus ad Ss. Udalricum & Afram Augustæ in pulvere scholastico ac cum primis philosophico tanquam Veteranus difficultates Summulisticas, hactenus penè neglectas ad in- eudem denuo revocavit, easque dexterrimè solvit, & penitus exhausit: Anno 1699. Multorum desiderijs hoc ipsò, quo ista scribo, anno expectatur Philosophia jam jam sub prælo sudans; quam juxta methodum Salisburgensis Universitatis concinnavit P. Ludovicus Babenstuber Ettalensis, in eadem Universitate actualis modò Theologus; Vir consummatæ in omni genere doctrinæ & probitatis.

N. VI.

Historici Notiores.

IN consignandis Posteritati temporum superiorum Historijs tantæ fidei, solertiæ ac judicij pariter defœcati Nostri extitère, ut à Regibus idcirco, & Principibus in summa sint veneratione habiti, &, teste VVion, lege communi ac decreto cautum fuerit apud Gallos, Anglos, & Scotos, Monasteria, inprimis verò San-Dionysianum, Albanense, & Sant-Adreanum, quasi communem thesaurum &

& receptaculum debere esse, ubi reponerentur, ac fidelissimè reservarentur omnia historica gesta illius Regni, & quæcunque memoria ac famâ digna essent, possent memoriter statim expedire.

Addit Hæstenus, eam fuisse Benedictinorum Coenobitarum in annotandis rerum suo, & præcedenti tempore gestarum historijs, diligentiam, eam in describendis, vel in Epitomen contrahendis priorum Chronographorum monumentis fidelitatem; ut penes eos veterum Annalium Repositorium, & *Sanctæ Ecclesiæ Archivum* fuisse videatur. Hinc scilicet prodierunt Chronographiæ, & Chronica Nostrorum, Sigeberti Monachi Gemblacensis; Mariani Scoti, Fuldensis; Hermannii Contraïi, Augiensis; Reginonis, Abbatis Prumiensis; Lamberti Schafnaburgensis; Anastasij Bibliothecarij; Leonis Ostiensis; Petri Diaconi; Dodechini, Abbatis S. Disibodi; Roberti, Montensis, Roperti, Remensis; Joannis Trithemij Abbatis; Annonij, seu Aimonij, S. Germani; Helinandi, fontisfrigidi; Mathæi Paris, Albanensis; Mathæi VVest-monasteriensis; Thomæ VValsinghamij, Albanensis; VVitichindi, Corbeiensis; Ottonis San-Blasiani; Guntheri Ligurini, S. Amandi; Pauli Langij, Bozauviensis, & aliorum infinitorum Monachorum, qui in hoc præclaro scribendi genere, laudem omnem aliis præcipuerunt: in quo certè ita eorum diligentia enituit, ut, qui historias, &

maxi-

maximè antiquiorum , legere voluerit , vix aliorum nomen inveniatur , quàm Monachorum.

Quid ? quòd pleræque Sanctorum vitæ , quas Surius refert , à Benedictinis Monachis scriptæ legantur ?

Si fortè ignores , unde *Martyrologia* sua habeant exordia , progressus & incrementa ? Evolve *Bedam Venerabilem* , *Florum* , *Usuardum* , *VVandelbertum* , *Ægidium de Dammis* &c. & disces , his unis fere Benedictinis ea deberi. Haftenus de Historicis nostris *Antiquioribus*.

E' *Modernis* famâ notiores sunt *D. Lucas de Achery* , *Mabillonius* , eorûmque è Congregatione *S. Mauri* in Gallia Socij : de quibus *Acta Eruditorum* Anno 1686. f. 57. sic habent: *Ut Benedictini Ordinis , cujus de Congregatione S. Mauri sacrameum , se profitetur , Historiam Ecclesiasticam conderet , omnibûsque ejus Alumnis Majorum exempla , tanquam statuam Mercurialem ob oculos poneret Joannes Mabillonius , indefessus antiquitatum Ecclesiasticarum Excussor , ac Propalator , cum Luca Acherio Viro reconditæ antiquitatis & ipso studiosissimo , Vitas Benedictinorum hincinde conquistavit , conquistósque edidit , ac notis , observationibus , indicibûsque necessarijs illustravit &c.*

His in exornanda de Ordine nostro *Re Historica* facem prætulit dudum *Antonius Jopez Hispanus* , septem integros tomos *Annalium Benedictinorum* idiomate scribens Hispanico , è quibus geminos *Thomas VVeiss Nerisheimensis* ,

sis, linguarum peritiâ & eruditione clarus, latinitate donavit.

Suô quoque Chronicô notissimus est Gilbertus Genebrardus Aquensis in Gallia Archiepiscopus, Prior antehac Semuriensis Monasterij: de quo inferiùs plura.

In *Viciniâ*, enituit eruditissimus P. Gabriel Bucelinus *Weingartensis*, de Germania cum Sacra, tum prophana, ac ipsa etiam Religione Benedictinâ meritissimus.

Nec prætereundam duco nobilissimam Triadem fratrum Germanorum, Josephi, Francisci, Pauli Mezgerorum: quorum primus scribendæ *Historia Salisburgensi* manum admovit, & magno prorsus labore usque ad Archiepiscopi Ernesti tempora perduxit. Ibi ut scribendi, & vivendi finem faceret, postquam fata voluerunt: fraterno Operi, & oneri superstites duo fratres Germani Franciscus & Paulus succollarunt, & reliquum Operis perficiendum susceperunt.

Verùm ad Jepezij mentionem, frontem contrahit, caputque jactat meus, qui Tractatui huic occasionem dedit, Adversarius, ac ejusdem vitij, quô toties ipse laborat, arguit Viram de re Historica optimè meritum, adducitque Eminentissimum Cardinalem Bonnam, quòd dixerit, *Iepesium in multis corrigendum esse*. Novum hoc scilicet, & inaudientum hætenus cespitantis fortè Jepesij delictum est, nec veniâ dignum! licet ipse Jepesius de fide in rebus historicis, præsertim antiquioribus,

bus dubiâ frequenter conquestus sit, omniumque aliarum scientiarum, fortè minùsutilium materias, publico examini exponi, & disputationibus, unius Rei Historicæ exceptâ. Exhibeat (quæso) Adversarius è tot millibus Historiographum, tractantem de rebus antiquioribus, cujus in universis ac singulis Authoritas sacro-sancta, & veritas irrefragabilis, fidèsq; sit prorsus indubitata. Quantam à centum, dum scripsit Jepesius, annis res historica lucem acceperit, norunt Illi, qui huic sese studio ardentius devoverunt.

Nulla planè in re cespitare proniùs est, quàm historicâ: præsertim si caligo eam Antiquitatis insuper obfuscet.

N. VII.

Mathematici celebriores.

IN Mathesi diversis diversis floruerunt ætatibus. Gerbertus Episcopus Rhemenſis olim composuit *Horologia & Organa hydraulica*: eorûmq; neglectam, & ab hominum memoriâ absconditam praxin in usum revocavit: qui etiam plura scripsit de *Arithmetica*, de *Sphæra*, & compositione *Astrolabij*.

Dionysius exiguus *Cyclum paschalem*, & morem computandi annos à Nativitate Domini N. JESU Christi primus excogitavit.

Nicolaus de Donis Monachus Richenbaccensis *Ptolomæi Tabulas*, totâmq; *Cosmographiam* reparavit.

Fama hodie plures è Nostreis celebrat in Universitate Paduana &c.

Vicinia veneratur Marianum Schott Einsidlensem, pluribus opusculis clarum; nec-non Ottonem Aicher ad S. Vitum in Bavaria Ethicæ & Historiarum in Universitate Salisburgensi Professore.

N. VIII.

Musici prestantiores.

Veterum nonnulli somniârunt, harmonico resonare concentu cœlestem Sphæram; hoc cum Fidei Articulis apud nos repugnet, Musicam substituo, quam eximie coluerunt Nostri.

S. Gregorius M. Juventutem, ut Pontifex quoque in cantu instruere non est dedignatus; & Cantum firmum, qui ab eo *Gregorianus* dicitur, in Ecclesiam invexit.

Guido Aretinus, Abbas primùm, postea S. R. E. Purpuratus Princeps, vulgatissimas Notas musicas, *Ut, Re, Mi, Fa, Sol, La*: inexplicabili Musicæ, tum adhuc in cunis vagientis, & apertiore in lucem exire gestientis, compendio excogitavit.

Engelbertus Trevirensis S. Mathiæ Cœnobita Musicorum facile Antesignanus, præclara de Arte Symphoniaca, & Monochordo Syntagmata posteritati reliquit.

Sacræ nuper Harmoniæ Magistros in vicinia sese præbuere, datis in lucem præclaris Musicis

lices Operibus ; Leopoldus à Plavven , Zvvifaltensis ; Valentinus Molitor , San-Gallensis ; Antonius Ziggeler , VVeingartensis ; Fidelis Molitor , VVettingensis ; Georgius Geisler Villingensis ; Maurus Moser , San-Trudpertanus ; Bernardus Rauchenstein Petrusianus ; Romanus VVeichlin , Lambacensis ; Cajetanus Kolberer , Andecensis ; Antonius Holzmann , Schut-teranus ; Udalricus Nüechten , Mellicensis ; qui, dum Opus suum musicum sub typo Francisci Straub Constantiæ sudaret , morbo interceptus, piè in Domino defunctus est ; Ejus tamen frater Germanus Philippus Nüechten sæcularis &c. prælo illud Ulmensi perfici, & in lucem edi curavit, suumque proprium præfigi nomen ; sed perperam , & liberali nimis in fratrem defunctum confidentiâ.

N. IX.

Linguistæ peritiores.

PRæclariora variarum Gentium Idiomata calluerunt olim, tradideruntve Dionysius Exiguus Abbas Romanus ; Hermannus Contractus &c. At quantus, quæso fuit, Constantinus Afer , Sacri Montis Casini Monachus ? verè Polyglottos, inquit Hæftenus ; Hebræam quippe, Syram, Chaldaicam, Græcam, Latinam, Italicam, Persicam, Arabicam, Ægyptiacam, Æthiopicam, & Indicam Linguam perfectè noverat ; Hic Grammaticâ, Dialecticâ,

lecticâ , Rhetoricâ , Geometriâ , Mathesi ,
Astronomiâ , Musicâ Physicâque Chaldaeorum ,
Arabum , Persarum , Saracenorum per trigin-
ta novem annos edoctus , Orientis , & Occi-
dentis Magister , novusque Hypocrates Orbi
effulsit. Factus enim Monachus , ex diversa-
rum Gentium Linguis plurima transtulit, ipse-
que alia ad Medicinam pertinentia conscripsit.

Inter Linguistas *nuper* enituit Joann. Cara-
muel non modò Latij, sed Hebraicæ, aliarum-
que Linguarum, teste Ughello, peritissimus.

In *Vicinia* claret hodie Hermannus Schenck
San-Gallensis, Latinè , Græcè , Italicè , Gal-
licè , Hispanicè egregiè doctus: quem nuper-
rimè Augustissimus & Magnus LEOPOLDUS
noster, tantâ Viri famâ permotus, in Biblio-
thecarium expetere clementissimè dignatus
est.

En ! Syllabum eorum librorum , quos
composuit vel ipse , vel ex alieno idiomate
vertit.

Composuit Historiæ Monasterij S. Galli tomum
III. in 4.

Epitomen Historiæ Monasterij S. Galli. in 4.
Epitomen , seu Historiam foederum Helve-
tiæ. in 4.

Acta Monasterij S. Galli, seu Jura secundum
Chronotaxin. fol.

Vitam Cardinalis Sfondrati.

Ephemerides Eucharisticas: in quibus ad
singulos anni dies enarrantur practici modi
colen-

colendi Ven. Sacramentum, aut singulares
Gratiæ concessæ Sacramentum devotè colentibus. in 4.

Practicæ Industriæ amandi, colendi, imitandi Christum patientem. in 4.

Centuria selectarum Historiarum ex varijs Authoribus, & linguis latinè edita. in 4.

Ex Gallico vertit.

Historiæ funestæ nostri temporis du Bel-
laij. in 12.

Vollkommenheit des Christenthums?
P. Rapini S. J. in 12.

Devotio montis Calvariæ, Grassetti S. J.
in 8.

De Amore Jesu: Nepueu. in 8.

Leben Benedictæ de Passione Ordinis S.
Benedicti. in 4.

Vera & solida devotio complectens Scien-
tiam Christiani circa septem Sacramenta. Beau-
veletti. 8.

Instructio Novitiorum Congregationis
S. Mauri. in 8.

Dubia Historica Mabillonij circa Histo-
riam Ecclesiasticam. 4.

Dissertatione duæ Mabillonij de præce-
dentia inter Benedictinos, & Canonicos Regu-
lares. in 4.

Historia Omnium Conciliorum Truillor-
ti. in 4.

Spiritus Christianæ Religionis: Rapini
S. I. in 8.

Dissertatio Chronologica de anno Nati-
vitatís Christi, Baronis de Notle. in 4.

Magnum Salutis negotium. Rapini S. I.
in 4.

Von dem Glauben diser letzten Zeiten.
Ejusdem. in 4.

Weegweisung zum innerlichen Leben. in 8.
Glückseligkeit einer Seelen/die Gott in
dem Gebett gefunden. 8.

Leben Mariæ Amatæ de Rabutin:
Item Helenæ de Chatelus, Monialium
Visitationis B. V. MARIÆ.

Ex Græcis.

Grammatica Chrysoloræ. 4.
Capita Parænetica S. Nili. 8.

Ex Italico.

Indirizzo per caminar alla perfettione
d'amore.

Anleitung zur Vollkommenheit der Ste-
be. 8.

Ex Hispanico.

De Apparitione Spirituum: Authore
Onuphrio Manescal Cathedratico Universita-
tis Barcinonensis.

De Jubilæo Dubia.



N. X.

Oratores facundiores.

IN Palæstra Oratoria eminuerunt *olim*: Casiodorus, Theodorici Italiae Regis Cancellarius, Romanae Urbis Senator, & Consul, postea Abbas Monasterij Ravennatis; qui omnes seculares disciplinas, & maximè eloquentiam in obsequium Christi convertit.

S. Bardo Abbas, ob mirificam pro concione eloquentiam alter Chrysostomus fuit appellatus.

Antonius Picoth Episcopus, & Concionator, ac Consiliarius Henrici III. Regis Galliarum celeberrimus extitit.

Vicinia nuper suspexit Romanum Myller Abbatem Seonensem Virum, teste Mezgero, raræ eruditionis, & eloquentiæ; quam produnt gemini libri, *Sympateticon*, & *Olor Laureatus*, nuncupati.

Pontianus Schyz Ottoburanus edidit *Artem expeditam quacunque in materia Dialecticè & Rhetoricè discurrendi &c.*

Iter Oratorium vulgavit Otto Aicher; Rhetorices antehac in Universitate Salisburgensi Professor; item *Florilegium Sententiarum Oratoriarum &c.* Notas quoque in *Ciceronis Philippicas &c.*



N. XI.

Poëtae feliciores.

P Arnassum coluerunt divite celebres venâ
olim Rhabanus Monachus Fuldensis Archi-
 Episcopus Moguntinus: ejus tories usque
 huc adducti non possum hoc loco præterire en-
 comium, quod Doctissimus Gretscherus S. I.
 tribuit Rhabano; hunc (ait) tantum extitisse
 Virum, cui similem nec Italia, nec Germania
 unquam pepererit.

B. Albini Flacci Alchvini Abbatis, Ca-
 roli Magni Imperatoris Magistri, Poëmata quæ-
 dam reperire est in *Historia Salisburgensi lib. 6.*
fol. 1131.

Inter antiquiores tamen omnes mentem,
 oculósq; rapit meos Sanctioris Alumnus Pal-
 ladis, & Matris ter admirabilis MARIE Cor-
 culum, Hermannus Contractus; cui non Pe-
 gasi ungula, sed Virginis IMMACULAE
 Gratia venam aperuit, & puriori fonte liquo-
 rem instillavit Apollineum: unde mirari desi-
 ne, quòd ex ejus mellitissimo ingenio suavis-
 simum illud, quod in universa nunc Ecclesiâ
 tenerrimo Fidelium sensu frequentatur, *Salve*
Regina &c. promanârit: cui ne quid suavita-
 tis deesset, ultimas voces: O! Clemens! O!
 Pia! &c. mellifluus Abbas Clarevallensis, pul-
 lus èt ipse Benedictino MARIANUS, subjunxit.
 Hujus Hermanni flagrantissimis præterea amo-
 ribus debemus èt alteram solemnem in Ecclesia
 DEI

DEI Antiphonam, metro poetico contextam: *Alma Redemptoris &c.* quâ nimirum, sicut est priori potiores per annum Canonicarum Horarum preces finiuntur, ut quandam Benedictinæ hinc Pietatis zelus æternitatem adeptus sit.

Hymni, *Ut queant laxis &c.* Paulus Diaconus, Casinensis Monachus Author fuit. Theodulphus Aurelianensis Episcopus Hymnum, *Gloria, Laus, & Honor &c.* quem in Dominica Palmarum Ecclesia canit, itemque & alterum: *Vexilla Regis prodeunt &c.* composuit.

Inter modernos, quos Vicinia tulit, Poëseos Magistros, palmam alijs facile præripit Thomas Mezler Zvvifaltensis: qui nemini hac ætate quidquam cedit sive ingenium spectes, aut artificium evisceres. Scripsit Opuscula plura, quorum aliqua lucem viderunt; ut:

Staurosofia, sive, Artificium poeticum sapienter ferendi res adversas. Friburgi Brisgoia. Typis Theodori Majeri. Anno 1652.

Epigrammatum laetorum libri 4. de varijs Sanctorum variorum Gestis &c. iisdem typis Anno 1650.

Periphrasis Poetica in 5. libros Psalmorum Davidicorum. iisdem typis. Anno 1651.

Odæum literatæ Juventutis in 6. libros distributum. Typis prioribus, eod. anno.

Joannis Gersen de Imitatione Christi libri 4. elegiacè redditi. Typis Joan. Mommarti Bruxellis 1699. libellus Philippi IV. Hispaniarum Regis privilegiò comitatus.

Cæterùm , plura meditatus est acutissimus iste Mezlerus typis exprimere, sed fata intento pectus obduxerunt: præter alia multa, quæ alibi in Monasterijs hinc inde studiorum causâ versatus, composuit, ejusmodi sunt:

Scipio Teutonicus.

Triviæ bonitatis Angiportus.

Josepheidos (libellus sanè luce publicâ præ cæteris dignissimus.)

Lacrymæ Divorum Joachim & Annæ.

Vita Bonæ Elisabethæ Rythenfis.

Hygiasticon.

Sylvarum Libri 4.

Lyricorum Libri 4.

Isagoge Novitiorum.

Stromatum libri 3.

Athanasius Gugger Sanct-Gallensis *Sacras Odeas*, seu, elegantissimos Hymnos de omnibus totius Anni Sanctis, aliâque plura composuit, ac typo mandavit.

Cujus nuper Discipuli Humaniorum in eodem illustrissimo Monasterio Professores consummatum de *Re Poëtica* Opus concinuerunt: quod plurimorum votis, ut in apricum tandem eluctetur, summo opere expetitur.

Otto Aicher ad S. Vitum cis Rotham in Bavaria *Iter poëticum* expedivit; *Notas* item in Livium, Curtium, Virgilium, & Senecæ tragoedias: *Florilegium* quoque illustrium Sententiarum ex Poëtis &c.

N. XII.

Grammatici Accuratiores.

Prima latinæ Linguae posuerunt *Rudimenta*,
& in varias Regiones, Germaniam cum-
primis, traduxerunt, auxeruntque novis
Legibus olim

Cassiodorus Abbas.

Alcuinus.

Venerabilis Beda.

Hermannus Contractus.

S. Anselmus.

Quibus suam *nuperrimè* operam addide-
runt Patres Sanct-Gallens, Grammatices leges
Discipulorum captui facilius accommodando:
ut adeo nullum sit prorsus Doctrinæ genus,
quod eruditissimorum horum industria Patrum
non constanter excolat, cum grandi equidem
Rei literariæ fructu, ac emolumento.

N. XIII.

Quinque Sibyllæ.

Sinistrè mihi, credo, verterit Nemo, si
coronidis loco subiciam quinque pruden-
tes Virgines, veterum Sibyllarum æmulas,
iisque Sanctitate longè majores: S. Elisabeth
Schönaugiæ Abbatissam, S. Hildegardem,
S. Gertrudem itidem Abbatissam, S. Mechtil-
dem, & Rosvvidem Sancti-moniales: quarum
priorum quatuor Prophetiæ Spiritu, Sanctitatis
glo-

gloriâ, & Literarum monumentis clarissimæ fuerunt. Rôlvvidis verò Poëtria Græcè, & Latinè doctissima, Oratores dicendi arte supergressa, Poëtarum sui temporis nulli inferior, multa versibus composuit, Virginésque sacras ad continentiam hortando, Comœdias sex composuit, Laudes B. Virginis MARIAE, & S. Annæ, aliorúmque Sanctorum diverso metri genere. Quamvis autem gentilis Vates (Juvenal. Satyr. 6.) cecinerit, haud sibi placere fœminam, quæ

— *curtum sermone rotato
torqueat enthymema:*

Nobis tamen Hæc, & quæcunque ei similis, meritò videtur eximium Ordinis nostri Ornamentum, &

Gloria fœminei, & decus admirabile Sexûs.

E Modernis adjicio Joannam Mariam Bonhomiam, eruditionis etiam latinæ non minùs, quàm Sanctitatis famâ celebrem. Obijt 1670.

N. XIV.

Suffragium R. P. Dominici

*Musanti S. I. de Literarum per Nostros
propagatione, & librorum antiquiorum utilitate.*

Cæterùm ijs, quos hætenus ex Ordine nostro adduximus, Scriptoribus non infimæ duntaxat Syntaxeos, sed potiorum Scientia-

tiarum in varijs Regnis propagationem, introductionemque deberi, insigni docet Suffragiò R. P. Joannes Dominicus Musantius, S. I.; qui in Face chronologica *tabula* 4. sic scribit: *Seculo* 700. & 800. *Beda Venerabilis*, ejusque discipulus *Alcuinus Grammatica* scribunt. *Rhabanus Maurus*, *Hilduinus Abbas*, *Oratores*, *Poëtae*. *Beda Philosophia* 4. *libros* scripsit. *Alcuinus Flaccus*, & *Ioannes Scotus*, *Beda Discipuli*, *Philosophiam* in *Academia Parisiensi* professi sunt, & in omnem fere *Europam* propagata est.

At (tacitus cogitabis) plerique ex assignatis Authoribus sunt antiqui, ac effætam præseferunt senectutem, quæ nihil vividum, nihil generosum, nihil delicatum spirat.

Quisquis ita tecum ipse judicas, (da veniam) erras sanè: non hac ego te censurâ noto, sed justissimus & nullo partium Studio corruptus Arbiter: ausculta paululùm, quid sentiat hac in re sincerus Antiquitatis Cultor, præallegatus Musantius: *hoc aro* (inquit citato loco) *fortasse Literis obest nimia librorum copia, quæ nos inopes facit Sapientia; quia dum novorum multitudine oc-*

cupamur, optimos veterum plerumque negligimus.



N. XV.

*Copia Scriptorum No-
strorum.*

POsitos haftenus Numeros , & Authores postquam inspexeris , Amice Lector ! ne credas , meminisse nos omnium , quos omni ætate Hispania , Gallia , Italia , & omnis haftenus Orbis tulit ; vel quos reperiat Ille , qui omnium populorum Fastos , Annales & Ephemerides in cunctis ubique Gentium Bibliothecis lustraret : experiretur enim talis , vix Codicem esse antiquiorem , cujus frons non Monachi titulô fulgeat ; nec , à veritate alienum esse , deprehenderet , quod eruditissimus Nonnemo è nominatissima JESU Societate vivâ voce palàm testatus est : *intra mille scilicet annos tam copiosos , & utiles libros haud editum iri , quot ab Ordine Benedictino jam sint editi : hinc scribi , dicique hac modò ætate vix aliquid posse , quod à Nostis non abundè scriptum , dictumve fuerit.*

Tradit VVionius ex Historicorum fide , fuisse nostri Ordinis quindecim millia Authorum , Scriptis & eruditione celebrium. Alij numerant solos Abbates Doctores supra quindecim mille septingentos ; & hos quidem ante artem typographicam : quæ ubi sub exordium Ordinis extitisset , nullus propè foret in Orbe angulus , quem Monachi codex non exornaret.

Hujus

Hujus ut documentum aliquod capias, accipe Hæfteni verba : *lib. 9. disq. Monast. tr. 2. disq. 4.* Nostri (inquit) omnis generis libros tum sacros, tum profanos, quin ipsa Biblia ab interitu vindicarunt; in una Bibliotheca, Sanctissimo Patre nostro vix mortuô, reperta sunt 6700. volumina manuscripta à Monachis. Fulde sub Abbate primo fuerunt 400. Monachi, omnes occupati conficiendis libris.

Quapropter

Sol prius oppositas perfundet lumine terras,
quàm reliquorum Nos Authorum cumulum in
numerum, & chartæ hujus angustias redigamus:
ex *Antiquioribus* certè unum aut alterum dunta-
taxat produximus; ex *Modernis* verò tantùm aut *Fa-*
mæ magnitudine, aut *Vicinie* beneficiô notio-
res; nec hos etiam omnes, quòd reliquos aliud,
quod molimur, maneat Opus.

N. XVI.

*Arnoldi VVionij de Scripto-
ribus nostris Iudicium.*

Habuit Religio Benedictina (inquit *lib. 2. Ligni Vitæ c. 61.*) in quo gloriari possit, & verè debeat, citra alterius injuriam. Habuit in omni ætate suos Marones, Homeros, & Cicerones, etiamsi defuerint Illi Mæcenates. Habuit & suas Bibliothecas loquentes, atque (ut ita dicam) apes aureas. Habuit & in Arcanis Sacro-Sanctæ Triadis enodandis, & Divinitatis ineffabilibus Sacramen-
tis

tis elucidandis, suos Augustinos, & Hieronymos, ita ut verè de Illa dici possit, in Ea illam disciplinarum pene omnium fuisse intelligentiam, quam olim in Catone Cicero ipse in *Academicis lib. 1.* ingenuè agnoscebat. Quod eò magis in Illa admirandum est, quoniam Veteres illi Monachi de industria se se à Literis removebant, quo se totos in una rerum coelestium contemplatione abderent: ut de S. P. N. BENEDICTO, narrat Gregorius. Sed tamen neque illo tempore, neque unquam in Ea defuere Eruditi. Et ut quasi cursim omnem Religionis Benedictinæ ætatem ab initio inspiciamus, ut eorum multitudinem & copiam videamus, qui in doctrinarum studiis magni fuerunt, inter innumeros multiscia eruditione probè instructos Monachos, præ cæteris (de antiquioribus sermo est, recentiora namque contrectare ausi non sumus, multorum offensione vitandâ) excelluerunt S. Gregorius Magnus, in quo invenies, & demiraberis facilitatem; in Berchorio, simplicitatem; in Blofio, sanctitatem; in Cassiodoro elegantiam; in Anselmo, candorem; in Rabano, ingenium; in Trittemio, varietatem; in Paulo Diacono, acumen; in Radulpho, eruditionem.

Dicit Sigebertus diligenter; Marianus leniter; narrat apertè Contractus; eloquitur graviter Ligurinus; appositè Folengius; Clarus luculenter; Panhormitanus scitè; Ferdinandus splendide; Cortesius apertè, acutè & nitide; Joachimus Perionius, philosophicè;

cujus

cujus incude expolita jam purè loqui didicit
Philosophia. S. Bernardi casto sermone, Theo-
logia melle dulciùs concionatur ; Litteraturæ
Dionysij, & Gereberti Mathesi rubiginem de-
terfit. Constantino duce Medici, & cum elo-
quentia morbos curant. Præeunte Aretino,
omnes Musicæ partes cantabant.

Quid de Laureato Hispano, qui tot Sin-
gularia in sua Sylva in unum coniecit? Quid
de Venerabili illo Beda, qui alter Ptolomæus
in Cosmographia, alter Alcabitius in Astrolo-
gia, alter Cicero in arte dicendi, alter Bias
in Philosophia, alter Livius in Historia, dici
potest? & unum dicere non pigebit, quod
nec majorem, nec parem recipit Benedictina
Religio, nec similis inveniri potest. Nec ta-
men singulis has solas virtutes inesse existimo,
sed his insigniores, cum nemo ex eis & prosa,
& versa oratione non polleat. Nemo item
quin sit aut Medicinæ, aut Philosophiæ, aut
Juris, aut Theologiæ consultus, omnes ferè
atticissantes, plerique Hebraicè periti, &
Caldaicè, & multi eorum Græcam lin-
guam, tanquam maternam habentes
&c. Ita Wionius *lo. cit.*



N. XVII.

*Testimonium Hieronymi Plati**S. I. de Scriptoribus Benedictinis.*

ITerum alienum pro nobis hac in re produ-
cimus testimonium, ne forsan jactantiæ
potius, quàm studiò veritatis tribuisse
quidpiam per domestica duntaxat videamur.

Exhibet illud celeberrimus S. I. Scriptor
Hieronymus Platus, *lib. 2. c. 23. de Bono Sta-
tûs Religiosi* ita in rem nostram differens: Jam
sunt (inquit) mille & septuaginta anni, ex quo
Benedictinus Ordo natus est. His igitur un-
decim ferè sæculis, mirum certè est, quàm
multos semper, & quàm præstantes in omni
doctrinæ genere produxerit Viros. PRIMÔ
enim SÆCULÔ, id est, usque ad annum
Domini sexcentesium, vixit, ut scimus,
CASSIODORUS (de quo supra diximus: nem-
pe *lib. 2. c. 25.* ubi sequentia habentur:) Cas-
siodorus, antea Ravennæ Urbis Senator, &
Theodorici Italiæ Regis Cancellarius fuit: à
quo post occisum Bohetium abhorrens, eum-
que unâ cum mundo deserens, Classense Mo-
nasterium ex Benedicti instituto adhuc admo-
dum recenti fundavit: eique se insuper dica-
vit, ut in omni prius sæculari literatura peri-
tus, postea verò etiam divinâ, quod adhuc
ejus Opera ostendunt. Vixit anno Domini 550.
Eique æqualis DIONYSIUS cognomento Parvus,
vir sui temporis eruditissimus, tum divinis, tum
etiam

etiam humanis literis, quod ostendunt scripta ab eo relicta. Eodem tempore GREGORIUS Magnus, GREGORIUS Turonensis, & LEANDER Hispalensis, satis adhuc per se noti. De Gregorio autem Magno sic *lib. 2. cap. 25.* habetur: GREGORIUM verò Magnum, qui annis ante Cassiodorum quinquaginta fuit, quis dignè laudare possit? aut quis satis admirari illam sanctitatem, illam etiam doctrinæ ubertatem, quæ se per tot libros ad mortalium utilitatem effudit? Atque hujus etiam ætate vixit GREGORIUS ille Turonensis, ad eam cathedram Episcopalem ex Monacho effectus, ejus doctrinæ multa adhuc extant monumenta. De LEANDRO Hispalensi vide Joannem Trithemium *de viris Illustribus Ordinis Divi Benedicti. lib. 2. cap. 9.*

Lib. 2. cap. 32. SECUNDO SÆCULO, à sexcentesimo ad septuagesimum, multum, ut accepimus, claruit CAESARIUS in Galliâ, EUTROPIUS in Hispaniâ, in Lusitaniâ JOANNES GERUNDENSIS Episcopus, in Scotiâ ADAMANNUS Abbas, in Angliâ THEODORUS, qui Romæ Monasticam vitam professus, à Vitaliano Pontifice Cantuariam destinatus est septimus Archiepiscopus, ejus de Laudibus Beda sæpè.

TERTIO SÆCULO, usque ad annum Octingentesimum, BEDA ipse notissimus libris scriptis: tum BONIFACIUS ille Germaniæ Apostolus, quem non sola sanctitas, sed insuper etiam eruditio illustravit. Deinde ÆGI-

DIUS Abbas, natione Græcus, idem Philo-
sophus ac Poëta, quin etiam Medicus insignis,
quippe qui multa de arte Medicâ Carmine
scripserit. Imprimis autem **ALCUINUS**, qui
suæ ætatis doctissimus habitus est, **CAROLI**
Magni Magister: ita ei Charus, ut cum deli-
cias suas appellaret: cujus etiam prudentiæ Pa-
risiensem Academiam, quam Româ illuc
transtulerat, ordinandam commisit. Idemque
multa edidit, tum in sacram scripturam, tum
suopte ingenio. Quo eodem tempore floruit
etiam **PAULUS DIACONUS**, Author celebris
hymni in S. Joannem Baptistam, pluriûmque
librorum, quorum pars adhuc extat. Hic prius
Desiderij Regis Longobardorum familiaris &
Secretarius fuit. Deinde unâ cum ipso à Ca-
rolo Imperatore captus, & in Italiam abdu-
ctus, servatus tamen est ab ipso nocte ab inge-
nij famam. Postea in Insulam relegatus, cum
fugâ evasisset, etsi Beneventi ab Aldeberga
desiderij filia exceptus esset benignè, & hono-
rificè: tamen sæculò contemptò, in Cassinen-
se Monasterium sese recepit. Quod Carolus
ipse audiens, magis etiam eum deinceps amas-
se, & coluisse dicitur, ac cum eo sæpè per
litteras humanissimè communicasse.

QUARTO SÆCULO, usque ad annum
900. insignis fuit **HAYMO** Monachus Fuldën-
sis, postea etiam Episcopus, Alcuini auditor,
omnino inter doctissimos numerandus: qui
totam scripturam commentarijs illustravit, aliâ-
que propria ingenij monumenta reliquit. Ne-
que

que huic inferior RABANUS, ex Fuldensi Abbate Archiepiscopus Moguntinus, qui justam pene bibliothecam solus edidit. Nam cum puer adhuc ab ipsis parentibus Fuldensi Monasterio oblatus esset, tantum in Poësi, in Philosophia & in sacris litteris profecit, ut in totâ Germaniâ, fortasse etiam toto orbe, nullus ei æqualis putaretur. Cui tamen ut tempore, sic ingenio proximi fuere (ut alios complures omittamus) ANGELOMUS Luxoviensis, notus ipse quoque ex libris scriptis. Et STRABUS Fuldensis, cujus opus dicitur esse *Glossa*, quæ *Ordinaria* vocatur, ex sanctorum Patrum scriptis concinnata.

QUINTO SÆCULO, ab anno 900. ad millesimum, celebratur inprimis ODO Abbas Cluniacensis, divinis & humanis litteris eruditus: HERIGERUS Abbas Lobbiensis, non in Gallia solum, sed tota Italia & Germania, ob doctrinæ opinionem celeberrimus. Tum RATHERIUS, ex Monacho Lobbiensi, Episcopus Veronensis: qui miræ simplicitatis, sed magnæ Literaturæ fuisse traditur. Et alij denique permulti: inter quos tamen nihil ita enigmat, ut RADULPHUS Monachus Fuldensis: de quo in Ecclesiâ totâ hæc erat constans opinio, nullum ei vel in Philosophiâ, vel in Theologia parem esse: ut propterea ad eum, ex toto fermè Orbe, difficillimæ quæque quæstiones referrentur.

Sed multo etiam feracius talium ingeniorum fuit SEXTUM SÆCULUM: in quo

præter alios multos, quorum extant nomina, floruit **MARIANUS SCOTUS**, qui Fuldæ undecim annos, quindecim Moguntia, in cellâ inclusus duravit: quo tempore Chronica scripsit ab initio mundi, ad sua usq; tempora: fuitque ob doctrinæ, & multò magis ob sanctitatis nomen, in magnâ omnium veneratione. Ac eodem tempore celeberrimus etiam fuit **LANFRANCUS**, qui in Dialecticis, totâque Philosophia, sui temporis princeps habitus est, idem Lumen ac Magister Theologorum. Hunc tradunt, cum Papiâ, ubi natus erat, & ubi publicam Scholam cum laude habuerat, in Galliam proficisceretur, à latronibus spoliatum & abductum, prius impatienter tulisse: deinde in se reversum, damnare cœpisse seipsum, quòd tam diuturnum studium sacræ scripturæ impendisset, néque adhuc **DEUM** in tribulatione laudare didicisset: statimque vovisse, si evaderet, se deinceps **DEO** famulaturum. Liberatus, igitur venit ad Monasterium Beccense, ubi aliquamdiu ita latuit, quasi idiota, & illiteratus, donec ab Italis mercatoribus agnitus & patefactus, primùm à suis adhibitus est ad domestica studia moderanda: deinceps etiam à S. Pontifice Cantuariensi Ecclesiæ præpositus. Huic etiam simillimus fuit is, qui ei proximè in sede successit, **ANSELMUS** ejus Auditor, & in Beccensi item scholâ successor. De cujus Anselmi eruditione nihil attinet dicere, cum eam libri editi satis ostendant. His ascribendi sunt duo

Car-

Cardinales ejusdem temporis, HUMBERTUS Monachus Tullensis, quem Leo 9. ob excellentem doctrinam & pietatem, ad eum honorem provexit, & Constantinopolim legavit, ut Leonis Bulgarorum Episcopi audaciam frangeret. Alter fuit PETRUS DAMIANUS, cujus adhuc eruditio & facundia, ex ejus pluribus scriptis nota est. Illud Sanctitatis fuit, quòd diu Cardinalis & Episcopi Hostiensis munere functus, denique pertæsus ejus vitæ, Nazianzeni exemplo, ad pristina se recepit Monachorum studia, cujus etiam facti rationem luculento scriptò reddidit. Denique ut alios omnes omittamus, magnus etiam fuit per ea tempora HERMANNUS cognomento Contractus: cujus doctrina eò mirabilior fuit, quòd eam insigni miraculo adeptus est. Ita enim scriptum est, hunc in Sueviâ ex nobili Comite ortum, ab ineunte ætate omnibus membris captum fuisse, atque ob eam causam nomen illud, quod diximus, Contracti accepisse. Quare cùm Monachus factus esset, multis precibus Beatam Virginem rogare institit, ut ipsum eo morbo liberaret. Illa verò clara luce se ei visendam præbens, optionem obtulit, utrùm è duobus malis, sanusne fieri, sed, ut erat, rudis & indoctus permanere: an perseverare in morbo, & omnibus scientiis insignis evadere? Cùm autem Hermannus, ut debebat, hoc posterius prætulisset, ab eo tempore mirabiles progressus in omni genere literarum facere cæpit: adeo ut neminem in his

superiorem, vix etiam æqualem habere crederetur: ac nominatim tres linguas, Latinam, Græcam, Hebraicam, ita calleret, ac si in ijs natus esset.

IN SEPTIMO SÆCULO, usque ad annum 1200. multos item accepimus fuisse, omnium doctrinâ, atq; optimarum artium studijs eruditissimos: quo in numero præcipuè ponitur PETRUS Abbas Cluniacensis, cujus tum alij libri extant, tum unus de mirabilibus, & revelationibus suo tempore factis. Tum verò SIGIBERTUS ex Gemblacensi Cœnobio: & GRATIANUS ex Bononiensi: quorum ille insigne Chronicon conscripsit, & alias insuper historias: hic nobile illud opus Decretorum ex Patrum sententijs, & Pontificum responsis digessit, approbatum deinde ab Eugenio tertio. Inter omnes autem maximè celebres illi duo, HUGO è Cœnobio *S. Victoris Parisiensis*, & RUPERTUS Abbas Tuitiensis: cujus doctrinæ excellentiam, non solum multa volumina ab eo scripta indicant, sed etiam miraculum, quò eam doctrinam accepit: Nam cum ingenio tardior esset, instaretque precibus apud Virginem DEI Matrem, ut sibi à filio Scripturarum intelligentiam impetraret, apparuit ei Mater illa Gratiæ, denunciante ejus preces à se auditas: tantumque ei lumen impertitum iri, ut nullus ejus ætatis doctrinâ ei æquari posset: tantum videret, ne id talentum in terra defoderet, sed strenuè excerceret. Quod quidem ab illo abundè perfectum constat:

stat: nunquam enim deinceps à legendo, vel scribendo cessavit.

OCTAVO SÆCULO, ab anno 1200. usque ad 1300. Floruisse accepimus HELMANDUM Monachum Beluacensem, in divinis Scripturis eruditissimum, & in Sæcularibus etiam literis, ac multis quoque libris scriptis nobilitatum.

Eodémque tempore GUILLIELMUM Abbatem Piæaviensem, non solùm Theologiæ, sed Juris etiam civilis scientissimum. Deinde PHILIPPUM BERGAMUM, in cænobio Patavino egregium virum, tum doctrinâ, tum eloquentiâ. Tum etiam PETRUM BERTORIUM Monachum Parisiensem, cujus librorum grandis extat catalogus.

Ab anno autem 1300. usque ad annum 1400. TOTO HOC SÆCULO multi item celebrantur: ut LAPUS Abbas S. Miniatis, in Theologia, & insuper in utroq; jure peritissimus. PETRUS BOCHERII Abbas Avianensis, ipse quoque Decretorum Doctor. Præcipuè verò PETRUS ROGERIUS, is qui postea ad Pontificatum evehctus, CLEMENS SEXTUS vocatus est: quem acerrimo ingenio, & tum omni doctrinâ, tum etiam dicendi facultate egregiè instructum fuisse ferunt: ita ut populum, quo vellet, concionando impelleret. Quare nil mirum, si eum tot merita ad summam Ecclesiæ dignitatem extulerunt.

SÆCULUM DECIMUM, usque ad annum quingentesimum, præter alios insignes

Viros, aliquot etiam habuit in jure Canonico admodum excellentes: ut HENRICUM Abbatem Nurembergensem; JOANNEM RODE Abbatem Trentensem, cujus egregia Opera constitit in Concilio Basiliensi: tum verò NICOLAUM illum, qui prius Abbas Monacensis, postea Archi-Episcopus Panormitanus, deinde etiam Cardinalis factus est. Scripsit autem multa consilia, & uberrima Commentaria in universum Corpus Juris Canonici: quorum tanta hodie est autoritas, ut nullus in hoc genere notior, & celebratior sit.

Denique hoc ULTIMO SAECULO, quod nunc labitur ab anno quingentesimo, non paucos scimus eminentes Viros: ut IGNATIUM, ex Cœnobio Florentino: ex Parmensi, JOANNEM BAPTISTAM, utrumque Abbatem, utrumque magno progressu in divinis, & humanis litteris: In Hispaniâ verò PASQUALEM, qui in Salmaticensi Academia, publicam Theologiae Scholam cum ingenti approbatione professus est. Postremò ne longiores simus, multum etiam viguit hoc tempore GREGORIUS, qui prius in nobili illo Mantuano Cœnobio Abbas: deinde etiam Cardinalis à Paulo tertio creatus est. Hunc verò omnibus scientiis excultum tradunt, utrâque etiam linguâ, Græcâ, & Latinâ peritissimum: ita ut loqueretur, & scriberet expeditè atque eleganter. Idem etiam dicitur, imminente morte, Cubiculario cuidam suo ita dixisse: Ecce jam annis pluribus Cardinales fuimus, quid

quid autem nunc superest de hoc honore? Quanto satius fuisset in Religione mori, ubi minus erat animæ periculum? Atque hi quidem ex Monastico Ordine, quos de multis paucos nominavimus. Haftenus Hieronymus Platus in libro *de Bono Religionis*.

Et ex his, quæ usque huc produximus, tam domesticis, quàm exteris quoque testimonijs, animadvertis dubio procul, Amice Lector! à primis statim Religionis nostræ incunabulis nullo non sæculo floruisse Viros in omni *Scientiarum* genere versatissimos, maximò utique Ecclesiæ Bonò, ipsius quoque Religionis gloriâ ingenti, & exemplò Posterorum, quod impigri sectentur, præclarò.

DISSERTATIO III.

An in Academijs etiam, & publicè Scientias Benedictini profiteantur?

SUMMARIA.

1. Monasteria Benedictina olim loco Academia-
rum.
2. Academiae plures fundatæ Authoribus Benedi-
ctinis.
3. In illustribus Academijs docuerunt olim Bene-
dictini, & adhuc hodie docent.
4. Lycea, Gymnasiaque publica, ac privata.
5. Novum Congregationis Bavaricæ studium.

6. Ad-

6. *Adversarij contra Academias & professoras
Nostrorum sugillatio refellitur.*

7. *Ribadineira S. I. de Benedictinorum docendi
ratione sententia.*

N. 1.

Monasteria Benedictina olim loco Academiarum.

ANte CAROLI Imperatoris, qui rerum
gestarum gloriâ Magni cognomen sibi
peperit, tempora seiscitatus, ubinam
nobilior Christiani Orbis & felicior Portio,
Majestatisque Divinæ expressior Imago consti-
tuatur? responderi jure potuisset, hunc apud
Benedictinos, & in eorum Monasterijs reperi-
ri: cùm enim nullæ ferè, aut certè non eâ,
quam nunc admiramur, formâ & apparatu
conspiciæ, ac tam eximijs saluberrimisque le-
gibus firmatæ cernerentur Academiæ, in ipsis
Christianæ pietatis, Sanctitatisque Gymnasijs
(Nostrorum scil. Monasterijs) suas habuit se-
des omnis Musarum tam mansuetiorum, quàm
severiorum Chorus, ut Clarissimi Mezgeri
testantur in *Historia Salisburgensi*.

Ex his porro Scientiarum Emporijs (re-
ferente sic Trithemio) fuere præcipua: *Ful-
dense, San-Gallense, Augiense, S. Albani Mo-
guntiense, Corbeienste, Brumense, Midiolanen-
se, S. Dionysij Parisiense, S. Maximi Trevi-
rense, Antisiodorense, Turonense, Stabulense,
Veissenburgense &c.*

In Monasteriò Fuldensi longo sanè tem-
pore

pore duodecim continuò Doctores extiterunt, qui scholis unicè præessent: & censebatur hæc sparta inter præcipua olim munia; sicut *Præfectura Scholarum* fuit, & est etiamnum in multis Cathedralibus & Collegiatis *Dignitas* quædam indigitata *Scholastici* vel simili nomine, cujus Officium est Scholas publicas moderari.

Sicut & illud quoque memorata dignum occurrit, quòd anno 816. à Doctissimo Erlebaldo in Divitis Augiæ Monasterio Gymnasium ad Germanæ tam nobilis, quàm plebeie Juventutis emolumentum apertum sit.

De Ducali quoque Archisterio Campodunensi memorat Bruschius ad annum 777. quòd, ex Adriani Romani Pontificis consensu, *Academia* San-Gallensi, illuc translata, sit nobilitatum; licèt exinde iterum propter rebellis plebis tumultum abducta Herbipolim fuerit, & abhinc etiam ob seditiosos in Episcopum cives per Archi-Episcopum Moguntinum Joannem Comitem Anoxovianum Erfordiam, Bonifacio IX. Pontifice Maximo, migrare iussa sit.

Ne verò de hætenus allatis dubites, singula novissimè confirmat celebris quidam Ss. Theologiæ Magister ex Ordine Prædicatorum in sua Panegyri de S. P. N. Benedicto: *Benedictus*, inquit, noster per suos surgentes hæreses delevit, & Scriptorum illustrium plus quàm millia quindecim suo ex Ordine concitavit: Ille per suos Bibliothecas, scholas, Academias florere fecit, ut Ecclesia floreret. In solis hu-
jus

jus Ordinis Monasterijs Academia & schola tantâ cum laude stetit, ut intra Cœnobij tantum unius parietes aliquando quatuor millia studiosorum erudirentur.

Assentitur nempe Trithemio, qui in *Chron. Hirsaug.* Cathalogum benè longum exhibet Doctorum in solo Hirsaugiensi Asceterio florentium: & porro refert, in prædictis Monasterijs extitisse semper Studiorum Regentem unum, (quem ipse *Scholasticum* vocat) cui cæteri Disciplinarum Cultores parebant, eorumque ipse Scripta corrigebat: qui *Scholastici* titulus (ut supra memini) in plurimis etiamnum viget Cathedralibus Ecclesijs, ijs præsertim, quarum Canonici Benedictini in Sæculares migrarunt. Quæ omnia suò confirmat suffragiò Joannes à Bolco in *Annotat: ad Vitam S. Abbonis c. 1.* ita differens: *scholæ quondam adeo insignes atque celebres, in Cœnobia Floriacensi habebantur, ut Scholasticorum plus quinque millibus recenserentur. Hi Didascalis suis, muneris honorarij gratiâ, pro candelis, Edictisve, in Parisiensi Academia, nostra Aetate, Classium Moderatoribus exhiberi consuetis: bina Manuscripta (eò quòd necdum typographica ars emergerat) offerebant volumina. Quorum numerositas locupletissimam Floriacensem conflat Bibliothecam. Hæc ille.*



N. 11.

*Academiae plures fundatae Au-
thoribus Benedictinis.*

ALCUINUS Benedictinae Arboris Ramus
merito illustrissimus, & Venerabilis Be-
da Discipulus ac Gloria, Magno, quem
proximè deprædicavimus, CAROLO, conti-
nendorum in officio Populorum suggessit con-
siliū, quò præstantius omnes hætenus Poli-
tici excogitare, etsi maximè voluissent, post
diuturnos etiam sudores nunquam potuissent.

Cū enim ex Gentium nuper devicta-
rum, & ferocium præsertim Germanorum
barbarie, nunquam plenè domitâ, perpetuus
turbarum, tumultuum, ac defectionum me-
tus immineret, ut ex mansuetiorum confor-
tio Musarum tantisper mitescerent, geniū-
que induerent tractabiliorem, suavit ille Caro-
lo diversarum foundationem Academicarum.
Cujus vestigijs insistentes Nostratum plurimi
consiliō pari, pari Sapientia, & Zelo alias in
alijs subinde locis Academias excitârunt. De
Alcuino ita vetus Poëta:

*Quid non Alcuino facunda Lutetia debes?
Instaurare bonas ibi qui feliciter artes,
Barbariēque procul, solus depellere cœpit.*

Edicite igitur, & vestra conferte suffra-
gia nobiliora Europæ Athenæa, referte nobis,
quis primum in vobis lapidem posuit? quis pri-

prima excitavit vestigia? quis uberrima dedit incrementa? Nonne Monachi? Nonne Benedictini? nonne noster præ reliquis Alcuinus? Hunc *Parisiensis* Academia in Gallia, hunc *Patavina*, *papiensis*, *Bononiensis* in Italia, hunc *Eboracensis*, & *Cantabrigiensis* in Anglia, ut Præcipuum sui Authorem venerantur.

Florentina Universitas nostro Clementi VI., & *Erfordiana* San-Gallensibus, unde translata fuit, in acceptis referuntur; *Ducense* Gymnasium perquam magnificentum extruxit Arnoldus Abbas Marchianensis; *Magdeburgenses* Scholas erexit S. Adelbertus, & *Oxiensem* denique Academiam in Anglia Neotus, qui Musas, quas Danorum crudelitas pene extinxerat, in Anglia restauravit.

Quidquid igitur amplissimorum fructuum in tam frequentibus Academijs hodie dum progerminat, nî esse ingrati velimus, fateamur oportet, id totum Benedictinæ familiæ meritis, & industriæ immutabili jure deberi.

N. 111.

In illustribus Academijs docuerunt olim Benedictini, & adhuc hodie docent.

Fundare Academiam nobile quidem, sed docere in Academia nobilius aliquo saltem
ex

ex capite opus est : ad illud fortunæ tantum , sed Animi Bona ad hoc exigitur ; in *edificando* manus, & Operæ, in *docendo* intellectus, & præcipuæ hominis facultates laborant, & sicut aurum ibi, ita hîc cerebrum expenditur.

Et isto etiam tam sublimi titulo, & *docendi* munere prorsus eximiô enituit semper, ac nitet hodiedum Benedictina Religio, illustres passim in nobilissimis Europæ Universitatibus Cathedras obtinens.

Adeamus GALLIAM, & lustremus Universitatem *Parisiensem*, docebunt ibi, & florebut Benedictini.

Adeamus BURGUNDIAM, & inspiciamus *Dolanam*, docebunt ibi, & vigebut Benedictini.

Adeamus HISPANIAM, & arbitremur *Salmanticensem*, *Ovetanam*, *Vallisoletanam*, *Compostellanam*, *Hispalensem*, *Complutensem*, *Hyrachensem*, docebunt in his omnibus, & eminebut Benedictini; Et verô in hac ultimâ (*Hyrachensi* videl.) *soli* quidem cum Clavo Cathedras obtinent Nostrates.

Adeamus ITALIAM, & intueamur *Pætavinam* Universitatem, docebunt ibi, & de prædicabuntur Nostrates.

Adeamus BELGIUM, & videamus *Duacensem* docebunt ibi, & ut fertur *Lovanij* quoque, dilaudabuntur Nostrates.

Adeamus inferiorem RHENUM, & aspiciamus *Coloniensem*, docebunt ibi, & ex tollentur Nostrates; inter quos nuper enituit

R. mus DD. Henricus Gyrenius, Abbas S. Heriberti in Tuitio propè Coloniam; qui ingenti ibi plausu Theologiam docuit.

Adeamus superiorem GERMANIAM, & scrutemur *Salisburgensem*, omnium linguis, & calamis non ibi tantùm, sed in universâ, quâ longè, latèque patet, Europa celebrantur Nostrates; utpote quorum arbitrio, & disciplinæ subjacet florentissima, & omni hætenus tempore celeberrima Universitas: è qua nempe, ceu equo quondam Trojano famosi in arenam literariam Heroës prodierunt.

Adeamus & investigemus Universitatem *Rhintelensem*, æternò ibi meritò, & gloria vigeant Nostrates.

Deus bone! Quanti hætenus Doctores in istis, quas enumeravimus modò, Academijs extitère!

Ut Lectoris curiositas suaviùs pascatur, adeatur Bucelinus in *Benedictò redivivo*, ubi plurimorum, qui in nuncupatis Universitatibus publicè docuerunt, Professorum bene longus texitur catalogus.

Et hi sunt præclari illi Viri, qui (verba do ejusdem Authoris) magnis se se meritis amplissimis Regnis plurimùm commendarunt, & alij non multò antea mortui, alij usque hodie bene mereri non desinunt.



N. IV.

*Lycea, Gymnasiaq; publica,
& privata.*

Quemadmodum peculiaribus quælibet ætas studiis destinatur, ita his ipsis diversa quoque loca respondent: Juventuti excolendæ Universitates, instituendæ verò adolescentiæ, pueritiæque inserviunt Gymnasia, quorum in toto Orbe apud Nostros affluentiam (si privatam spectemus institutionem) sigillatim enumerare, & accuratò exponere syllabo labor vix non improbus esset. Nullum facilè Monasterium reperias, ubi non spectabilis Adolescentum Cópia pietate æquè ac Doctrina imbuatur, & eâ quidem studiorum famâ, eò discipulorum fructu, & eò quoque parentum solatiò, ut ad litteras publicè tradendas à permultis certatim locis Benedictini expeterentur; de quo si dubites, consule superiorem Germaniam, & luculentis id testibus edocebit; testabitur Bellizonense in Helvetia, Villinganum in Hercinia, Ehingenense in Suevia, Frisingense in Bavaria Gymnasium. Et verò in Bellizonensi docent soli Einsidenses; in Ehingenensi, soli Zuvifaltentes; in Villingensi soli ad S. Georgium ejusdem Civitatis Inquilini; In Frisingensi seliguntur ex totius Provinciæ illius Monasterijs Professores. San-Gallenses, ut præclaros literarum fructus in externos quoque opportunè derivent, per-

amplum hodie & novum moliuntur Athenæum, ubi cum Philosophia, Jus, & Theologiam &c. publicè deinceps profitebuntur: ut jam suprâ memoravi.

At, ne putes, apud inferiorem Germaniam minori nos esse loco, Aubertum Miræum propono, qui apud Bucelinum *Annal. Benedict.* p. 2. postquam Nostrorum in Germania Superiore studia commendasset, sic ait: *Et-verò in nostra Germania inferiore non jacent. In Flandriâ nominatim Gerardimontenses Benedictini, Exemplô Patrum Societ. Jesu scholas literarias Juventuti, undique confluenti, annis superioribus aperuerunt. Duaci Philosophiam publicè docent in Collegio seu Gymnasio Vedastino, quod nostra memoriâ Cavarellus Abbas Vedastinus à fundamentis extruxit. Alibi, nec uno loco, Theologiam explicant: ut meo quidem judicio, velut reddita Juventute Familia Benedictina hodie reviviscere videatur. Quid in Hispania, Italia, Gallia, & alibi Sodales vestri agant, in Originibus nostris Monasticis, Colonia editis, explicui, nec hîc repeto &c. Ita Miræus.*

Apud quem eundem, de iisdem Nostrorum studiis, Joannes Mariana sic loquitur: *nam Antiqua, Benedictinorum præsertim, Monasteria Scholæ publicæ erant, ad Juventutem erudiendam à viris sanctissimis constituta, unde haud levis publica utilitas extitit: ipsi magnis divitijs atque ingentibus creverunt, omnibus certatim pios eorum conatus juvantibus re, operâ,*
consi-

consiliò. Ex ijs Monasteriis velut ex arce Sapientiae innumeri Viri prodierunt, utriusque Philosophiae cognitione praestantes, divina atque humanae; ut editi eo tempore, ab eaque natione hominum libri multi & excellentes, in suo quis genere mirandi, argumento sunt.

Resplendet scilicet illa etiamnum Benedictinae Gloriam prerogativa, quâ (ut probat & disserit Mabillonius) antiqua puerorum institutio ad solos fere illos pertinebat, qui in Monasterijs in vita Regulari, vel suò, vel parentum arbitriò oblatis erant. At post Divi Bonifacii nostri tempora instruendis etiam alijs Coenobiorum Gymnasia patebant: qui nunquam satis laudandus Germaniae Apostolus Bonifacius incultis fere, si scientias spectes, eâ ætate Regionibus apertis ubique musarum domicilijs, cultiorem faciem induxit.

Et verò informem adhuc pueritiam Christianis informare moribus, vel adultiorem jam ad Pietatem, eruditionemque instituere, tantæ opus est præcellentiae, ut in prima collocari classe soleat meritorum, quibus in apicem eluctari Christiana perfectio potest. Puer etenim, aut Juvenis ejusmodi, ignobilis, informisque trunci speciem refert; ex quo tamen per artificis institutionem Magistri splendida efformatur Christiani, doctique hominis statua, quæ non sine intuentium voluptate, fructuque multiplici expressiorem Divinae Majestatis, & Sapientiae increatae imaginem exhibet.

Quàm tenero autem Juventutis insti-
tuendæ fervore succensus fuerit Gloriosissimus
Patriarcha Noster, testantur abundè gemina
ejusdem, ac Nobilissima Senatorij Ordinis
Corcula *Placidus & Maurus* cum pluribus alijs
in Cœnobijs recens erectis piè, doctèque edu-
cati; *cujus illustribus vestigijs dociles in Fran-*
ciâ discipuli constanter insistentes, in tantum
unà doctrina fructificaverunt, ut Moderni Galli,
inquit Vetustissimus Author Monachus San-
Gallensis, *antiquis Romanis, seu Atheniensibus*
æquarentur.

Cassinenses præterea, & reliquæ deinceps
Ordinis nostri Asceteria hunc instruendi Iven-
tutem morem, velut beatissimæ hæreditatis
medullam illibatam semper observarunt, at-
que sanctissimam; quin florentissima ipsa Jesu
societas contra Instituti sui Calumniatores Hæ-
reticos, docendi consuetudinem à Benedicti-
nis Jure quasi avitò accepisse sese fatetur ul-
trò, ac tæstatur: teste P. Ribadineira, infra
adducendo.

Tam copiosis autem in omni genere pro-
gressibus educationis publicæ felicissima dex-
teritas redundabat, ut suam ipsi Reges Pro-
geniem Laudatissimis Moderatoribus nostris
comitterent: sic OTHONEM Juniores San-
Gallense, LOTHARIUM Caroli Calvi filium
S. Germani Antisiodorensē, THEODORI-
cum III. Kalense, LUDOVICUM VI. & alios &c.
Dionysianum instituit, & Magni quoque Ca-
roli maximus Pater PIPINUS suam Monasticæ
disci-

disciplinæ educationem in acceptis refert.

Ac si hæc omnia subticuissem; illud tamen abundè sufficeret, quòd ipse adeo Theologorum Sol, Aquinas in Monte Casino educatus, primam eruditionis suæ lucem imbibit.

Ex tam Gloriosa pro literariæ rei in omnigenam Juventutem propagatione, quis non deprehendat, è Divinæ Mentis sententia esse pronunciatum Magni Basilij; qui interrogatus, *sitne conveniens, ut in Monasteriis habeantur Magistri pro pueris sæcularibus?* laulenter respondit: *Hoc esse conforme Evangelio. Basil. in Reg. brevior. q. 292.*

N. V.

Novum Congregationis nostræ Bavaricæ Studium.

HÆc uè eximia cùm lubentissimus veneror, immortalibus tamen præconijs super omnia extollo inspiratum cœlitus (sicut nullatenus dubito) & plenum sublimioris Providentiæ consilium, quod paucis abhinc annis amplexa fuit Bavarica Congregatio titulo *S. Angeli Custodis*. Instituit illa publicum tam in Theologia, quàm Philosophia studium; in quo Nostri Ordinis Viri, habitò delecta ex tanta Doctorum copia, assumpti Professorum munere funguntur; nec vel infrequens Auditorum Copia, vel minor Discipulos

pulorum fructus emergit. Confluunt eò ex omnibus ejusdem non modò, sed & alijs aliarum quoque Congregationum Monasterijs utriusque facultatis Alumni, ac tales quidem absolutò curriculum domum redeunt, quales vel expectare, vel optare Superiores poterant.

Tantam porro laudatissimi studij ubertatem cur admiremur? ubi enim in tantò delectu ac numero florentia concurrunt ingenia, & præter similem à potiori ætatem eadem Religio, idem Spiritus, æmulatióque accedit, potentes utique stimuli debent quemlibet ad sedulitatem, fervorémque incitare, præsertim ubi publicarum thesaurum editiones annuæ ardorem amplificant.

Hinc certè permotus Patronorum nonnullus *Juris* etiam *Canonici* Professuram graciosè fundavit; unde posthac non erit aliquid, quod ad tam gloriosi scopi perfectionem, & studiorum in omni genere maximam utilitatem desideretur.

N. VI.

Adversarij contra Academias,

*& Professuras nostras suggillatio
refellitur.*

AT, quot, & quantum sint ab alijs estimatæ hæ Monachorum Universitates, meâ non interest, inquit fol. 83. illudenstacitè nobis Adversarius: Deinde alienò mentem

tem suam titulò colorans pro se Authorem, cujus ergo nomen honoris egò, & amicitiae colendae gratiâ studiosè taceo, sic loquentem inducit: *Monachis utiliùs esset non tantùm singulis, sed etiam toti Congregationi, si in claustris manerent, quia institutum eorum ad docendum non tendit; nec satis prospectum foret Ecclesiis, nisi adessent alij, qui ex instituto suo & propria vocatione ad id deputati essent.*

Quasi verò (respondet Nostrum aliquis, & Benedictinae gloriae nobilis Vindex) à morte Apostolorum, non fuisset satis à Christo Domino prospectum Ecclesijs! Nec intelligunt isti, se Quintiano Siciliae Praetore graviùs impingere, qui Virgini Agathae mamillam abscindi praecipiens, hunc ab ea retulit colaphum: *Crudelis Tyranne! non te pudet amputare in foemina, quod in Matre suxisti? &c.*

Hujus tam graphicae similitudinis occasione ratio cinari sic possemus: Per Bonifacium, Rhabanum &c. Religio nostra materno quasi est functa officiò, ac è geminis sacrae, profanaeque Scientiae papillis eruditionis omnigenae lacteos fontes balbutienti tunc Germaniae ubertim propinavit: quàm turpiter ergo ingratus est ille, qui tam beneficam, quam in suis Majoribus suxit ipse, mamillam resecare non erubescit! Videtur Antagonista ejusmodi non absimilis Philistæis, Populi Israëlitici hostibus infensissimis; qui eum non armis modò, sed armorum etiam fabris penitus spoliarent. Verum Divina haecenus Clementia sacratissimam

BENEDICTI Religionem ita deseruit nunquam, ut Viros hostibus unde unde surgentibus pares, non constanter nutriret. Floruère & superioribus semper sæculis laureati Hannibales, devictorum ad Cannas hostium annulos legere docti, & Modernum Suis etiamnum haud caret. Et licet Benedictinos Adversarius *pumilionibus*, seipsum verò comparet *giganti*: meminisse tamen oportet, à parvulo etiam, sed Davide masculo, carneam Philistæorum turrim uno lapidis ictu fuisse prostratam. Benignus quippe DEUS est, qui Suos nunquam deserit; &, si necesse sit, è lapidibus etiam suscitare consuevit Abrahæ filios, quidni & BENEDICTI?

Sed non opus est pluribus, ubi manifesta ob oculos versatur veritas, & *ex nostra parte aequè parùm interest*, quale ferat Judicium Adversarius de Academijs & Professoribus Benedictinis. Germanus est, caveat ergo, ne incurrat Notam proximè insinuatam.

Ut clavum tamen clavo, id est, Authoritatem pellam Authoritate, audiendus est suprà citatus Ribadineira, quem de Nostriorum docendi ratione Hæftenus *lib. 2. disq. Mon. xv. 6., disq. 5.* ita differentem inducit.



N. VII.

R. P. Ribadineira, S. I. de Benedictinorum docendi ratione Sententia.

DIVUS BENEDICTUS (inquit Ribadin. in vit. S. Ignat. l. 3. c. 23.) Monachorum in Occidente Parens, pueros in Cœnobijs educabat, informabátque ad Pietatem (in eum fere modum, quò Societas nostra quibusdam in Collegijs separatim nunc facit.) Sic Placidum & Maurum puerulos à BENEDICTO receptos legimus, & in omni genere virtutum excultos, atque perfectos. Quæ consuetudo diu postea tenuit. Nam D. Gregorius Anglos pueros magnâ diligentia conquiri jubebat, & in sui Ordinis Cœnobijs ali, atque educari. Et D. Thomas Aquinas longo pòst tempore in Casinensi Monasterio à puero institutus est. Neque verò pueros fingebant Monachi S. BENEDICTI ad omnem tantummodo virtutis laudem, sed etiam disciplinis, & in omni SCIENTIARUM genere instruebant. Nam & in Germania, & in Gallia, & in Anglia magna cum laude Docuerunt: Authore & Principe hujus Instituti Venerabili Beda, qui ante annos 800. in Anglia docuit, & scholæ præfuit: in ejus locum postea successit Albinus, Caroli Magni Præceptor, & in locum Albini Rhabanus Abbas Fuldensis, qui postea etiam Archi-Episcopus fuit Moguntinus. Et Monachi S. BENEDICTI Collegia
(quem

(quemadmodum nos nunc habemus) habuerunt, in quibus docebant, scilicet quæ nos docemus, ut videre est apud Joannem Trithemium Monachum & Abbatem ejusdem Ordinis, qui rem totam diligentissimè persequitur. Atque ea re tantopere floruit Ordo S. Benedicti, & sanctissimis, doctissimisque Viris abundavit, quorum doctrinâ universam Ecclesiam illustravit. Hactenus Ribadineira: cum quo hanc de Benedictini Ordinis Scientiâ partem concludo.



PARS

PARS IV.

DE

Actione

*Tertiô ad Hierarchicum Ordinem
Requisitô.*

DISSERTATIO I.

*An Actio vigeat in Religione
Benedictina ?*

SUMMARIA.

1. *Quid per Actionem intelligatur ?*
2. *Actio ista , seu , Munus prædicandi vigeat in Religione Benedictina.*
3. *Relucet in Sanctissimô BENEDICTÔ divinitus ad eam vocatô.*
4. *In GREGORIÔ Magnô , Augustinô , Melittô &c. Angliæ Apostolis.*
5. *In BONIFACIÔ Germania Apostolo.*
6. *In alijs diversarum Germania Provinciarum Apostolis.*
7. *In alijs insuper omnium fere Gentium Apostolis.*
8. *In F. Buillio , ejusque Sociis , primis in Indijs Evangelij Præconibus.*
9. *Roborantur hæc dicta illustri duorum Scriptorum suffragiô.*

N. I. *Quid*

N. I.

*Quid per Actionem
intelligatur ?*

Actio, quam, utpote tertiam Ordinis Hierarchici partem, in præsentis Dissertatione tractabimus, versatur in negotiatione humanæ salutis, ac Verbi potissimum Divini, & Evangelicæ Legis solenni Prædicatione.

Et hujusmodi quidem Actio ad triplicem speciem à Divino Areopagita, juxta superius positam ab eodem descriptionem, reducitur.

Primam nuncupat *Purgatricem*; quæ Gentium superstitionem, Hæreticorum errores, & omne, quod humana vel malitia, vel fragilitas admittere solet, scelus, ceu infelix lolium solertis ad instar Horculani radicibus extirpat. Alteram vocat *Illuminatricem*, quæ Fidei Mysteriorum, ad nostram præsertim Redemptionem spectantium, Lumen, & Virtutum, Christi, Sanctorumque Exemplis illustratarum, ac stringentis quemlibet hominem Christianæ obligationis, cognitionem ingerit. Tertiam denique appellat *Perfectricem*, quæ rationem explicat mediorum, quibus fidelis anima diteſcat, opesque meritorum augeat & vinculorum, quibus Deo suo, tanquam summo Bono, arctissimè copuletur, uniatürque.

Gran-

Grande profectò arcanum subest, excellentia multiplex, & totius Asceleos medulla sacratissima! Hæc nimirum *triplici Actione* ipse jam olim Atheniensium Areopagita, ac deinceps Episcopus signavit mirabilem illam, quam mystici nunc Theologi statuunt, *viam*: *primam* quippe aggrediuntur *Incipientes*, & hos *purgatrix* disponit; *secundam* ineunt *Proficientes*, & hos erudit *Illuminatrix*; *Tertiam* denique subeunt *Perfecti*, & hos absolvit *perfectrix Actio*: In *primâ* removentur, tollunturque impedimenta Sponsæ; in *secundâ* illi nuptialis comparatur Ornatus; & in *tertiâ* solenne in Christo Conjugium, *unióque* Sacramentò prorsus ineffabili adimpletur.

N. 11.

Actio ista, seu, Munus prædicandi viget in Religione Benedictina.

Commani fertur adagiò: *Qualis vita, finis ita*; gloriosa igitur cum extiterit & omnigenis inclyta Virtutibus, plurimisque fuerit miraculis insignita Protoparentis BENEDICTI vita, debuit utique non minùs gloriosò claudi epilogò, & illustri simul prodigiò exornari. Vix animam egerat felicissimus, & tam copiosâ jam Sobole foecundus Patriarcha, cum, eundem inter laureatos Cœli Principes receptum, luculentò testatus est

est signô Deus: duo quippe Monachi paternæ Virtutis æmuli, & tantô digni Patre Filij supernæ gratiæ radijs collustrati, juxta Romani Breviarii relationem, *euntem in Cœlum viderunt* (BENEDICTI animam) *pallio ornatam pretiosissimô, circa eam fulgentibus lampadibus, & Clarissimâ & gravissimâ specie virum stantem supra caput ipsius dicentem audierunt: HÆC EST VIA, QUÂ DILECTUS DOMINI BENEDICTUS IN CœLUM ASCENDIT.*

En pallium! en Lampades! en Cœlum! Cœlum purgationem exigit, quia nihil intrabit coinquinatum; lampades Illuminationem portendunt, quia *Lucis, omnem hominem illuminantis symbolum, speciémque præseferunt; Pallium Unionem denotat, quia circumdat Filiam Regis, quæ assistit à dextris in vestitu deaurato circumdata varietate.*

Quid innuit ergo Senex, cœlesti Majestate circumfusus? una (dicere volebat) *lactea Cœli via est, sed triplici, Incipientium scilicet, Proficientium, & perfectorum trita vestigiô: Hanc Præambulo BENEDICTUS aperuit innumeris, quas per se, Suosque Immortalitati consecraturus erat, animabus.*

At unde his patuit accessus ad DEUM, æternitatémque beatam? *ad DEUM accedentem oportet credere; & Fides unde, nisi ex auditu? & auditus, nunquid per Verbum Dei? Divini igitur Verbi promulgatio triplicem illam veluti digitô præmonstrat Viam, & Actionem, ad Ordinem Hierarchicum requisitam,*
cum-

cum primis repræsentat, fundat, & exequitur.

Hanc verò tam sublimem Evangelicæ *Prædicationis* Provinciam, seu *Actionem Prædicativam* non convenire Benedictinis nonnulli acriter cum Adversario nostro, sed majori æmulationis, quàm Veritatis studiò, contendunt; In præsentem enim Dissertatione firmissimus asseram, & luculenter demonstratum ibo, *Evangelicæ Legis prædicatione*, & Apostolicò Præconis Divini munere tam Protoparentem BENEDICTUM, quàm Zelosissimam BENEDICTI Religionem eâ hætenus felicitate defunctos esse, ut ex Agro Dominico copiosissimam animarum messem cœlesti Horreo importarent, & hinc nequeat in dubium vocari, an Evangelicæ *Prædicationis munus* Benedictinis conveniat? utpote quos præ ceteris unos maximè voluit DEUS hætenus cœlesti ejusmodi Suadâ, & Concionatorum celebri famâ inclarescere,

N. III.

Relucet in Sanctissimo Benedicto divinitus ad eam vocato.

Gloriosissimum Parentem Divum BENEDICTUM ad Evangelij promulgationem, munusque prædicandi non ab homine, vel Angelo, sed ab ipso vocatum DEO fuisse, accuratissimè nobis refert Reverendissimus DD. Abbas Georgius Geisler in

Oculo extatico S. P. Benedicti sect. 6. n. Cl. f. 224. ex primâ, quâ Sanctissimus Pater illustratus fuit, Cœlesti Visione, eamque ita describit:

Cùm enim Vir Dei lapsum tenerioribus discipulis pertimesceret, ob spureas, ab invidio æmulo Florentio in ruinam mentium religiosarum compositas insidias, & quid tandem factò opus esset, sollicitâ cogitatione pensitaret: Ecce tibi! vox Cœlestis fluctuantem Benedictum his compellavit verbis: *Ut quid dulcissime, ac dilectissime Benedicte tristaris? nunquidnam non reminisceris illud, quod ego Discipulis meis locutus sum, dicens: si me persequi sunt, & vos persequentur? Tibi enim alia est eligenda via, aliud iter quarendum. Te namq̃ elegi ex omnibus incolentibus Orbem. Tu EVANGELII MBI TUBA CŒLESTIS existens Spiritu es meo repletus. Surge jam, & vade ad Castrum Casinum, & populum ejusdem Provinciae, qui adhuc idolorum nefandis cultibus servit, & in quorum prœcordiis Sathanae versutia regnat, qui nihil sciunt, aut dicunt, nisi quod in cordibus eorum veternosi serpentis versutia scripsit, sermone verifico prædicans, meum ad cultum converti, stude: quia tecum ego ero, & non te deseram, & confundam omnes Adversarios tuos. Proficiscere idolorum ad pugnam, confortare & esto robustus, quia castrum tibi tradam, & illic Sedes nominis tui in perpetuum erit.* Ita Gordianus in Vita S. Placidi apud surium 5. Octobris.

Et hanc visionem (pergit ibidem doctissimus iste Abbas) revelationemque divinam magni facit Angelicus Doctor, D. Thomas, eò quòd per illam S. Benedictus ad Prædicationis Officium, non per potestatem humanam, sed per jussionem divinam vocatus fuerit. *Divinò* (inquit S. Doctor *Opus. 19. c. 4.*) *judiciò reputatus fuit Benedictus idoneus, cui immediate à Deo committeretur Prædicationis Officium.* Quod idem S. P. N. Benedictus, Sublacentibus extremum valedicens, sic expressit: *Audite me, Fratres, nam mihi Dominus meus Jesus Christus precepit, ut ad culturam idolorum exterminandam castrum petam Casinum.*

Angelici Doctoris irrefragabilis cùm sit *Authoritas*, non est cur fulcrum addamus; sed videamus tantisper, quò Spiritu, Zelòque tam illustri BENELECTUS Spartâ functus sit? Ingenti sanè Spiritu, ut refert Gregorius Magnus, Zelò incredibili, fructu locupletissimò: *succidit enim lucos, evertit aras, Apollinis confregit idolum.* Et, ut insinuaret jam non Casino procul abesse Christum, *Christi Præcursori templum dicavit.*

Sed ut vivâ etiam, quæ Deus inhabita-
ret, templa surgerent, Sanctioris Vitæ legibus Pastores erudit, vitam licèt Eremiticam adhuc, & Soli DEO (juxta Adversarios) vacantem agens.

Ut porrò universæ Posteritati indubitato demonstraret argumentò, institutam à se Religionem ad idem Prædicationis Evangelici

æ Munus destinari, vivens adhuc & Discipulos misit pro impertiendis verbis exhortationis, & Deum precatus fuit, ne permitteret Monachos suos ab infidelibus interimi, quoniam decreverat, ut illi nomen ejus per totum Orbem terrarum PRAEDICANDO circumferrent. S. Gregorius lib. 20. cap. 17.

N. IV.

In GREGORIO Magno, Augustino, Melito &c. Angliæ Apostolis.

Maximus & Magni Patris Filius & Ecclesiæ Romanæ Pontifex GREGORIUS à Venerabili Beda Apostolus Angliæ, nec immeritò quidem, nuncupatur; cùm enim sanctissimus Pontifex Romanum forum obambulans, pueros sibi habuisset obvios, Cœlestis quasi formæ dignitate cōspicuos, & intellexisset, esse Anglos nati, Gentiliūque adhuc tenebris immersos, cum gemitu exclamasse fertur, *heu! quàm pulchras animas demon possidet!*

Sanctâ deinde in orbem invidiâ succensus in Insulam Evangelicæ Legis promulgandæ gratiâ plures è Nostris Viros ablegavit, cum Protomartyre Stephano plenos gratiâ, fortitudine, & Spiritu sancto. Præ cæteris tamen celebrantur Augustinus & Melitus &c: qui primi Gentes illas Fidei Lumine illustrârunt; eâ Christiani Nominis Gloriâ, & propagatione,

ne, ut Coeli speciem referret Angliâ, &, quia non homines, sed amictos carne *Angelos* nutrire videbatur, antonomastice *Insula sanctorum* appellaretur.

Nec vanus tituli Splendor erat; Anglia quippe, cum affinibus Insulis Scotiâ & Hiberniâ Divinum extitit Seminarium, in quo reliquarum Gentium Apostoli educabantur: inter quos præcellit Magnus Germaniæ Apostolus *Bonifacius*, tot meritis, egregiæque gestis clarus, ut proximum sibi Numerum vendiceret.

N. V.

In BONIFACIO Germaniæ

Apostolo.

Perlustranti mihi vitam Gloriosi Archipræsulis & Martyris, universa, quæ occurrunt, summi Viri magnitudinem, famamque declarant; eminet namque Parentum Pietas, qui adhuc propè infantem *DEXTER* Optimi, & Patriarchæ *BENEDICTI* honoribus consecrârunt: eminet parvuli felicitas, qui tenellæ ætatis quasi primitias, & pueritiæ florem Cœlo in Religione quinquennis dicavit: resplendet ingenij præstantia, quò gravissimas quasque disciplinas complexus, Doctoris eruditissimi nomen, laudésque consecutus est: præcellit Christi, Proximique flagrantissimus amor, quò vehementer succensus, mari se credidit, & Trajectum, inferioris

ris Germaniæ Urbem, ex Angliâ delatus, per tredecim annos Frisonum, Francorumque Gentem in Fide Catholica diligenter instruxit.

Clarissimum igitur tot meritis, & triumphis Christi Operarium Gregorius secundus, coelesti haud dubiè lumine impulsus, in tuum, O! Felix Germania! *Apostolum* destinavit. A BONIFACIO Christianis imbuta Legibus Franconia, lustricis tinâta fontibus Bavaria, Gratiæ legem edocta Turingia, & subjugata Christi Imperio Saxonia fuit. Et Moguntina, quam Infulâ & Pedô Episcopali primus nobilitavit BONIFACIUS, Sedes, utique vel ideò Sacra jure audit, quia primus eam insedit BONIFACIUS, qui meritò hinc præconiò gloriosus GERMANIAE APOSTOLUS appellatur. Quantò igitur vinculo ei obstringatur, quisquis natale in Germania Solum habet, graviter ostendit Othlonus, qui in ejus vita apud Surium 5.^{to} Junij ita discurret: *Sicut Abraham ob Fidei, obedientiaq; meritum Pater omnium dictus est in Christo credentium, haud aliter S. Præsul BONIFACIUS omnium GERMANIAE Incolarum PATER dici potest, pro eo, quòd illos verbò Sanctæ PRAEDICATIONIS primitus Christo genuit, exemplis confirmavit, postremò animam quoque suam pro ipsis posuit. Et paulò infra: Unde confidenter dico, quia quicumque filiorum ejus, GERMANORUM, videlicet, agnitò tanti Patris labore, non cum quantacunque praevalet, veneratione amplectitur,*

tur , in honore , quem parentibus exhibere debemus , NEGLIGENS invenitur.

N. VI.

*In alijs diversarum Germaniae
Provinciarum Apostolis.*

BONIFACIUM totius Germaniae Apostolum comitantur , seu ut Parentem Filij , seu ut speciales diversarum in Germania Provinciarum , ac Nationum Apostoli , qui idem Fidei lumen diversis locis intulere.

Colit Austria Ss. Colmannum & VVolfgangum ;

Saxonia Ss. Elvvaldum & Lullum ;

Turingia Ss. VVunibaldum , Albuinum ;

Juliacum , Clivia , Sicambria S. Lebuinum.

Veneratur Suevia S. Magnum ;

Helvetia Ss. Columbanum & Gallum ;

Flandria Ss. Tillonem & Livinum ;

Moravia S. Gervadium ;

Brabantia Ss. Amandum , Livinum.

Suspicit Mechelburgum S. Joannem ;

Westphalia , Holandia , Zeilandia Ss. VVilibrodum & Eligium ;

Frisia , Brunsvvicum , Batua , Teisterbandia , Boructuarij , Colonienses Ss. Radbodum , Suitbertum.

Celebrant Gandavenses Ss. Joannem Abbatem , & Livinum ;

Mechlinienses S. Rumoldum;

Trevirenses Ss. Goam, VVolfum;

Batavi, VVesterfordienses, Elstenses & Neomagenses S. VVerenfridum.

Honorant *Bavaria & Salisburgum* S. Rupertum;

Pomerania S. Ottonem.

Russia S. VVilibaldum.

Deprædicat *Weterovia* S. Sturmionem.

Agnoscit *Rhetia* S. Sigisbertum.

Profitetur *Alsatia* S. Arbogastum.

Unde his omnibus ritè perpensis, accedo lubens Bucelino: qui in *Aquila Imperij Benedictina* docet, nullam *GERMANIÆ* Provinciam, ac nullam fere Cathedralē Ecclesiā fore, quæ non sui vel Fundatorem, vel Patronum, ac Episcopum, è Benedictinis aliquem numeret, & veneretur.

N. VII.

*In alijs insuper omnium ferè
Gentium Apostolis.*

GERMANIAM usque huc spectavimus, patrij jure Soli primam; lustremus nunc reliqui Orbis Provincias, Regna & Populos, conclamabunt unanimiter, Evangelij se Legem Benedictinis debere.

Fidei Lumen in acceptis referent Ss. Ansgario, Remberto, VVimoni *Gotthia, Suecia, Dania, & totus Septendrio;*

S. Blit-

S. Blitundo *Bicardia*;

Ss. Ernano & Euchadio *Scoti*, & *Pictoni*;

Ss. Lubentio & Bennoni *Slavi*;

D. Bernardo Episcopo, & S. Petro *Confluentia*, *Livonia* &c.

Pro Gratia lege promulgatâ grates deponent Ss. Amando & Adalgado *Vasconia*;

Huic eidem Amando *Turoni*, *Eburoni*, & *Brabantini*;

S. Altoni *Lycatj*, *Ambroni*; *Sueci* B. Stephano Archi-Episcopo, & S. Eligio;

Bulgari S. Trebellio Regi Monacho;

Ss. Grillo & Methudio *Illirium*, *Moravia*, *Sclavonia*, *Bulgaria*, *Croatia*, & *Bohemia*;

S. Martino *Dumienſi*, *Æmiliano*, & S. Fulgentio *Hispania*.

Eucharisticam adornabunt *Saxonia*, *Frisia*, *Foteslandia* S. Bernardo *Vieuvvenſi*, & Ss. Ludgero ac Odulpho;

Warosci S. Eustachio Abbati;

Fania, *Theoraces*, & *Menapes* S. Usmaro.

Panegyrim dicabunt *Bohemia*, *Ungaria*, *Polonia*, *Lutuania* & *Ruscia* S. Adalberto, Venerab. Hieronymo, S. Gaudenzio, S. Brunoni, & S. Gerardo.

Scotia S. Egherto;

Pontivenſes & *Ultramarini* S. Richario.

Columnas honoris statuent *Livonia* Ss. Meinrado & S. Bertholdo;

Ægyptj & *Babilonj* S. Bonnonio;

Nortumbria S. Aidano;

Tarvanenſes S. Audomaro;

Taxandria S. Lamberto.

Gratitudinis monimenta erigent, *Gracia*
Urbano IV.

Wandali S. Brunoni;

Bajocenses S. Vigori;

Hasbana S. Trudoni;

Lubavienses S. Christiano;

Maritima Callia Cajodoco;

Holsatæ S. Vicelino &c.

Et hos omnium ferè Gentium Aposto-
los, cum insigni Benedictini Ordinis Elogio,
Ordine Alphabetico recenset celebris hoc ævo
Concionator Clariss. D. Christophorus Seel-
hammer Ss. Theologiæ Doctor &c. *Domini-*
ca IV. Quadrages. Tuba Rusticæ parte 1.

Ita Noster se proficitur obstrictum Bene-
dictino Ordini Orbis; sed quid Novus?

N. VIII.

In F. Buillio, ejusque Socjjs,
primis in Indijs Evangelij Præ-
conibus &c.

NOVUS etiam ORBIS & ipse pari can-
dore, plausu eodem, & simili gratitu-
dine proficitur, illatum tenebris suis
Lumen, & Fidei Romanæ jubar fuisse à Be-
nedictinis. Consule præter Bucelinum nostrum,
celebrem Congregationis Oratoriæ Scriptorem
Thomam Bozium Eugubinum, Honorium
Philop. Petrum Ciezam, Franciscum Lopez,
Ge.

Genebrardum , Hæstenum &c. & ættonitô quasi digitô demonstrabunt, BuLLIUM nostrum , natione Catalonum , Montis Serrati Monachum , & ab Alexandro IV. destinatum primum novi Orbis Apostolum , & Indiarum Archi-Episcopum , ac Vicarium summum Romani Pontificis : quem inclytus ex eâdem Benedictinâ Propagine Heroum duodenarius stipabat numerus.

Primus iste scil. à Christi Apostolis fuit , qui detectô per Christophorum Columbum Orbe aliô , in Indijs Occidentalibus Christi fidem promulgando , *primam* (ut solerter non nemo advertit) *fregit glaciem* , & prima erexit trophæa Crucis : quia Crucis æmulus generosum fudit sanguinem cum Socijs , eodem Coeli spiritu animatis ; & primas sic Proto-pars noster victimas in Indijs Occidentalibus Christo feliciter immolavit , non sinè læto omine , utpote quô manifestè portendebatur , in *Benedictione* fore impofterum Gentes , quibus DEI SERVUS BENEDICTUS semel per Suos jam benedixisset.

Illustris certè ejusmodi Benedictio amplissimis nuper documentis refulsit in Reverendissimo DD. *Didaco de Heria* , qui in Urbe Compostellana Monasterij S. Martini prius Abbas , & in novo deinde Orbe *de los Angeles* Episcopus , suo munere tam gloriosè defunctus est , ut Ejusdem memoria in Benedictione non fuerit hætenus modò , sed deinceps etiam futura sit. De illo enim ita scribit Bucelinus in
Bene-

Benedicto redivivo fol. 286. Vir Apostolico Zelo, omnique Virtutum cultu verè illustrissimus: de quo inter alia scribitur: quòd rebelles Indos contra Gubernatores, & Exactores Vectigalium, mittendo eis Baculum pastorem, promittendoque veniam, sedaverit & placaverit, rebellionem alioquin illà magna secum incommoda Regum fortunæ, Hispanorum salutis, ipsique Ecclesiæ allaturâ.

Cui meritò adjicias Franciscum Rice Apostolici Zeli Præsulem ex Montserratensi Congregatione in Indijs Episcopum.

Nec prætereundi illi Ordinis nostri Religiosi, qui per utramque *Armeniam* diffusi, strictissimam tenent disciplinam, ut qui non à carnibus solùm, sed à piscibus in Quadragesima ipsa, solis leguminibus, herbis, pane, sale & aqua contenti, nunquam vinum nisi in Ss. Sacrificio gustantes. Ut docet Cajetanus ad annum 1619.

Anno quoque 1620. insigni totius Ordinis, & sacrae ejusdem Reformationis gloriâ creatus est Archi-episcopus Dominico-politanus, & totius novi Orbis Primas R. mus & Illustrissimus D. Petrus de Oviedo Hortensis in Hispania Monachus, postquam annis pluribus Philosophiam & Theologiam summa cum admiratione Compluci professus fuisset, Regi Catholico, & inprimis Paulo V. Pontifici Max., toti denique Hispaniæ eximie commendatus.

Inter Apostolicos Indiarum Viros eni-

cuit

tuit ad Annum 1644. Illustriss. Franciscus de Borgia ex Monacho S. Benedicti de Sahagun Archi-episcopus de Las Charcas.

Circa annum 1650. Illustrissimus DD. Franciscus de Berya, ex Comitum de Graxal stirpe oriundus, Saguntini Monasterij Monachus, cum & eruditionis laude, zeloque propagandæ fidei ferventissimus esset, Apostolicæ functionis munere dignissimus habitus, Charquensis in India Episcopus renunciatus est, paulò post ad Limensem Regiæ Urbis Episcopatum promotus.

Quò simul tempore vel maximè in Imperio Mexicano, Romanæ Ecclesiæ fidelem operam navârunt *Nostri*, ut oretenus, & scriptò Bucelinum edocuère RR. PP. Societatis Jesu Franciscus de Encinas, & Petrus Martinez.

N. IX.

*Roborantur hætenus dicta
illustri duorum Scriptorum suffragiò.*

NE porro videamur, ex gloriæ domesticæ zelo in jactantiam declinâsse; sed ut allata hætenus extraneo roboremus suffragiò, juvabit in testes adducere duos à florentissimâ Societate Jesu Viros, apprimè doctos, & insignes; Primus ex ijs Bollandus To. 1. Jan. pag. 368. sic ait: *vix ullam esse Nationem barbaram, quæ non fuerit aut conversa per sollicitudinem & laborem Monachorum.*

aut in fide confirmata per foundationem Monasteriorum, quæ primi terræ illius Apostoli ibi construxerunt; ut essent veluti seminaria, unde possent desumi Magistri salutaris doctrinæ &c.

Alter Christophorus nempe Brovverus, luculentiori adhuc Suadâ merita Nostrorum exprimens, Et verò (inquit) hujus Ordinis, id est, Benedictinæ familiæ, quis noscit laudem hanc esse propriam, ut ambiat meritis, & rectè factorum gloriâ, quàm latè patet, Orbem Christianum? Etenim ut palmus taceam, & adoreas in reliquo Occidente partas, certè innumeras abstulit ex hac Germania nostra magna; cujus inferæ, superæ Regionibus, tot retrò seculis, hac unica ferè dedit scientiæ, veræq; Pietatis Doctores, Duces, Magistros: Unica, inquam, Boreæ Populis citimis, extimis, in magna errorum nocte, prætulit veri, honestique facem. Scilicet hac virtutis arduâ viâ, & non mortali doctrinarum curriculo, communem mortalium mensuram supergressa, pondera tot Cathedrarum ingentia suorum humeris, velut Atlas cælum sustulit; excelsoque loco in Republica Christianâ, non populis duntaxat & urbibus, sed Principibus terrarum Dominis, benè, beatèquo vivendi leges, & præcepta dedit.



N. X.

Adversus Monachos nonnullorum querelæ.

Longè alia fuit mens, & animi valde iniqui circa hæc sententia Superioribus temporibus nonnullis; qui Benedictinos, universo licèt Orbi Apostolos dederint, ex Orbe tamen in posteris (ut majoribus scilicet eorum grates referrent) eliminatos cupiebant; quod tamen admiratione non admodùm esse dignum censeo: Probitati nempe (ait P. Hay loc. cit. f. 558.) nil vicinius persecutione; quæ justum sequitur, ut umbra corpus: minatur interitum, & vires auget. (Sanguis Martyrum, semen Christianorum) Nempe Africus dum procernas arbores creditur dejecturus, figit, firmatque radices. Arcus, nervum quò plus deprimit, hoc telum altius jaculatur: Tonitruum dum territat arva, refrigerat, & erigit omnia. Vix dum ante sæcula undecim Monachatum plantaverat S. P. Benedictus, jam in vicino horto succreverat Florentius Clericus, qui persecutionem Ordini meditans, non armatam manum, sed imbellem, infandam castissimis Monachorum oculis immisit, & loco, si salvos cuperent animas, cedere coëgit. Durat hodièque Divino munere Ordo S. Benedicti; durat amuli Florentij progenies, quæ pulcherrimi nominis obiectu fallere dum pergit, multos Monachos loco

co pellit, sed non Orbe. Sordet in horum nari-
bus, oculis, auribus Monachi nomen, vel pro-
cul allatum, idque mallent in Europa sepultum.
Nec defunt ex Germanis; qui illud apud Hierony-
mum epist. 23. ingeminant: Quousque genus dete-
stabile Monachorum non urbe pellitur, non la-
pidibus obruitur, non præcipitatur in fluctus?
Adeo rarus cespes est, quem à Monachis insideri
cupiant. Dum fervet olla, dum locus turget,
amici sunt, sed non diu memores, quippe, qui
omnia sibi non tam dari, quàm deberi existi-
mant. Ac, ne pueri nesciant, etiam è rostris
rastra in Monachos educunt, dentibus alienum
fundum arant, & occant, ut incedentium quo-
que gressus censura morsu vix liberi sint.

Displicet (nempe) quocunque se vertant
Monachi: si enim in Cænobijs contemplationi,
silentio, mortificationi sensuum, precibus, la-
crymis, & gemitibus, pro salute militantis
Ecclesiæ se dederint, proclamantur inutilia
terræ pondera, ventres pigri, qui bono publi-
co nil conferant; & talibus, ajunt, Monaste-
ria non deberi, cùm Beneficia Ecclesiastica pro
ijs primitus instituta dicant, qui publicum
Ecclesijs ministerium præstant. Sin^o, pro pu-
blico bono ad populum instituere, animarum
conversioni invigilare, Professuras Academicas
adire voluerint, replicant altum id Hieronymi:
Monachus non docentis, sed plangentis habet
officium.

Ita veteres Antagonistæ apud Eundem:
Audiamus quid recens noster Adversarius con-
tra nos congerat.

N. XI.

*Diluuntur nostri Adversarij
Objectiones.*

Obstrepit is f. 17. adducendo contra Nos cap. placuit; cap. pervenit; cap. interdicimus; cap. juxta 16. q. 1. In quibus Monachis interdicitur Prædicatio, & Ministerium Sacramentorum.

At terri culamenta sunt hæc, quòd plus fulguris & flammæ, quàm fulminis habeant: Non aliâ quippe interdiciuntur hæc mente, quàm ne fiant sinè licentia suorum Episcoporum, vel Abbatum, & in alijs Parochijs, in quibus jurisdictionem Monachi non habent &c. uti patet ex illo, quod notatur ad cap. adjicimus, 16. q. 1.

Prædictis autem capitulis opponuntur alia Capitula, videlicet ead. caus. 15. q. 1. cap. doctos; cap. si Monachus; cap. Moderamine; cap. ex autoritate; & vel maximè cap. sunt nonnulli &c.

Adhuc, ut solet, reclamat Adversarius, & f. 51. ait: hoc certum esse, Monachos de jure non potuisse Clericatu insigniri, ut notat Præpositus in Can. priscis 55. dist. & in Can. requisitus 1. q. 7. nisi ex causa necessitatis, ut in d. can. prisc. & in Can. moderamine, & in Can. ex Auth. ibid. q. 1. dicitur.

Citatur equidem ab Adversario Canon Requisitus, in toto tamen Decreto, affirmo
P fan-

sanctē, is non reperitur: quomodo ergo Præpositus in cap. hoc scribere poterat? Fortē erit capitulum *requiritis*? At capitulum hoc non agit de Monachis, sed de Simoniacis; neque aliud in cit. cap. tractat Præpositus, quā resolvendo, quid sit rigor Juris? quid dispensatio? quis dispensare possit? quānam sint dispensabilia? &c. ut dictum tamen Can. *requiritis* intelligas, Notandum est: Leonem Pontificem fuisse requisitum ab Episcopis Britanniae, an Simoniaci in Ordine simoniacē accepto poenitentiam agere possint? Et Respondisse: se non posse contra Patrum sententiam dispensare, nisi intuitu pietatis, necessitatis, vel utilitatis; sicut Gelasius ejus Antecessor causā necessitatis concessit de Monachis clericos assumi: ubi glossa in V. de Monachis citat cap. *Priscis*, quod non tractat de promotione ad Clericatum, sed de clericali munere, uti ipsa Rubrica innuit: sed de hoc paulōpōst. Deinde Pontifex in cit. can. *requiritis*, non dicit: concessit de Monachis fieri Clericos, sed de Monachis assumi Clericos: ergo inter Monachos jam præsupponebat esse Clericos, alias Eos de Monachis assumere non potuisset.

Jam ad Can. *Priscis* peculiariter

Respondeo Allegatum Præpositi tractatum de distinctionibus Decreti ad manum mihi quidem non esse: persuadere tamen mihi nequeo, eum adeo cespitalle, ut ex hoc Can. *priscis* probare conaretur Monachos de jure antiquo non potuisse fieri Clericos; dum in

cit.

cit. can. de promotione ad clericatum nulla prorsus fiat mentio, sed tantum de clericali munere; quod munus dicit exercere parochialia, & fungi officio Parochi, non ad Clericatum promoveri; de illò igitur loquitur citatus Canon, non de istò.

Quod patet ex eo, quòd eo tempore, quò hic Canon à Gelasio scriptus est, ex penurià sacerdotum sæcularium, ob hostium rabiem deficientium, Monachi Clericorum parochijs fuerant præpositi.

Hinc etiam Glossa V. *Monasterialibus*: de Monachis Parochis loquitur; ubi tandem cum Hugone concludit: Monachos cum licentià Abbatis & Episcopi posse præfici Ecclesijs sæcularibus, juxta 16. q. 1. *cum pro utilitate, & c. doctos.*

Consideret Adversarius cit. can. *cum pro utilitate*, & inveniet, illum Canonem esse longè antiquiorem ipso Syricio Papà, (qui cum Monachis dispensasse malè ab Adversario dicitur, cum nullatenus dispensaverit cum ijs, sed Clericatu eos ultrò absque dispensatione nobilitarit) circa annum nempe 324. factum, cum tamen Syricius vixerit circa annum 384.

Consideret toties à se, & pro se aliàs citatum cap. *Quod Dei*, de statu Monachorum; fateri debet, Monachos posse de jure ANTIQUO non tantum ad sacerdotium promoveri, sed etiam paræcialium Ecclesiarum regimen suscipere. Verba dicti cap. sic sonant: *per ANTIQUOS Canones etiam Monachi possunt ad Ecclesiarum paræcialium Regimen in Presby-*

eros ordinari. Si per **ANTIQUOS Canones**, cur non de Jure **ANTIQUO**? cur de Jure **du-**
taxat NOVO?

Ex quo discordantes nonnihil **Canones** facile conciliari posse, existimo. Quod si tamen **Adversarius** pertinax vellet, **Monachos** jure *antiquo* non potuisse paræcialibus præfici **Ecclesijs**, & eum in finem fieri **Clericos** (et si contrarium omnino constet ex cit. cap. *Quod Dei.*) posset intelligi, quòd **Monachi** de jure antiquo non potuerint præfici *Beneficiis secularibus*: uti factum est tempore **Gelasij**: potuerint tamen præfici *Regularibus*. Cautum enim forsan jam tum erat, ut **Monachi Regularibus**, & **Sæculares secularibus** præficerentur **Beneficijs**.

Porro, ut ad citatum cap. *Priscis* redeamus: ex eò nullatenus potest erui, **Monachos** non potuisse ex Jure antiquo Clericatu insigniri, sed tantum statuitur, ut prius anteacla illorum vita requiratur; quod magis patet ex c. *si quis* dist. 77. qui Canon desumptus est ex ead. epistolâ **Gelasij**, ex quâ desumptus est Canon *priscis*.

Imo, si ex isto Can. *priscis* probatur, **Monachos** de jure non potuisse fieri **Clericos**, tunc etiam **laici** non poterant de jure fieri **clerici**, quia dictus Canon non tantum de **Monachorum**, sed et **Laicorum** vitâ examinanda loquitur.

Et quod magis urget: In Can. *Monachus* verò *Novitius* dist. 77. (qui Canon ex citatâ epistolâ

stolâ desumptus est) majorem difficultatem reperit Gelasius in promovendo laico, quàm Monacho, cum dixit: *ut tantò sollicitiùs examinetur laicus, quantum inter mundanam, & Religiosam vitam constat esse discriminis.* Ec hæc epistola scripta est Anno 494. ante tempora S. Benedicti.

Canones autem moderamine, & ex auctoritate planè pro nobis potius militant, quàm pro Adversario, cum ibi expressè dicatur: Monachos Presbyteros debere frui Beneficijs Ecclesiasticis, & administrare Clericorum officia.

Probo tandem ad hominem, Monachos de Jure antiquo potuisse fieri Clericos: Omnes laici de jure antiquo poterant fieri Clerici; atqui juxta Adversarium Monachi erant laici: ergo.

Denique textus & Canones hujusmodi de Monachis in solitudinibus degentibus, non de Monachis Benedictinis, sunt intelligendi, utpote facti dudum ante tempora Divi Benedicti: ut sup. Doctissimus Hay advertit.

N. XII.

Confirmantur hæcenus dicta

Decretò Bonifacij IV. Papæ.

Producit hoc integrum mox citatus P. Romanus Hay in aulâ Eccles. f. 562. sui que facti rationem ita exponit:

Virtuti , inquiens, *Comes est invidia* :

Nullô sæculô defuerunt , qui pijs Monachorum, Ecclesiæ prodesse cupientium , conatibus obstitissent, & mortuos mundo, ad Monasteria tanquam funus ablegandos dictitarent, rectè *Veteres Æmuli* à Bonifacio IV. nuncupati, quippe qui ducant originem à Paradyso, varficiem à serpente, rei vetitæ concupiscentiam ab Evâ, supercilium à lateribus Aquilonis, livorem à Caino. Movit hæc oppressio S. Gregorium I. Papam. 16. q. 1. c. *ex auctoritate*. Movit Bonifacium IV. Successorem. c. *sunt nonnulli* , ibid. Movit nuperrimè facultatis Theologicæ Salmanticensis Senatum , ut causam alioqui liquidam , & non semel definitam, denuò deciderent. Et quod Decretum Bonifacij IV. Anno Domini 610. in Concilio Romano ea propter emanatum , & à S. Mellito Episcopo Londoniensi in Anglia , omnibûsque Italiæ Episcopis laudatum & subscriptum, hætenus nunquam integrum in lucem, quod sciam, prodierit, nec apud Gratianum d. q. 1. *Causa 16.* integrum inveniat, ex antiquissimo MS. Codice in pergameno Bibliothecæ Monasterij Ochsenhusani, fugientibus ferè literis descriptum, inter Aulæ nostræ expandimus, ac tam nobile Antiquitatis monumentum Lectori benevolo communicamus.

Quod èt ego, ob nostrum præsertim, in quem Adversarius invasit, *Habitu* huc ponendam existimavi.

Decre-

*Decretum Bonifacii IV. Papæ, in favorem
Monachorum Ord. S. Benedicti.*

Sunt nonnulli stulti dogmatis, magis zelo amaritudinis, quàm dilectionis inflammati, asserentes, Monachos, quia mundo mortui sunt, & Deo vivunt, sacerdotali officio indignos, neque poenitentiam, aut Christianitatem, seu absolutionem largiri posse per sacerdotalis officij injunctam gratiam. Sed omnino falluntur. Nam si ex hac causa veteres Æmuli vera prædicarent, Apostolicæ Sedis compar, Beatissimus Gregorius Monachico cultu pollens, ad summum apicem nullatenus conscenderet, cui ligandi, solvendique potestas concessa est. Augustinus ejusdem quoque sanctissimi Gregorij Discipulus, Anglorum Prædicator egregius, & Pannoniensis Martinus, aliique quàm plurimi sanctissimi viri, pretiosò Monachorum habitu fulgentes, nequaquam annulo Pontificali subarrherentur. Neque enim Benedictus Monachorum Præceptor, hujus rei fuit aliquò modo Interdictor, sed eos sæcularium negotiorum dixit expertes esse debere; quod quidem Apostolicis documentis, & Ss. PP. Institutis, non solum Monachis, sed etiam Canonicis summopere imperatur: utrisque enim perspicacibus sanctorum Patrum Exemplis, ut mundo mortui sint, præcipitur. Credimus igitur à sacerdotibus Monachis ligandi, solvendique officium dignè

administrari, si tamen dignè contigerit; ex hoc ministerio sublimari. Quod evidenter affirmat, quisquis statum Monachorum & *Habitum* considerat; Angelus enim Græcè, latinè Nuntius dicitur; sacerdotes igitur Monachi atque Canonici, qui Dei præcepta annuntiant, Angeli vocantur: sed unusquisque Angelicus Ordo, quantò viciniùs Deum contemplatur, tantò sublimiùs dignitate firmatur.

Nanquid ut *Cherubin* Monachi *sex Alis* velantur? *duæ* in Caputio, quò caput tegitur, veris demonstrantur assertionibus, illud verò quod in brachijs extenditur, *Alas duas* esse diximus; & illud, quò corpus conditur, *Alas duas*. Sic lex Alarum numerus certissimè conficitur.

Decertantes igitur contra Monachos in hac re sacerdotalis potentiaë officiò carere præcipimus, ut ab hujusmodi nefandis ausibus imposterum reprimantur, quia quantò quisque excelsior, tantò potentior. Ex decreto Gregorij Papæ, Episcopus debet Missam celebrare in ordinatione Presbyteri, & Abbas in Consecratione Monachi, & quatuor Evangelia super Caput ejus dicere, ut sicut per quatuor Evangelia docetur, ita per quatuor Orationes consecratur, & ita usque in diem tertium, velatum habeat caput, cum summo silentio, & debitâ Deo reverentiâ, figuram gerens Dominicæ Passionis: Die tertio tollat Abbas Caputium de Capite ejus, ut depositâ cristitiâ veteris peccati, revelatâ facie gloriam Do-

Domini speculetur. Secundò ergo Baptizatus est, & emundatus ab omnibus peccatis. Unde oportet Eum majorem sollicitudinem habere, & pro peccatis hominum orare, & plus valere peccata eorum solvere, quàm Presbyteri sæculares; quia hi secundùm regulam Apostolorum vivant, & eorum sequentes vestigia communem vitam ducunt. Ideo nobis videatur, his qui sua pro DEO relinquunt, & à Passione ejus & morte sumunt exordia mutæ conversationis, dignius licere baptizare, communionem dare, poenitentiam imponere, peccata solvere. Tribus diebus sunt in silentio juxta Apostolos, qui ob metum Judæorum in conclavi residebant, usque dum die tertiâ Dominus resurgens diceret illis: *Pax Vobis*. Sic Abbas det pacem Monacho, & caputium de capite ejus auferat. Censemus ergo Eos prædicare, baptizare, Communicare, poenitentes solvere, juxta Constituta trecentorum decem & octo Patrum. Hucusque Decretum Bonifacij IV.

Atque hoc ipsum est, quò omnia, quæ hætenus fuere disputata, abundè roborata sunt, & comprobata, in ordine præsertim ad *habitum monasticum*, quem Pontifex *Alis* comparat *Cherubicis*, Adversarius verò, ut suprà videre erat, indignè omnino tractat: de quò pluribus tamen infra.

¶

P 5

DISSER.

DISSERTATIO II.

D E

Speciali Actione contra Hæreticos, per singula Sacula digestâ.

SUMMARI A.

1. Nunquam non viguere hæresum Monstra, horumque Debellatores Benedictini.
2. Sæculô Christi sextô, Benedicti primô profligantur superstites etiamnum Arianæ, Donatistæ, Agnoitæ, Sabelliani &c.
3. Sæculô Christi septimô, Benedicti secundô opprimuntur Acephalitæ, Photiniani, Monothelitæ, Græci, Helvidiani &c.
4. Sæculô Christi octavô, Benedicti tertiô debellantur Iconoclastæ, Simoniaci &c.
5. Sæculô Christi nonô, Benedicti quartô triumpphantur Bertramiani, Feliciani &c.
6. Sæculô Christi decimô, Benedicti quintô impugnantur Anthropomorphitæ, Sacramentarij &c.
7. Sæculô Christi undecimô, Benedicti sextô vincuntur repullulantes Manichæi, Berengariani, Nicolaitæ, renascentes Sabelliani, Græci &c.
8. Sæculô Christi duodecimo, S. Benedicti septimô conteruntur Henriciani, Petrobusiani, Porretani, Cathari, Albigeneses &c.
9. Sæculô Christi decimô tertiô, Benedicti octa-

vô franguntur iterum Albigenſes, Hannibali-
ni &c.

10. *Sæculô* Chriſti *decimô quartô*, Benedicti
nonô extirpantur Fratricelli, Bohemi, Wic-
cleſiſtæ &c.

11. *Sæculô* Chriſti *decimô quintô*, Benedicti
decimô repelluntur Huſſitæ &c.

12. *Sæculô* Chriſti *decimô ſextô*, Benedicti un-
decimô ſubiguntur Calviniſtæ, Lutherani,
Zvvingliani &c.

13. *Sæculô* Chriſti *decimô ſeptimô*, Benedicti
duodecimô pugnatur contra Calvini, Luthe-
ri &c. Reliquias &c.

N. I.

*Nullô non ſæculô viguère hæ-
reſum monſtra, horûmque Debellores
Benedictini.*

Figmentorum, quibus antiqua ſcatet Poëſis,
umbras in apertam Veritatis lucem Bene-
dictina Religio traxiſſe, mihi videtur:
quod enim cecinit Illa vel Herculis de Cerbe-
ro, vel Theſei de Minotauro, vel Apollinis
de Pythone triumpho, hoc edidère ſpectacu-
lum Noſtri, dum Hæreſum Monſtra Victo-
res expugnarunt; Quorum Glorioſiſſimo Du-
ci BENEDICTO non immeritò hoc ideirco
Emblema adjicias:

— Monſtra domat Magno Hercule
Major.

Omnia

Omnia percurre Sæcula , & nullum re-
perias , in quo non viguerit & Hæresis aliqua,
& Nostratum aliquis ejusdem impugnator, aut
extirpator: id, quod per subsequentes nume-
ros pauculis edoctum imus.

N. 11.

Sæculô Christi sexto, Benedicti

*primò ab Anno 500. usque 600. de-
bellantur superstites Arianî, Do-
natistæ, Agnoitæ, Sabel-
liani &c.*

HOc etiamnum sæculô grassabantur in
Hispania Gothi Arianî : quis horum
impetus, & furias repressit ? Ipse Mo-
nachorum Patriarcha & Antesignanus BENE-
DICTUS primo statim congressu Regem ipsum
Arianorum Totilam unius verbi fulmine tre-
mentem prostravit, & ad meliora reduxit.
Congressum memorabilem (loquor cum R.
P. Arsenio Sulger *in vita didact. S. Bened. n.*
84.) congressum, inquam, memorabilem &
propè divinâ plenum majestate ipse Doctor
Ecclesiæ S. Gregorius suis verbis narret: Tum
per seipsum idem Totilas ad hominem Dei acces-
sit, quem cùm longè sedentem cerneret, non
ausus accedere, sese in terram dedit, cui cùm
Vir Dei bis, terve diceret, Surge, sed ipse ante
*eum se de terra erigere non auderet, BENE-
DICTUS Jesu Christi famulus per semetipsum*
digna-

dignatus est accedere ad Regem, prostratūque de terra levavit, & de suis actibus increpavit &c. multa (inter cætera inquiens) mala fecisti, jam aliquando ab iniquitate conquiesce &c. Quæso te, Lector, homōne hîc loquitur, an iterum DEUS fulminat inter flammæ & tonitrua è Monte Syna coruscus? Video prostratum fulmen Italiæ ad pedes BENEDICTI; sedet iste, jacer ille; tremat & rogat Victor & Tyrannus, BENEDICTUS insultat & imperat: absunt sonantes tituli, meditata prologia, serva adulatio, non tinnunt Aulæ phrasæ. Ausim credere, æternum Numen, uti huic Viro suum esse nomen commune voluit, ita nunc de Majestate Divinâ particulam demisisse; quâ Regem superbum, & recentibus triumphis ferocem tam potenter exterruit; quamquàm aliàs mens conscia recti, & Deo juncta, Regia semper est, nil quod infra Deum est, metuit, nihil timet &c. Pergat narrare Gregorius, & concludat. Quibus auditis Rex vehementer territus orationem ejus petijt, & recessit, atque ex illo tempore minùs crudelis fuit &c.

Tantus laureati Ducis (BENEDICTI) de Rege Tyranno triumphus athleticas continuo vires accendit, & ardentissimum contra eosdem Ecclesiæ hostes zelum in ejus milite discipulo S. Herculano; qui, vivente adhuc S. Patre, ad Perusanum subinde Episcopatum evectus, urbe suâ à Gothis captâ, primus inter Suos, & pro Suis, in fide probè roboratis, cœu Bonus Pastor, cervice datâ, pretiosissimâ

sisimâ morte pretiosam DEO animam tradidit: *Cujus corpus* (sunt verba memorati Gregorij M.) *quadragesimo post abscissionem die, ita capiti unitum fuit repertum, ac si nulla ferri incisio illud tetigisset,*

Ex monumentis Sublacensibus habetur, Insulam Palmeriam ipsi jam Sanctissimo Patri nostro, ejusque tum Discipulis fuisse donatam; in eam postea relegatum à Bellisario sanctum Pontificem Silverium, furentium deinceps Sectariorum iusultus, ope Benedictinorum, constanter repressisse, & reliquam per Orbem Ecclesiam velut ex alterâ Româ solertissimè æquè ac sanctissimè gubernâsse.

Terror quoque Hæreticorum maximus extitit Magnus noster GREGORIUS; de quò ita Breviarium Romanum: *Catholicam fidem multis locis labefactatam restituit; Nam Donatistas in Africa, Arianos in Hispania repressit: Agnoitas Alexandriâ ejecit, Pallium Syagrio Augustodunensi Episcopo dare noluit, nisi Neophytos hæreticos expelleret ex Gallia. Gothos Arianam hæresim relinquere coëgit &c.*

Sub idem tempus in arenam contra eosdem Ecclesiæ hostes descenderunt in Hispania Ss. Vincentius (gloriosus pro Christo Martyr sub Rege Riciliano) Raimirus, Joannes Vilelarenfis, Joannes Archi-episcopus Saragossanus, Ephemius Abbas Agaliensis, Æmilianus de Cogolla, Martinus Episcopus Dumienfis &c.

S. autem Codocus cum integrâ Discipulorum

lorum turmâ hostibus obviâ generosus processit : ne tamen suppetiæ , quæ identidem ferrentur , unquam deessent , publicum instituit Gymnasium , unde errores , circa animæ immortalitatem suborti , opportunissimè impeterentur.

S. Leander Hispalensis Archi-episcopus in Concilio Toletano (cui nomine Pelagij Papæ præerat) eximiam contra Arianos præstitit Operam ; quæ pariter luculentissimè enituit in conversione S. Hermenegildi Regis , de qua Breviarium Romanum 13. Aprilis proluxius. Cui individuum se Achatem , & Coöperatorem insignem adjunxit S. Fulgentius Episcopus Astigitanus , zelô Arianos ardentissimô usque & usque infectatus.

Inter hæc gemina Galliam pestis invasit ; Arianismum una , altera Sabellianismum spirans : utramque extinxit singularis Gregorij nostri Turonensis dexteritas , quâ ipsum adeo Regem Chilpericum exitiale virus evomere compulit. Verùm , ut recens extincta candela celerius ignem concipit , ita Regem vix sanatum eadem lues denuo infecit , Gregoriô deinceps operam , & oleum , quod ajunt , perdente. In subsidium accurrit & succurrit S.

Salvinus Episcopus Albigenensis , & Regem à contagione restitutô , omne pariter Regnum ruinæ subtraxit.



N. III.

*Sæculo Christi septimo, Benedi-
dicti secundò, ab Anno 600. usque ad
700. profligantur Acephalitæ,
Photiniani, Monothelitæ,
Græci, Helvidiani &c.*

INter ovantium, ex hæresum strage, No-
strorum agmina, primus hoc sæculo occur-
rit S. Columbanus; qui Mediolanum in
Italia Arianismò demum penitus purgavit:
stante interea in Hispania S. Isidorò intrepidè
contra Acephalitas.

At Agrestinus novo subinde schismate
universam tentat Ecclesiam in varias distrahe-
re partes, & factiones: cujus impios conatus,
sicut & succrescentes unà hæreses Photini ac
Bononij frangunt, evelluntque Monachi Luxo-
vienses; quorum in acie primipili erant B.
Agilus Abbas, & Eustasius Monachus, pluri-
bus victorijs illustres.

Pretium ijs addidit, & admirationem ex
imbecilliori etiam cætu armata Pallas, S. Bur-
gundofera, Abbatissa Evoriacensis; quæ ausu
sanè generoso, & virili prorsus animo Arge-
stino à fronte sese opposuit, ejusque erroribus
palam convictis, non sinè effusissimo Antago-
nistæ rubore, illustrissimam imbelli cæterà
sexui palmam cedere coëgit.

In Oriente S. Mater Ecclesia circa pro-
fundissimum Ss. Trinitatis Mysterium ingens
subijt

subijt periculum; cui S. Eugenius Archi-episcopus Toletanus, Monachus S. Engratiæ celerimè occurrit, & feliciter avertit.

S. Theodorus in Germania Abbas stabulensis, & Episcopus Leodiensis pro Libertate ac immunitate Ecclesiastica constanter dimicando, gladijs impiorum gloriosus demum Martyr occidit.

Romæ dum S. Agatho noster Pontifex Maximus in diversis, quas crebrò convocavit, Synodis Monothelitarum Hæresim proscripsit; S. Theodorus Græcorum errores de Processione Spiritûs sancti repressit.

Fortunatior tamen nullus contrà Heterodoxos pugnavit S. Ildelphonso Archi-episcopo Toletano; quem, pro illibata Virginitatis MARIANÆ Candore certantem, Virgo IMMACULATA è Coelo conspicua, candidissimâ impertiri veste voluit.

Iterum Roma per S. Sergium I. damnato Constantinopolitano Pseudo-Concilio præclarè de Schismaticis triumphat.

In Gallia Monothelitæ proteruntur à S. Audôeno, Monacho Rasbacensi; qui longis pro Ecclesia laboribus inclytus, præmium ferens Pallium Archi-episcopatus Rottomagensis, labem dein' Simoniacam penitus extinxit.

Contra errores Britonum de celebratione Paschatis calamum strinxit S. Anthelmus Monachus Meldinensis, cui suam strenuè operam associavit Adamannus Huenfis Archimandrita celeberrimus: S. Geolfridus Abbas Gentem

Pictavorum, hæresum varietate turbatam,
Romanæ Ecclesiæ novo fœdere conciliavit.

N. IV.

Sæculo Christi octavo, Bene-
dicti tertio, ab Anno 700. ad 800.
errores Græcorum, Iconoclastarum,
Simoniacorum &c. oppri-
mntur.

Felix Germania ! cui millies & per myria-
des millies in BONIFACIO *bene-fecit*, et
--- *dixit* Divina Clementia, quando Is
Vineam in Te Evangelicam non tantum sedulus
plantavit, sed et Zizania, quæ orcina subinde
invidia Ermvolfi, Adelberti, Clementis &c.
latè sparserat, sollicitus continuo evulsit; omni-
bus nempe omnia factus *Apostolus*.

Græcorum iterum errores & schismata
convicit Gregorius noster II. supra omnes hu-
manos respectus altissimi, & constantis animi
Vir, Magni illius Gregorij æmulus; necdum
enim Pontifex, Con-ultro profectus, de Græ-
corum erroribus Victor cum plausu redijt: in-
de ad summum Romani Pontificatûs apicem
evectus, Leoni Imperatori Iconomacho, bel-
lum sacrum contra Sanctorum Imagines mo-
lienti, toto sese nisû opposuit.

Cùm Hæresin dico, malum dico, quod,
ubi semel invaluit, ad instar contagiosi flumi-
nis, in omnes, quâ latè pater, Orbis partes
sefe

seſe pernicioſiſſimè inſinuat; aut, velut a terra decepatrix Orphei Cythara omne genus hominum, nobile, ignobile trahit. Iconoclaſtarum hæreſis Romæ omnino jugulata videbatur, cùm momento quaſi ad ipſas Angliæ ſeſe Oras effudit; at, ne latiùs indies malum ſerperet, obicem poſuit S. Bertholdus, Monachus Radvulfenſis, poſtea Cantuariæ Archi-epiſcopus, convocatâ eum in finem frequenti Suorum ſynodò.

De S. Georgio Martyre, eiùſdem ævi Benedictino Monacho, ita Martyrologium Romanum: *S. Georgius Limniota Monachus, cùm impium Leonem Imperatorem reprehendiſſet, quòd ſacras Imagines frangeret, Sanctorùmque Reliquias combureret, ejus juffu manibus abſciſſis, & capite, Martyr migravit ad Dominum.*

Memorati Gregorij II. Virtutis æquè, ac Sedis, nominisq; Hæres Gregorius III. ſuam in Cœlites Pietatem eximiè oſtendit, dum devotiſſimum Eorum cultum non confirmavit modò, ſed èt legatione ad Leonem Iſauricum miſſâ, Orientalem Eccleſiam ſtudiò ſummò, & labore Romanæ copulavit.

Joannis tamen Damasceni noſtri felicitatem condignè quis celebret? Cui Benigniſſima DEI Mater MARIA manum ultrò reſtituit, quam, pro Ejus, & reliquorum Divo- rum Cœlitum obſequio certantem, impia ſecuris amputavit.

Plurimi quoque eo tempore in Oriente

Monachi, quorum Monasteria jam ævô ipsius S. P. N. Benedicti fuere condita, pro cultu sacrarum Imaginum gloriolâ occubuere morte.

Etiam Germania nostra hoc sæculô pluribus Sectarum Victoribus fertilis fuit; & ad Rhenum quidem superiorem S. Othmarus Abbas San-Gallensis; In Augia Divite B. Etho Abbas, Episcopus postea Argentinensis; S. Viterpus demum Prior Elvacensis, Episcopus exin Augustanus invicti contra variarum hæresum insultus steterunt.

Virum se Romæ exhibuit infracti, & excelsi animi S. Stephanus IV. in Divi Chrysogoni Coenobio olim Monachus; abrogando omnia Constantini Pseudo-Pontificis comitia, ejusdemque Acta palam cremando; Cultum præterea sacrarum Imaginum, impiè à Constantino Imperatore sublatum, pristinae Catholicorum devotioni restituendo.

Claudit hoc Sæculum B. Alcuinus, alias Flaccus Albinus, Profligator execrandæ de adoptivo & nuncupativo Dei Filio &c. Sæcæ acerrimus.

N. V.

Sæculo Christi nono, Benedi-

cti quartô, ab Anno 800. ad 900.

triumphantur Bertramiani, Feli-

ciani, Prædestinatores &c.

SUborta hoc sæculô perniciosissima Felicianæ Hæreseos lues, per Septimaniam latè ser-

serpens, & ad ipsos Ecclesiæ Infulas pervadens, Antidotum habuit in S. Benedicto Abbate Monasterij S. Sequani: universi verò Fidei hostes malleum sensere in S. Gregorio IV, Novæ Fossæ olim Monacho.

Bertramum Hæresiarcham, Ss. Eucharistiæ invasorem calamus repressit S. Paschasij Monachi, & Abbatis Corbeix Gallicæ.

Prædestinatorum Hæreticorum, & Godescalci Hæresiarchæ in Gallia Victor extitit Himmarius noster Rhemensis Episcopus: & ejusdem Godescalcianæ labis è Germaniâ Eliminator S. Rhabanus, Archi-episcopus Moguntinus, Monachus olim & Abbas Fuldensis, suprâ laudatus.

Sæculi hujus epilogus in eo verè felix fuit, quòd tulerit Joannem Diaconum nostrum; cujus sagacissimò ingeniò Græcorum vasfrities Orbi tandem toti innotuit, quâ è Scriptis Divi Gregorij Magni (ubi Spiritum S. à Patre, Filióque procedere asseruit) verbum illud *Filióque* expunxerunt; unde factum, ut suo tum

errori non leve pondus accesserit,

etsi levissimus fuerit astus, à

Joanne facile detectus.



N. VI.

Sæculo Christi decimo, Benedicti quintò, ab Anno 900. ad 1000. impugnantur Antropomorphitæ, Sacramentarij &c.

INitium hujus Sæculi nobili pro Ecclesiæ libertate triumphò consecrârunt Rhemensis Archi-episcopus S. Fulco, Cœnobij olim Bertimiani Monachus, & S. Grimbaldu Monachus & Abbas Sithiensis: Balduinus quippe Dux Flandriæ, ne manus Ecclesiæ Bonis contaminaret, crebrò admonitus, illum exiliò, sævâ hunc nece mulctavit.

Sancti VVimonis Bremensis Episcopi, Monachi priùs Corbeia Saxonica laboriosa Humanitas efferatissimam Gothorum Gentem ab Arianismi tandem exuvijs ad Ecclesiam, & Christi mansuetudinem reduxit.

Ex Laubiensi propè Binchium Cœnobio prodit S. Ratherius Veronensis Cathedræ Episcopus contra Anthropomorphitas, & Berengariorum superstites Reliquias.

Floriacense in Gallia Cœnobium Archi-episcopatu Cantuariensi dedit S. Odonem, egregium Sacramentariorum Impugnatorem.

Quantum porrò hoc Sæculò laboraverint Nostri, avertendis variarum Hæresum contagionibus, consulendus est, ut prolixitatem vitæ, Jacobus Gualterius; inter quos provi-
dus

aus omnino occurrit Richardus Antistodoren-
sis Episcopus, olim Monachus Monasterij S. Ger-
mani, contra gliscentes de Eucharistico Sacra-
mento Novatores, egregium conscribens li-
brum. Eodem collimarunt gemini è Corbeien-
si Saxoniz Coenobio pugiles Algerius, & Bru-
no, ceu Vates orituris mox Hæresiarchis oc-
currentes voluminibus, de Sacramento Altaris,
non spernendis.

N. VII.

Sæculo Christi undecimo, Be-

nedicti sextò, ab Anno 1000. usque

ad 1100. vincuntur repullulantes

Manichæi, Berengariani, re-

nascentes Sabelliani,

Græci &c.

R Eferunt rerum Gallicarum Scriptores, sub
initium hujus sæculi nefariam Mani-
chæorum hæresin denuò repullulâs-
se; Fulberti tamen Carnotensis Episcopi sa-
gacitate continuò peremptam. Qui Idem
Fulbertus, pessimi discipuli (Berengarij) Ma-
gister optimus, ejusdem errores librò, *de Ve-
ritate Corporis Christi in Ss. Eucharistie Sacra-
mento*, primus confutavit.

Fulberti vices mox subierunt, & succen-
turiârunt tres è Benedictinis Castris adversus
eundem Berengarium commilitones: Rogerius
Monachus Corbeiz Saxoniz; Algerus ejusdem

Professus Coenobij, jam superiori laudatus sæculo; & B. Guido Monachus Aretinus.

Beatus Hildebrandus Cluniacensis Monachus, S. R. E. Cardinalis Subdiaconus, *Legatus à Latere*, ad reformationem Ecclesiæ Gallicanæ missus, quadraginta quinque Episcopos *Simonis* labe infectos miraculò ad poenitentiam adegit: Quidam enim horum Episcoporum dicere Versum illum *Gloria Patri &c.* iussus, hæsit omnino, nec *Spiritum sanctum* proferre ullâ vi valuit, donec reatum suum professus, Episcopatui *Simonis* quæstu acquisito renuntiaret.

Nefandam Heriberti, & Lisoij hæresin feliciter pepulit S. Theodoricus Monachus Senonensis, Aurelianensis postea Episcopus.

Anno sæculi hujus ML. Leo Nonus Monachus quondam Tullensis in Synodo Provinciali Romanâ Berengarij hæresin damnavit, teste Eminentiss. nostro Sfondrato, *Gall. Vin. diff. IV. §. 1.* Idem Leo, missò summâ cum potestate S. Humberto, Monacho itidem Tullensi, Orientalium errores sustulit.

Memoratos Berengarij errores confixerunt quoque Lanfrancus Archi-Episcopus Cantuariensis, Beccensis olim Monachus & Abbas; B. Guidmundus Monachus Averfanus; B. Algerius Monachus Cluniacensis; S. Volphelmus Abbas Brauvvilerensis; Albericus Monachus Casinensis, qui petito unius duntaxat hebdomadæ spatio pro inducijs, librum contra Berengarium conscripsit, tantis Ss. Patrum testi-

testimonijs roboratum, ut jure ex meritis acqui-
sitô hujus cum Sacramenti nobilissimum Affer-
torem, Vindicemque dixeris.

Populum Florentinum à Simoniaca labe
liberavit S. Petrus Vallis umbrosæ Monachus,
Abbas inde Ficedensis, at non sinè miraculi
adminiculâ: in contestationem quippe Veri-
tatis à se assertæ succensum subinde ignem,
spectante populo, nudis pedibus illæsus pertran-
sijt; Petrus ideirco *igneus* deinceps vocari
ceptus.

Tres omnino hæreses confecit solus S.
Petrus Damianus, invictissimi animi Cardi-
nalis, & Sectarijs, cum quibus perpetuum ei
bellum, formidandus. Prima fuit Simonia-
corum, quos Orbe tandem eliminavit; Secun-
da Nicolaismus, quô ducentis jam annis Me-
diolanenses laborârunt; Tertia erat Hæresis
Incestuosorum, quæ, teste Sfondrato, *lo-
cit.* nata est Anno M L X V. quàm plurimi enim,
imò multa millia Christianorum, præcipuè præ-
potentium, in tertio gradu nuptias contrahe-
bant, quòd multorum Juris-Consultorum au-
toritate ducti, gradus ex Justiniani præscri-
ptô numerarent, adeò ut fratrem & sororem
in secundo gradu collocarent. Pernicioso huic
Dogmati, ut & cæteris, Damianus noster
se se opposuit, tanquam firmissimus pro Do-
mo DEI Murus.

Pari constantiâ memoratas hæreses dam-
navit B. Alexander II. Monachus olim è La-
terano.

In pleno Concilij Romani confessa S. Bruno Monachus Casinensis (necdum Episcopus Signiensis) singulari cum Berengario certamine congredi ausus, triumphatò palam Antagonistà, DEI Ecclesiam acriter ac felicissimè propugnavit.

In profliganda Gibertina hæresi multùm laboravit B. Urbanus II. quondam Lateranensis, dein Cavenfis, tandem Cluniacensis Monachus; gravissimis, priusquam Pontifex renuntiaretur, legationibus contra præfatam hæresin functus.

Circa finem hujus sæculi celebrati sunt frequentes triumphus S. Anselmi nostri Archiepiscopi Cantuariensis contra renascentes Sabellianos, qui opportunam ei occasionem subministrârunt, scribendi doctissimum illud *Volumen de Incarnatione Verbi &c.* Conversus dein in Græcos, & Schismaticos, tanto eis terrori fuit, ut vincula ei injicere frequenter tentantes, solo aspectu consternati, abjectis armis, supplices ab eo Benedictionem efflagitarent.



N. VIII.

Sæculo Christi duodecimo; Benedicti septimò, ab Anno 1100. ad 1200. conteruntur Henriciani, Petrobusiani, Porretani, Cathari, Albigenfes &c.

Gliscenti hoc etiamnum sæculò flammæ hære-
ticos Berengarianæ aquam affudit, in-
cendiūque prorsus extinxit S. Bruno
Monachus & Abbas Casinensis; needum enim
Abbas, summi Pontificis legatione in Gallia
functus, Authoritate Apostolicâ Synodum in
causa Berengariana celebravit, veteremque hæ-
resin iteratò damnavit.

Sed novum eo tempore excitavit incen-
dium Henricus IV. Imperator; cui sopiendo
Chuno Arosianæ Congregationis Monachus,
S. R. E. Cardinalis, ad Gallos Pontificis Le-
gatus, coactò in Urbe Bellovacensi Conciliò,
Imperatorem anathematis vinculo subjecit.

Anno MCXI. Damната est ab Innocen-
tio II. hæresis Abailardi; qualis ea fuerit Ber-
nardus his verbis explicat ep. 292. *Cùm de Trini-
tate loquitur, Arrium sapit: cùm de Gratia,
sapit Pelagium: cùm de Persona Christi, sapit
Nestorium.* Ad hanc hæresin, quæ paulatim
per Galliam serpebat, perimendam, accinxit
se S. Bernardus, ab ipso Abailardo Hæresiar-
cha provocatus; in Concilio Rhemenfi con-
gre-

grediuntur: sed pertinax reversus Abailardus, Cluniacum Ordinis nostri illustre Monasterium fortè pertransit; exceptus perhumaniter à Petro Venerabili Abbate tam loci, errorumque suorum convictus, hæresin non modò exuit, sed, quæ est mutatio dexteræ Excelsi! Religiosum insuper & pijsimum quidem induit.

Is idem Petrus Venerabilis, eximium hujus Sæculi decus, Petrobusianorum quoque luem extinxit.

Causam Innocentij II. Abbatis quondam Ss. Nicolai & Primitivi, contra Petrum Leonis, dictum Anacletum II. Antipapam strenuè defendit Mellifluus Doctor Bernardus Clara-vallensis Abbas; cujus porrò merita in oppugnandâ Politicorum Arnaldi de Brixia hæresi multum inclaruere.

Anno MCXLVIII. à Romano Pontifice Eugenio III. Divi Bernardi quondam Discipulo, & Abbate Pisensi, in Concilio Rhemenfi hæresis Gilberti Porretani examinata & proscripta est, suam in hac causa operam impigrè navantibus memorato Bernardo, unum Petro Venerabili, & Godefredo Bernardi comite: qui iidem hæreses quoque & sectas Eudonis de Stella, Henricianorum, Apostolicorum dictas, jugulârunt.

Mellitissimâ præterea Bernardi Suadâ Mediolanenses, missò, quò conflictabantur, schismate, Romanæ Ecclesiæ denuò sunt reconciliati.

Hæreses in Armorica ortas Scriptis infestavit

stavit Hugo Archi-episcopus Rothomagensis,
Prior quondam Cluniacensis.

Iterum armata è cætu infirmiore prodit
Pallas: æquænam illa? Sancta Hildegardis,
doctissimis contra Catharorum errores Scriptis
& triumphis Orbi notissima: ejus Germanus
frater Venerabilis Eckbertus Monachus & Ab-
bas Monasterij S. Florini sua contra eosdem
Catharos, Adamitarum hæresin resuscitantes,
tela vibravit.

Hæreticorum non minùs, & Schismatici-
corum Malleus apud plerosque Scriptores au-
dit S. Petrus, Archi-episcopus Tarentasiensis,
Bonæ Vallis olim Monachus & Abbas.

Novissima hujus Sæculi tempora funestâ-
runt nefandâ suâ hæresi Albigenes: in quos
surrexerunt prævalidis undique armis Henricus
Abbas Claravallensis, B. Petrus Abbas Ignia-
censis, S. Petrus Monachus Fontis frigidi, sa-
cræ Fidei Inquisitor, immani nece interem-
ptus; B. Almarius Monachus & Abbas Caro-
lilocensis, *Fidei Pugil* dictus. S. Ama-
tus ex Monacho Montis Virgi-
nis, Nuscensis Episcopus.



N. IX.

Sæculo Christi decimo tertio,

*Benedicti nonô ab Anno 1200. ad annum 1300. impugnantur iterum
Albigenses, Hannibalini &c.*

Hæreticos sui temporis Apostolicô zelô, & ardentissimô defendendæ Catholicæ Religionis studiô persecutus est S. Guilielmus Bituricensis Archi-episcopus; Monachus quondam Grandimontensis, & Carolilocensis postea Abbas, animi magnitudine pro tuenda libertate Ecclesiastica Regi etiam Galliæ, cui se constanter opponebat, formidandus.

B. Fulco ex Abbate Grandis Sylvæ Archi-episcopus Tolosanus, ut Gregem suum ab Albigensium erroribus revocaret, omnem movit lapidem, eâ tandem felicitate, ut revocatô ipsô Albigensium Duce Raymundô Comite Tolosanô, tota deinceps hæresis corruerit: cui simul opprimendæ suam addiderunt operam B. Didacus Oxomensis Episcopus, postea Monachus ad Cistercium, cum alijs suæ familiæ 12. Abbatibus; B. Arnaldus Archi-episcopus Narbonensis, hæreticæ pravitatis Inquisitor, Monachus olim & Abbas Grandis Sylvæ; B. Conradus S. R. E. Cardinalis, Monachus & Abbas Villariensis, Legatus à Latere, Belli demum Dux contra eosdem Albigenses


gentes constitutus; B. Petrus de Castro Novo Fontis frigidi, hæresum Corrector & Inquisitor.

Hæreticos in ore gladij, quod est Verbum DEI, (ut loquitur Menologium Henricusij) potenter exterminavit, & Veritatem catholicam stabilivit S. Alachrinus Casæ Mariæ Monachus ac Prior.

Hannibalianam hæresin obrivit noster Gregorius IX.

Errores, quos profligavit B. Alanus Monachus, Doctor olim & Professor Sorbonicus, Conversus postea Cisterciensis, fuere sequentes: *Non esse corporum Resurrectionem, sed neque Paradysum, neque Infernum; Idololatriam esse Sanctorum invocationem, & imaginum adorationem; JESU Christi corpus non aliter in Pane Eucharistico, atque in alio quovis pane existere &c.* Is cum in publica subinde Disputatione Romæ ingens Fidei periculum incognitus adverteret, in medium subito progressus, ovantes jam jam hæreticos tantâ argumentorum energiâ pressit, & convicit, ut eorum nonnemo, *Aut Alanus es tu, exclamaret, aut Diabolus; cui Alanus; Diabolus non sum, sed Alanus.* Domum cum Abbate suo redux,

Alberici, mox Albigensum, & VValdensium nefaria dogmata doctissime refutavit.



N. X.

Sæculo Christi decimo quarto,

*Benedicti decimò ab Anno 1300. ad
annum 1400. extirpantur Fratri-
celli, Bohemi, Wicleffistæ &c.*

FELICI auspiciò hoc inchoant Sæculum Pu-
giles nostri, contra diversas hæreticorum
phalanges, egregiè dimicando, & Verita-
tis Victoriâ, & palmam Martyrij reportan-
tes. Inter hos ex solo Firmitatis Cœnobio
Burgundiæ 50. Monachi ab Hæreticis variò
mortis genere interempti, præclaram Marty-
rij lauream sunt adepti.

Referunt Montalvus, Manriquez, Hen-
riquez, Æneas Sylvius, Paulus Langius &c.,
innumeros ferè Monachos ob fidei constantiam
à Bohemis hæreticis fuisse contrucidatos.

Arnoldi Villanovani hæretici pestifera
Dogmata felici calamò exagitavit & vicit Ja-
cobus Richard Populetensis Monachus.

Scelestissima Fratricellorum flagitia, eo-
rumque nefandam hæresin Apostolicâ damna-
vit Authoritate B. Benedictus XII. Abbas olim
frigidi Montis, & Monachus Bolbonensis.

VVicleffi hæresin primi Nostri deprehen-
derunt; primarij eorum fuere Guilielmus Bri-
hamus Norfolciensis Monachus; Simon de
Langham ex Archi-episcopo Cantuariensi S. R.
E. Cardinalis; Guilielmus Bingham Nordo-
vicensis

vicensis Monachus; Utredus Boldon, Dunelmensis Monachus; Simon Sonthrarius, Albanensis Monachus; Joannes VVellius, Ramseyensis Monachus; Joannes Radinghal, & Henricus VVoodhil, Monachi Cantuarienses; Nicolaus Radeliffus, Monachus Albanensis; Adamus Estonius, Nordovicensis Monachus, Episcopus Londoniensis S. R. E. Cardinalis; Joannes Rapotensis, & Petrus Clonensis, Episcopi: de quibus omnibus consulendus est Reinerus noster in *Apostolatu Benedictino*.

N. XI.

Sæculo Christi decimo quinto,

Benedicti decimò ab Anno 1400. ad

Annum 1500. tolluntur Hussitæ,

aliæque variæ hæreses &c.

IN diversis Provincijs diversis occurrunt hæresibus, & obnituntur Nostri, inter quos eminent: Conradus Sodorensis in Mannia Episcopus; Joannes ex Monacho Clarifontis Derensis Episcopus in Hibernia; Robertus Tonata Scopiensis in Orcadam Insulis; Conradus Ochlenius Ebronensis; Otho ex Monacho VValekenriedensi Mersburgensis ad Salum Episcopus; & alij plures, quos reperire est in *lib. de Provis. Prælat.*

Suum hoc sæculò nefarium erexit caput Joannes Huss, Hæresiarcha Pragensis; qui suâ

R

Impie-

*Impietate novos ritus, nova Sacra per
urbes*

Instituit, priscasque ausus rescindere Leges.

Cum hoc frequentibus se congressibus celebrem fecit Mathæus, Monachus Aulae Regiensis: Zedtlizenses verò Monachi cum alijs multis contra Hussitismi initia mirabili fervore ad sanguinem usque decertantes, illustri Martirii palmâ condecorati sunt; quibus haud segniores extiterunt Monachi Cellæ novæ in Silesia, ab Hussitis in odium Religionis omnes trucidati.

In Concilio porro Constantiensi multa contra Hussitas præclarè gessit Joannes de Martiniaco Cisterciensis, Doctrinæ VViclefii, & Hussij cum plena potestate examinatus.

Singulos pro singulis annis Hussitarum in Bohemia triumphatores referre, immensus esset labor; de quibus, sicut peculiariter de Monachis Osseckensibus, & Grumachinensibus, (qui pro fide occubuere) videantur Annales Ordinis nostri.

Judex post hæc in causis fidei designatus est in Concilio Basileensi Joannes, Cisterciensis Generalis, & ad Bohemos Orator destinatus.

Sed & Germani Abbates (Eberbacensis, & Lanckheimensis) ejusdem Concilij Nuntij, rem strenuè contra Hæreticos gessere.

Enituit in Concilio pariter Basileensi ope-
ra no-

ra nostri Abbatis Panormitani, Pontificis ad id Legatus.

S. Hieronymus Camaldulensis Congregationis Monachus J. V. D. & Theologus varias varijs libris devicit hæreses: inter eos sunt

Contra Hæreticos lib. I.

Contra errores Græcorum lib. I.

De Corpore Domini. lib. I.

N. XII.

Sæculo Christi decimo sexto,

Benedicti undecimò ab Anno 1500.

ad annum 1600. subiguntur

Calvinistæ, Lutherani,

Zwingliani &c.

AD hoc Sæculum dum progredimur, ob-
vius fit decantatissimus inter Aleman-
nos Trithemius, sui Miraculum tempo-
ris, *totius Arcæ Sapientie* à Joachimo S. R. I.
Electore Brandenburgiæ appellatus; qui gliscen-
tium per Germaniam hæresum semina, & an-
guem, quod aiunt, in herba suffocaturus,
Ecclesiam varijs adversus impiorum technas vo-
luminibus præmunivit. Quorum præcipua
sunt:

1. De Fide & Intellectu.

2. De Fide necessaria ad Salutem.

3. De Miraculis Infidelium.

R 2

4. De

4. De Scriptura Sacra.
5. De Prænotionibus licitis Christiano, & non licitis.
6. De Reprobis & Maleficijs.
7. De Promissione Divina.
8. De Providentia Dei.

Etverò ; quod Trithemius ceu Vates ominatus est , paulò pòst accidit : Anno quippe 1517. desciscens à Religione M. Lutherus novum hæresis multiformis monstrum produxit , ex quo innumeræ aliæ sectæ , erroresque nati , & propagati , quibus tota fere Europa infecta fuit , & fædissimis , quæ tîndé emanarunt , bellis involuta , hæresi Duce. Unde optimè Poëta :

*Hæc duce vastatos luget Germania campos ;
 Omnis ubi sparsis ossibus albet ager ;
 Hæc duce civili maduerunt sanguine rivi ,
 Anglia sive tui , Gallia sive tui.*

Dum mala in Germania crescunt , & vires unâ Acatholicorum , deficientibus potentissimis Germaniæ Urbibus , Monachis tamen Benedictinis nec animus defecit , nec fidelitas contra hæreticos , licèt pleraque eorum Monasteria fuerint expilata , ipsique de Sede sua ejecti. Quos inter Diethelmus Blarer à VVartensee S. R. J. Princeps , & Abbas San. Gallensis Novatores stupendâ animi constantiâ , armisque impavidus attrivit.

Victoriæ contra hæreticos triumphum palmæ Martyrij junxerunt in Anglia Ricardus VVehin-

VVehintinger Abbas Glastemburiensis; Joannes Torre, & Rogerus Jacob, ejusdem Cœnobij Professi; Duo Abbates VVallensis, & Sauliensis; Guilielmus Hadoc Monachus VVal-
lensis; Abbates Riveriensis, & Fontanensis; Vittinus Glastoniensis Abbas; Hugo Feningdoni Abbas Redingensis; Joannes Becus Abbas; Ruggus, & Onionus Clocestrenses: de quibus consule Reynerum in *Apostolatu Bened. Anglia.*

In Germania superiore non sinè gravissimò vitæ periculò pro DEI Ecclesia & Imperio in causa hæreticorum stetit, ac plurimum laboravit Gervvicus Abbas VVeingartensis ex Blarerorum illustri familia: quem proinde, indictò Conciliò Tridentinò, convenire, deque re Catholica cum eo conferre à Pio IV. jussus est Nuntius Apostolicus: de quo ita Mezgeri in *Historia Salisburg. lib. 4. c. 58.* Vineæ quoque VVeingartenses insignem tulere botrum Gervvicum Abbatem: hic vinò generosissimi Zeli ebrius, omnem conatum in avertendâ, & eliminandâ Suevia hæresi adhibuit: quod feliciter alijs etiam in ditionibus præstitit; & Cæsaris Legatus juramentum fidelitatis exegit. Adfuit tandem publicæ, eique ultimæ Ulmensi supplicationi, in Solemnitate Ss. Corporis Christi; ubi præsentè & comitante Imperatore Carolo V. Ss. Sacramentum ipse circumtulit.

Ad idem quoque Concilium in causa Fidei nomine totius Ecclesiæ Helveticæ missus est Joachimus Abbas, & S. R. I. Princeps Einsid-
lensis.

Nec Monachi Itali in tanta hæresum illuvie & turbelis torpebant; testis est insignis liber Jacobi de Leccio Monachi de Congregatione Cœlestinorum, quò impia Hæresiarcharum Dogmata egregiè elusit, ac convicit.

Interea hæresis (inquiunt Mezgeri *lo. cit. lib. 5. c. 4.*) non contenta dimicare stylo, & calamo, secures & gladios in Catholicorum capita acuebat. Anglia, ubi hæresis erat in folio collocata, arena fuit, quæ identidem sanguinem Martyrum bibens, & semper sitiens, cruentis spectaculis crudeles hæreticorum oculos quotidie pascebat. Illustrarunt illam glorioso certamine unico anno 75. supra 200. Religiosi è sola D. Benedicti familia, præter alios innumeros. Gloriosum inprimis fuit Martyrium, & inauditò miraculò divinitus nobilitatum 40. Monachorum Monasterij Magienfis in Hibernia è familia Cisterciensi.

Cùm anno 78. in pervigilio B. Virginis Assumptæ insana hæreticorum manus ingenti furore arietatis & effractis foribus Monasterium irrumperet, Monachi omnes, concursu ad templum factò, ante Ss. Eucharistiæ Sacramentum procubui sese paratas pro fide victimas offerebant, & mutuis ad mortem fortiter obeundam cohortationibus firmati, hostilem ferociam præstolabantur. Adfuerunt illi insana cum vociferatione, singulòsque, decussis capitibus, crudeliter immolarunt.

Contigit, dum hæc fierent, Promumcondum (Cellerarium vocamus) negotiorum causâ

causâ Monasteriô abesse; qui eâdem die regressus, cum neminem in Claustro, multa verò vastata, expilata, suisque deque versa inveniret, suspicabatur, hæreticos expilatores adfuisse, & Monachos metu dilapsos, ad tutiora se recepisse. Verum ubi ad templi Chororum suspenso gradu pervenit; en triste spectaculum! videt 40. suorum Confratrum victimas demersis capitibus in proprio cruore nantes. Tum enimverò singulorum cadavera obire, sublata deosculari capita, cruori lacrymarum imbres affundere, quos fluctuans inter gratulationem & commiserationem affectus expresserat. Ita aliquamdiu affectui suo indulgentem subit memoria, pervigilium esse celeberrimi Festi Assumptionis B. Virginis *MARIÆ*, atque horam instare, quâ solenni Vesperarum obsequio Cœli Regina antehac colebatur. Hinc novo luctu obrutus, quod tanta festivitas absque debito, solitoque cultu esset abitura, genibus humi defixis rorantes oculos, manusque in Cœlum attollens, *Nosti*, exclamavit, *O! Virgo purissima! unica Domina, & Protectrix nostra! quantâ isti solitudine, devotione, & diligentia semper tibi servaverint in hac domo, & celebrarint omnia Festa tua. Cur ergo permitis, ut tanta solennitas negligatur hoc modo? Dum ita inter lachrymas & suspiria perorat, en! Stupendum prodigium! subito omnes Monasterij campanæ nullâ manu admotâ pulsari, sanctorum Martyrum corpora moveri, surgere, suum quod-*

libet caput humo attollere, collo imponere, suis se quilibet sedilibus collocare, præcimente Abbate Vespertinas horas decantare, eâ cantûs dulcedine, quæ coelestem prorsus Musicam loqueretur. Quæ dum fierent, ipsorum quilibet coronâ caput redimitus, & palmam manu gestans apparuit. Absolutô tandem magnâ gravitate & morâ Vespertini cantûs obsequiô, pristinâ rursus in statione, in quâ priûs Martyrium subierant, depositis capitibus procubuerunt. Id miraculum totâ Hybernâ vulgatum plurimum valuit ad firmandam fidem nuntantium populorum.

Ad decantanda Joannis Feeknami Abbatîs VVestmoasteriensis contra hæreticos certamina, & triumphos integer non sufficeret liber; ipsos quippe sectariorum Antesignanos ad certamen provocare ausus, ter & frequentius ob fidei constantiam, & Veritatis Catholicæ defensionem carceri mancipatus, in eo tandem gloriosè occubuit.

Atque ita quidem in Anglia hæresis in Catholicos religiosos læviebat: at non mitius in Belgio cum iisdem agebatur, ex quibus Fidei ac catholicæ veritatis testimonium propriô obsignavit sanguine Cornelius Poldermannus Monachus S. Salvatoris Antverpiæ, Abbas postea Zirizeensis Holandiæ, ejûsque subditi Monachi, ab hæreticis immaniter trucidati.

Strinxit etiam stylum contra grassantes in Belgio hæretes, (testibus iisdem Mezgeris *ibid.*) post alia quàm plurima in omni Asce-

seos

seos genere præclara opera, Venerabilis Ludovicus Blosius, Abbas Lætiensis, in Mystica Theologia, doctrinæque Ascetica facile Princeps, meritis, & doctrinâ præstantissimus: cujus Scripta Augustissimo Imperatori Carolo V. summò fuerunt in pretiò, & usu, ita ut ex eorundem lectione tum Imperij negotijs occupatus, tum maximè in suo supremo ad D. Justum secessu sacra solatia caperet: Is cum Patriæ turbas, & quotidiana hæresum incrementa cerneret, magnò mœrore affectus, à præsentibus ad æterna felicissimo obitu transijt anno 66.

In Gallia Calvino & Luthero occurrit strenuè præclarum Ecclesiæ, litterarum, & Ordinis Benedictini Sydus Gilbertus Genebrardus Aquensis Archi-episcopus, editò Chronico notissimus, à pluribus, præsertim à Possevino in *Apparatu sacro* celebratus; sepultus in Semurienli Monasterio Ejusdem Ordinis, ubi Priorem egerat. In monumento medio legitur hic versus:

*Urna capit cineres, nomen non Orbe
tenetur.*

D. quoque Franciscus de Sales ipsius honori hos versus scripsit:

*Abstulit una dies ævi decus, ictaque luctu,
Conticuit sacra tristis facundia lingua.*

Huic junge P. Gabrielem Gifford, sive, à S. Maria, ex Benedictino Monacho Archie-

piscopum Rhemensem, qui et ipse Calvinum validissimè impugnavit.

Auspicatissimum hoc etiam sæculo initium sumpsit Congregatio nostra Anglicana; ejus se Monachi quartò Missionis Votò pro Anglorum conversione obstringunt. De hac pulchrè Reynerus in *Apostolatu Bened.* quem consule, sicut & alios Chronicorum Hiberniæ, Scotiæ, Britanniæ, Bohemiæ &c. Scriptores, ubi innumeros fere Monachos Benedictinos reperies, qui hòc sæculò *pro lege DEI sui certarunt usque ad mortem*, perpetuò contra hæreticos triumphò.

N. XIII.

Sæculo Christi decimo septimo,

Benedicti decimò tertiò pugnatur con-

tra Calvinii, Lutheri &c.

reliquias.

VT porrò luculentiùs constet, quantum dictæ Congregationi nostræ Anglicanæ conversio Hæreticorum in Anglia, Scotia, Hybernia cordi sit, placet ob oculos ponere ipsam, quâ sese obstringunt, Professionis formulam; Hæc ita: Ego N. Monachus Professus promitto, spondeo, & voveo coram DEO, Beatissimâ semper Deiparâ Virgine, & Beato nostro Benedictò &c. me semper paratum fore, in Angliam Fidei Catholicæ propagationis causâ redire,

redire, atque ibi permanere, indèque reverti ad locum mihi destinatum, quando, & quoties mihi præceptum fuerit à Reverendissimo Patre Præsìde Missionis, & Congregationis Anglicanae.

Et verò præclaros, quos celeberrima hæc Congregatio tulit, fructus, Hærescósque Anglicanae generosissimos recensere Debellatores, laboris foret longè maximi: paucos adjiciam, eosque duntaxat, quos gloriola Martyrij exornavit corona. Inter eos autem enituère *Marcus Barckvvortus*, *Bernardus Treiur*, *Eugenius Ogallabure Abbas S. Mariæ de Sumaria*; quorum primus coronam Monasticam, eò ipsò die, quò occisus est, tonderi sibi fecit, habitumque Monasticum (quem apertè portare in Anglia prohibebatur) reassumpsit: Duo verò posteriores capite truncati.

B. Vilhelmus VValchæus in carcere tredecim annos detentus, & in exilio ex vulnere mortuus.

Georgius Gervasi, proprio sanguine purpuratus.

Joannes Robertus de Mervinia, *Thomas Helmius*, suspensi, eviscerati, & in 4. partes dissecti.

Guilielmus Scotus, post crebros carceres, occisus.

Nicolaus Taganus scelopetò ab hæreticis tactus, paulò post occubuit.

Egregia pro fide certamina *Ambrosij Barlo*, *Albani Røe*, *Philippi Poyeli Historia Salisburgensis lib. 5. c. 30.* ita describit: Anglia quoque

quoque Cœlo Benedictino his temporibus præclaros Martyres dedit; Inter complures tres eminuere, qui in ferali ligno gloriosum trophæum propugnatae Catholicae veritatis feliciter fixerunt. Fuit inprimis P. Antonius Barlo in Duaceno D. Gregorij Monasterio Congregationis Anglicanae Monachum professus: is patriam, quam sanctæ fidei amore reliquerat, eodem affectu generosè repetens, cum ultra viginti annos magno animarum lucro in propagando fidei negotio defudâset, præter Doctoralem, Martyrij quoque coronam accepit, pro defensione S. Rom. & Apostolicæ fidei Lancastriæ supremo supplicio affectus, anno Christi millesimo, sexcent. quadrages. primò, ætatis suæ 55. Statûs Monastici 25. Sacerdotalis vigesimo quartò.

Sequenti mox anno pridie Calend. Februarij in eodem agone feliciter certavit Venerab. P. Albanus Roë Congregationis Anglicanae Presbyter, & Monachus Anglus, in Monasterio S. Laurentij de Dei custodia, Diocesis Tullensis professus, circa annum suæ ætatis sexagesimum, ob fidei catholicæ professionem, & Sacerdotalem functionem Londini more Anglicano suspensus, evisceratus, & in quatuor partes sectus.

Addidit à sui sanguinis purpura splendoris auctarium generosus Christi Athleta Philippus Povelus, ex Vallia nobilibus parentibus oriundus, quem ab anno ætatis decimo sexto R. P. Augustini Backeri Ordinis nostri

noſtri Londini diſcipulum, poſtea in Duace-
no D. Gregorij Cœnobio Monachum, zelus
animarum orthodoxæ fidei afferendarum in
patriam reduxit, in qua ab anno vigefimo
ſecundo hujus ſæculi ad annum uſque quadra-
geſimum ſextum animabus lucrandis indefeſ-
ſam locavit operam. Flagrante demum hoc
anno inter Regem & Parlamentum bellô, dum
Catholicis in regio exercitu merentibus curâ &
ſolatiô aſſiſtit, à Parlamentarijs capitur, &
patibuli ſupplicio addiſtus, decimâ Julij glo-
rioſum Martyrij curſum abſolvit, cùm prius
plures concaptivos, quos inter unus Centu-
rio, & duo nobiles, ad veræ fidei & ſalutis
viam ſanctâ perſuaſione in carcere perduxiſſet.

Sed & Germania victrici in hæreticos ca-
lamô floret, rubetque recenti etiamnum Mar-
tyrum ſanguine. Duorum Principum *Sfon-*
drati San-Galleniſis, *Redingi* Einſidlenſis in-
comparabilem fidei Catholicæ zelum abundè
demonſtrant præclara contra peſtilentiſſimos
tractatus Heideggeri Tigurini Volumina. R.
P. Joachim Tabernicius, Cellæ Mariæ infra
Anaſum fluvium Monachus, & Parochus In-
zerſtorfenſis, ſæpius nova Acatholicorum Do-
gmata convellere auſus, ab ijs demum inter-
ceptus tredecim læthalibus ſauciatus ictibus,
glorioſo Martyriô occubuit; cujus Animam
plures Sectarij etiam, & duo viri Orthodoxæ
Religionis in ſpecie ſplendidiffimæ ſphæræ
Cœlum petere conſpexerunt.

Dedit èr Vicinia inſignem Martyrem in
floren-

florētissimo & Imperiali Monasterio Vinearum (Weingarten) imò dedit Monasterio (ajunt Mezgeri sæpiùs citati in *Hist. Salisburg. lib. 5. c. 30.*) Martyrem hæreticus furor Religiosissimum juvenem Venerab. F. Rupertum ex Illustrissima familia Comitum Khuen de Belasi, Liechtenberg &c. Jo. Jacobi Archiepiscopi Salisburgensis ex fratre nepotem. Hunc, dum cæteros Religiosos fuga servaret, febris vehementi detentum, Sueci irruentes anno trigesimo secundo deprehenderunt. Mox ligatum verberibus immaniter cædunt, suspensum aliquoties in sublime tollunt, donec nigresceret, seminecem rursus demittunt, novosque cruciatus admovent. Tandem unus truculentior asciam gravi ictu in caput infligit, è quo vulnere generosissima anima corpore soluta, Cœlum petijt. Fuit vitæ innocentissimæ, & Regularis disciplinæ observantissimus, suumque fatum non semel prædixerat; insuper nemine adhuc hostis adventum suspicante, fugiendum, & quâ viâ disertè præmonuerat.

Et hæ prodigæ sanguinis effusiones sunt illæ eruentæ lacrymæ, quibus Monachi Benedictini plangentis officio funguntur.



DISSERTATIO III.

De speciali Actione pro tuenda Sede Apostolica.

SUMMARIUM.

1. *Arctissima Apostolicam Sedem inter, & Benedictinum Ordinem Necessitudo.*
2. *Ermenoldi Abbatis Pruveningensis mira pro Sede Apostolica Constantia.*
3. *Novissimi Ejusdem Defensores.*

N. I.

Arctissima Apostolicam Sedem inter, & Ordinem Benedictinum Necessitudo.

QUàm arcta Apostolicam Sedem inter, & Benedictinam Propaginem necessitudo semper viguerit, rerum à Nostreis gestarum illustrissima passim exempla testantur. Veterum etenim si perlustremus Annales, multi occurrent Heroës, & invicti Spiritûs Abbates, qui decumanas exantlarunt calamitates in Apostolicæ Sedis obsequium. Dolenda sunt bella, & odia, quibus in Christi Vicarios toties permulti Cæsarum depugnaverunt: sed æquè de prædicanda pietas est, ac Fortitudo Nostrorum, qui sanctâ quadam, & simplici, ac simul

mul admirandâ Generositate se se opposcentes, Petri Thronum, & Hæredes supremis viribus tuebantur.

Tempore certè Gregorij VII. Papæ, & Henrici IV. Imperatoris Ichismatici, pluribus Archiepiscopis, Episcopis, Abbatibus ex Ordine D. Benedicti faciliùs accidit in exilium, quàm à Pontificiæ Sedis reverentiâ, cultûque abire. Omnes illi perpessi sunt ærumnas, ne degenerum in Ecclesiam Filiorum perpeti notam cogerentur. Unum ex innumeris duntaxat cape sis exemplum.

N. 11.

Ermenoldi Abbatis Pruveningen- sis mira pro Sede Aposto- lica Constantia.

Generosam animi, quam mira simplicitas geminavit, Constantiam exemplò planè stupendò ostendit contra ipsam adeò Cæsaris Majestatem Ermenoldus Abbas Pruveningensis, de quo Trithemius (cujus ipsa do verba) in *Chronic. Hirsaug.* sequentia refert.

Quadam vice (inquit) Henricus Rex V. qui fuit ejus nominis Imperator IV. Ratisbonæ existens cum S. Præsule Ottone animi recreandi causâ paululùm digressus, ibat novum videre, quod Episcopus construxerat, Pruveningense Monasterium, habens in comitatu suo Principes, ac nobiles quàm plurimos.

Nun-

Nuntius ad Virum Dei Ermenoldum præmittitur, adventus Cæsaris simul & Sancti Fundatoris nuntiatur. Quod Vir Dei audiens, & sciens, Imperatorem eo tempore pro suis demeritis à Romano Pontifice excommunicatum, nec pulsari campanas permisit, nec, ut moris erat, cum solenni processione Fratrum illi obviam processit, sed omnia Monasterij ostia & valvas obserari præcepit; ne Imperatori anathematizato ullus pateret ingressus; districtè prohibens, ne quis subditorum in occursum cujusquam procederet, nec verbum quantumcunque parvum alicui diceret. Ipse tamen extra Monasterium Cæsaris præstolabatur adventum, ne vel ex fastu, vel ex contemptu hæc agere putaretur. Venientem propius Cæsarem his verbis Vir sanctus alloquitur: *Libenter, inquit, & officio salutandi satisfacerem, debitumque honorem Cæsareæ Majestati exhiberem, si te communione Sedis Apostolicæ privatum nescirem.* Ad hæc Imperator commotus, non zelò Justitiæ, sed ex felle amaritudinis eum talia proferre existimans, & offensum propterea, quòd munera quondam ab ejus fratre accepisset, quorum indignatione Laurisensem resignaverat Abbatiam, respondit: *Nimis inconsultè & precipitanter honore vos tantò Domine Abba privastis; cujus suspicioni Vir Dei obviare cupiens, simplici animo dixit: Novit omnipotens Deus, qui nihil ignorat, non me hujus injuriæ (si tamen injuria dici queat) memorem & ultorem, sed hæc facio intuitu*

intuitu Justitiæ Dei solius, & pro reverentia Sedis Apostolicæ, cujus mandatis contradicere non licet. Ad hæc S. Otto Fundator loci adstans, quasi mediator inter dissidentes: neminem, ait, vitare tenemur, de ejus nobis excommunicatione non constat. Quò contra Vir Dei Spiritu Fortitudinis roboratus, nec Gratiæ deferens Fundatoris, nec terrori cedens Cæsaræ Majestatis, quin veritatem libere testaretur, sic respondit: Quomodo possum sententiam ignorare, quam ore meo memini promulgatam? Stupebant omnes Ermenoldi Constantiam: quam aliqui in bonam, plures verò, ut fieri solet, in malam partem interpretati sunt. Discedunt, qui venerant omnes, & nec unus quidem ex eis Monasterium ingredi potuit.

Et consimilia quidem quàm plurima Trithemius suggereret; sed nolim ultra chartæ angustias provehi, aut Antiquitatis scrutari rudera, quando ex hæcūm ætate discere id liquidissimò possumus, & producere ex Ordine nostro Literatissimos Viros, qui Veritatis, & Apostolici simul Throni patrocinium soli susceperunt.

N. III.

Novissimi Ejusdem Defensores.

Prodierunt nempe annò lapsi sæculi septuagesimò quintò in magnam Pontificiæ Auctoritatis

thoritatis imminutionem & præjudicium *quatuor illæ Gallicanæ Ecclesiæ Propositiones?* Quid ad illas Sorbona? Ingemuit linguæ suæ servitutem, non jam è Ss. Scripturarum & Canonum, sed edicti Regij præcepto loqui iussa, cum silere maluisset. Quid exulans è Gallia olim, & per Pontificem Romanum restituta, eique hinc obstrictissima *Jesu Societas?* Indoluit per suos Maimburgos, & Laschellos ad funestum ejusmodi bellum classicum cani. Quid reliqui per Orbem Christianum status, & Religiosæ Familiæ? Omnes ferè metu aut reverentiâ concussæ, obmutuère.

At non sic in Ordine Benedictino, ubi Veritas, & aura liberior, ab Aulæ assentatione procul,

In aciem itaque contra potentissimos hostes descendit Josephus Saënz de Aguirre Professor Salmanticensis emeritus, ac pluribus tomis tam theologicis, quàm philosophicis in lucem editis famosus; qui pro Apostolicæ Sedis Autoritate insigne volumen elaboravit, & sudoris impensæ præmium tulit ab Innocentio XI. Galerum purpureum.

Descendit in aciem Augustinus ille Redingius, Celsissimus S. R. I. Princeps & Abbas Einsidlensis in Helvetia, in cujus subtili cerebro Hipponensem Antistitem revixisse putâsses.

Descendit in aciem Coelestinus Sfondratius, ad S. Gallum adscititiô nomine Eugenius Lombardus dictus, postea ejusdem Monasterij

nasterij Celsissimus Princeps, demum S. R. E. Cardinalis.

Nobilissima Trias ista in Christiano Orbe sola fuit, quæ contra Christianissimum in materia prorsus difficili stringere calamum auderet, nec desisteret, donec hostis palinodiam caneret. Ut adeò S. Gertrudis nostræ Oraculum adimpleri hâc ætate videatur,

quod vaticinabatur: *Sedem Apostolicam à Benedictino Ordine ad finem usque Mundi defensum iri.*



PARS

P A R S V.

D E

*Antiquitate Ordinis Hierar-
chico-Benedictini,*

Et

Canonorum Regularium.

DISSSERTATIO I.

*De Antiquitate Ordinis Mo-
nastici in communi.*

S U M M A R I A.

1. Antiquitas Venerabilis quidem, sed dubia.
2. Posset Monastici Ordinis Origo ab Apostolis facile derivari.
3. Origo Ordinis Monastici reducitur non ultra tempora Pachomij, & Antonij.

N. I.

*Antiquitas venerabilis qui-
dem, sed dubia.*

Nemo, inter homines aliquando versatus,
aut historicæ rei peritiâ vel leviter tin-
ctus, inficias ibit, Antiquitatem in pre-
tium, & veneratione ubique gentium, & omni

semper ætate fuisse. Illa certè genuinum imprimis characterem Nobilitatis; quam, si nuper è cunis primùm evoluta sit, despiciunt omnes; ac è diverso, si venerandam plurimum sæculorum canitiem in fumosis Majorum Ceris prætesert, suspiciunt universi. Frequentiora tamen, & robustiora simul litigiorum femina, quàm ex dilaudatæ hactenus *Antiquitatis* occasione, aliunde non nascuntur.

Nam cum ejusdem obscurissima subinde vestigia supersint, & fastorum incerta læpè fides accedat, amplissima certandi, errandique simul libera quasi facultas relinquitur. Quapropter (ut ingeniosè observat Clariss. P. Ralslerus S. I. in *Diplom. Lind. Defens.*) pronius nil, quàm in rebus antiquissimis, & circa ipsam antiquitatem post quamlibet etiam diligentiam à vero aberrare.

Et, si aliquando hæsit aqua (inquit Plinius *Prefat. Hist. nat.*) cogitet Lector, quàm sit res ardua, vetustis novitatem dare, novis *Authoritatem*, obsoletis lucem, fastidijs gratiam, dubijs fidem.

Experti sunt idipsum duo ætatis hujus nobilissimi Scriptores, Papebrochius, & Mabillonius, quorum neuter erubuit, in tam amico, ingenioloque certamine, sæpiùs alteri palmam deferre, ut inter eruditos mutuis uterque suffragijs, & Victoris gloriosi nomen, & Historiographi undequaque versatissimi famam consequeretur.

Rei igitur antiquariæ, tot difficultatibus,

bus, nodisque implicatæ discussionem aggressus, Ducem sequor Mabillonium, cujus in punctis admodum intricatis audire sententiam, & amplecti deprædicatus toties Papebrochius ipse persæpè consuevit. Sit ergo

N. II.

Posset Monastici Ordinis

*Origo ab Apostolis facile
derivari.*

PLacuit, titulum hunc obliquè tantum insinuare, & non assertivè ponere, ut quæ semper modestiâ tueamur Nostra, magis liquefiat: Ad id ipsum tamen non propriâ aliquâ impulsu sumus ambitione, sed Adversarij jactantiâ; qui, ut se, Suosque extollat magis, nôsque deprimat, arrogat immerita sibi tempora, & ab ipsiis adeò Apostolis Canonicorum Regularium Ordinem deducere conatur; sed, quàm feliciter, infra videbimus.

In præsentî jam afferemus sanctorum Patrum luculentissima testimonia, ex quibus, si collubesceret, possemus perquàm efficaciter ostendere, *Monastici Ordinis Originem ab ipsis sanè Apostolis derivari.*

Primus pro parte nostra stat Cassianus, qui collat. 18. c. 5. ante plus, quàm 1200. annos asseruit, quòd vita Cœnobitarum acceperit suam originem à predicatione Apostolorum,

& quòd Communitates Monachorum sint eà-
les, qualis fuit hæc sancta multitudo fidelium,
quorum erat Cor unum, & anima una.

Pergit hic Auctor eodem loco, quòd
antiquissimum Monachorum genus perpetuò sine
interruptione continuatum fuerit usque ad
tempora Pauli & Antonij, qui fuerunt prin-
cipalia ornamenta hujus sancti Instituti.

S. Hieronymus de Script. Eccles. in fide ait:
Talis primò credentium fuit Ecclesia, quales
nunc Monachos esse censemus.

Subsiste hîc Paulisper, amice Lector! &
mirare: Hunc ipsum textum ausus est pro
Canonicis Regularibus citare Adversarius f. 234.
Sed benè; ipsos enim quâ Regulares esse simul
Monachos, suprâ demonstravit Mabillonius.

In eandem pro nobis sententiam loquun-
tur Episcopi congregati apud Theodonis —
villam Anno 844. (Conc. ad Theod. c. 3.)
quando statum nostrum honorârunt titulò
sacri Ordinis Monastici inspirati à Deo, & ab
ipsis Apostolis FUNDATI.

Et S. Bernardus idem sensit, cùm dixit:
Apol. ad Guil. quòd Ordo Monasticus fuerit Pri-
mus in Ecclesia, cujus Apostoli Institutores.

Et, si modica hæc, si adhuc dubia, si
nondum certa esse videantur, (verba sunt Ma-
billonij) dicemus cum Petro Damiani Op. 28.
quòd Apostoli duxerint genus vitæ, sicut no-
strum, & non sicut illud Canonicorum; No-
strò, non vestrò more vivebant.

Dicemus

Dicemus cum Patribus Concilij Germi-
niacensis Anno 843. Ordinem Monasticum
esse proximum perfectioni Apostolorum: *qui
perfectioni Apostolica melius congruit: & cum
Patribus Concilij Sigesteronensis Anno 859.
Apostolica perfectioni viciniùs adhaeret.*

Dicemus denique cum Bonifacio IV. &
Urbano II. in Decreto Concilij Nemausensis
Anno 1096. quòd Monachi Sacerdotes digniùs
cæteris Sacramenta administrent: *quoniam se-
cundùm Regulam Apostolorum vivunt, & eorum
sequentes vestigia, communem vitam ducunt.*

Universa hæc gravissimò & illustri pro
more suffragiò confirmat celeberrimus Societ.
JESU Theologus Suarezius To. 3. de Relig. l. 3.
qui asseverare de statu religioso in communi
sustinuit Eum quoad substantiam & essentiam à
Jure divino ducere Originem: *nam ab ipsomet
Christo, inquit, institutus est.*

Adstipulatur novissimè Jacobus Masenius
ejusdem Societatis Scriptor, in libro de utili
curiositat. Mirum esse, inquiens, quâ Acatho-
lici hoc Institutum (Religiosorum) novitatis
insimulare audeant, & Lutherus hanc, quam
Apostoli instituerunt, vitam dissuadere, atque
inauditâ licentiâ dissolvere.

Huc inclinant etiam Imaginis primi sæcu-
li Societatis Jesu Scriptores, qui nefas esse,
asserunt, alium dictæ Societatis agnoscere Au-
ctorem, quàm ipsum JESUM Christum.

Caramuel in Reg. S. Bened. dis 10. ait:
Ab ipsa Mundi infantia, imò ab ipsius exordio

fuisse Institutum monasticum, religiosamque militiam, licet non in ea perfectione, quâ nunc viget, manifestum esse. Nam si (pergit ille) ad primum omnium Parentem oculos vertamus, necessitate quadam naturæ solitarium in toto terrarum orbe reperimus: quam solitudinem à natura ipsa indictam, utpote sapientissimus, ad mores reduxit, & æquo animo ferens, virtutem fecit (ut in proverbii est) ex necessitate. Non est digna silentio Conjux ejus amantissima Eva, quæ sicut in peccato occasio, sic individua comes in pœnitentia. Hos igitur vitam pœnitentiam egisse, liquet. Hactenus Ille.

N. III.

*Origo Ordinis Monastici redu-
citur non ultra tempora Pachomij
& Antonij.*

AD initium igitur quarti sæculi, vel ad finem tertij in Ægypto fuere ejusmodi Ascetæ, qui ad imitationem Therapeutarum vivebant in campis, locisque separatis, quæ vocabant Monasteria.

Ex quorum numero erant S. Paulus primus Eremita, & S. Antonius. S. Hilarion imitatus est illorum exemplum in Palæstina.

S. Pachomius, postquam aliquamdiu fuit discipulus S. Palemonis Eremitæ, ædificavit Monasterium Tabenitarum in superiori Thebaide circa annum 315, & successivè alia, ex
qui-

quibus formavit unam Congregationem, cujus velut Generalem egit.

Theodorus ejus Discipulus in *Cod. Regul.* & S. Antonius, in *vita illius apud Bolland. n. 76.* eum recognoscunt pro Authore vitæ Cœnobiticæ. S. Hieronymus ejusdem opinionis fuit, in *suo Prologo ad Regul. S. Pachomij.*

Ecce! concludit Mabillonius (cujus omnia ferè verba huc transtuli) Ecce! inquit, quæ sit verè Origo Ordinis Monastici, ut altiora petere nolumus.

Alia, credo, mens foret Adversario, si pugnantium pro Canonicis Regularibus Ss. Patrum, Doctorumque tam spectabilem cumulum haberet; quantum sibi blandiretur! quâ verborum pompâ uteretur! quibus Religionem suam præconijs eveheret!

DISSERTATIO II.

De Origine Ordinis Hierarchico-Benedictini.

SUMMARIA.

1. Ordinis Hierarchico-Benedictini Origo posset ad ipsa etiam Apostolorum tempora reduci.
2. A D. BENEDICTO non fundata tantum Religio, sed et ipsa Regula promulgata est.
3. Regula Divi BENEDICTI antiquissima.

N. I.

Ordinis Hierarchico-Benedi-

*ctini Origo posset ad ipsa etiam Apo-
stolorum tempora reduci.*

Postquam priori dissertatione attulimus tot Patrum, ac Doctorum insignes sententias, quibus Monasticæ vitæ Propago ad ipsa Apostolorum tempora manifestè refunditur, levi nunc brachiò possemus eandem Antiquitatis prærogativam Religioni Hierarchico-Benedictinæ arrogare.

Nam, tempore S. Benedicti, docet Mabillonius, antiquos Monachos non nisi unum Corpus constituisse; Divisionem autem factam in diversos Ordines, accidisse primùm diu post S. Benedictum. Hinc si Religionem Benedictinam ut reliquis antiquis Monasticis in eodem sacro Corpore coherentem inspiciamus, perspicuè deprehendimus, illam ex eodem stemmate, & ab ipsis pariter Apostolis descendere.

Eâdem præterea facilitate persuaderi à nobis posset, non FUNDATORIS, sed REFORMATORIS munere potius defunctum fuisse BENEDICTUM; cùm Eminentissimus Cardinalis Baronius in Martyrologio Romano pronuntiare idipsum videatur, quando graviter affirmat: quòd collapsam in Occidente Monasticam Disciplinam restituerit.

Verùm procul absit à pijsimis in Proto-
paren-

parentem Filijs tanta impietas, & ingrati-
tudinis summæ dedecus. Illustrior nobis est Cha-
rissimi Patriarchæ Memoria, quàm ut alienò
eam nomine obscuremus; & charior Filijs suis
BENEDICTUS, quàm ut aliam degeneres
Parentem substituant.

N. II.

A Divo BENEDICTO non

*Fundata tantùm Religio, sed & ipsa
Regula promulgata est.*

VNanimes igitur profitemur, asserimus,
& propugnamus, Religionis Benedicti-
onæ non alium esse Conditorem, Au-
thorem, & FUNDATOREM, quàm Divum
BENEDICTUM; in hoc solo & unico (ut lo-
quamur cum Apostolo) gaudium nostrum est,
& Corona nostra.

Natalem proinde Religioni nostræ ea
dedere tempora, quibus sanctissimus iste Le-
gislator suam conscripsit Regulam, suisque
Discipulis observandam proposuit: quod fa-
ctum esse, ex ejus Vitâ constat, circa Annum
Christi DXXI. postquam, constructis apud
Sublacum Monasterijs duodecim, Cassinum
petijt, ut inde per universam Europam suum
diffunderet Ordinem; quasi funestissimâ illâ æta-
te comparatum fuisset hoc vivendi Institutum,
tutissimum adversus humanas misérias refu-
gium.

Et verò S. BENEDICTI Regulam ipsò adhuc vivente in Italia maximè promulgatam, ac disseminatam fuisse; nemo ante Gallonium Cæsaris Baronij Patronum dubitavit. Nimirum Gallonius, ut sibi commissam Baronij causam de Gregorij Magni Professione Æquiana propugnaret, BENEDICTI Regulam, quoad vixit, latuisse, & à Simplicio duntaxat, tertio ejus Successore, divulgatam fuisse, commentus est infeliciter.

Certè non pauca Monasteria à S. Benedicto excitata, ac suismet sinè dubio instructa legibus fuisse, nemo inficias ire potest: siquidem præter duodecim, quæ in solitudine sublaensi condidisse legitur, Coenobium Terracinen-
se, teste Greg. in lib. 2. Dial. c. 22. construendum curavit. Quid? quod ipse brevè moriturus Mauro Discipulo suo, in Galliam proficiscen-
ti, Regulam propriâ manu exaratam concessit? An fortasse invidendo subtraxit popularibus, id quod cum exteris benignè communicavit?

N. III.

Regula Divi BENEDICTI *Antiquissima.*

Antiquitas Religionis, quæ super cæteras præcellentia titulum parit, susceptæ in ea Regula Antiquitati commensuratur: Regule porro Antiquitas, ut præcedentiæ compareret effectum Alumnis suis, & jure præ-
lationis

lationis ac præminentia gaudeat, non ab Institutionis per Fundatorem, sed Approbationis per Apostolicam Sedem factæ tempore, ac anno dimetienda est; Illa ergo Religio, & Regula pariter illa Antiquitatis, prælationis, ac præminentia tenet primatum, quæ prior à Christi in terris Vicariò approbata est. Quemadmodum in pluribus Capitulis expressissimi textus docent, ac innuunt: ut in *Clement. 1. de Religios. Domibus*; in *cap. Cum ex eo, de sent. excom.*; & in *Can. Consuluit, qui Clerici vel volentes*; & in *Can. Perniciosam*. Antequam enim confirmentur hujusmodi Regulae, non sunt in consideratione quoad effectum Juris, sed sunt in rerum natura tantum de facto, ait Gemm. in *Cap. Quorundam, de Elect. in 6.* Abbas in *Cap. Nimis 2. de excess. Prælat.* Petrus de Monte in *sua Monarchiâ q. 5. & alij.*

Si nunc tempus inspiciamus, quò S. BENEDICTI Regula à summo Pontifice approbata fuit, intelligemus, certissimum ac indubitatum esse, quòd specialiter, expressè ac nominatim approbata, confirmataque fuerit: Primò quidem à S. Gregorio Papa in *Vita S. Benedicti ab eodem conscripta*. Secundò, per Alexandrum II. in *Can. juxta Chalcedon*. Tertiò per Bonifacium Papam IV. in *Can. Sunt nonnulli*. Quartò per Concilia Aurelianum *Cap. 3.* Triburiense *Cap. 13.* Toletanum *Cap. 5.*

De prioritate autem Approbationis hujus

ius ejusdem Regulæ ante approbationem Regulæ S. Augustini tractant ex Professo Joannes Ant. de Pappia in *suis recollect. fol. 57. Lancellotus. Decius per integrum Consilium fol. 97. Rolandus de Curte in suo Consilio fol. 120. Jo. Bapt. de S. Blas. in suo Consilio fol. 338.*

Cùm igitur ambiguum prorsus, & incertum omninò sit, quò tempore D. Augustini Regulam summus Pontifex approbaverit; & stante hòc dubiò juxta mentem prædictorum Doctorum approbatio Regulæ S. Benedicti sit antiquior approbatione Regulæ S. Augustini; ac insuper quotiescunque in Jure de Monachis, & Regulâ S. Benedicti fit mentio, toties Monachi cum Regula sua Canonicis Regularibus, eorùmque Regulæ præponantur; hinc indubitata, & rationabilis præsumptio erit pro Regula D. Benedicti, eandem in approbatione priorem esse, & antiquiorem approbatione Regulæ S. Augustini.

Neque huic assertioni obest, quòd præcedant Adversarij, à Gelasio Regulam S. Augustini approbatam fuisse in *Can. Sancta Romana Ecclesia 15. dist.*

Respondetur enim, quòd ibi generaliter tantùm approbentur Opera D. Augustini, quæ non sunt contra fidem, nec contra bonos mores, sinè omni expressa mentione ipsius Regulæ.

Unde, quia Regula cujuscunque Instituti speciatim, nominatimque per Pontificem approbari, & confirmari debet, nullò defendi modò

modò poterit, quòd vi hujus Canonis Gela-
fiani, generaliter loquentis, approbata sit
Regula D. Augustini; aliàs Regula Divi Hie-
ronymi, cujus Opera in eodem Canone Gela-
si pariter sunt generaliter approbata, posset
pariter dici confirmata; de quo tamen in Ju-
re nec apicem reperies.

Verùm, expeditis his, Adversarius se
jam opponit, asseritque *fol. 4.* ante Conci-
lium Lateranense censentur omnes Regulæ ipso
Jure approbatæ *per Cap. fin. de Rel. Dom. Glos-
sa in Cap. unic. §. penult. eod. tit. l. 6.* Item
text. in Can. parsimoniam.

Respondeo, Dictum *c. fin.* (quod de-
sumptum est ex Concilio Generali Lateran.
Anno 1216. celebratò) solùm præcipere, ut
ij, qui ad aliquam Religionem velint Con-
verti, unam de Approbatis assumant, non
autem dicit, omnes Regulas ante illud Con-
cilium esse approbatas ipsò Jure, vel appro-
batas censeri debere.

Imò Concilium Lateranense, per quod
Regula S. Augustini approbata dicitur, longo
tempore post approbationem nostræ Regulæ
per Gregorium Magnum factam, celebratum
fuit. *Cap. autem unic. eod. tit. in 6.* solu-
modò confirmat supradictum *Cap.*

Tandem Can. *Parsimoniam* desumptus
ex Conciliò Gangrensi anno 328. ante tempora
S. Augustini habitò, præcisè temperantiam ci-
borum & Vestium laudat, ac dissolutionem
Clericorum vituperat.

Post hæc non video, quid Religionis, ac Regulæ nostræ sacram *Antiquitatem*, & prælationis, ac præminentiaæ Jus vocare in dubium queat.

DISSSERTATIO III.

An Canonici Regulares suam Originem trahant ab Apostolis?

SUMMARIA.

1. *Adversarius Originem Canonorum Regularium ad Apostolorum usque tempora extendit.*
2. *Expenduntur Decreta Pontificum.*
3. *Expenduntur Suffragia Doctorum.*
4. *Expenditur pondus Rationum.*
5. *Expenditur Ratio palmaris, cui fundamenta Adversarij, hætenus assignata, innituntur.*

N. I.

Adversarius Originem Canonorum Regularium ad Apostolorum, usque tempora extendit.

Quidam è Doctissimis Canonicis Regularibus nostri temporis, apud Mabill. in 1. Responsò, rectè dixit: quòd Ordo Canonorum Regularium similis sit certis fluminibus, quorum cursus in tantam se longitudi-

tudinem extendit, ut *Origo* illorum necdum potuerit inveniri.

Scitur, quando Benedictini, Carthusiani, Cistercienses, & alij Religiosi inciperint; ac quantum ad Canonicos Regulares, nemo hominum adhuc indagare potuit verum principium, nec cognoscere verum Authorem.

Plerique tamen eorum sua incunabula extendunt ad *Apostolorum* usque tempora, & eâ quidem fiducia, ut Adversarius audacter asserat: *Eos, sive ignorantia, sive livore ductos fuisse, qui primævam hanc lucem sancto Ordini eripere, ac novitiam affingere allaborarunt.*

Hanc Ordinis sui Apostolicam Vetustatem roborat deinde Decretis summorum Pontificum, Authoritate Doctorum, & pondere denique rationum. Quàm efficaciter autem Videamus.

N. 11.

Expenduntur Decreta Pontificum.

ADversarius pro stabilienda suâ opinione, adducit Bullas Summorum Pontificum ferè duodecim, Urbani I. Paschalis II. Calixti II. Honorij II. Benedicti XII. Martini V. Eugenij IV. Nicolai V. Sixti IV. Pij IV. & Pij V. ac denique Pauli III.

Quorum, præsertim Pij IV. & V. Decreta existimat ita esse irrefragabilia, ut, si

non convincant, planè nullam videat viam superstitem, quâ per illorum summam Authoritatem aliquid probetur. Pro quo tamen

Adverte I. In Bullis Pontificum aliqua contineri, quæ se habent *narrativè*, alia quæ *assertivè*.

Adverte II. In aliquibus *Juris*, in aliquibus *facti* quæstionem involvi.

Adverte III. Vetustatem Ordinum pertinere ad quæstionem *facti*, non *Juris*.

Adverte IV. Ea, quæ in Bullis continentur purè *narrativè*, & non *decisivè*, non probare; ut Adversarius ipse fatetur, & apud omnes in confesso est.

Jam verò, cum prædictæ Bullæ nil *assertivè*, aut *decisivè* contineant in ordine ad *Antiquitatem* Canonorum Regularium, sed *narrativè* duntaxat procedant, hinc perspicuum est, eas prorsus non probare; præsertim circa quæstionem *facti*, in quo fundatur Vetustas Ordinum, à summa Sede nunquam hætenus definita. Cumque dependeat hæc ipsa Vetustas ex re Historica, ac relatione eorum, qui à summis Pontificibus gratias postulant; *hujusmodi sic relatis* (ait Eruditissimus Papebrochius in 1. p. Responsionis &c.) nec minimum quidem punctum majoris, quàm antea habuerint, probabilitatis inde accedit.

Cui suæ opinioni illustrandæ, quærit (Papebrochius) ex Adversario suo, an quotiescunque favorem aliquem, seu privilegium à Pontifice quis petit, titulò singularis Nobilitatis,

eatis, aliorumve, quæ adferri solent multa, & speciosa; quarit, inquam, an si Pontifex in Diplomate indulti respondeat, Caium EG. exponi sibi fecisse, quod sit ex illustrissimâ natus prosapiâ &c. propterea tanta Caji nobilitas Pontificiâ Oraculâ confirmata sit? aut etiam plus, quàm antea habuerit, accipiat probabilitatis? Profectò, qui Regijs Nobilitatis Censoribus aliud Nobilitatis suæ testimonium non proferret, an non is sibilis hominum exciperetur? Hactenus ille.

Nec obstat clausula *ex certa scientia & motu proprio*, quæ procedit in ijs, quæ in *jure* consistunt, non autem de his, quæ consistunt in *facto*, & præsertim in *antiquo*: quia tunc talis clausula non operatur. Bald. apud Tamburin. *to. 1. disp. 25. q. 1. n. 288. & 289.*

Imò juxta Papebrochium *lo. cit.* Pontifici etiam frequenti considerationis indagine aliquid perlustranti & intra Claustra pectoris sollicitâ meditatione discutienti (his nempe Verbis utitur Bonifacius VIII.) obrepere potest in ijs, quæ purè *historica* sunt, cujus falsitas non obsistit principali intento.

Nec inde Authoritati Pontificum quidpiam derogatur: quando versantur in materia (nempe *Historica*) in qua se homines esse, & humani nihil à se alienum putare profitentur. Uti eorum Verbis demonstravit Idem *ibid.* Quis autem, concludit denique, à Romanis Pontificibus, in quancunque momenti negotio, majorem exigat, distinctiorémque rerum præteritarum

tarum scientiam, quàm cujusque ferebant tempora?

Inter hæc fatetur etiam ipse Adversarius in Responsione ad argumentum Francisci à S. Augustino, n. 425. plures Pontifices fuisse, qui S. Augustinum *Fundatorem sui Ordinis* vocaverint.

Hos igitur Pontifices oppono alijs prædictis Pontificibus.

Dicit: Ob notabilem reformationem S. Augustinum dicendam esse quidem *Fundatorem*, sed minùs rigorosè, & *quasi-Fundatorem*.

Dixerim ego pariter, in citatis quoque Pontificum Decretis Apostolos *Fundatores* quidem dictos fuisse, at in sensu minùs rigoroso, ac *Quasi-Fundatores*, ob communem eorum vitam, quæ serviebat pro Idea, & exemplo tam Ordini Canoniorum, quàm Monastico.

In rem denique nostram, Decretis Pontificum opponere nos possemus suffragia Patrum superiùs allegata, quorum in consimili materie Authoritatem non Eruditi tantùm, sed ipsi etiam Pontifices venerandam semper habuerunt. Illi ergo longè apertiùs loquuntur (ut suprà vidimus) stantque pro Origine Monachorum ab *Apostolis* derivatâ, quàm isti Pontifices, quorum aliqui nullam, alij admodùm obscuram faciunt mentionem hujus existimatæ antiquitatis Canoniorum Regularium; plures verò eorum *Fundatorem* nominant S. Augustinum, quem ipsi tamen pro *Reformatore* solummodò agnoscunt.

N. III.

N. III.

*Perpenduntur suffragia
Doctorem.*

ADversarius post summos Pontifices ait: *in suam sententiam concedere celeberrimos Historicos, Theologos, Ascetas, & Authores omnes, unô vel alterô exceptô, quos vel livor, vel ignorantia in contrarium detorsit.*

Ecquidam illi omnes? Tres citat duntaxat, aut quatuor, qui diversæ à Canonicorum Regularium sint Religionis. Quibus nos pauculis integrum possemus opponere exercitum; in quô Triariorum quasi vices subeunt celeberrimæ Universitates, Patavina, Ferrariensis, & Bononiensis, unanimi pro Benedictinis suffragiô contendentes, ut juxta ipsos etiam Adversarios apud Tamburin. loc. cit. n. 292. & numerô, & gravitate communem constituent opinionem.

Ex quo deduco, Adversarium in Doctorum suorum Authoritate blandiri sibi nec nullatenus posse.

Quin reor insuper, Doctorum illius ætatis judicium gravioris haud esse momenti in materia purè historica, qualis est antiquitas, indigens longô & accuratô examine, quod ante Baronij tempora non admodum frequenter adhibebatur; Hinc idem Baronius non illicò in cujusvis Referentis etiam Sancti concessit

sit sententiam, ut patet ex illa Historia, quæ refertur à Paulo Abbate, quòd S. Leo Papa primus, cùm propriam manum obtruncâisset, ut libidinis ignem restingueret, per Virginem à S. Luca depictam, eam recuperarit. Id certè (ipsomet Paulo fatente) Baronio durum videtur, nec valet credere, licèt à S. Antonino, aliisque relatum.

Ecce ! quantam apud Baronium fidem inveniant Authores etiam Sancti in re historica, quam non ex industria pertractant? S. Antoninus autem unus è præcipuis habetur, qui pro parte stat adversâ. Idem die de Vincentio Bellvac., Gersone &c.

Horum (ni fallor) Authorum tempore summâ adhuc laborabat caligine res historica, ut oculatissimo etiam cuique à Veritatis scopo aberrare pronissimum fuerit.

Felicior est nostra hæc Ætas, quæ per suos Baronios, Spondanos, Jepesios, Bollandos, Papebrochios, Mabillonios in re Historicâ summam adepta est lucem. Nec tamen Authores illos ullius propterea ignorantiaè arguas; cùm neque ab his (ut suprâ dictum de Romanis Pontificibus) major exigenda, distinctiôrque rerum præteritarum scientia, quàm cujusque ferebant

tempora.



N. IV.

Expenditur pondus Rationis.

Hanc Adversarius istò complectitur syllogismò: cui adequatè convenit definitio, illi etiam convenit esse definiti, ut patet ex Philosophiæ summulis; & quia definitio ex naturâ sua est constitutiva rei, idcirco etiam est distinctiva ab omni alio; atqui Apostolis convenit adequatè definitio Canonici Regularis, ergo Apostoli fuerunt Canonici Regulares &c.

Ad minorem probandam in memoriam revocat definitionem Canonici Regularis, eamque prolixè & particulatim adaptat Ss. Apostolis; ac denique Universaliter ita concludit: ergo ex Authoritate summorum Pontificum, Doctorum, Historicorum (è quibus tamen nullum ferè, ut dixi, imparbialem observo) & ratione penitus est irrefragabile, quòd Ordo Canoniorum Regularium sit realiter Institutus, & observatus à Ss. Apostolis, eorùmque Discipulis.

Pondus Rationis hujus (si quod subsit) triplici ego eliserim responsò: Primò, Remittendo syllogismum in eum, è quo prodijt, sinum; cui adæquatè convenit definitio, illi etiam convenit esse definiti, atqui Apostolis adæquatè convenit definitio Monachi, ergo Apostoli fuerunt Monachi. Minor constat ex descriptione Monachi in omnibus Ascetis obviâ; (non autem illâ,

quam suo è cerebro fabricavit Adversarius: de quâ alibi.)

Secundò, Retorquendo argumentum in S. Paulo primo Eremita: Huic convenit definitio Eremitæ, & fuit primus Eremita, ergo *instituit* Ordinem Eremitarum? Negatur consequentia; cum Discipulos habuerit nullos, aut reliquerit, *quos instituerit ipse*; ait sæpè citatus Papebrochius.

Tertiò denique: Transmittendo totum syllogismum, negando illatum: Aliud enim est, *Ideam* constituere vitæ Canoniorum Regularium, aliud *instituire* Ordinem eorundem.

Feecerint prius Apostoli, non tamen fecere posterius. Sicut ergo ex eo, quòd Apostoli dicantur, observâsse perfectionem monasticam, adeoque fuisse Monachi, non continuo inferitur, ergo *instituerunt*, ergo *fundarunt* Ordinem Monasticum; ita nec ex eo, quòd dicantur Apostoli observâsse perfectionem Ordinis Canonici, aut fuisse Canonici, inferri continuo poterit, eos *instituisse*, & *fundâsse* Ordinem Canoniorum Regularium.

Etiam Prodromus Christi Joannes Baptista verus extitit Christianus, & Religionis Christianæ observator exactissimus, cum tamen Christianismi *Authorem*, aut *Fundatorem* prudens quis edixerit?

Aliud est *observâsse* perfectionem alicujus Ordinis, aliud *fundâsse* ipsum Ordinem secundum illam perfectionem, ut patet in S. Paulo

Paulo primo Eremita suprà citato, in quo Posterius non Fundatorem, sed Exemplar duntaxat habuere, licet Eremitarum vocetur Auctor & Magister; nec enim Institutio nimis crudè accipienda, sed rigorosiùs ad modum aliorum Ordinum, puta Predicatorum, Minorum, ut cum Papebrochio iterum loquar, locò suprà citatò.

N. V.

*Expenditur Ratio palmaris,
cui fundamenta Adversarij, hætenus
assignata, innituntur.*

DIvvs Lucas Act. c. 4. ait: quòd Jerosolymis fuerit multitudo fideium, & eorum cor unum, & anima una, nec quisquam eorum, quæ possidebat, dicebat aliquid esse suum, sed erant ipsis omnia communia.

Ex isto textu evincere omni conatu laborat Adversarius, quòd, sicut secundùm Camuelem nostrum, ejusque sequaces, laici primitivæ Ecclesiæ Apostolorum exemplò tria Regularium Vota ediderint, sic incredibile esse, eadem Vota non fuisse edita saltem à multis, si non ab omnibus primitivæ Ecclesiæ Clericis. Quis enim credat (inquit fol. 228.) Clericalem Religionem sub tribus Votis à Christo, vel Apostolis institutam, statim cum ipsis Apostolis adeò intercidisse, ut ad solos laicos devoluta, neminem è Clericis habuerit sequacem?

Hæc

Hæc nimirum, pergit ille, palmaria illa est ratio, quæ summos Pontifices, Ss. Patres, Theologos, Historicos, aliósque Authores pene omnes aded in nostram coëgit sententiam, ut vix unum alterumve Lexicographum reliquerit superstitem, quem Caramuel suæ sectæ advocaret Patronum.

Hem! Palmariam, diu jam inquisitam Adversarij contra nos rationem, textum nempe sacrae Scripturae citatum!

Ad quem tamen eviscerandum, Notare juvat; Ex eo nec Caramuelem, nec ullum illius sequacem attentasse unquam evincere, Statum Monachalem ita fuisse Apostolis coævum, & in laicis primitivæ Ecclesiæ conservatum, ut in Apostolis sui Instituti veros agnoscant *Fundatores, & Institutores*, sed Exemplum duntaxat, & Ideam, cum alium quilibet Ordo Monasticus agnoscat sui Instituti *Fundatorem*.

Quod si ergo Canonici Regulares ex hoc contextu non eruere velint aliud, quam *exemplar & Ideam* celebris sui Instituti, hanc illis gloriam tantisper indulgebimus.

Interea prius ostendatur, necesse est, Clericalem Religionem sub tribus Votis ab Apostolis verè fuisse institutam, quam credamus, eandem sub hac ratione fuisse conservatam. Etsi verò Adversarius existimet, cuivis id etiam mediocri ingenio evidens esse; ea tamen mihi evidentia, aliisque non obscuri ingenij Viris necdum apparet, etsi omni mentis intentione in eam investigemus.

Funda-

Fundatores ergo Ordinum , eorūque Antiquitatem , & continuam seriem apertis oportet Demonstrationibus exhiberi, non conjecturis duntaxat, aut pijs credulitatibus; ubi præsertim agitur de Antiquitate, quæ Parti adversæ ingens dānum accersit & præjudicium.

Nec mirari satis unquam possum, ausum fuisse Adversarium asserere, per palmariam istam rationem Authores pene omnes in suam cogi sententiam, cū tamen abundè constet, contrariam opinionem esse communem, & pro eā stare integras Universitates. Adverterint nimirum Doctores nostri, Institutum Canoniorum Regularium habere similitudinem quidem cum Communitate Apostolorum, non tamen omnimodam; quia ab Apostolis, indiscriminatim recipiebantur omnis generis personæ, mulieres, liberi, uxorati, nec non diversis operibus vitæ civilis, negotijs, armis, & magistratibus occupati; vivebant itidem in communi, sed in privatis habitantes domibus, nec erat mensæ, vel habitationis, sed bonorum tantū opūque Communitas.

Comparet jam, quisquis Veritatis amans est, Apostolicæ vitæ per hunc textum insinuatæ Institutum cum Canoniorum Regularium Instituto, & speciem utriusque omnino differentem manu palpabit; vita quippe Apostolorum bonorum tantū communitatem habebat, ac consortium omnium etiam laicorum &c. admittebat, vita autem Canoniorum Regularium etiam in Communitate ha-
bita-

bitationis, & mensa consistit, nec admittit consortium Laicorum, &c. ergo ex hujus textûs deductâ palmariâ, ut vocat Adversarius, Ratione nil penitus evincitur, quin in ipsam adeò Adversarium validè retorquetur.

Hinc Petrus Venerabilis, qui vixit 1130. lib. 1. epist. 33. & 34. Canonicos Regulares meritò vocat *Filios novos*. Et Arnulphus Episcopus Lemovicensis, factus postea Canonicus Regularis epist. ad Alexandrum III. queritur: *Pauca esse hujus Instituti Monasteria, vocâque novellam plantationem.*

DISSERTATIO IV.

An Canonici Regulares suam Originem trahant à S. Augustino?

SUMMARIA.

1. *Adversarij Opinio.*
2. *S. Augustinus non est Reformatore Canonico-
rum Regularium.*
3. *S. Augustini Institutum, si dabatur, non fuit
continuatum.*
4. *Canonici Regulares Lateranenses à S. Augu-
stino non descendunt.*
5. *Canonici Regulares sunt Benedictinis in Ger-
mania Juniores.*
6. *Præter Canonicos Seculares, & Regulares,
datur etiam tertium genus.*

7. An à Canonici Regularibus descendant per relaxationem Canonici Saculares, & Hos Illi precedant?

N. I.

Adversarij Opinio.

INsignis Franciscanæ familiæ Alumnus, Franciscus à S. Augustino piè desudavit in extollenda Canoniorum Regularium Religione; Cujus Institutionem etiam adscripsit S. Augustino, ex impensissimo (ut ipse fateatur) in Magnum hunc Ecclesiæ Doctorem amore: Sed Vir Zelosissimus exiguum laboris, pietatisque suæ mercedem retulit; istiusmodi quippe amorem improbat Adversarius noster, & Augustino Reformatoris, non Fundatoris titulum impertitur.

Et verò si faceret id quidem studiò veritatis aliquatenus saltem colendæ, laudarem ex hoc capite; quia, sicut deinde ostendam, verissimum est, à S. Augustino Canoniorum Regularium Ordinem non *fundatum* fuisse: Sed quoniam facit id desiderio suum Ordinem ad Apostolica usque tempora extendendi, duplicem committit errorem; primum in eo, quia tantam Augustino Gloriam ex solo *antiquitatis* indebitæ ambitu detrahit; secundum per hoc admittit, quia dum nimium affectat, quasi totum amittit. Prospicere haud dubiè poterat, se, quò longius recessisset, eò diffici-

difficilius ab actis retrò sæculis ad sua iterum tempora rediturum esse, & tolerabilius cæteris Religionibus, ac universo demum Orbi literato credibilius fore, si in Religionis *Fundatorem* statueret Augustinum, cujus nomen & speciem aliquam viciniorem præferunt Canonici Regulares, quàm si Apostolos sibi totos vindicaret, quos tamen in Christianæ perfectionis ideam cunctis fidelibus Christus proposuit.

At, post exactissimam ab hac in omnibus veterum monumentis versatissimâ ætate adhibitam indaginem, deprehenditur, neutrum Canonicis Regularibus, & Augustinum nec ut *Fundatorem*, nec ut *Reformatorem* attribui cum fundamento posse. Quod utrumque sequentibus numeris dilucidabimus.

N. II.

S. Augustinus non est Reformator Canonorum Regularium.

Reformatoris nomen & officium tria maxime importat: Primò supponit, jam præcessisse, & actu præexistere Institutum talis Religionis. Secundò *Reformatoris* officiò tunc quis fungitur, cum præsuppositum jam Institutum novis legibus firmat, emendat, instruit, & auget. Tertiò, factæ *Reformationis* leges debent acceptari, observari, & continuari.

Jam

Jam singula puncta discutiamus. Debit Augustinus præsupponere Institutum Canonico-
rum Regularium jam aliunde factum ; De-
bit illud ipsum novis legibus emendare , in-
struere , & augere ; Debit ultimò hujus In-
stituti à se *reformati* habere , & relinquere se-
quaces discipulos , atque ab hisipfis illud ac-
ceptari , observari , & in hæc usque tempora
continuari.

At nihil horum cum veritate, sed ipsum
potius è diametro contrarium asseri debere,
nos sic ostendimus.

Si Canoniorum Regularium Institutum jam ante tempora Augustini, & aliunde fundatum fuisset, fundâssent illud Apostoli (hos enim pro *Fundatoribus* assignant Adversarij) sed in Apostolos hujus Instituti foundationem perperam refundi, in priori Dissertatione ostensum à nobis fuit: Institutum ergo Canoniorum Regularium ante tempora Augustini fundatum non fuit, atque nullo sic immodò ad eadem præsupponi, & ab ipso deinde Augustino *reformari* potuit.

Secundò , si *Reformatoris* officiò functus
esset *Augustinus*, tunc vel novis legibus firmâ-
set præexistens Institutum, vel idem ad anti-
quas leges revocâset: ubi autem, vel quando
hoc præstitit *Augustinus*?

Respondet Adversarius; quando illam,
quæ passim circumfertur, Regulam conscripsit.

Sed , percontor ex Adversario , in quâ
U formâ

formâ conscripsit? quibus? & quô intentô?

In forma epistolari (ut demonstrat Mabillonius, & alij) ad sanctimoniales, & sororem suam, earundem Superiorissam; pro Religiosæ vitæ viâ certius, facilius, & tutius in-eundâ.

Si tradere Regulam, & Viris quidem, ac ex scopo Instituti, & ut Reformator voluisset, aliâ sapientissimus Præsul formâ usus, suam-que circa hæc mentem etiam expressurus, ac solennioribus medijs tanti momenti negotium (quanti erat facienda Apostolici Instituti Reformatio) haud dubiè aggressurus fuisset, nec inscripsisset Regulam *feminis*, per quam viros *reformari* cupiebat.

Deinde, si Regulam dedisset Augustinus, hujus utique aliqua saltem vestigia, & mentio ad minimum perfunctoria reperiretur in Concilijs circa illa tempora celebratis, aut in Actis sanctorum, qui eâdem ætate illa floruerant: sed nec litera exhiberi poterit, quæ vel obiter de Regula Augustini quid innuat: Imò nec in vita S. Fulgentij (quæ inter præcipua Antiquitatis monumenta computatur) nec à Victore de Vite (cujus etiam illustris in hac materia Authoritas est) quidquam memoratur.

Illud autem me vix non omnino convin-
cit, ut credam, falli Adversarios; quòd ad instantiam Caroli Magni, & Ludovici Pij Concilium Aquisgranense peculiarem ex sacris
Cano-

Canonibus , Patrúmque sententijs Regulam compilârit , eámque Canonicis Regularibus observandam proposuerit : Hâc enim Imperatorum instantiâ , hóc Concilij labore , & hâc Regulâ recenter compilatâ minimè opus erat , si alia jam ab ipso Augustino composita extitisset pro ipsis Canonicis Regularibus.

Vel denique ipsum Concilium Aquilgranense hujus jam præexistentis Regulæ Augustinianæ (si quæ fuisset) aliquam saltem mentionem injecisset , vel ex eâdem in suæ Regulæ corpus transtulisset aliquid.

Ad Tercium deveniendo , si Regula S. Augustini fuisset *acceptata* , *observata* , & *continuata* , tunc debuisset utique supponi ut præexistens in rerum natura , atque extra causas constituta ; sed hoc falsò adstrui , proximè ostendimus , ergo non fuit *acceptata* &c.

Sed omisso hóc , depromamus palpabilius argumentum ex ipsius ratione ac significatione *acceptationis* , *observationis* , & *continuationis*.

Omnia hæc tria (quis negare potest ?) denotant actionem , & per actionem ipsam respectum essentialem ad determinatum Ordinem , seu Communitatem hominum , à quibus rei (de qua fit quæstio) facta sit *acceptatio* , *observatio* , & *continuatio*. Oportet igitur , ut Adversarij ostendant Communitatem , & assignent tempus , in quo Communitas illa pro Fundamento ac directione substantiali vitæ suæ expressè habuerit Regulam Divi Augustini ;

stini; aliàs nunquam dici poterit hæc *accepta* &c. At, inquirent omni sedulitate, & quancunque tempore labet, nunquam invenient ante sæculum undecimum, vel ad summum ante decimum ab ulla Communitate Regulam hanc tanquam *Fundamentum* vitæ Canonice propositam fuisse.

Nec dicant Adversarij; ante tempus illud fuisse quasdam Clericorum Communitates.

Transmitto, fuisse aliquas; ergo *Regulam*, de quâ loquimur, *observârunt*? Hic labor, hoc opus est, quod incumbit Adversarijs. Designent mihi vel unicam Communitatem, quæ votum abdicatæ *proprietas* fecerit, aut tria vota emisit, ante Congregationem S. Ruffi de Aroise, S. Victoris, & Ivonis Episcopi Carnotensis; nullam producent, etsi maxime vel-
lent.

Jam sic argumentor: Institutum Canonicorum Regularium per Adversarium hæc ex causa deducitur ab Apostolis, quia vitam communem cum 3. Votis, ad Religionem quamlibet aliàs requisitis, complectitur, ergo (cùm *Reformatio* non mutet substantiam Instituti) Apostolicæ hujus vitæ Institutum per Augustinum (ex Adversariorum suppositio) reformatum eadem pariter 3. Vota continere debet: At, quòd hæc contineat, ex nullo irrefragabili poterit indicio probari.

Afferent fortè pro indicio & exemplo
Com-

Communitatem Clericorum, in Urbe Hipponensi ab ipso Augustino institutam.

Sed per hoc eximiè iterum nostra confirmatur sententia: in Communitate illa non obligabantur Clerici ad Votum saltem Paupertatis; quod manifestè colligimus ex reformatione (ut Adversarij vocant) vitæ communis Canoniorum Regularium, factâ tempore Caroli Magni per Concilium Aquisgranense: nam juxta *Capit. 115. de Regulâ* per dictum Concilium concinnatâ, conceditur Clericis *Proprietas: quia* (ut Regula loquitur) *in sacris Canonibus illis prohibitum non legitur.* Ergo cum Reformatio Canoniorum Regularium per Aquisgranense Concilium facta non involvat Votum paupertatis, necessariò concluditur, illud ipsum paupertatis Votum etiam non insertum fuisse Reformationi factæ per Augustinum: ergo, à primo ad ultimum, S. Augustinus non fuit Reformatior Instituti Apostolici, utpote, juxta ipsum Adversarium, tria vota complectentis.

In omnem hîc partem se versat Adversarius, ut Vota saltem *simplicia* à Clericis S. Augustini emissa fuisse & observata evincat: in suæ igitur opinionis fulcrum allegat *f. 252. Regulæ Augustinianæ cap. 1. 3. & 9.* ac ipsum etiam D. Augustinum in *sermonibus de communi vitâ Clericorum* pro se ita loquentem inducit: Ecce, inquit, *quomodò vivimus; nulli licet in Societate nostrâ aliquid habere proprium, sed si fortè aliqui habent, nulli licet, & qui habuerint, faciant, quod non licet.*

Hæc etsi omnia lubens admiserim, minime tamen id evincit Adversarius, quod contendit; præterquam enim, quod Regula illa non Clericis Communitatis S. Augustini sit scripta, (ut suprâ insinuavimus) ex ea certe nullatenus probatur, vi *Voti* etiam *simplicis* *ijs non licuisse habere proprium*: aliunde enim, vel consuetudine in Societate receptâ, vel privatis Societatis legibus &c. id eis non licuerit.

Ait Adversarius, in Regula S. Augustini tria vota Obedientia, Castitatis, & Expropriationis cap. 1. 3. & 9. ita clarè tradi, ut otiosum sit, ipsos textus afferre.

Quæ tamen claritas, cum nulla ratione mihi affulgeat, integrè illa capita (utpote brevissima) Lectoris oculis subycio, & iudicio desuper formando. Primum ita sonat: *Primum, propter quod in unum estis congregati, ut unanimes habitetis in domo Domini, & sit vobis anima, & cor unum in DEO.*

Tertium sic: *Et distribuatur unicuique vestrum à Præposito vestro victus, & tegumentum: non equaliter omnibus, quia non equaliter valeatis omnes: sed potius unicuique, sicut cuique opus fuerit. Sic enim legitis in Actibus Apostolorum; quia erant illis omnia communia, & distribuebatur unicuique, sicut cuique opus erat.*

Capitis noni; formalia sunt ista: *Non sit notabilis habitus vester, nec affectetis vestibus placere, sed moribus.*

Ex his jam colligas, Amice Lector! num
tria

tria vota ita clarè tradantur in hac Regula, ut otiosum sit, ipsos textus afferre, in quibus nec apex de ullo voto apparet?

Aut planè fateamur, necessè est, omnia, quæcunque in Regula continentur, sub Voti vinculum cadere.

Imò non tantùm non habemus ullum pro votis fundamentum, sed contrarium potius, in ordine ad votum *paupertatis* præsertim, læculenter apparet in factò Honorati Presbyteri, & Clerici Tagastensis, qui (referente etiam Adversario) cùm ad Ecclesiam Thianensem vocaretur, omne suum patrimonium secum tulit; necnon in testamento, quod Januarius ejusdem Communitatis Presbyter ac Canonicus confecit,

Certè si isti contra votum *paupertatis* etiam *simplex* peccassent, tantus Ecclesiæ Doctor eam peccati enormitatem nullatenus tolerasset, aut in correctione, quam crebrò adhibuit, hujus voti mentionem omnino injecisset.

At nullius prorsus voti, sed *qualiscunque* demum *paupertatis* solummodò meminisse; sunt (inquit *serm. 2. de vit. Cler.*) qui de suâ qualiscunque *paupertate*, quod statuerant, nondum fecerunt. Contra nullum igitur votum prædicti Clerici peccaverunt, sed *leges duntaxat & jura Societatis*; quia in hoc casu (inquit S. Augustinus Ep. 239.) & similibus ea jura servanda esse censeo, quæ talibus habendis vel non habendis secundùm civilem Societatem sunt instituta.

Quemadmodum itaque Adversarius demonstrare ex his contendit, quòd Clerici S. Augustini emiserint vota quidem, sed non *solemnia*, ita pariter evinco, illos nulla, & ne *simplicia* quidem emisisse. Iisdem proinde, quibus is concludit verbis, vota Clericorum S. Augustini non fuisse *solemnia*, concludo èt ego, nulla fuisse, & ne quidem *simplicia*: cum enim nec in Regula, nec in Operibus S. Augustini habeamus ullum Fundamentum, quò votum illud inter ipsius Clericos demonstretur, &c. omnino non est nundè asserenda tanta obligatio, quantam præfert voti etiam simplicis vis & efficacia: nam votum simplex non minùs est efficax in ratione voti, quàm solenne: ut cum communi docent San-Gallenses 10. 5. de Virtut. Card. tr. 5. sect. 1. q. 2. dub. 3. votóque religioso est accidentalis, & solùm ab Ecclesia instituta solemnitas juxta omnes, & ipsum etiam Adversarium f. 250. ergo non qualemunque ex voto simplici, sed veram, strictámque nasci paupertatem, necessè omnino est, qualis tamen secundùm D. Augustini sententiam in sua Communitate nulla viguit: ergo qualemunque illam paupertatem non vi ullius etiam simplicis voti observârunt, sed tantummodò ob *leges Societatis privatas*.

Denique ubi S. Augustinus dixit: nulli licere in sua Societate *proprium* habere; & ab Ea qualemunque paupertatem coli: peraccommodè intelligendus est de *Proprio* seu Dominio, cui ante rerum Ecclesiasticarum divisionem omnes olim Clerici, congestis in communem massam & suis, & Fidelium bonis, renunti-

runt:

runt: unde non rigorosa, sed qualiscunque paupertas nata est; Ut manifestè colligitur ex eisdem Epist. 50. ad Bonif. ubi sic loquitur: Si privatim possidemus, quod nobis sufficiat, non illa nostra sunt, sed pauperum, quorum procuratorem quodammodò gerimus, non proprietatem nobis damnabili usurpatione vindicamus.

N. III.

S. Augustini Institutum, si dabatur, non fuit continuatum &c.

Verùm, ut amplior disputationi locus sit, & veritatis splendor magis elucescat, permittamus nonnihil Adversario; assentiamur dicenti, in Ecclesia Hipponensi ejusmodi Clericorum Communitatem fundatam fuisse, an omnis ideo difficultas tollitur? nova planè surgit, quam fortè minùs dissolvat; Probandum continuo erit, quòd Communitas illa per continuam, & nunquam interruptam seriem ad hæc usque tempora descendere, vel usque ad tempora Congregationum S. Ruffi &c. de quibus suprà, propagata fuerit. At hoc nunquam ostendetur.

Inquiratur, quantum placet (inquit Mabillonius) nusquam reperietur exemplar, aut testimonium irrefragabile.

Quamvis igitur (ratiocinatur Alvisetus noster fol. 201.) dicant se S. Augustini, & S. Augustinum in Patrem elegerint, non tamen sequitur, quòd possint trahere suam originem, aut antiquitatem ab illo, tanquam sint ab eo-

dem instituti, aut ab eò descendant. Nam in Hungaria & Polonia sunt Monachi, qui se dicunt S. Pauli primi Eremitæ: In Gallijs alij, qui S. Antonij; in Hispanijs, & Italia alij, qui S. Hieronymi &c. Quis autem putet, illos esse institutos à dictis Beatis, aut ab illorum temporibus posse suam Originem derivare, atque inde præcedentiam ab alijs exigere?

Respondent Adversarij apud eund. loc. cit. Quia Augustiniani non elegerunt simpliciter S. Augustinum in Patrem, sed Regulam ejus profitentur, atque ideo tanquam ejus Ordinis (& antiquioris) possunt petere præcedentiam.

Sed hoc nihil evincit, reponit is idem; quia non licet arguere à genere ad speciem: Nemo enim negat, S. Augustinum esse Antiquiorem S. BENEDICTO. Sed negatur, eas familias, quæ se dicunt Ordinis S. Augustini, & successu temporis sub ejus Regula sunt fundatæ, posse dici ab illo institutas, aut ab eo suam Originem, & Antiquitatem trahere, ut dicantur Ordine S. Benedicti antiquiores. Nam Philosophi agnoscunt essentias rerum esse æternas, quorum tamen individua videamus oriri singulis diebus.

Et quamvis Roma v. g. sit antiqua, non tamen sequitur, æquè antiquas esse omnium Romanorum familias.

Est igitur falsa Argumentatio, cum dicitur: S. Augustinus est antiquior S. BENEDICTO, ergo & Congregatio S. Salvatoris,
vel

vel Rochetinorum v. g.; sed ut hoc asseratur, necesse est, ostendere talium Familiarum originem immediatè esse à S. Augustino, & per rectam lineam, absque interruptione ad hæc tempora propagatam.

Neque alij Ordines, ut illi, suam Originem, suamve Antiquitatem derivant. Nam v. g. Dominicani profitentur etiam Regulam S. Augustini, atque ideo nemo potest negare, quin sint ex illius Ordine, & tamen non derivant suum principium, neque computant suos annos, aut suam antiquitatem à S. Augustino, sed à S. Dominico, qui sub ejus Regula eos instituit. Sic nemo potest negare, quin Camaldulenses, Olivetani, Cistercienses, & alij ejusmodi, servant, & profiteantur Regulam S. Benedicti, & quin sint verè ejus filij, & sui Ordinis, & tamen quando agitur de ipsis, non quærimus eorum Originem apud S. BENEDICTUM, neque eorum Antiquitatem ab illo derivamus, sed à Ss. Romualdo, Roberto, Barnardo &c. qui sub Regula & Ordine S. Benedicti illos instituerunt. Et ita à pari Canonici, seu Clerici Regulares, qui se dicunt S. Augustini, non ab Augustino, sed à suis privatis Fundatoribus debent suam Originem & Antiquitatem derivare, in quo, quia sunt inferiores Benedictinis, irrationabiliter etiam prætendunt eos præcedere. Hactenus Alvisetus perquàm eruditè.

Quid ad hæc autem Adversarius? Rem paucis more suo, dum convictus, non habet, quoniam

quod respondeat, expedit fol. 80. contemp-
tim asserendo: quæ Alvisetus de Monachis Po-
lonis, Hungaris, Dominicanis, Cisterciensibus,
& alijs recenset, nihil facere ad rem, nec nisi
folijs replendis, ac imperitis fascinandis deser-
vire.

Si hæc non ad rem; non perspicio, cur
ad rem sint, quæcunque in Titulorum suo-
rum pertractatione argumenta profert Adver-
sarius: Debuerat scilicet disparitas exempli ab
Adversario ostendi; sed non potuit commoda
excogitari, quia similitudinis perfectio acrius
urgebat: hinc quæ seriò diluere nequit, per
contemptum eludit.

In speciem quidem responsionis sub-
jungit: Quoad Antiquitatem Ordinis, rem
jam transisse in judicatam, cum Canonicis Re-
gularibus Lateranensibus, Creüzlingensibus,
& alijs fuerit adjudicata præcedentia ob anti-
quitatem Ordinis, quem immediatè à S. Au-
gustino per continuam traditionem acceperint,
æquè ac Benedictini Germani suum Ordinem
acceperunt à S. Benedicto.

Multum hinc Adversarius & audacter di-
cit; & primò quidem, rem transisse in judi-
catam. At, quando? & quo Judice?

Quando Canonicis (reponit) Regulari-
bus Lateranensibus, Creüzlingensibus, & alijs
fuit adjudicata præcedentia ob antiquitatem &c.

Sed qualem ob Antiquitatem?

Jam tam temporis dubiam, (ut frequen-
ter monuimus) sinistrâ informatione laboran-

tem; & in tantâ modò Historiæ luce, apertè falsam.

Etverò, quamvis, Lateranensibus denique sententiam quandam indultam, admittamus, idipsum tamen quoad Creüzlingentes à veritate esse alienissimum, infrà demonstrabimus.

Dicit *Secundò Adversarius*: *Lateranenses Ordinem suum immediatè à S. Augustino per continuam traditionem accepisse, æquè ac Benedictini Germani suum Ordinem acceperunt à S. Benedicto.*

Hoc si probaverit *Adversarius*, herbam porrigemus lubentes, & victas dabimus manus. Quàm longè autem hoc à nobis periculum absit, ostendam mox ex Mabillonio.

Liceat mihi prius tamen ad priora ejusmodi formare *subsumptum*: atqui Benedictini suum Ordinem acceperunt à S. BENEDICTO ceu *Fundatore*; ergo & Lateranenses suum acceperunt Ordinem à S. Augustino ceu *Fundatore*; id, quod *Adversarius* constanter hætenus negavit, quando eorum Originem ad ipsos adeo Apostolos devolvit.

N. IV.

Canonici Lateranenses à S.

Augustino non descendunt.

Demonstrat hoc Eruditissimus P. Mabillonius in primo suo Responso tam clare, ut nulli suboriri dubium circa id prudens deinceps possit.

quod

Quod ut meliùs intelligas, Nota : Canonicos Lateranenses persuasum habere, institutos fuisse se in Laterano à Gelasio Papa hujus nominis primò, S. Augustini Discipulo, & ab eo tempore usque in præsens conservatos; habentque pro se Anastasium. Et hic est lapis ille offensionis, in quem fortè plures hactenus impegerunt.

Eum tamen dexterrimè removit Eruditissimus Mabillonius, ex rei Antiquariæ monumentis perspicuè demonstrando, meram esse fabulam, quæ circumferuntur de Gelasij ex Africa Romam adventu, & de fundatione, quam dicitur fecisse, Canonorum Regularium in Laterano.

Cujus ego propria in re tanti momenti admetior verba.

Præter Antiquitatem (inquit) Originariam Canonorum Regularium, Cardinales (qui causam inter *Lateranenses* & *Cassinenses* discutiebant) allegabant insuper illam Canonorum ipsorum *Lateranensium*; supponentes, quòd fuerint fundati à Gelasio Papa hujus nominis I. qui cum natione, ut eis persuasum fuit, esset *Africanus*, filius *Valerij*, & Discipulus S. Augustini, & consequenter Canonicus Regularis, profectus fuerit in Italiam, & postea Romam tempore S. Leonis, aut priùs, & constituerit confratres suos in *Lateranensi Ecclesia*; ubi sunt commorati usque ad tempus Bonifacij VIII. spatio 800. annorum. Hæc narratio inserta fuit Breviario Canonico-

corum

corum Regularium Lateranensium, approbato à Pio V. Pennotus denique addidit pag. 268. quòd Valerius, Pater Gelasij, fuerit Prædecessor S. Augustini in Episcopatu Hipponensi.

Cardinales benè advertebant, in hac expositione aliquod, nescio quale, dubium reperiri: Verùm Memorialia Benedictinorum, quæ obtulerant, non satis evidenter remonstrabant fallam suppositionem; quamvis modò deprehendant illi, qui vel parùm in Historijs sunt versati. Gelasius non fuit Africanus, sed *natus Romanus*: multò minùs fuit Filius Valerij Episcopi Hipponensis; nec fuit unquam Discipulus S. Augustini.

Antonius Caracciolus pag. 320. has omnes suppositiones agnovit in suis Monumentis Ecclesiæ Neapolitanæ; Earum falsitatem paucis oportet ostendere.

Nemo meliùs scit Patriam Gelasij, quàm Gelasius ipse, qui se dicit *Nativitate Romanum* in quadam Epistola, quam scripsit ad Anastasium Imperatorem (ep. 4. L'Abbe. 4. Col. 1182.) En! ejus verba: *quia gloriose Filie sicut Romanus natus, Romanum Principem amo, solo, suspicio &c.* Hic locus est tam clarus, ut Commentariò opus non habeat; Dicendùmque est, nullum debere haberi respectum illius authoris vitarum Paparum, qui Gelasium Africanum facit.

Ex quo sequitur, si Pater hujus Papæ Valerius Vocabatur, cum fuisse *Romanum*, ut
adver-

advertit Caracciolus ; & nullo modo S. illum Episcopum , qui præcessit S. Augustinum in sede Hipponensi.

Et si nullum aliud argumentum esset ad refutandum hunc errorem , illud , quod ex ætate Valerij Hipponensis , & Gelasij Papæ desumitur , seipsò id decidit. Nam si Gelasius fuisset Filius hujus Valerij , debuisset nasci ante annum 392. quò tempore Valerius erat Episcopus Hipponensis : adeoque debuisset esse major plùs quàm 100. annis , quando fuit promotus ad Cathedrum S. Petri , quod accidit anno 492. hoc est , 62. annis post mortem S. Augustini.

Quæ est adhuc ratio convincens , Gelasium non fuisse Discipulum hujus S. Doctoris : aliàs oporteret supponere quòd ex Africa venisset , quod non est verum , ut ostensum fuit.

Si quis desiderat perfectam ideam illam , quam Gelasius ante suum Pontificatum exhibuit ; legat solummodo illud , quod scripsit Dionysius Pancus in Epistolâ , quæ habetur in principio Decretalium Pontificiarum , directâ ad Julianum Presbyterum tituli S. Anastasij , qui Gelasium vidit : ubi inter alia reperietur , quòd multum delectetur conversatione *servorum Dei* , hoc est , *Monachorum* , ut illo tempore ordinariè appellari solebant : *servorumque Dei* , maxime consortio , atque societate gaudebat : Nul- lum autem Verbum ibi habetur , ex quo posset concipi idea *Canonicorum Regularium* ,
nec

nec quòd fuerit Africanus, aut Discipulus S. Augustini. Usque huc Mabillonius.

Sed quid ad tanti evidentiam discursus Adversarij?

Ex illis Nonnullus in *Horto suo Hierarchico* &c. putat, rem in expedito fore, si verba illa, quibus se *natum Romanum* Gelasius profitetur, in eundem detorqueat sensum, quò Apostolus *Civem Romanum* semet appellavit, quamvis ortu *Tharsensis* fuerit.

At, quàm violenta hæc sit, quàm torta interpretatio, nemo non videt.

Ut *civis Romanus* quis dicatur, sufficit, modò gaudeat Jure Civitatis illius; quod plurimis socijs Urbibus commune fuisse, nemo ignorat, qui Romanam Historiam vel semel perlustravit.

E diverso Nativitas locum appellat par-tus: ut igitur *Natus Romanus* dici quis possit, *Romæ* debuit, & non alibi fuisse genitus: Nec unquam Adversarij convincent duo ista: *Esse Civem Romanum*, & , *esse natum Romanum*, pro synonymis haberi.

Ut porrò omnis æquivocationis tolleretur occasio, in Conciliorum margine solerter adnotata hæc leguntur Verba: *Romæ natus*.

Nec prætereundum existimo, in recentioribus Juris Canonici editionibus loco Gelasij, qui à Gratiano in *Cap. Osius. dist. 56.* nominatus erat, poni Felicem III. per sequentia formalia: *Felix enim III. natione Afer, ex Pa-*

tre Episcopo Valerio natus est : quod rem adhuc intricatiorem reddit.

Denique , ut ostendamus , inter ipsos etiam Canonicos Regulares non tam unanimem & constantem fuisse omnium in hac re opinionem :

Audiamus Nebridium à Mindelheim Canonicum Regularem ex Austria *Epist. 142. in Antiquario Monastico* : ubi postquam hanc de Gelasio opinionem retulit ; *sed hac ipsa res (inquit) incerta est. Mirum enim , si tam diu fuit , in Concilijs nusquam ejus fieri mentionem , sicut Regula S. Benedicti , cum non raro fuisset occasio ? &c.*

Quid sincerius hōce Viri Religiosissimi suffragiō ? summi planè illud momenti esse meritō reor ; quia nunquam protulisset id ipsum Domesticus , nisi rationum pondere , & manifestâ veritatis luce adactus.

N. V.

Canonici Regulares sunt Benedictini in Germania juniores.

ASSERTUM istud , non eâ mente ponimus , quasi à prudenti Viro in dubium Vocari posset , aut plurium conquisitione Argumentorum indigeret ; sed ut innuamus per illud Adversarijs aliquid , quod unicâ sui memoriâ immoderatam honoris indebiti cupiditatem ,

piditatem, studiūque abstergat.

Germaniæ Evangelij lucem intulit Gloriosissimus BONIFACIUS noster, & per se, Suosque barbaram prius Teutonum indolem, & incultam Christianis moribus, Musisque mansuetioribus non minùs, quàm severioribus imbuat. Alemanniam igitur Christo in spiritu, & per Gratiam genuere *Benedictini*, atque his omnes debemus *admirabile lumen*, ad quod de tenebris translati sumus.

At, quod reverentiæ servitium exigit à Filijs Pater? quale honoris obsequium à Junioriore Senior expectat? Vel solo hujus merititalò, quem nullæ non Gentes sacro-sanctum habent, oportuisset Adversarium cum Nostriis modestiùs, ac submissiùs agere, nec in ipsa etiam Germania præcellentia jus Benedictinis surripere, sed potius persuadere Suis, ut & Filiorum debitam pietatem, & Juniorum ingenuam observent Verecundiam, nec ambient ipsis præponi, quorum Majoribus referre in acceptis tenentur, quòd genuini sint homines, Christiani scilicet, & literati.

Ego ex mea parte labentissimus Veneror plurimum, quam Canonici Regulares in Germania habent, Monasteriorum Antiquitatem valde spectabilem, sed in id annuere nequaquam valeo, nonnulla (ut Adversarius contendit) reperiri, quæ jam ante decimum à partu Christi sæculum floruerint. Esto enim, quòd tunc illæ cum ædificijs suis Ecclesiæ jam extiterint, non tamen incolebantur à Cano-

nicis , *Divi Augustini Regula adstrictis* , eandemque vitæ normam professis , quam moderni proficentur.

Hinc Benedictinus ille Vindex nullatenus insultavit ceu imperitus Historicus Canonicis Regularibus , ut Adversarius fol. 71. exprobrat, quando petijt , ut Canonici Regulares producant authenticas Fundationes Monasteriorum ante annum Millesimum in his partibus (Bavarix , ubi scripsit ille) Canonicis Regularibus, Ordini & Regula S. Augustini obstrictis factas, sicut nos Benedictini ante ea tempora plura producere possumus.

Quamvis enim Adversarius fol. 71. octo Historicos proferat , è quibus contrarium evinci putat ; Authores tamen illi non ejus semper sunt elasis & fidei , ut authenticæ foundationis probationem subministrarent. Solus quippe Bruschius (tacendo exteros) circa unius Monasterij Oxenhusani relatam foundationem duorum valde palpabilium errorum convictus fuit à Doctiss. P. Romano Hay ejusdem Monasterij Professo per documenta ipsius Archivij Oxenhusani.

Credo proin , non absque peculiari causa dictum Vindicem nostrum petijisse : in Partibus his , id est , Bavarix ; unde scilicet ex vicinia authenticæ ex Archivij foundationes facile comparari potuissent.

Denique addidit studiosè Vindex , Canonicis Regularibus Ordini & Regula S. Augustini obstrictis ; cum eò tempore , quo pleraque

que Monasteria Canoniorum Regularium in illis Bavariae partibus, qualia sunt Reichen-
spergense, Dieffenſe &c. non Regulæ S. Au-
guſtini, ſed Concilij Aquisgranenſis, quam
Conradus Archi-Epiſcopus ſibi à Ludovico Pio
ſubmiſſam propoſuit, obſtricti fuerint: ut
numero ſequenti magis pateſcet.

Ne verò ſalutem ex inimicis ſuis (P. Ber-
nardo Hertfelder Monacho & Priore ad Ss.
Udal. & Afram, ac Carolo Stengelio) ſibi
adgratuletur (fol. 72.) Aio: non abſolute
Priorem illum aſſeruiſſe; quòd Canonici Re-
gulares eâ tempeſtate locum illum (Monasterij
S. Udalrici Auguſtæ) incoluerint, ſed ſolùm
ex conjecturâ; & illo forſan etiam errore,
quò perſuaſum habuit, omnes Canonicos in
communi viventes, continuò Regulares fuiſſe;
quod non ſubſiſtere, infrà demonſtrabimus.
Dubium verò ſe in illa re extitiſſe, clarè
demonſtrat, dum ait: *quando, & à quo tem-
pore id factum, Annales noſtri expreſſè non pro-
dunt.* Denique, quamvis aſſerat, fuiſſe Ca-
nonicos Regulares, non addit tamen, fuiſſe
Regulæ obſtrictos S. Auguſtini; de quibus eſt
nobis ſermo.

Et licet Stengelius Proprium Auguſta-
num ab erroribus purgâſſe dicatur, credere
tamen omnia nemo tenetur ut Canonizata;
ſicut in eodem ferè genere eruditè reſpondet
P. Papebrochius circa Officia, à ſacra etiam
Congregatione approbata. Dum ſacra inquit,
Rituum Congregatio approbat aliquod Officium,

ut recitandum, certum nobis & prorsus infallibile est, omnes eos, quibus hoc officium à Sacra Congregatione recitandum, ab omni errore juris remotos esse, sive, licitè illud, & sinè culpa periculò recitatu-ros; imò ad illud teneri, si eos sacra Congregatio obstrinxerit. Non autem certum nobis est, & infallibile, omnes eos, qui ad Officium recitandum præceptò obligantur, hoc ipsò obstringi ad certò & infallibiliter credendum, quidquid in isto Officio continetur. Hæc Papebrochius.

N. VI.

*Præter Canonicos Sæculares,
& Regulares, datur etiam tertium
Canonicorum Genus.*

E Quod, inquis, est illud? Eorum nempe, qui nec separatim soli, nec conjunctim cum Votis religiosi, sed absque his in communi vivunt.

Collegit id Caramuel ex Beyerlinkio, qui apud Adversarium fol. 229. v. Canonicus ita loquitur: Quidam eorum (Canonicorum) non contenti, Apostolicam vivendi normam sequi, tria insuper vota Monachorum ritu facere, ac exinde Canonici Regulares dici ceperunt &c. Ergo, inquit Caramuel n. 151. & alibi sæpiùs, Canonici Regulares (qui tria vota emisserunt) sunt posteriores Monachis, utpote
Mona-

Monachorum imitatores. Imo ex eâdem hâc authoritatè Caramuel sequentes Ectheses elicit:

1. Clericos communis vitæ vixisse sinè votis.
2. Monachos esse Canoniorum Regularium Patres.
3. Tria fuisse Canoniorum Genera, videlicet Sæcularium, Regularium, & in communi Viventium.
4. In Consilijs Evangelicis fuisse devotionis heredes Canonicos, voti Monachos.

Fatetur Adversarius ibidem, speciosa hæc fore ædificia, nisi carerent luce, ac fundamento. Firmamentum tamen firmum satis, & lucem æquè copiosam accedere, credo, ex ipsius Authoritate Beyerlinkij, quò Canoniorum Institutionem rectiùs nemo descripserit, nisi Canonicus Beyerlinkius, ut rectè advertit Caramuel.

Et quamvis Adversarius Canonico Canonicum, Augustinum Barbosam, opponat, ac Beyerlinkij mentem quadruplici responsò eludere conetur, manet tamen tanto Viro sua semper authoritas, ejusque verbis illibata claritas, & fides inconcussa, etsi ab Adversario non nisi Lexicographi nomine afficiatur.

Dilucidatur nostrum præterea Assertum ex illustrissimis, quæ ob oculos habemus, nobilium Virginum Cœnobijs, Buchoviensi, Lindaviensi, Seggingensi &c. quorum illustres Canonissæ in communi omnes vivunt, ac nullis, aut non omnibus saltem Regularium votis adstrictæ.

Confirmari hæc possent ex Instituto novissimo RR. DD. Clericorum in communi vi-

ventium, quos vulgò Bartholomeitas vocamus. Denique multos ejusmodi Canonicos Regulares, non qui Regulam S. Augustini servant, sed duntaxat secundùm Instituta Ss. PP. (ut olim) vivant, *res proprias* habentes, reperiri etiamnum hodie in Gallia testatur Clemens Reynerus in tractatu de Apostolatu Benedictino in Anglia. Imo fuisse quosdam Canonicos Regulares in diversis locis professos secundùm Regulam S. Augustini, quam tamen non habebant, colligitur ex Chronico Canonico-rum Regularium Reicherispergensium in Bavaria sub Anno 1169. quod allegat Mabillonius in primo responso: ubi fit mentio, Prioris Gerohi, Zelotissimi Reformatoris hujus loci; & de illo leguntur sequentia: *Nec enim satiabatur illis diebus dulcedine illa mirabili, quam inveniebat legendo in Excerpto de dictis sanctorum de vita Canonica, quò & eatenus pro Regulâ usi fuerunt Fratres sui. Exquirebat omni animadversione, quomodo sibi vivendum esset secundùm Regulam S. P. nostri Augustini; vel quæ esset illa Regula, secundùm quam vivere professus fuerat. Quæ Regula tamen tunc in illis locis non inveniebatur, sed nec in alijs locis ejusdem professionis. Pro qua re necessarium duxit, Romanum adire Pontificem cum quibusdam fratribus de Claustro: quatenus Regulam, quam unacum omnibus communiter fuerat professus, Claustro illi, cui erat obligatus, stabiliret. Quod & factum est. Hæc ibi.*

Dubitari non debet (subdit his Mabillonius)

Ionius) quin istud *Excerptum de dictis Sancto-
rum de vitâ Canonica*, quod his Abbatijs tunc pro
regula serviebat, fuerit illa Concilij Aquisgra-
nensis, fueritque illa pro Regula S. Augustini
habita, eò quòd præscriberet vitam commu-
nem, quam S. Augustinus Hippone instituit.
Legimus (pergit is idem) apud Raderum in
Bavaria S. quod hæc compilatio Concilij Aquis-
granensis per Ludovicum Pium fuerit missa ad
Arnonem Archiepiscopum Salisburgensem,
ut habeatur pro Regula ad introducendam
vitam communem in novis Abbatijs, quæ fun-
dabantur in Bavaria circa finem Sæculi XI. &
principium XII.

Ex his unà colligat Adversarius, etsi
unius tortè aut alterius Monasterij Canonico-
rum Regularium foundationem ante sæculum
XI. allegarit, ea tamen minimè fuisse obstri-
cta Regulæ S. Augustini, quæ hodie obser-
vatur: ut paulò antè notavi.

N. VII.

*An à Canonici Regularibus
descendant per relaxationem Canonici
Seculares, & Hos Illi
præcedant?*

ADversarius eò demum fiducia delabatur,
ut pronuntiare auset (fol. 242.) Cano-
nicos Regulares esse Secularibus antiquio-
res,

res, ut qui Ordinis ac Clericatus sui Regularis habuerint Institutores ac observatores ipsos sanctos Apostolos; ut adeo Clerici seculares sint à Regularibus orti per relaxationem, non verò hi ab illis per reformationem.

An igitur tam turpi horrescit maculâ pulcherrima & nobilissima Ecclesiæ Portio? (Clerus videl. secularis) an licentiæ & relaxationis torpore obfessi sint omni hætenus tempore Episcopi? cum Episcopis Archi-episcopi? cum Archi-episcopis Cardinales? et &c. (erubesco inferre) An Divina sustinuerit Providentia eos potissimum in terris gerere Christi vicem, qui à primævâ Apostolicæ vitæ per Christum traditæ normâ degeneres, solutis originarij Instituti legibus, in laxioris vitæ rationem deflexissent?

Hoc prorsus non capio, nec persuadere mihi met possum, quòd ille hominum Status, qui à primæva Institutione, & sanctæ vocationis legibus degeneravit, nihilominus & floreat præ cæteris, & imperet reliquis, & in Ecclesiæ Hierarchia supremum excellentiæ gradum constituat.

Alteram tituli partem, (præcedentiam videlicet Canoniorum Regularium ante Canonicos Sæculares) spectando, Adversarius fol. 83. ex Bulla Pij V. hæc tria colligit: I. est, Canonicis sæcularibus S. Augustini jure deberi præcedentiam ante quasvis personas ecclesiasticas tam sæculares, quàm Regulares &c. II. De factò decrevisse quidem summum Pontificem,

ut Canonici Regulares in publicis processioni-
bus cederent, idque præcisè ex hac ratione,
ne Canonici ab Episcopo, tanquam membra
à Capite, per interpositos Canonicos Regu-
lares separarentur; unde non ex Jure, sed
duntaxat ob congruentiam illam Canonicis
sæcularibus Præcedentiam permitti. III. Quan-
do Canonici sæculares in privato congressu,
vel plures Canonici sæculares absque suo Ca-
pite, scilicet Episcopo, Archi-episcopo &c.
cum Canonicis Regularibus conveniunt, tunc
Canonicos Regulares præcedere Sæculares. Ha-
tenus ille.

Ad quæ ego, ne falcem in alienam vi-
dear mittere messem, nil respondeo, sed,
attonitâ tantisper mente operior occasionem
illam & Actum, quò Canonici Regulares in
privatis Congressibus suam ante Canonicos
Sæculares exigent præcedentiam. Tum enim-
verò apparebit, quid factò ipsò Canonici Sæcu-
lares responduri sint.

DISSERTATIO V.

De Antiquitate Nominis, & Habitûs Canoniorum Regularium.

SUMMARIA.

1. Antiquitas Canoniorum Regularium ex
eorundem Nomine mensuratur.

2. An-

2. *Antiquitas Canoniorum Regularium ex eorum denique Habitu concluditur.*
3. *Adversarij scomma de Habitu Monachorum rejicitur.*

N. I.

Antiquitas Canoniorum Regularium ex eorundem Nomine mensuratur.

Nobiliorum Stemmatum *Antiquitatem* ex annexi *Nominis*, & Insignium, quibus innotescit, ætate dimetiri homines solent; nec immerito: *Nominis* quippe per Heroica Gesta illustrati splendor parere nobilitatis debuit famam, & opinionem, cujus ad Posteris transmissæ beneficiò nobilissimum ejusmodi Stemma inclaresceret; unde tota quoque ipsius Arboris gentilitiæ structura, in singulis consuevit ramis eodem semper *Nomine* insigniri, ac unica probandæ nobilitatis ratio ex *Nominis* à Majoribus accepti *Antiquitate* solet ubique gentium æstimari.

Cùm itaque quælibet Religio illustris cujusdam Stemmatum speciem, rationemque præferat, & *anonymi* Ordinis nulla apud posteris sit fama vel pretium, convenientissimum absque dubio erit, si dimetiamur ex ipso *Nomine* Canoniorum Regularium *Antiquitatem* eorundem, quam hactenus pertractavimus.

Et verò, cùm propria confessio sit species

cies nobilissimæ probationis, auscultemus, quid hac in re ipse sentiat Adversarius? Ingenuè omnino fatetur f. 241. *Nomen Canonici Regularis in primitiva Ecclesia non fuisse in usu.*

Et alius quidam apud Mabillonium lubens concedit: *Nomen Canonici Regularis ante decimum seculum fuisse incognitum.*

Quod admodum videtur mirum Mabillonio, si jam fuissent Canonici Regulares ipsis temporibus Christi & Apostolorum, & interea tamen per novem integra secula nulla de ipsis mentio facta fuisset. Vix, ait, inveniri poterit causa tam extraordinarij silentij.

At, non refert, inquit Adversarius, quia si de re constet, de nomine non est disceptandum; aliàs enim sequeretur, in primitiva Ecclesia non fuisse realiter Christianos, cum nomen Christianorum ante Concilium Antiochenum non fuerit in usu, ut habetur causa 24. q. 1. cap. Rogamus. Item sequeretur, monachos à Divo Benedicto institutos, usque ad tempora S. Gregorij Magni non fuisse Benedictinos, cum nullum tunc temporis fuerit, vel ostendi possit hujus nominis vestigium.

Verùm, si aliunde tam certum foret, Canonicos Regulares realiter extitisse in Primitiva Ecclesia, ac certum est, in eâdem extitisse Christianos, & Benedictinos tempore S. Benedicti, de Nomine utique ex superfluo disputaretur.

At inspexisset ille vel obiter Apostolorum

rum *Acta*, c. 11. v. 26. & c. 26. v. 28. vel primam Petri Epistolam c. 4. v. 16. aspexisset nomen *Christiani* expressissimè poni.

Ad obtinendam igitur paritatem, oporteret *Canonicorum Regularium nomen* quoque alicubi sic expressam legi in Apostolorum *Actis*, quæ pro fundamento Ipsi ac *Regula* sua statuunt.

N. 11.

Antiquitas *Canonicorum Regularium* ex eorum denique *Habitu* concluditur.

Quemadmodum Nobiles olim notabantur per *lunulas*, quas in calceis gestabant; sic Religiosus ex habitu dignoscitur, ad quam ille speciem, classèmq; pertineat: exhibeant igitur Canonici Regulares, ex Apostolis vel unum, quem *Superpellicea*, *Cappa*, *Mozetta*, & *Bireto quadrato* (quorum scilicet antiquitatem opponunt *Lana*, & cucullo *Monachorum*) indatum, rectumque fuisse sciant. Nobis saltem demonstrata facillimum est, quod nec *Mozetta*, nec *quadratum* sint tam antiqua, quàm *Cucullus*, & nostrum *Caputium*.

Quod attinet *Rochetum*, in quo substantialem vestitus sui gloriam ipsi constituunt, nec illud persuasam ijs habet antiquitatem: audiamus enim *Alvisetum*, qui fol. 204. ait; non sibi
adde

adeò bene constare Augustinianos in suis propositionibus, & fundamentis, cum dicunt, se Ordinis S. Augustini, & se portare ejus habitum; nam ex ipso Iure discimus, pergit ille, Rochetum fuisse attributum Episcopis ab Innocentio III. ut videre est in Cap. Clerici Officia, de vit. & honest. Cler. Quò cum Sanctus longè sit antiquior, quomodo potest dici usus Rocheto, aut illum suo Ordini tradidisse?

Ad quæ in suo Commentario Adversarius altum filet, & hinc denuo in memoriam revocanda censui.

N. III.

Adversarij scomma de Habitu Monachorum recitatur.

ADversarij qualis sit animus in Monachismo, si non aliunde, ex illo saltem capite quivis deprehenderet, quòd Habitum denique, & Cucullum etiam indignis proscindere modis sustinuit. Nec est, cur obiciat exemplum Alvisei: unicam hic Historiolam protulit, quæ nullius tamen viri gravis sententiâ, sed simplicis tantum rusticelli incauto dicterio nitebatur: & vel hunc retulisse, ex ipsius etiam Adversarij confessione, displicuit Nostri.

At horum nulla est ratio, curaque Adversario, sed, ut solenniùs vituperet, inducit Cap. Mandamus 10. q. 3.

Prohibet ibi Pontifex Canonicis Regularibus transitum ad Monachos, & jubet, ut transgressor ad suos reductus, ultimò locò in Choro stet, & memorialem Cappam in manibus portet.

Sed, qua de causa? sub quâ limitatione?

Ne causâ *levitatis*, inquit *capitulum*, & temeritatis, ac non petitâ licentiâ id faciant; ne scilicet Canonici Regulares tam liberè, frequenter & copiosè solò *levitatis*, *inconstantia*, *temeritatis*, & *mutabilitatis vagabunda spiritu* agitati, & proprii arbitrii usi libidine, nec ullam impetrandæ à superioribus licentiæ rationem habentes ad Monachos transmearent, remedium quæri debuit; nec inveniri aliud efficacius potuit, quàm si traheretur in pœnæ speciem illud ipsum, quod præposterè ac in propriæ Religionis, salutisque præjudicium, contemptum, damnumque incauti ejusmodi transfugæ ambiverant; respexerit omnino sapientissimus Pontifex ad ipsius Divini Methodi Judicii, quo juxta Spiritûs sancti Oraculum, *per quæ quis peccat, punietur*.

Hunc præterea omnis passim Religio observat, ut ea ipsa, circa quæ deliquit Religiosus, in publico deinde Refectorio, vel Templo appensa collò, aut manibus gestare à Superiore jubeatur. Sic etiam inter opera pœnitentiæ scelestissimis peccatoribus injungi consuevit bajulatio *Crucis*; an ideo venerabile Salutis humanæ Trophæum vilescit?

Mitro

Mitto innumera , quæ possent in hanc rem afferri exempla , cum quilibet prudens obvia habeat , & facillimè advertat , ex istiusmodi argumento plus gloriæ nobis , ac præjudicii Adversariis accrescere , & Crucis contemptæ ignominiam pro illustrioris exinde triumpho pompâ deservisse. Hinc ablego Adversarium ad Decretum Bonifacii IV. Cujus pars aliqua capitulo sunt nonnulli inserta legitur : ex hoc discere poterit ille *Monastici Habitûs* præcellentiam , & quàm sublimis Mysterij sacramentum in eodem figuretur.

Cherubini (ait Pontifex) sex alis velati speciem refert suo Monachus Habitu ; duo scilicet in Caputio , geminæ in brachiorum manibus , & totidem in binis , quæ Corpus contegunt , partibus alæ signantur.

Cherubicum ergo decorem exprimit , geritque sui apparatus Cuculli Monachus , ac per id quidem , credo , multiplicis excellentiæ , quâ splendet Monachismus , Arcanum haud obscure nobis insinuari ; quantascunque enim dotes , ac prærogativas obtinent Cherubini , aut quæ gloriôsè gesta ab Ijs in utriusque Fœderis Pagina perhibentur , ea omnia per similitudinem admodum vetustam attribui Monachis possunt : Cherubinus Paradyû limen obsidens , flammeum rotat *ensem* ; & per hunc nunquid aptissimè *sacer Principatus* designatur ? Cherubini duo suis tegebant alis *Arcam fœderis Domini* , in quâ *Manna* servabatur ; & per ista nunquid Divinissimi ad Aram Sacrificij

species, sublimisque Clericatus Dignitas repræ-
sentatur? DEI Scientia specialissimi luminis
infusione habitat in Cherubinis, ab istis verò
inferiores exinde Angelorum Chori illuminan-
tur; & per eadem nunquid pulcherrimè Scien-
tia, & Actio delineantur? Ex ipso igitur Ha-
bitu convincitur Hierarchici Ordinis nostri
Ratio; quam usque hac pro ingenij no-
stri modulo asserere allaboravimus.



PARS

P A R S VI.

D E

*Ijs, quæ ex hætenus dictis
consecutanea sunt.*

DISSERTATIO UNICA.

*An Canonici Regulares præce-
dant quoscunque Monachos?*

S U M M A R I A.

1. Adversarij Sententia, & Rationes.
2. Refutantur.
3. Statuitur nostra sententia, & Benedictinis
Præcedentia Jus asseritur titulô Possessio-
nis &c.
4. Titulô Antiquitatis.
5. Ex Nomine Abbatis.
6. Academia quoque, & Doctores suffragantur.
7. Adversarij malè allegata Praxis refellitur, &
Benedictinorum Possessio demonstratur.
8. Adversarij circa Possessionem objecta di-
luuntur.

N. I.

*Adversarij Sententia, &
Rationes.*

Vltima tandem, & in omnibus usque huc pertractatis fundata quaestio nobis occurrat discutienda; & concludendum superest: *An Canonici Regulares quoscunque Monachos, vel Hi potius Illos Jure precedant?*

Adversarius f. 74. ubi paucis insinuavit, quanti momenti res & causa sit praecedentia; peccare, ait (ut superius jam notavi) *Prelatum, & Communitatem, qui sibi patiuntur ab alijs injuste eripi praecedentiam, & honorem debitum &c.*

Ad quaestionem exinde veniendo, refert, jam olim inter duos antiquissimos Canoniorum Regularium S. Augustini, & Monachorum S. Benedicti Ordines iteratam extitisse controversiam, cuinam competat Jus precedendi? semperque, & coram omnibus Tribunalibus palmam retulisse Canonicos Regulares ob gemina potissimum argumenta, videlicet prioritatis Institutionis, & Clericatus.

Eapropter denique concludit: *Canonicos Regulares S. Augustini non tantum Congregationis Lateranensis, sed etiam Germanos, Hispanos, Belgas, & alios totius Mundi ratione Ordinis & Clericatus precedere quoscunque Monachos, Casinenses, Germanos, Hispanos &c.*

Ab hac tamen prærogativa (quod probè animadvertas) exclusos vult f. 60. *Canonicos Regulares Præmonstratenses, Canonicos Regulares Scopetinos, seu Sancti Salvatoris de Bononia, vel de sylva Lacûs; Canonicos Regulares Gilbertinos, Canonicos Regulares S. Georgij de Alegâ, & alios &c.* quos, cum Pennoto ait, differre habitu, vel alio predicato essentiali, & consequenter specie à *Canonicis Regularibus S. Augustini &c.*

Ubi verò argumenta quoad Lateranenses (idecirco quòd, ex ipsius quidem mente, in rem judicatam eorum causa abierit) præterijt, de alijs *Canonicis Regularibus S. Augustini* totum præcedentiæ Jus demonstrare se hoc putat syllogismò: *Canonici Regulares S. Augustini Congregationis Lateranensis ratione solius Antiquitatis, & essentialis Clericatûs ex definitivâ summi Pontificis sententiâ precedunt Monachos Benedictinos, utpote accidentaliter tantùm Clericos, & Ordine Juniores: atquæ Canonici Regulares Germania, Hispania &c. sunt ejusdem specie Ordinis, ac Clericatûs cum Lateranensibus, ergo etiam Canonici Regulares Germania &c. precedunt quoscunque Monachos ob paritatem rationis.*

Syllogismi hujus singulas propositiones pluribus deinde prosequitur; sed quia eversò semel fundamentò *Majoris*, spontè corruunt cætera, eadem ut inuilia adducere superse-
deo.

Paulò inferiùs deinde: *Vel breviorè (inquit)*

viâ : Crucelingsibus ob Antiquitatem Ordinis (ut patet ex Diplomate) adjudicata est precedentia ; atqui Canonici Regulares S. Augustini sunt ejusdem speciei (videretur enim à doctis & indoctis, qui diceret Canonicos Regulares Wettenhusanos, Waldseenses, Wengenses, & alia Crucelingsibus vicina Canoniorum Collegia esse diversi Ordinis (ergo &c.)

Confirmat denique sic: *Sacra Congregatio Cardinalium Anno 1593. die 30. Aug. declaravit, ut ratione precedentie ubivis terrarum observetur, quod Romæ est in usu, ut in refert Alviset n. 3. sed Romæ precedunt Lateranenses, ergo in toto mundo precedere debent. Hactenus ille.*

N. II.

Refutantur Argumenta hactenus allata.

Istæ (ut ab Adversario nuncupantur) demonstrationes plus apparentiæ, quàm soliditatis habent : cum ipsò Antiquitatis, quò nituntur, fundamentò destituantur ; & Clericatus ijs, quos Adversarius impugnat, per se æquè, ac Canonicis Regularibus competat.

Respondeo igitur ad primum syllogismum ex suprà dictis, distinguendo Majorem : Et ista sententia (si tamen strictè talis fuit) definitiva lata fuit, cum accurata, exacta, & plena utriusque suppositi tam Antiquitatis, quàm Cleri-

Clericatus cognitio nondum haberetur, & consequenter utriusque puncti disquisitio non esset omni ex parte fundamentalis; Concedo: fecus; Nego.

Quoniam enim in quaestione *facti* fides erat penes referentium, & inter se controvertentium personas, ac peritiam: res verò historica tum temporis multiplici adhuc caligine involvebatur, & plurimis, quos in alijs etiam materijs passim irrepsisse erudita Posteritas deprehendit, errorum offendiculis esset obnoxia: mirum non est, ex *erronea* informatione, quam pro *fundamento* & Regula Judices habent, ejusmodi sententiam emanasse. Hodie verò, cum tantam Historiæ lucem acceperint per multiplicem solertiam, dexteritatēque hominum eruditorum, *existimata antiquitas* sustineri non potest.

Quin (juxta Mabillonium) *credibile magis est*, quòd, si negotium Canonorum Regularium Lateranensium hodie deberet decidi, *relinquerentur Benedictini in sua possessione*.

Lateranenses potissimum tunc temporis prævaluerunt ex eo, quòd probasse viderentur suam *Antiquitatem*, & descendenciam per Gelasium I. à S. Augustino; in quo tamen manifestè errasse illos, jam suprà ostendimus.

Id ut luculentius adhuc intelligas, observa circa hoc cum citato Mabillonio: quòd Cardinalis Cicada (qui inter delegatos hujus causæ Judices fuerat) invenerit antiquitatem hanc *dubiam*: Pius autem V. per aliam Bal-

iam prioris à Pio IV. datæ defectus suppleverit, qui non timebantur modò, sed palpabiliter satis notabantur. Igitur Bulla illa Lateranensium plus ex *privilegiò*, & finiendæ litis ergò, quàm ex causæ meritis, & *Antiquitatis* &c. legitimò modò probata, titulò emanavit: quod enim *ex rei naturâ*, seu *debitò*, vel *jure ipso* subsistit, nullò indiget *privilegiò*, aut Bullâ; nec ullis obnoxium est defectibus, qui *suppleri* posthac debeant.

Unde non lepidè respondebat (ùt Adversarius exprobrat) *nec in meridie cecutiebat Caramuel*, quando ita distinxit majorem: *Lateranensibus adjudicata est præcedentia ex privilegiò*, Con: *ex natura rei*, seu *debito*, vel *jure*, neg: Quod enim, ùt dixi, *ex natura rei* debetur, debetur nullatenus ex Bullâ, *defectuum suppletivâ*.

Replicat Adversarius: Cui tribuitur præcedentia ob rationem *Antiquitatis*, & *majoris dignitatis*, illi non tribuitur ex *gratia*, sed ex *jure*; cum nulli magis debeatur honor, quàm qui est dignior & senior; atqui &c.

Respondeo: si antiquitas & dignitas illa sit vera, & non *existimata* duntaxat, concedo; secus, nego. Ubi Judices ipsi hæsitârunt, nec rei Historicæ debita suberat evolutio, latæque sententiæ Bulla alterius Autoritate fulciri debuit, quis credat, *veram* intervenisse *vetustatem*, legitimúmque probationis, examinis, & judicij rigorem?

Jam quod *Clericatus* allegati titulum at-
tine-

etinebat, debuerant Casinenses eundem vindicare sibi, ut jure, ac per se competentem, tanquam non simplicibus Monachis, sed Monachis Benedictinis, in Clericatu natis, & ad eundem in virtute ac vi Regulae destinatis; quod in prima parte efficaciter, luculenter, & ad ipsum adeò oculum demonstravimus, ut, si res in judicium hodie traheretur, quivis causae Arbiter, unicum Veritatis, & nullum cujuscunque Partis studium professus, in nostrum haud dubiè favorem pronuntiaturus esset.

Neque verò per ventilatam hactenus sententiam Pij IV. (ut perperam intulit Adversarius) Religionis ad Religionem, sed Congregationis duntaxat ad Congregationem comparatio est facta.

Interim persæpè rationes & Jura universalis per rationes & jura particularia, quæ locorum consuetudinum, & possessionum titulis ultimò roborantur, tolli solent, prorsusque enervari; quia ingens aliàs rerum chaos, & inextricabilis Jurium tam diversorum confusio lequeretur, ex quibus omnibus perpetua litigiorum semina, non sinè multiplici Reipublicæ Christianæ in vario genere damnò ac ruinâ, nascerentur.

Accedit huc, quòd Canonici Regulares Bononienses etiam post latam illam pro Lateranensibus sententiam, & dum Romæ in ipsius conspectu Pontificis versantur, præcedentiam Benedictinis surripere nunquam hactenus tentaverint, cum efficaci utique documen-

tò ad solos Lateranenses obtentum illud qualicumque demum titulò privilegium pertinere.

Nec solvit argumentum Adversarius, quando propter diversitatem *habitus* &c. contendit, *diversam* quoque ipsorum Canonico-
rum (Lateranensium scilicet, & Bononien-
sium) *speciem* esse; hæc namque ratio si tenet, legitimè infero: ergo Lateranenses, qui ante tempora Leonis X. existerant, *specie* differunt ab ijs, qui deinceps extiterunt: ergo *hujus speciei* Lateranenses, qui nunc dantur, non nisi à ducentis ferè annis sua duxere initia; quia superioribus temporibus alium gessere *habitum* Canonici, & istum, quem modò gestant, non nisi ante ducentos annos susceperunt, deposito habitu priori: Cappam scilicet nigram portare olim supra superpelliceum consueverant, cum caputio in capite, loco pileoli quadrati: ut Tamburinus docet, locò sæpiùs citatò.

Verùm, cum iter Romanum Adversario longius videretur, breviorẽ inijt viam ad obtinendum scopum, atque ex *Creizlingensium* causâ contra *Peterhusianos* vi publici decreti triumphante, idem præcedentiæ jus etiam cæteris Germaniæ Canonicis Regularibus ob ejusdem *speciei* fundamentum attribuit.

Compendiosam profectò, & fortunatam inijisset viam, si comitem quoque habuisset Veritatem, & Bullam illam Pontificiam exhibere requirenti potuisset.

Redarguit quidem Caramuelem, modeste se excusantem, quòd non viderit Acta litis
illius

illius inter Abbates de Creüzlingen & Petri-domo: ablegatque eundem ad Pennotum, diversa Bullaria, & Acta Concilij Constantiensis.

Ego verò (ut ingenuè profitear) volvi, & revolvi tam Bullaria Cherubini, Ferdinandi Ughelli, Stephani Quarantæ &c. quàm Acta Concilij Constantiensis, & ea præsertim, quæ novissimè 1697. ex diversis totius Europæ Bibliothecis accuratissimè collegit Hermannus von der Hardt Serenis. Ducis Brunsvic. ac Luneburg. à litteris, & in Academ. Julia Ling. Orient. Professor, nec tamen ullam reperi Bullam, Creüzlingensibus datam vel à Concilio Constantensi, vel ab Innocentio VIII.

Pennotum quòd spectat, non est, cur partium studioso credam, etsi talem fortè alleget; ostendam enim, illam ipsam Bullam *sub- & obreptionis* vicio ex pluribus indicijs obnoxiam esse.

Si quam Creüzlingenses habent, exhibeant, subjiciantque legitimo examini; an valida sit, paulò pòst patebit: &c. De qua tamen ipsà seq. tit. fusiùs.

Confirmationem denique ex Alviseto adductam paucissimis expeditus: extendit Adversarius verba Pontificis ultra vim significandi; loquitur ibi Pontifex de Ordinibus *mendicantibus*, inter hos autem quis hætenus numeravit *Nostros*?



N. III.

Statuitur nostra Sententia, & Benedictinis Præcedentiæ Jus asseritur primò titulò Possessionis &c; quem efficacissimum esse, ostenditur.

Postquam deteximus fallibilitatem, infirmitatēque titularum, quibûs Jus Præcedentiæ Canonici Regularibus vindicare Adversarius voluit; examinemus nunc, quæ nostra circa propositam quæstionem sit sententia? &, annon solidiores Benedictini, ac quosnam in specie titulos habeant?

Dico igitur, & concludo: Benedictini Monachi præcedunt Canonicos Regulares multiplici ex titulò, præcipuè tamen *Possessionis*.

Potentissimum longè titulum à *Possessione*, & *Consuetudine*, atque emergente ex his *Prescriptione* nasci, in confesso est: Hanc verò ubique ferè locorum Benedictinos per tot sæcula, & omni hætenus tempore obtinuisse, & obtinere etiamnum, inferiùs n. 9. docebimus, ubi de Præcedentiæ hujus malè ab Adversario allegatâ *praxi* agemus, & luculenter demonstrabimus, in tota ferè Italia, Gallia, & omnibus totius Germaniæ Provincijs, Suevia, Helvetia, Austria, Bavaria, Tyroli, Styria &c. Benedictinos titulò *Possessionis* ante Canonicos Regulares in puncto Præcedentiæ gaudere.

Hujus

Hujus sanè tituli (Possessionis) tantus est valor, vis tanta, & authoritas tam efficax, ut & specialibus in Jure capitulis insigniatur, & vix ullus sit alius, qui vel ab utriusque Juris Interpretibus fusiùs, accuratiùsque tractetur, vel à Tribunalibus sanctiùs, exactiùsve observetur, (quando in dubijs plerumque ultimatò ad eundem recurritur) & hinc, ex tritò Juristarum, Reg. 55. Iur. in 6. potior ac melior, tutiòrque sit semper, & victoriæ propinquior conditio possidentis; quem ut adversa Pars inde deturbet, multò nisu, & rationibus omnino fortioribus opus est: nec sufficiunt in praxi, & coram prudente Judice metaphysicationes inutiles, plus imaginationis, quàm realitatis habentes; quales tamen usque & usque Adversarij obtrudunt, dum subtili valde inanitate Clericatum sibi per se, nobis verò per accidens tantùm convenire dictitant.

A Possessionis jam titulò (quem, ut dixi, infra, ubi de Præcedentiæ praxi agemus, demonstrabimus) progredimur ad alios insuper titulos; quos inter proximè veneranda occurrit Antiquitas, ubique semper & ab omnibus in pretio habita.

N. IV.

Benedictinis Ius Præcedentiæ titulò Antiquitatis competit.

S Ecundum fundat titulum *Antiquitas*, quâ nobis suffragante (ut suprâ docuimus)
aliquor

aliquot planè sæculis Regularium Canonicorum ætatem (si præsertim computum faciamus à tempore apud Authores Classicos receptò) manifestè superamus.

Ex ipsâ igitur Adversarij mente, licèt invitâ , præcedentiæ nobis Jus debetur, utpote *Antiquitatis* titulò gaudentibus; vel non subsistit Adversarij *Major propositio*, in quâ dixerat, & supposuerat, *antiquiorem Religionem juniori* meritò, & indubiè in congressu præferri.

Neque alteram dein' Caput (nempe *Clericatus*) deest nobis; jam sæpissimè enim, & ad nauseam usque inculcavimus argumenta in hanc rem superiùs posita, quibus, *Clericatum* Religioni Benedictinæ per se competere, solide non minùs, quàm manifestè vindicavimus.

N. V.

Id ipsum Ius fundat Nomen Abbatis.

Tertium generat titulum ipsius *Nominis*, Dignitatisque *Abbatialis* conditio, cujus tanta Majoribus nostris reverentia, æstimationeque fuit, ut Abbates illi, nondum licèt *Insulâ*, *Pedòque* insigniti, in Concilijs tam Generalibus, quàm Provincialibus & *Vocem deliberativam* haberent, & immediatè post Episcopos suò ipsi nomine, & Episcoporum etiam sæpè locò subscriberent.

In rem

In rem verò nostram apprimè deservit, quòd in Concilio III. Constantinopolitano, adversus Monotelitas congregato, Patriarcharum vices in subscribendo plures Monachi suppleverint: & admirandum prorsus est, Abbatumque Dignitati summum afferens splendorem, quòd in Niceno II. Concilio ipsius adeò Summi Pontificis locum tenuerit Petrus Monachus & Abbas, eique Concilio præsederit;

Et quantum denique hæc etiam ætate pretium titulo sit, Nominique *Abbatis*, hand obscurè insinuant ipsi è *Nostris* Sacri Romani Imperij Principes; qui in celsissimo ejusmodi fastigio constituti, Nomen tamen *Abbatum* constantissimè retinent.

Et quamvis *Abbatis* nomen Superiores quidam Canoniorum Regularium hæc demum ætate sibi etiam arrogant; eis tamen vi *sue Regule* nullatenus, adeoque *per accidens* duntaxat competit.

N. VI.

Benedictinis Academia, &

Doctores &c. suffragantur.

Quartum denique conciliat titulum *Academiarum & Doctorum* pro nobis stantium, sentientiumque venerabilis Auctoritas, quam oportet in pretio habeat nolens

lens Adversarius, si meminerit & juramenti, quod in susceptione Gradus depoluit, & tituli, quem exinde comparavit.

Juris Benedictini circa præcedentiam valorem, æquitatémque agnoverunt celeberrimæ in Italia Universitates Bononiensis, Patavina, Ferrariensis; quæ, cum earum mens, Judicium atque Sententia in controversia Lateranensium & Casinensium requireretur, gravissimè, sapientissimèque in Nostrorum favorem, & pro Casinensibus definiverunt.

Agnovit idipsum Cassanæus in *Catal. de glor. Mundi* p. 4. consid. 54. affirmans, quod Ordo S. Benedicti præcedat omnes alios, etiam Canoniorum Regularium: & hanc esse opinionem omnium Doctorum, Canonistarum, & Scribentium.

Agnovit Renatus Chopinus omni, sicut & Cassanæus, suspicionis notâ carens Author, qui etiam post decisionem causæ Lateranensis in eandem cum Cassanæo sententiam scripsit, ixitque.

Agnovit Tiberius Decianus Jurisconsultus celeberrimus volum. 9. Respons. 50. n. 37. ita loquens: Postremò temeraria profectò videtur esse contentio ista ex parte Canoniorum Regularium (absit audacia verbo) cum sciant communem opinionem contra ipsos & pro Monachis stare. Esto enim, quod nullus textus sit clarus, qui hanc difficultatem in individuo decidat, quamquam ex ordine litteræ satis id probavi suprâ, & in Consilio deductum fuit; standum tamen est.

est communi opinioni Doctorum, de hac ipsa questione loquentium. Ubi enim lex deficit, Doctorum Authoritas sequenda est. l. si idem de eod. ff. de jurisdict. omn. Judicum.

Differentem ita pro nobis Decianum Concupista Creüzlingensem, ante triginta fere annos in suo ad Nostra Responso, *Benedictina Culina Adulatorem* vocare non erubescit, forsitan ipse tunc è *culina* redux, dum fuliginosam ejusmodi calumniam in chartam conjiceret. Decianus discurrendi methodum tenet, quam per innumeras materias Juristæ observant, & (quia non omnia in Jure expressa sunt) observare debent.

Discere magis oportuisset hunc Concupistam, & omnes communium opinionum contemptores, quæ Reverentia, quæ Authoritas, quæ fides sit tribuenda sententiæ, quæ communi Doctorum suffragiò fulcitur.

Veritatem quidem, ait, *potiorem esse opinione communi.*

Sed ubi Illa (*Veritas*) manifesta non est, ex Istâ sanè (*communi opinione*) & non aliunde erui poterit.

Addit insuper Leguleius ille Creüzlingensis, locutum fuisse sinè fundamentò, & lege Decianum, cum tamen expressam pro se adducat legem *si idem de eod. &c.* Ex quâ dilucidè omnino comprobatur, *deficiente lege, Doctorum Authoritatem sequendam esse.*

Agnovit denique (ut plures alios præteream) hoc Benedictinorum Jus Ferdinandus VVeizeneggerus, Juris utriusque Doctor, Serenissimi Bavariæ Ducis Maximiliani &c. Consiliarius, in celeberrimâ & Catholicâ Ingolsta-
diensi Academiâ Professor Juris Ordina-
rius &c. qui in *Affertionibus Iuris Canonici de Personis, Rebus &c.* Anno Salutis MDCXVIII. editis, fol. 17. in rem nostram ita loquitur:
Sunt autem & inter ipsos Ordines sæpenumerò motæ quæstiones circa præminentiam. Dum videlicet alij antiquitate temporis, alij perfectione sui Instituti, nonnulli numerò eorum, qui suam profitentur Religionem, aut testimonijs Principum & Magnatum publicis nituntur. Illud constat, Ordinem S. Benedicti circa Annum Domini DXX. fuisse institutum, aliisque etiam Canonicis Regularibus præferendum.

N. VII.

*Adversarij malè allegatâ circa
Præcedentiam Praxis refellitur, &
Benedictinorum Possessio
demonstratur.*

AD Praxin denique procedit Adversarius, & f. 147. ita loquitur: In Suevia & Ty-
roli nullus Præpositus infulatus vitium ce-
det Abbati Monacho Infulato, nisi forsitan in
aliqua civitate, ubi indiscriminatim nonnun-
quam

quam attenditur prioritas receptionis in civitatem. In Bavaria præcedit ille, qui antiquior est in Dignitate Prælatitia; in Austria præcedit, cujus Collegium, vel Monasterium est antiquius, prout Reverendiss. D. Prælatus Canonorum Regularium Claustro-Neoburgi in Austria omnes Abbates Benedictinos, aliosque, nemine contradicente, præcedit. Idipsum observatur in Styria, Carinthia, & alijs locis &c. ergo quid ex praxi somniveris, (loquitur suo Antagonistæ) non assequor. Dixi viritum; nam quid in publicis conventibus fiat, est in præsentem per accidens; quia ibi præcedit ille, qui prius ad talem conventum est admissus, cujuscunque demum sit Ordinis, & Instituti. Hactenus Adversarius.

Quoniam non latuit Adversarium, manifestiorem, & decantatiorem esse Nostrorum in publicis Conventibus præcedentiam, quam ut in dubium vocari ullatenus possit, hinc effugium quærens, alterum negat, & asserit, viritum saltem Canonicos Regulares præcedere. Condoleo, me hercle! infelicis Adversarij præcipitanti audaciæ, quam obstupescere satis non possum; quis enim capiat, aut credat, posse ab homine Religioso negari ea in publicis etiam typis, quæ typis ipsis vulgatiores sunt.

Quo congressu, quo tempore, quove loco Suevia nostra vidit unquam, Canonorum Regularium Prælati aliquem è Nostriis Abbatem viritum cedere, nisi etiam in Collegio Imperiali jure receptionis anteferatur?

An Salemitanus in Sueviæ Circulo *primus* inter Abbates, VVetrenhusano omnium *pestremo* etiam extra Circuli conventum celsit *unquam*, aut posthac *cedet*?

VVeingartensis certè in Electionibus, Exequijs &c. (ad quas ordinariè vocari, ac invitari solet) Celsissimi Ordinarij Constantiensis honoratiorem dari locum Creüzlingano nunquam permisit usque huc, nec deinceps permittet.

Ottoburanus, & Elchingensis &c. Anno 1698. 13. Octob. Augustæ Vindel. in Imperiali Monasterio ad Ss. Udalricum & Afram, dum solennis Translatio Corporum, Ss. VVierpi, Thosonis &c. fieret, Abbatibus Canoniorum Regularium ad S. Crucem, & S. Georgium ubique præpositi sunt, nec in simili occasione postponi se imposterum sustinebunt.

Hæc ignorat Adversarius, in Suevia tamdiu moratus? At, si scivit, & sciens scripsit illa, quid concludemus?

At accuratiorem forsan informationem habuerit Adversarius quoad Provincias Styriæ, Carinthiæ & Austriæ? in quarum ultimâ (ut refert ipse) Reverendiss. DD. Prælatus Canoniorum Regularium Claustro-Neoburgi omnes Abbates Benedictinos, aliósque omnes, nemine contradicente, præcedit.

Communicavi hæc cum viris gravibus,
con-

consuetudinumque in Provinciis illis vigentium admodum gnaris, qui vehementer exarserunt, & oretenus, scriptoque ex toto contrarium asseverarunt, attributis Adversario epithetis, quibus nolim importunè vel ejus, vel alienas aures gravare.

Ad eandem pertinet farinam, quæ retulit de Tyroli, cum litteræ abs Admodum R. & Clariss. P. Eugenio Speth professo Salemitano, Ss. Theologiæ Doct. ac Notario Apostolico &c. (qui in ea Provincia longo tempore moratus, morum omnium, ac consuetudinum oculatissimus fuit observator) acceptæ longè diversa perscribant.

Bavariæ morem, si talis sit, eximie commendando; hoc quippe mediò emergentium aliàs litigiorum faces feliciter extinguuntur. Illud tamen adverto, quòd Concipista Actorum Creüzlingensium contrarium absolute testetur; consequenter alteruter erraverit.

Hæc de *praxi* Germaniæ; quæ alibi, in Gallia præsertim & Belgio, fit, audiendus est Mabillonius, qui de ea ita scribit.

Aio, Ecclesiam, cui Jus ejusmodi quaestiones præcedentiæ decidendi competit, primò esse Romanam, quæ Benedictinis præcedentiam contra alias Congregationes, si Lateranensem excipias, intemeratam voluit; aio dein' nomine Ecclesiæ intelligi omnes Ecclesias particulares, nempe Galliæ, Angliæ, Flandriæ,

driæ, Germaniæ, Hispaniarum &c. quæ ut plurimum eò honorariò Jure Ordinem S. Benedicti condecorârunt ex legitimis causis, quarum momenta expendere Operis ratio non admittit.

Et ut de sola Gallia loquamur, nulla fermè est civitas paulò nobilior, in qua concurrentibus utriusque Ordinis Aſſeclis, Benedictini non primas Antiquitatis ferant; Eò Jure gaudent præcipuè Rhemis, Sueſſione, Cabillone, Belluaci, Noviomis, Atrebatibus, Turonis, Audomaropoli &c.

Non ſolùm *Conſuetudo* adhuc viva fidem facit, ſed etiam antiqua diſpoſitio in antiquis picturis expreſſa, quæ ordinem conſeſſus ſuffragia in Conventu Provinciarum ferentium exhibet. Ea effigies æri inciſa occurrit in primo tomo Metropolis Rhemenſis f. 81., ubi cernuntur duo Abbates Ordinis S. Benedicti ſedentes ad lævam, & Abbas Canonico-
rum Regularium tertium locum occupans. Expreſſa eſt ea figura ex MS. Guidonis de Roye Archi-epiſcopi ſæculò XIII. Eòdem præcedentiæ gradu gaudent adhuc Benedictini Rhotomagi, Bituriciſ, Andegavi, Cenomanni, Meldis, Carnoti, Claromontij, Antiſiodori, Auſtoduni, Cadomi, Bajocæ &c. Ex-
cipiunt Canonici Regulares Pariſios contra uſum conſignatum in epiſtola Æneæ Epſcopi Urbis, & contra Ceremoniale Gallicum, quod in exequijs Regijs Monachis S. Germani de Pratis

Pratis primum locum decernit. Ex libro, cui titulus *Neustria pia*, discimus, in publica supplicatione Rhotomagi Anno 1542. instituta Benedictinos Abbatiae S. Audoëni, S. Catharinae, quin & Prioratum Bone-nouvelle praecessisse Canonicos Regulares S. Lautonis, & S. Magdalenae, & immediatè ante Canonicos Cathedralis Ecclesiae, supplicationis Authores, incessisse.

Quoniam Canonici Regulares magnum intercedere discrimen alunt inter Conventus Urbium, & Statuum, juvat docere, Benedictinos etiam in publicis Statuum Conventibus eodem Jure gaudere, quò in privatis Urbium confessibus. In Statibus Artesiae Abbates S. Vedasti, S. Bertini, Anchini, & d'Auchelles Moines Canonicos Regulares S. Eligij praecedunt. In Statibus du Tocernensis Abbas S. Amandi praecunctis primas obtinet. In Castellania Insulae Franciae Abbas Marchiennensis primum occupat locum, alterum Abbas Lozensis Ordinis Cisterciensium; hunc quidem exturbare conatus est Abbas Cisoini Ordinis S. Augustini, sed decretò anno 1661. Bruxellis datò Lozensi Abbati possessio confirmata est, etsi hunc antiquitate Abbas Cisoini vincat. In Statibus Brabantiae primum ab Episcopis locum vendicat Abbas Afflighemiensis nostri Ordinis, quem sequitur Abbas Ullerbekensis ejusdem Ordinis. Abbas S. Petri Gandavi ex parte Flandriae omnium primus est. Denique S.

Gisleni est Præses natus in Statibus Hannoniæ, alter locus patet Abbati Marolensi nostri Ordinis. Silentio transmittimus illustres Abbacias Germaniæ & Helvetiæ, Fuldam, Campidonam, Corbeiam, Augustanam, Ratisbonensem, Salzburgensem, Trevirensensem, Coloniensem, Leodiensem, S. Galli, Einsidlensem &c. &c. quæ iisdem privilegijs in Conventu Imperij, aut suarum Provinciarum consensibus gaudent. Quare non solum Benedictinorum Monachorum in Concilijs ante Canonicos Regulares, sed etiam *Regula Benedictina* ante *Regulam S. Augustini* semper mentio facta est, quemadmodum in primo scripto Benedictino demonstratum est; cui succenturiari potest Concilium Mediolani Anno 1287. celebratum, in quo statutum fuit, ut Abbates, Monachi, cæterique Religiosi vitam suam adtemperarent ad Regulas S. Benedicti, & S. Augustini: *Ut Abbates, & Monachi, & reliqui omnes Religiosi ex formula S. Benedicti, & S. Augustini viverent.* Bzovius Anno 1287. n. 2.

Quæ cum ita sint, mirari lubet, quod Canonici Regulares jactent, se præcedentiâ gaudere in omnibus *Conventibus Civilibus, & Ecclesiasticis*, audeantque tanquam rem certissimam venditare non solum in Scriptis suis, sed etiam in libello supplici Regi tradito; quin tanquam rem monstro similem traducere justam Benedictinorum defensionem &c.

Ita de *praxi & consuetudine* aliorum locorum Mabillonius.

Ex quibus evidenter nunquid & dilucidè demonstratam cernis Benedictinorum *Possessionem*?

Et hæc omnia novissimè confirmat Reverendissimus & eruditissimus DD. Nicolaus Bouxhon Abbas Benedictinus ad S. Jacobum, & Examiner Synodalis Leodij, in ad me datis 12. Junij 1701. perhibens: *Leodij absque ulla contentione Canonicos Regulares cedere in omnibus ipsis Benedictinis*; additque Vir iste doctissimus, *loci consuetudinem in hoc puncto servandam esse potius, quàm aliquid juris statui posse.*

Cujus etiam mentis jam dudum extitit (cum Barbosa) Clarissimus P. Ludovicus Engel noster *lib. 1. tit. 33. §. 6. n. 62. &c. de Abbatibus, Prepositis, & Decanis &c.*

Id, quod èt ego cum omnibus bonis, pacisque amantibus senserim; nec unquam probaverim inutiles eorum conatus, quibus religiosæ pacis & vicinitatis amicæ ratione postpositâ, volupe est per integra volumina, ad abolendam locorum *consuetudinem, possessionemque* aliorum turbandam, reliquos cum insigni quietis publicæ damnò noxiè, mordaciterque provocare, & animare, quos inter Coriphæum agit, canitque classicum Adversarius noster.

Ut enim cum Mabillonio demum finiam, diversæ sunt de præcedentiâ Rationes, prout comparantur ad diversas Provincias & Civitates. Aliquando enim attendi solet Antiquitas

Corporum; subinde solùm consideratur Antiquitas receptionis in Provinciam, vel in Societatem; quandoque attenditur dignitas Ecclesiarum, vel situs earum in Urbibus, & Metropoli Provinciarum; aliquando considerantur Patroni Regionum, quorum Corpora in loco aliquo asservantur: Denique ad servitia præstita Provincijs, quæ in gratitudinem præcedentiam contulerunt, non obstantibus rationibus generalibus, minùs faventibus.

Præter exemplum à Mabillonio ex Ven. Beda desumptum, constat id de Monasterio ad S. Petrum Salisburgi; quod postquam Juri eligendi Archi-episcopum ultrò cecidit, præcedentiam nihilominus ante omnes Canonicos Sæculares per plura Sæcula constanter retinuit in testimonium, quòd Sedes Archi-episcopalis suam Originem ab ipso trahat.

Etsi igitur rationes generales pro Canonicis Regularibus militarent (quod tamen quàm non fiat, manifestè hætenùs demonstravimus) particulares tamen obistere, & prævalere possunt: *Sicuti enim lex particularis, cum est legitimè firmata, derogat Iuri communi;* sic rationes particulares circa præcedentiam debent prævalere rationibus generalibus, maximè tunc, quando innituntur *Possessioni*. De quâ demum quid sentiat Adversarius, modò percipiamus.

N. VIII.

Adversarij circa Possessionem objecta diluuntur.

PRæbeamus nunc aures iterum Adversario, & , quid de Nostrorum circa præcedentiam continuatâ hætenus possessione, præscriptione, & consuetudine sentiat; audiamus.

Fol. 81. contestatur, particularem unius, vel alterius civitatis consuetudinem, nullô legitimo processu acquisitam, sed vel Canoniceorum negligentia, vel Monachorum violentia extortam, nihil se morari &c.

Et paulò post: *quid (exclamat) consuetudo, præscriptio, possessio sit pro Monachis? pro ijs, qui coram omnibus Tribunalibus cecidere causâ?*

Scrutemur nunc omnium verborum sensum, & mirabimur præproperi calami deviationem.

Ait ille: *unius vel alterius civitatis &c.* Ne à veritate aberraret, omnium ferè civitatum dixisse debuerat, vel demonstrâsse potiores, ubi consuetudo illa non vigeret.

Ait rursus: *nullô legitimo processu acquisitam &c.* Quò igitur processu opus est Filio,
ut re-

ut relictis à Patre hereditarijs juribus, & opibus fruatur? aut quando ante Quadragesimam, vel quò die præviò instituunt processum Hispani, ut titulò possessionis & consuetudinis uti possint in Quadragesima, ac intestinis vesci? Aut ex quo apice Juris in Titulo de Consuetudine & Possessione insinuat, quòd ad ejusdem roborationem præviùs requiratur processus?

Ait deinde: *Sed vel Canonorum negligentia &c.* Quàm ingenuè, quàm reverenter, quàm modestè suos tractat Majores Adversarius! inter tot dormientes scilicet unus hic in nocte perpetua Castos vigilem agit, & ubi cæterorum lippiebant oculi, lincis ille præsefert aciem: nollem ego sedulus videri, si reliquis, & Senioribus quidem per id Negligentia nota affricaretur.

Tulerunt priora etiam sæcula Viros, quibus tantum animi, ut auderent, & tantum doctrinæ fuerat, ut possent invadere, si suavisset æquitas.

Ait quartò: *vel Monachorum violentiam extortam &c.* Hic, nisi cum Religioso mihi quoque homini Religioso negotium foret, ex calumniæ meritò, & more sæculi agerem cum Adversario, & verba iterum resorbenda redderem. Onus probandi incumbit Adversario, aut ad palinodiam obligatur; vel demonstrandum ipsi erit, nunquam non committi violentiam, ubi

ubi quis contra iniquum Aggressorem se, suaque viribus, modisque omnibus tueretur.

Si qui Nostrum Canonicis Regularibus in propugnando Præcedentiæ Jure restiterunt, violentiam non intulerunt, sed repulerunt, quia sua defendebant Jura.

Ait denique: nihil se morari.

Undenam quæso novus hic respondendi modus? Ergo non curandi sunt, sed flocci habendi possessionum, consuetudinum, & præscriptionum tituli, alias semper, & in omni foro efficacissimi? Ergo contemnendæ, quæ solvi nequeunt, objectiones? Ergo argumenta, quarum vis non elidi potest, risu explodenda?

Quod tribunalia ibidem allegata attinet: quæro ex Adversario, quænam sint illa?

Respondet, quidem ipse, esse superius enumerata f. 75. *Commentarij sui*; & enumerari etiam à Tamburino nostro to. 1. de *Jur. Abb. D. 25. q. 1.*

At de his nullibi quidquam Tamburinus, nec ullius victoriæ mentionem facit idem, nisi ejus, quam de Casinensibus Lateranenses reportarant. Innuit quidem aliquid de controversia Petrusianorum, & Creüzlingensium; sed cautè simul addit, nullam desuper emanasse Sententiam, sed (formalia ipsius appono) à Ioanne postea privato gratiam factam sine cognitione causæ, ad preces, & expositionem
unius

unius ex partibus, sub illa erronea narrativa &c. Cui (gratiæ) Benedictini Petrusiani nihilo- minus se opponebant. Quâ de Causâ ta- men peculiariter infrâ. Interea, si aliæ etiam victoriæ, quibus Adversarius ibi gloria- tur, sint tam illustres, luculentæ ac certæ, ut Creüzlingensis: nolim ego palmas inde com- paratas cum ipsis esse nobis communes.

Enimvero, si impunè Adversarius, & prudenter rejicit titulos *possessionis, consuetu- dinis, & præscriptionis* ubique Gentium, & universaliter alias receptos, cur nos moremur particularem tantùm, & in causa Congrega- tionum non nisi duarum (Casinensium & La- teranensium) decisionem? *mutilam præterea, & conditionatam?*

Mutilam dixi; quia post litem integrò sæculò agitatam, lucrum adhuc inter partes dividit; quando vi ejusdem decisionis Casi- nenses in Generalibus Concilijs &c. eodem contra Lateranenses præcedentiæ Jure gaudent, ubi gravior ætas Abbatem ornat.

Conditionatam dixi; quia hoc præceden- tiæ Jure sub eâ tantùm conditione fruuntur, si dimissâ superiori veste, palliô, seu cappâ, in linea veste (superpelliceo) incedentes cum qua- drato unum cum Clero Corpus efficiant: ut re- censet Mabillonius ex Tamburino. Sepositô autem vestitu hoc, & in alijs congressibus, mutantur illicò jura; quemadmodum ingruen- tibus subinde pluvijs cùm Canonici Lateranen- ses

ses pallijs, pileisque uterentur, in publica processione Casinenses præcedentiam occupâsse, & in facie populi Romani triumphâsse, ex certissima relatione compertum habeo.

Nec est, cur tam intempestivè glorietur Adversarius noster, quasi Benedictini coram omnibus hætenus tribunalibus in puncto præcedentiæ causâ ceciderint: quando novissimè Anno videlicet 1679. 14. Aprilis Monachi Casinenses contra ipsos etiam Cathedralis Ecclesiæ S. Germani Canonicos è Rotta Romana nobilissimam reportârunt palmam: ut decisio, quàm penes me habeo, inde emanata testatur. Quod ipsum in causa quoque Casinensium & Lateranensium futurum, si ad trutinam hodie denuo revocetur, persuasissimum habeo.

Verùm, quid pluribus in re per se dilucidâ opus? si ipsum adeò *Possessionis* titulum negare, aut contemnere Adversarius non erubescit, aliud quid sperandum, nisi mera undique omnium omnino Ordinum, ac Saturnum confusio?

Cui tollendæ utinam tantilla, quam impendi, opera modici quid saltem conferat! Utinam in aureum, quem intendi, pertingat scopum! Utinam ad Sanctissimi Patriarchæ nostri amplissimum honorem, & Benedictini Nominis, ac Religionis florentissimæ fecundissimam propaginem! Utinam in obsequium Reverentiæ Christi, PRINCIPIS GLORIÆ, SACERDOTIS secundum Ordinem Melchi-

chisedech, SCIENTIARUM Domini, & Lu-
cis omnem hominem ILLUMINANTIS, cujus
æterna Generatio NON HABET FINEM!
Utinam in debitum immortalis Gloriæ holo-
caustum Ss. & individue Trinitati! Cui CHA-
RUBIN & SERAPHIN incessabili voce procla-
mant SANCTUS, SANCTUS, SAN-
CTUS: Cui èt à nobis fit Benedi-
ctio, & Claritas, & Sapien-
tia, & Gratiarum
Actio: &c.





Egger, Felix,

Idea ordinis Hierarchico-Benedictini

Friburgum Brisgovia 1715

H.mon. 144

urn:nbn:de:bvb:12-bsb10029727-6

VD18 14447053-001